

«ЖАҲОН АДАБИЁТИ» КУТУБХОНАСИ

Александ^р Сергееви^ч
Пушкин

*СУВ
ПАРИСИ*



ТОШКЕНТ – «O'ZBEKISTON» – 2013

УДК: 821.161.1(092) Пушкин
ББК 84(2Рос=Рус)1
П 96

Тузувчи ва нашр га тайёрловорчи

Анвар Шер

ISBN 978-9943-01-815-0

© «O'ZBEKISTON» НМИУ, 2013

РУС АДАБИЁТИНИНГ ҚҮЁШИ

Рус халқининг улуг шоири, янги рус адабиётиниң асосчиси Александр Сергеевич Пушкин (1799–1837) ижоди рус ва умуман, жаҳон адабиёти тараққиётiga жуда катта таъсир кўрсатди. Зоро, Ер юзида Пушкин номини эшитмаган инсон бўлмаса керак. Шеърият мухлиси борки, унинг исмини билади. Пушкин мағрур куйлаган эрк ва ҳақиқат ғояларининг ҳаётбахшлиги, шеърий даҳосининг қудрати билан башарият шоирига айланди. Улуг мунаққид В.Г. Белинский: «Ҳар қандай шеърият ҳаётни ифода этмоғи лозим... Лекин ҳаётнинг ифодаси бўлмоқ учун шеърият, даставвал шеърият бўлмоғи керак» дея таъкидлаган эди. Пушкин рус бадиий адабиётиниң шеърият ҳамда сўз санъати борасидаги ўзига хос хусусиятларни тамоман тараққий эттириди ва бу билан уни катта бир маърифий кучга айлантириди. Бундан ташқари, ўзига қадар бўлган рус адабиётиниң бутун тарихий тараққиёт йўли тақозо этган «хурфикрлиликка, халқчилликка», «қуруқ тумтароқликни тарқ этиб... табиий бир ҳолга келишга» бўлган асрий интилишларни амалга ошириб, рус бадиий услубини яратди. Улуг шоир анча қисқа, лекин ниҳоятда сермазмун ва шиддатли ҳаёт кечирди. У икки ўн йилликдан сал ортиқ фурсат орасида «воқелик шоири» бўлиб камолга етди, бироқ ана шу қисқа вақт ичидаги унинг ижоди мисли кўрилмаган шиддат билан ривож топди. Агар шоирнинг ана шу йиллар давомидаги ижодини чамалаб, ақл тарозисида тортиб кўрсангиз, худди ер кавлаб туриб хазинага дуч келган дехқондек ҳайратга тушасиз.

Пушкин адабий меросининг мазмун-моҳияти ва бадиий услубининг одатдан ташқари ранг-баранглиги кишини ҳайратга солмай иложи йўқ. Рус ёзувчиларининг кўпчилиги, нафакат рус мумтоз ёзувчилари, балки бошка ижодкорлар ҳам сўз санъатининг асосан бирон бир соҳасида қалам тебратганлар. Уларнинг орасида буюк шоирлар, носирлар, улуг драматурглар бор эди. «Евгений Онегин», «Қора хотин», «Капитан қизи», «Борис Годунов» ва кичик трагедияларнинг муаллифи эса бир неча йўлдан борди, поэтик қуролнинг барча турларидан фойдаланди

– шеъриятда ҳам, насрда ҳам, драматургияда ҳам асос қилишга арзигулик намуналарни яратса олди.

1823 йилда Пушкин ўзининг оламшумул шеърий романи «Евгений Онегин»ни ёзишга киришади. У бу асар устида саккиз йилдан ортиқ вакт давомида қаттиқ ва қатъий тартиб билан ишлайди. Романинг биринчи бобидаёқ улуғ инглиз шоири Жорж Байрон билан очик мунозарага киришиб, воқеликни типиклаштиришнинг янги амалий нуқтаи назарини илгари суради. «Байрон дунёга ва кишилик табиатига бирёклама назар ташлади, – дейди бирмунча кейинроқ А.С. Пушкин. – Сўнгра улардан воз кечиб, ўзи билан ўзи бўлиб қолади. У бизга ўзининг кўланкасини гавдалантиради».

Пушкин «Евгений Онегин» романининг қаҳрамони орқали ўзининг кўланкасини гавдалантиромайди, балки романнинг илк бобидаёқ ўзига «замондош киши»нинг – анча қобилиятли, ақли расо, зиёли, аммо заминдан ажралиб қолган, халқдан мутлако йироқ, теварак атрофдагилардан эмас, балки ўз-ўзидан азобланадиган, ҳеч нарсага яроқсиз, ҳеч нарсага арзимайдиган «ортинч» одамнинг – ёш зодагоннинг жуда ҳам характеристерли образини яратади.

«Евгений Онегин» адабиёт тарихида бутун бир даврни ташкил эта-диган нодир бадиий асарлардан бири бўлиб, у бадиий сўз санъатининг янада ривожланиши учун муҳим аҳамият касб этди. Шу билан бирга, «Евгений Онегин» мумтоз адабиёт нуқтаи назаридан олиб қаралганда, жаҳон адабиётининг Бальзак ва Стендалнинг романларидан олдин ёзилган биринчи чинакам асари ҳамdir.

«Евгений Онегин» Пушкиннинг ижодий тараққиётида ҳам марказий ўринни эгаллайди. «Шеърий роман» – шоир Пушкин билан носир Пушкин орасидаги, яъни «Руслан ва Людмила» ва «Кавказ асири»нинг муаллифи билан «Иван Белкин қиссалари» ҳамда «Капитан қизи»нинг муаллифи ўртасидаги кўприк эди.

Рус бадиий насрчилиги тараққиётида Пушкиннинг ўрни ниҳоятда буюқdir. Ижтимоий ҳаётни, инсоний муносабатларни имкон қадар аниқ ва ҳаққоний акс этиришни мақсад қилиб қўйган ёзувчи учун наср жанри – қисса, романлар янгидан-янги имкониятларни очади. Улар кенг китобхонлар доирасига тушунарли бўлиши жиҳатидан ҳам шеърдан кўра демократик, халқчил жанрdir. «Қисса ва романлар ҳамма томонидан ва ҳамма ерда севиб ўқилади», – деб таъкидлаган эди А.С. Пушкин. Дарҳақиқат, унга қадар рус бадиий насрчилиги ривожланиш жиҳатидан анча нимжон эди. «Насрчиликда шунчалик кам ижод қилинганки, – деб афсусланганди улуғ шоир. – Биз, ҳатто оддий

бир ёзишмада ҳам, энг содда фикрни тушунтириш учун ҳам янги сўз ибораларини тузишга мажбурмиз». У рус насрчилигини яратиш ҳакида ўзига замондош бир қатор ижодкорларга қайта-қайта мурожаат қилади. Шоирнинг ўзи жуда барвакт – «Евгений Онегин»нинг дастлабки боблари устида ишлаётган давридаёқ бадий наср йўлида ижод килишга, ўзи ҳазиломуз бир тарзда ёзганидек, «баланд охурдан тушиб, оддий наср» яратишга эхтиёж сезади.

1830 йилнинг кузида Болдинода жуда қаттиқ меҳнат қилиш натижасида яратилган «Иван Белкин қиссалари», унинг чинакам рус бадий насрини яратиш бобида ўз олдига қўйган вазифасини адо этди. Бу, Пушкиннинг насрый асар яратиш йўлидаги ўйларининг илк марта амалга ошуви эди.

«Иван Белкин қиссалари»ни Пушкин ўз исмини эълон қилмай, шартли муаллиф Иван Петрович Белкин номидан ҳикоя қилади. Ноширга ёзилган мактубда ва гўё, Белкиннинг ўз таржимаи ҳоли бўлган, «Горюхин қишлоғининг тарихи»га ёзилган сўз бошида ювошгина Белкиннинг образини адид мулоим ҳажв ва нозик киноя билан чизиб беради. «Иван Белкин қиссалари»да фавқулодда эҳтирослар ва камданкам учрайдиган қаҳрамонлар оламига зид ўлароқ, энг оддий кишилар ҳаётида содир бўлган воқеалар «саддалик» билан ҳикоя қилиб берилади. Ана шу «саддалик»да Пушкиннинг шунчалик чукур инсонпарварлик туйгуси, ўтқир зеҳни, мулоим кинояси ва ҳаётий ҳақиқати намоён бўлдики, унинг «Иван Белкин қиссалари» чинакам, санъаткорона бадий наср намунаси бўлиб қолди.

«Иван Белкин қиссалари»нинг энг салмоқлиси бўлган «Бекат назоратчиси»да Пушкин томонидан яратилган назоратчи образи алохида дикқатга сазовордир. У замонасининг шафқатсиз ва гайриинсоний тартиблари томонидан камситилган ва унуглигани инсон образидир. Рус адабиётида «кичкина одамлар» қиёфасини гавдалантиришга Пушкинга қадар ҳам уринишлар бўлган, бироқ адид бу ўринда илк бор чучмал инсонийлик ва қўпол табиийликдан қочиб, юксак, ҳаётий ҳамда бадий ҳаққониятга эриша олди. Рус адабиётининг кеининг ривожида «Бекат назоратчиси»нинг катта аҳамият касб этганига ҳам сабаб, аслида шудир.

«Иван Белкин қиссалари» билан Пушкин ҳақиқатан ҳам насрда қандай ижод қилиш кераклигини нафақат ўз замондошларига, балки бўлғуси буюк носирларга ҳам кўрсатиб қўйди.

Александр Сергеевич Пушкин ўзининг қадимги Рус давридан олиб ёзган, аммо тугалланмай қолган «Сув париси» пьесасида ҳам

даҳолигини исботлай олди. Ушбу асарда шоир князниңг беҳаёлик ва худбинлик билан қилган бемаъни тантиқлиги туфайли ҳароб бўлган, ҳалқ орасидан чиқсан оддий кишиларнинг фожиасини қўрсатади. «Айникса, «Сув париси», – деб ёзади В.Г. Белинский, – Пушкин истеъ-додининг ниҳоят даражада етуклигини намоён қиласади. Буюк истеъдод ўз ижодининг камолот чўққисидагина хаёлий бир эртакда шунчалик умуминсоний, ҳақиқий, реал гапларни айтиши мумкинки, уни мутолаа қилаётганда мутлақо эртак эмас, балки юксак бир фожиани ўқияпман, деб ўйлайсан киши».

Улуғ шоир яна бир шоҳ асарларидан бири «Дубровский» номли киссасини охирига етказа олмади: мўлжалланган уч қисмдан фақат иккитаси ёзилди. Шундай бўлса-да, у кишида тугалланган асар сингари таассурот қолдиради. «Олижаноб қароқчи» Дубровский образи бир-мунча романтик, ажойиб ва қизиқарли тарзда яратилган. Пушкиннинг бошқа биронта асарида оддий ҳалқ хаёти, «Дубровский»дагидек бу қадар ҳаққоний ва хилма-хил тарзда қўрсатилмаган бўлса керак.

Пушкин асар учун типикроқ ва тарихан манзур бўладиган воқеа қидириб, «Дубровский» асари устида ишлашни тўхтатади ва XVIII асрда Пугачёв етакчилигига бўлган энг катта дехконлар кўзголони даврига оид янги роман ёзишни режалаштиради. Бу мавзу сиёсий жиҳатдан ўткир ва қалтис бўлганлиги учун қўзголон тарихи у вактда ҳали мутлақо ўрганилмаган эди. Шунинг учун Пушкин янги асарнинг дастлабки режасини белгилаб олгач, асосий вақтини манба тўплашга ҳамда уларни қунт билан ўрганишга сарф қиласади. У манба ва тарихий адабиётлар билан танишибгина қолмади, балки қўзголон тарихини илк манбалар, кўп ҳолларда ўзи излаб топган материаллар асосида, зукко тарихчи сифатида мустақил равишда синчилаб, қунт билан ўрганиб чиқди. Қўзголон бўлган ерларни бевосита ўзи бориб кўришга қарор қилиб, 1833 йилнинг ёзиди Оренбург ва Поволжьега жўнаш учун рухсат олди. У бу ерда бир ойча бўлиб, қўзғолончиларнинг ҳукумат қўшинлари билан жанг қилган жойларини кезиб, Пугачёвни шахсан қўрган-билган кексалардан у ҳақдаги хотираларини сўраб-сuriштириди, у тўғрисидаги ривоятлар, ҳалқ қўшиклари ва бошқаларни қизиқиб тинглади.

Улуғ рус адабининг Болдинода ёзган «Қора хотин» киссаси унинг энг яхши асарларидан бири саналади. Қиссанинг бадиий тасвирдаги воқеалар ривожи учун қартабозлар турмушидан жуда қизиқарли ва хаёлий бир латифа асос қилиб олинган. Қиссада ўрта аср хасис рицарининг эмас, балки XIX аср «замонавий киши»сининг фожиавий тақдиди ҳикоя қилинади. Асардаги қаҳрамон ҳам «ўлгудек пулга ўч».

Қисса қаҳрамони ўзининг ҳар нима қилиб бўлса-да, бойиб кетишдан иборат худбин ниятига эришиш йўлида ҳеч нарсадан қайтмайди. У саксон ёшли кекса граф хонимнинг хуштори бўлишга ҳам тайёр; у Лиза исмли бечора бир қизга, гўё муҳаббат изхор қилиши билан бойиш учун бўлган кучли эҳтиросини ниқобламоқчи бўлади: «Бу ишларнинг асло муҳаббатга алоқаси йўқ эди! Унинг қалби пулни қўмсар эди!» Пушкин «Қора хотин»да нокаслик асири шароитида «ўз мустақиллигини мустахкамлаш»нинг бирдан-бир чораси бўлган бойлика ружу қўйиш, инсон қалбининг шикастланиши, инсоний туйғуларнинг топталиши ниҳоятда ёрқин тарзда акс эттиради. Шу билан бирга, «Қора хотин» – сўз санъатининг мўъжизасидир. Сюжетининг ўткирлиги ва воқеаларнинг жадал ривожланиб бориши, тасвирнинг аниқлиги, композициянинг изчиллигига кўра, бу асар жаҳон адабиётида кичкина қисса – новелланинг қарийб энг мукаммал намунасиdir.

Александр Сергеевич Пушкин ўзининг сўнгги энг йирик асари – Пугачёв қўзғолони давридан олиб ёзган «Капитан қизи» романини яратди. Шоир ушбу асар устида бир қанча йиллардан бўён ишлаб, уни 1836 йилнинг 19 октябрида якунлади. «Капитан қизи» романи Пушкиннинг наср йўлидаги ижодий чўққиси эди.

Асарни ёзишда Пушкин ўзининг ҳам буюк санъаткор-ёзувчи, ҳам тарихчи эканлигини кўрсатди. У Пугачёв қўзғолонининг тарихий сабабларини ва унинг ижтимоий характеристини чукур идрок этди. У ушбу асарини ёзib ажойиб санъаткор сифатида янада юксакликка кўтарилди. Дарҳақиқат, «Капитан қизи» катта бир тарихий даврнинг умумлашган бадиий ифодаси – XVIII асрнинг иккинчи ярмидаги рус ҳаётининг қомусидир. Гринёв билан Швабриндан тортиб, Миронов билан Савельичгача – романнинг барча персонажлари жонли шахслар бўлиш билан бирга, кенг ижтимоий-тарихий умумлашмани англатадиган типик характеристлардир. Пушкин яратган қўзғолон раҳбари Пугачёв образи унинг реалист-санъаткор сифатидаги порлоқ ғалабасидир. Пушкинга қадар кўпгина ёзувчилар бир-бирларига эргашиб Пугачёвни ҳеч қандай инсоний ҳиссиятга эга бўлмаган тошбагир, ёвуз, қонхўр сифатида тасвирлаганлар. У эса Пугачёвни бутунлай бошқача гавдалантириди. Шоир Пугачёвнинг шахсига оид ҳеч нарсани силлиқлаштиrmайди, бўёқ бермайди, ортиқча пардозламайди. Бироқ шу билан бирга, Пушкин яратган Пугачёвнинг жўшқин, олихиммат ва кенг феъли, рус миллий характеристининг кўпгина типик томонларини яққол ифода этади. Асардаги Пугачёв, эркин ва исёнкор руҳи, қаҳрамонона вазминлиги ва азamatлиги, тантилиги ва кенг феъллиги билан ажralиб туради.

Умуман олганда, Александр Сергеевич Пушкин ўз асарларини фақат рус халқига эмас, балки бутун жаҳон халқларига мерос қолдирди.

Севимли шоирамиз Зулфия ўта нозик нафосат билан таржима қилган Пушкиннинг бир шеъридаги куйидаги мисралар қалбларимизда ҳамон жаранглаб туради:

*Эсимдадир ажиб дам ҳали:
Кўз олдимда бўлдинг намоён,
Пок гўзаллик даҳоси каби,
Бир лаҳзалик хаёл, тушсимон.*

Дарҳақиқат, «пок гўзаллик даҳоси» – Пушкин ижодининг умри безаводдир, боқийдир.

Ушбу китобни нашрга тайёрлаш жараёнида А.С. Пушкиннинг 1955 йилда ўзбек тилида чоп этилган IV томлик «Танланган асарлар»идан ҳамда рус тилидаги сўнгги академик нашрининг V–VI томларидан фойдаланилди (Ленинград, «Наука», 1978).

Анвар Шер

*МАРҲУМ
ИВАН ПЕТРОВИЧ
БЕЛКИН
ҚИССАЛАРИ*

Фростакова хоним
Отпахоним у ёштириданок тарбисла
Жуда ҳам қизикар эди.
Митрофанов менга тоғтди.
Скотинин.
Недорост.



НОШИРДАН

И.П. Белкиннинг китобхонларга ҳозир тақдим этилаётган қиссаларини нашр этишга киришар эканмиз, бунга марҳум муаллифнинг ҳеч бўлмагандага қисқагина таржимиҳо ҳолини илова қилмоқчи ва шу билан ватан адабиёти ҳаваскорларининг ҳаққоний талабига жавоб бермоқчи бўлдик. Шу муносабат билан биз Иван Петрович Белкиннинг энг яқин қариндоши ҳамда ворисаси Марья Алексеева Трафилинага мурожаат қилдик. Бироқ баҳтга қарши, Белкин ҳақида Трафилина ҳеч қандай маълумот бериш имкониятига эга эмас экан, чунки у марҳумни, умуман танимас эди. Трафилина бу масала юзасидан бир мўътабар кишига, Иван Петровичнинг содик дўстига мурожаат қилишимизни маслаҳат берди. Биз бу маслаҳатга амал қилдик ва юборган мактубимизга қўйидаги кўнгилдагидек жавобни олдик. Бу жавоб олижаноб фикрлар ҳамда самимий дўстликнинг қимматли ёдгори, шу билан бирга, мукаммал биографик маълумот сифатида ҳеч қандай ўзгариш ва изоҳ киритмай чоп этамиз.

Мухтарам жаноб ***!

Шу ойнинг ўн бешида ёзган муборак мактубингизни, йигирма учинчida олиш шарафига муваффақ бўлдим. Мактубингизда менинг собиқ самимий дўстим, кўргоним ёнидаги қўшним Иван Петрович Белкиннинг туғилган ва ўлган вақти, машғулоти, оиласи шароити ва феъл-атвори ҳақида муфассал маълумот олишни орзу этибсиз. Мухтарам жаноб, сизнинг бу орзунингизни жону дилим билан адо этаман ва унинг гапларидан, шунингдек, шахсан кузатишларимдан хотирамда муҳрланиб қолган барча маълумотларни сизга юбораман.

Иван Петрович Белкин 1789 йилда Горюхино қишлоғида виждонли, покдомон ва олижаноб ота-онадан туғилди. Унинг марҳум отаси, майор Пётр Иванович Белкин Трафилинлар хонадонининг қизиペ-лагея Гавриловнага уйланганди. У бой эмас, ўртаҳол бўлиб, хўжалик

ишларининг кўзини биладиган одам эди. У кишининг ўғли бошланғич маълумотни қишлоқ руҳонийсидан олди. Ўзининг мутолаага, рус адабиётига бўлган ҳаваси учун ўша мўътабар кишидан миннатдор бўлса керак. 1815 йилда у пиёда Егер полкига хизматга кирди (аниқ санаси ёдимда йўқ), ўша полкда то 1823 йилгача хизмат қилди. Ота-онасининг вафоти деярли бир вақтга тўғри келиши уни истеъфога чиқиб, Горюхино қишлоғига, ўз мулкига қайтишга мажбур этди.

Иван Петрович мулкини идора қилишга киришиб, ўзининг тажрибасизлиги ва юмшоқ кўнгиллилиги оркасидан отаси ўрнатган қатъий интизомни бўшаштириб, тез орада хўжаликни оғир аҳволга солиб қўйди. У ўз ишига пишиқ, эпчил оқсоқолни ишдан бўшатиб (дехқонлар одатдагидек ундан норози эдилар), эртакларни боплаб айтиши билан ишонч қозонган қалитдор кампирга қишлоқни бошқаришни топширди. Бу тентак кампир йигирма беш сўмликдан, эллик сўмликни бир умр фарқлай олмасди; у ҳамма дехқонларнинг фарзандларни чўқинтиргани сабабли, дехқонлар ундан сира ҳайиқишишмасди. Дехқонлар сайлаган бу оқсоқол уларнинг ёнини олиб, фирибгарлик қилдики, Иван Петрович текинга ишлаб беришни бекор қилиб, ўртacha ўлпонлар тўловини жорий этишга мажбур бўлди, бироқ шунда хам дехқонлар унинг бўшлигидан фойдаланиб, биринчи йили енгиллик берилишини сўрашди, кейинги йилларда эса ўлпоннинг учдан икки кисмидан ортиқроғини ёнғоқ, бруслника ва шунга ўхшаш мевалар билан тўлашди.

Иван Петровичнинг мархум отасига дўст эканлигим сабабли, ўғлига маслаҳат беришни ўз бурчим деб билдим ва қўлдан бой берилган аввалги тартибни ўрнатишга ёрдамлашмоқчи бўлдим. Шунинг учун бир кун унинг қўргонига бориб, хўжалик дафтарини талаб қилдим, фирибгар оқсоқолни чақириби, Иван Петрович хузурида хўжалик дафтарини синчилаб текшира бошладим. Дастреб ёш хўжайнин катта иштиёқ ва қунт билан мени эшилди. Бироқ ҳисобларга қараганда, сўнгги икки йил ичига дехқонлар қўпайиб, парранда ва уй ҳайвонлари камайиб кетганини кўрган Иван Петрович, дастлабки маълумотлар билан кифояланиб, бошқа гапимга кулоқ солмай қўйди. Зўр бериб текширишим ва қаттиқ сўроқлар қилишим натижасида фирибгар оқсоқолни гангитиб қўйиб, нафасини ичига тушириб юборган вақтимда, Иван Петровичнинг курсида ўтирган ҳолатда хуррак отаётганини эшилди, роса таъбим тирриқ бўлди. Шундан кейин, унинг хўжалик ишларига аралашишни бутунлай йигиштиридим ва уларнинг барчасини Худонинг ихтиёрига топширдим.

Аммо бу ишлар бизнинг дўстона муносабатимизга асло путур етказмади, чунки мен барча ёш зодагонларимизга хос унинг бўшлигига ва ўлгудек ношудлигига афсуслансан-да, Иван Петровични чин кўнглимдан яхши кўрадим; шу қадар беозор ҳамда виждонли йигитни севмай бўлмасди. Иван Петрович ҳам кексалигимни хурмат қиласа менга ихлоси зўр эди. Одатимиз, фикримиз ва феъл-авторимизнинг ўхшашлигига қарамай, у то умрининг охиригача оддий сухбатларимни тақдирлаб, деярли ҳар куни мен билан кўришарди.

Иван Петрович ўтамиёна, осуда ҳаёт кечирап, исрофгарчиликка йўл қўймасди. Мен унинг маст бўлганини ҳечам кўрмаганман (бундай ҳолат биз томонларда мўъжиза саналиши аниқ); унинг хотин-қизларга иштиёқи жуда баланд, лекин ўзи қиздек уятчанг эди¹.

Мактубингизда кўрсатилган қиссалардан ташқари, Иван Петрович талайгина қўлёзмалар ҳам қолдирган. Бу қўлёзмаларнинг бир қисми менда сақланади, бир қисмини эса Иван Петровичнинг калитдори турли рўзгор ишларига ишлатиб юборган. Шундай қилиб, ўтган қиша калитдор аёл яшайдиган хоналарнинг барча деразаларига Иван Петрович ёзиб тутгатмаган романининг биринчи қисми ёпиширилган эди. Номи зикр этилган қиссалар унинг дастлабки тажрибаси бўлса керак. Иван Петровичнинг айтишича, ўша асарларнинг кўпчилиги ҳакиқат бўлиб, уларни турли одамлардан эшитган экан. Аммо асарлардаги исмларнинг деярли барчасини Иван Петровичнинг ўзи қўйган. Қишлоқларнинг номи эса, атрофимиздаги жойларнинг атамаси бўлиб, қиссаларидан аллақайси бир ерида менинг қишлоғим ҳам тилга олинган. Булар қандайдир ёмон ният билан эмас, балки тасаввур доирасининг торлигидан келиб чиқкан.

Иван Петрович 1828 йилнинг кузида безгак билан оғриди, бу қасал иситмага айланиб кетди, энг оғир касалликлар, жумладан, сил ва шунга ўхшашларни даволашда моҳир бўлган маҳаллий табиимизнинг катта файрат кўрсатишига қарамай, Иван Петрович вафот этди. У 30 ёшда менинг қўлимда жон берди ва Горюхино қишлоғининг черковига, ота-онасининг ёнига дафн этилди.

Иван Петрович ўрта бўйли, кўк кўз,mall соч, қиррабурун, оппоқ, қотма киши эди.

Муҳтарам жаноб, мархум қўшним ва дўстимнинг ҳаёти, машгулоти, феъл-автори ҳамда қиёфасини хотирлай олганларим мана шулар холос.

¹ Бир латифа бор, уни ортиқча ҳисоблаб нашр этаймиз, аммо китобхонни ишонтириб айтамизки, унда Иван Петрович Белкиннинг хотирасига доғ туширадиган ҳеч гап йўқ.

Борди-ю, мактубимдан бирор нарса учун фойдаланмоқчи бўлсангиз, исмимни тилга олмаслигингизни ўтиниб сўрайман; гарчи ўзим ёзувчиларни хурмат қилсам ва севсам-да, аммо ёзувчилик ишига аралашишни ортиқча ҳам ёшимга тўғри келмайди, деб ҳисоблайман. Самимий эҳтиром билан,

*1830 йил, 16 ноябрь,
Ненародов қишлоғи*

Муаллифнинг хурматли дўстининг истагини ҳисобга олиб, бизга юборган маълумоти учун катта ташаккур билдирамиз ва китобхонлар унинг самимийлиги ва олижаноблигини албатта тақдирлайдилар, деб ишонамиз.

A. П.

ЎҚ

Биз отишдик.
Баратинский¹

Мен уни дүэлдаги ҳақимга кўра
отиб ташлашга қасамёд этдим
(ўқ узиси навбати менда қолди).
Лашкаргоҳдаги кечадан

I

Биз қишлоқда турган эдик. Армия офицерининг ҳаёти маълум. Эрталаб таълим, манеж³. Полк қўмондони ёки яхудийнинг қовоқхонасида тушлик; кечқурун пунш⁴ ичиш ва қартабозлик. Манежда биронта ишрат уйи, биронта қаллиқ йўқ эди; биз бир-биримизнида тўпланаардик ва унда ўз мундирларимиздан бўлак ҳеч нарса кўрмасдик.

Улфатимиз ичидаги ҳарбий бўлмаган факат бир киши бор эди. Унинг ёши ўттиз бешларда бўлиб, катта деб биз уни хурмат килардик. Кўпни кўрганлиги билан у биздан анча устун турарди; бунинг устига унинг доим маъюслиги, қайсар табиати ва аччик тили биз ёшларнинг онгимизга қаттиқ таъсир қилдиради. Унинг ҳаёти ғалати бир тарзда бўлиб, ўзи русга ўхшар, лекин ажнабий исмда эди. Бир вактлар у гусарликда хизмат қилиб, яхшигина кун кечирган; унинг хизматдан чиқиши ва бу пастқам қишлоқка кўчиб келиб ҳам факирлик, ҳам исрофгарчиликда кун кечириши сабабларини ҳеч ким билмасди: эски қора калта чакмон кийиб яёв юрарди, аммо полкимиздаги ҳамма офицерлар учун дастурхони ёзиқ эди. Хизматдан бўшаган аскар пиширадиган унинг тушлиги икки ёки уч хил, аммо шампан виноси ариқ бўлиб оқарди. Унинг бойлигини ҳам, даромадини ҳам ҳеч ким билмас, бу ҳақда сўрашга унчамунчаси журъат этолмасди. Унда кўпроқ ҳарбий ишга доир китоблар ва романлар бўларди. Бу китобларни жон деб ўқигани берар ва ҳеч қачон сўраб олмас; шунингдек, бирордан олган китобини ҳам ҳеч қачон эгасига қайтариб бермасди. Унинг муҳим машғулоти тўппонча отишдан

¹ Баратинский Е.А. – Пушкин замонасининг атоқли шоири.

² Пушкин замонасининг машҳур адаби – декабрист А.А. Бестужев-Марлинскийнинг асари.

³ Манеж – от ўргатиладиган ёки чавандозлар ҳамда отлиқ аскарлар машқ қиласидаган атрофи ўралган жой ёки бино.

⁴ Пуниш – шакар, сув ва мева шираси қўшиб қайнатиладиган спиртли ичимлик.

иборат эди, уйининг деворлари илма-тешик бўлиб кетганлигидан асаларининг уясига ўхшарди. У турадиган қулбанинг ягона безаги жуда кўп хилма-хил тўппончалар эди. Отиш ишида у ниҳоятда ажойиб санъатга эришганди. Агар кишининг бошига нок қўйиб, ўқ билан уриб учирив юбормоқчи бўлса, полкимизда биронтаси иккиланмасдан бошини тутарди. Биз қўпинча дуэль тўғрисида сўзлашардик; Сельвио (уни шундай деб атайман) ҳеч қачон гапга аралашмас эди. Дуэлга чиққанмисиз деб сўрасак, у қуруқина қилиб, чиққанман дер, аммо муфассал айтиб бермасди. Бундай сўроқлар унга ёқмаслиги кўриниб турарди. Биз, бу одам ўзининг даҳшатли санъати билан бироннинг бошини еган бўлса керак, деб гумон қиласардик. Ҳарқалай, унда кўркоқликдан асар бор деб хаёлимизга ҳам келмас эди. Шундай кишилар борки, ёлғиз ташқи кўринишнинг ўзи бундай шубҳаларга йўл қўймайди. Тасодифий бир ҳодиса барчамизни ҳайрон қолдириди.

Бир кун бизнинг офицерлардан ўн киши Сельвионикида тушлик қилди. Ичиш одатдагича бўлди, яъни жуда кўп ичилди, тушлиқдан сўнг биз уй эгасининг ўйинга қўшилишини сўрадик. У анчагача унамади, чунки жуда кам ўйнарди; ниҳоят ўртага эллик сўм қўйди ва ўтириб карта суза бошлади. Биз уни ўраб олдик, ўйин кизиб кетди. Ўйин чоғида жим ўтириш Сельвионинг одати эди, ҳеч вақт сўз талашмас ва изоҳ бермасди. Агар гардкамчи нотўғри санаб қўйса, у дарров камини тўлар ёки ортигини ёзib қўяр эди. Биз буни билардик, шунинг учун унинг ўйинни ўз билганича бошқаришига халал бермасдик. Орамизда, яқинда бизга ўтказилган бир офицер бор эди. У ўйин устида, паришон хотирлигидан нотўғри хисоб қилиб қўйди. Сельвио бўрни олиб ўз одатида ҳисобни тўғрилаб ёзib қўйди. Офицер уни янгишган деб ўйлаб изоҳлай кетди. Сельвио индамай картга сузаверди. Офицер бетоқат бўлиб, чўткани олди-да, назарида нотўғри кўринган рақамларни ўчириб ташлади. Сельвио бўрни олиб, яна ёзib қўйди. Вино, ўйин ва ўртоқларининг кулишидан қизишиб кетган офицер, ўзини қаттиқ таҳқирланган деб санади ва аччиғланиб столдаги мис шамдонни олиб Сельвиога отди, у андак чап бериб қолди. Биз довдираб қолдик. Сельвио ўрнидан туриб, ғазабидан оқарган ва кўзлари чараклаган ҳолда «Муҳтарам жаноб, марҳамат қилиб чиқинг ва Худога шукр қилинг, бу ҳодиса менинг ўйимда бўлди» деди.

Биз, бунинг оқибати ёмон бўлишига шубҳа қилмасдик ва янги ўртогимизни ўлди, деб ҳисобладик. Офицер, ўйинчи афандининг таҳқирлагани учун истаган чоғда жавоб беришига тайёрман деди-да, чиқиб кетди. Ўйин яна бир неча дақиқа давом этди; лекин уй эгаси-

нинг ноилож ўйнаётганини сезиб, биз бирин-кетин турдик ва тез орада у офицернинг иш ўрни бўш қолишини сўзлашиб уй-уйимизга тарқалишдик.

Эртасига биз манежда, бечора поручик тирикмикан, деб турган эдикки, унинг ўзи келиб қолди; шу саволни ўзига бердик. У, ҳали Сельвио тўғрисида хеч қандай хабар эшитганим йўқ, деб жавоб берди. Бу ҳол бизни ҳайратга солди. Биз Сельвионикига бордик, уни ҳовлида, дарвозага ёпиширилган картанинг тузига устма-уст ўқ узайтганини кўрдик. У бизни одатдагича қабул қилди, кечаги ҳодиса тўғрисида бир сўз ҳам демади. Уч кун ўтди, поручик ҳали ҳам тирик эди. Биз ажабланиб, «Наҳотки Сельвио дуэлга чиқмаса?» деб бир-биримиздан сўрардик. Сельвио дуэльга чиқмади. У оддийгина изоҳ билан қаноатланди ва ярашиб кетди.

Бу эса Сельвиога нисбатан ёшларда ёмон фикр туғдирди. Одатда одамгарчиликнинг энг юқори фазилати ботирликда ва турли нуқсонларни кечиришда, деб билган ёшлар жасорат кўрсатмасликни ҳечам кечирмайдилар. Шундай бўлса-да, бора-бора ҳаммаси унутилиб кетди ва Сельвионинг аввалги обрўси ўз ўрнига тушди.

Энди унга ёлғиз мен яқинлаша олмасдим. Табиатан романтик бир тасаввурга эга бўлганимдан, ҳаёти сирли туюлган ва қандайдир гаройиб бир киссанинг қаҳрамони бўлиб кўринган бу одамга аввало, ҳаммадан кўра менда ихлос кучли эди. У мени севарди ва сухбатда одатдаги қаттиқ сўзларини бир ёққа қўйиб, турли нарсалар ҳақида мен билан дилкаш ва ёқимли гаплашарди. Аммо ўша кечадаги кўнгилсиз воқеадан сўнг унинг обрўси тўкилди ва ўз айби билан обрўсини яна кўтартмади, деган бир фикр менинг бошимдан кетмасди ва у билан илгаригидек муомалада бўлишимга халал берарди; юзига қарагани уялардим. Сельвио жуда ақлли ва тажрибали бўлганидан менинг кайфиятими ни ва бунинг сабабини пайкар эди. Бу ҳол уни ранжитарди; мен билан шу ҳақда сўзлашмоқчи бўлганини бир-икки марта сезиб қолдим, аммо мен бундай вақтларда чап бердим; Сельвио ҳам мендан ўзини тортди. Шундан кейин у билан ўртоқларим орасида кўришадиган бўлдим ва ўзаро очиқ сухбатларимиз тўхтади.

Пойтахтнинг паришонхотир аҳолиси, қишлоқ ёки шаҳарчаларнинг аҳолиларига яхши маълум бўлган кўп таассуротдан, масалан, почта келадиган кунни кутишдан хабарсиздир: сесанба ва жума кунлари бизнинг полк девонхонаси офицерлар билан тўларди: бирор пул, бирор мактуб, бирор газета кутарди. Одатда пакетлар шу ернинг ўзида очилиб, янгиликлар айтилар, девонхона бундай вақтда жуда гавжум ва ғовур-ғовур бўларди. Сельвиога ҳам мактуб бизнинг полк орқали ке-

ларди. Шунинг учун, у ҳам одатда шу ерда бўларди. Кунлардан бир кун унга бир қоғоз халта бердилар, у гоятда сабрсизлик билан мактубни очди. Мактубга қарапкан, кўзлари чараклаб кетди. Ҳар қайсиси ўз мактубига тикилган офицерлар ҳеч нарсани пайқамадилар. «Жаноблар, – деди Сельвио, – мен дархол кетишим керак; бугун кечаси жўнайман; умид қиласманки, сизлар уйимда сўнгги марта меҳмон бўлишни рад этмассизлар. Мен сизни ҳам кутаман, – деб давом этди у менга қараб, – албатта келинг». Шундай деб, у шошилиб чиқиб кетди; биз Сельвионикига тўпламоқчи бўлиб тарқалдик.

Мен тайинланган вақтда Сельвионикига келсам, бутун полк офицерлари деярли шу ерда экан. Унинг ҳамма нарсаси тугилган, илматешик бўлиб кетган деворлар ялангоч эди. Биз стол атрофига ўтириджик, ўй эгасининг кайфияти жойида эди, кўп ўтмасдан унинг хурсандлиги ҳаммамизга таъсир қилди; ҳар онда шишалар пақиллаб очилар, бордоқлар кўпикланар, тинмай вишиллаб турарди, биз эса кетувчига зўр бериб оқ йўл ва саодат тилардик. Кечаси алламаҳалда стол атрофидан турдик. Фуражкаларни олаётганимизда, Сельвио ҳамма билан хайрлашди, чиқиб кетаётганимда қўлимдан ушлаб тўхтатди ва: «Сиз билан сўзлашмоқчиман» деди астагина. Мен колдим.

Меҳмонлар кетишиди; иккимиз қолдик, индамасдан чубук тортиб ўтириджик. Сельвио паришонҳол, унинг хушчақчақлигидан асар ҳам қолмаган эди. Ўзи маъюс, ранги оқарган, кўзлари чараклар, бу ҳолат оғзидан чиқаётган қуюқ тутун билан қўшилиб, уни шайтонга ўхшатиб қўйганди. Бир неча дақиқа ўтгач Сельвио жимликни бузиб:

– Балки биз бундан сўнг ҳеч қачон кўришмасмиз, – деди, – жудолик олдидан, мен сиз билан гаплашмоқчиман. Бошқаларнинг фикрига унча эътибор қилмаслигимни, балки сезгандирсиз; аммо сизни севаман, шунинг учун қўнглингизда нотўғри фикр қолдириш, менга оғир.

У тўхтади ва тутаб бўлган чубуғига тамаки тўлдира бошлади; мен ерга қараб, жим ўтиравердим.

– Ўша бадмаст телба Р.дан қасос олмаганим, – деб давом этди у, – сизга ғалати туюлгандир. Сиз ишонингки, қурол танлаш хукуки менда бўлганидан, унинг ҳаёти менинг қўлимда, менини эса деярли хавфсиз эди; ўзимни тийишимни факат олижаноблигимдан деб айтишим мумкин, аммо ёлғон гапиришни истамайман. Агар мен ўз ҳаётимни бутунлай таҳликада қолдирмай Р.ни жазолаёлсам эди, у ҳолда мен уни ҳеч ҳам кечирмасдим.

Мен ҳайрон бўлиб Сельвиога қарадим. Унинг бу гали мени хижолатда қолдирди. Сельвио сўзини давом эттириди.

– Худди шундай: ўзимни ўлимга маҳкум этишга ҳақим йўқ. Олти йил аввал мен бирордан тарсаки еганман, ўша душманим ҳали типик.

Мен жуда қизиқсиниб қолдим. «Сиз у билан дуэлга чиқмадингизми? Шароит сизни ажратиб юборган бўлса керак?» дедим.

– Мен у билан дуэлга чиқдим, – деб жавоб берди Сельвио, – мана ўшандан қолган хотира.

Сельвио ўрнидан турди ва заррин попукли (французлар *bonnet de police*¹ дейдиган) қизил шапкани олиб, бошига кийди. Ўқ пешанадан тўрт энлик юқоридан тешиб ўтганди.

– Мени гусар полкида хизмат қилганимни биласиз, – деб давом этди Сельвио. – Феълим сизга маълум: мен доим устун бўлишга одатланмаган, бу ёшлигимдан қолган мендаги бир дард. Бизнинг замонамиизда жанжалкашлик урф эди: мен армияда биринчи жанжалкаш эдим. Биз пиёнисталик билан мақтанардик, мен ичишда Денис Давидов² мадх этган машҳур Бурцовни ҳам қочирадим. Бизнинг полкда деярли ҳар дақиқада дуэль бўлиб турар, мен ҳаммасида ё гувоҳ ёки иштирокчи бўлардим. Ўртоқларим мени хурмат қилишар, тез-тез ўзгариб турувчи полк қўмондонлари эса менга туганмас бир бало, деб қаардилар.

Мен хотиржам (ёки безовта) шуҳратимдан завқланардим. Шу вактда, бизнинг полкка бадавлат ва аслзода оиласа мансуб бир йигит (исмини айтмайман) келди. Умримда бундай ажойиб, баҳтиёр кишини кўрмаган эдим! Ёш, аклли, гўзал, энг хушчакчақ, жасорат кўрсатишида энг беларво, донгдор, ўзи саноғини билмайдиган ва ҳеч қачон тугамайдиган пулдор одамни кўз олдингизга келтиринг ҳамда унинг бизда қандай таъсири этишини бир тасаввур қилинг. Менинг устунлигимга рахна етди. У менинг довругимни эшишиб, дўст бўлиши йўлини излади; бироқ мен уни совуқ қарши олдим, у бўлса ҳеч бир таассуф билдирамай олдимдан кетди. Мен уни жуда ёмон қўриб қолдим. Унинг полкдаги ва аёллар орасидаги муваффақиятлари мени қаттиқ ғазаблантиради. Мен у билан жанжаллашгани баҳона ахтара бошладим; ҳажвий шеърларимга у ҳам шеър билан жавоб берарди, унинг шеърлари доим кутилмаган ва менинидан ўткир, албатта жуда қизиқ бўларди. У ҳазиллашарди, мен эса аччиғланардим. Ниҳоят, бир куни поляк зодагонининг уйида бўлган базмда мен унинг бутун хонимлар диққатини, айниқса, мен билан муносабатда бўлмиш уй бекасининг

¹ Полиция қалпоги.

² Денис Давидов – шоир.

назар-дикқатини жалб этганини қўриб, қулогига ярамас бир гап айтдим. У тутакиб кетди ва бир шапалоқ урди. Биз қиличларни қўлга олган эдик, хонимлар хушларидан кетиб йиқилиши; бизни ажратдилар, ўша кечанинг ўзидаёқ биз дуэлга чиқдик.

Тонг пайти эди. Мен уч секундантим¹ билан тайинланган жойда ниҳоятда қаттиқ бетоқат бўлиб душманимни кутардим. Баҳор қуёши қўтарилиб, ҳавони қизита бошлаган пайт. Мен уни узокдан кўрдим. У мундир кийган ва қилич тақсан бўлиб, бир секундант билан бирга пиёда келарди. Биз у келаётган томонга юрдик. У фуражкаси тўла гилосни қўлида тутган ҳолда яқинлашди. Секундантлар бизга ўн икки одим ўлчаб бердилар. Мен биринчи бўлиб ўқ узишим керак эди. Аммо мен ғазабдан шу қадар ҳаяжонланган эдимки, нишонни тўғри олишимга ишонмасдим, ўзимни босиб олиш учун биринчи бўлиб ўқ узиш ҳуқуқини унга бердим; душманим рози бўлмади. Чек ташлашга қарор қилдик: биринчи ракам унга, абадий баҳтиёр кишига чиқди. У нишонга олиб отди, ўқ фуражкамни тешиб ўтди. Навбат менга келди. Ниҳоят, унинг ҳаёти менинг қўлимда эди; мен андак безовталик аломати қидириб, унга диққат билан қарадим... у тўппончанинг қархисида туриб, пишган гиолосларни фуражкасидан танлаб олиб, оғзига солар ва данагини тупуриб ташларди, данак учуб келиб оёғимнинг тагига тушарди, унинг бепарволиги ғазабимни ошириб юборди. Ўз ҳаётини қадрламаган бир кишини ўлдиришдан менга нима фойда деб ўйладим. Бошимга ёвуз бир фикр келди. Тўппончани туширдим. – Сиз, афтидан энди ўлиш ниятида эмассиз, – дедим унга, – марҳамат қилиб нонуштангизни қилинг; сизга халал беришни истамайман... «Сиз зигирча ҳам халал бермайсиз, – деб эътиroz билдириди у, – марҳамат қилиб отаберинг, тағин ўзингиз биласиз: отиш навбати сизники, мен ҳамиша сизнинг хизматингизга тайёрман». Мен гувоҳларга бугун отмаслигимни билдиридим ва шу билан дуэль тугади.

Мен хизматдан бўшаб, шу жойга келдим. Ўшандан бери ўч олиш тўғрисида ўйламаган куним бўлмади. Энди мен кутган вақт етиб келди...

Сельвио эрталаб келган мактубни чўнтағидан олди ва менга узатди. Кимдир (унинг гумаштаси бўлса керак) Москвадан мактуб ёзиб, *машҳур зот* тез орада ёш ва гўзал кизга уйланишини билдириган эди.

– Сиз бу *машҳур зотнинг* ким эканини пайқагандирсиз, – деди Сельвио, – Москвага бораман. Хўш қани қўрай-чи, тўйида ҳам, бир вақтлар гилос еб туриб, ўлим кутгандек бепарво турармикан!

¹ Дуэлда вакил сифатида катнашувчи шахс.

Шундай деб, Сельвио ўрнидан турди, фуражкасини ерга бир уриб, худди қафасдаги йўлбарсдек уй ичида у ёқдан-бу ёққа юрди. Мен қимир этмай туриб унинг гапига қулоқ солдим. Бир-бирига зид ғалати ҳислар мени безовта қиласди.

Хизматкор кириб, арава қўшилганини айтди. Сельвио қўлимни қаттиқ сиқди ва биз ўпишиб хайрлашдик. У икки жомадон қўйилган аравага ўтириди, бирига тўппончалар, иккинчисига шахсий буюмлари жойланган эди. Биз яна хайрлашдик. Шундан кейин отлар шамолдек елиб кетди.

II

Бир неча йил ўтди, оилавий шароит мени Н. уездининг нообод бир қишлоғига кўчишга мажбур этди. Хўжалик ишлари билан машғул бўлганимда ҳам, илгариги сертўполон ва бепарво ўтадиган ҳаётимни қўмсаб, секингина ух тортиб кўярдим. Мен учун энг қийини куз ва қиши кечаларини танҳоликда ўтказиш эди. Тушлик вақтигача оқсоқол билан гаплашиб, иш билан у ёқ-бу ёққа бориб ёки хўжаликни айланиб бир қадар ўзимни овутиб юрадим, аммо қоронги туша бошладими, тоқатим тоқ бўлиб, ўзимни қаерга қўйишни билмай қолардим. Жавонларнинг остидан ва омборхонадан топиб олган бир неча китобни ўқишиберид ёдлаб ҳам олдим. Омборчи аёл Криловна билган ҳамма эртакларни кўп мартадан эшитдим; аёлларнинг қўшиқлари мени зериктирадиган бўлиб қолди. Унча ширин бўлмаган шаробдан ичишга тушган эдим, бошимни оғритди; тўғрисини айтганда, ғам чекиб пиёниста бўлиб қолишдан, яъни, уездимизда нусхаси кўп учрайдиган бадмастлардан бири бўлиб қолишдан қўрқдим. Сухбатининг кўпроги ҳиқичоқ ва ух тортишдан иборат бўлган икки ё уч бадмастдан бошка атрофимда яқин қўшни йўқ эди... Улар билан бирга бўлишдан кўра танҳолик афзал эди.

Мендан тўрут чақирим нарида, граф хоним Б.га қарашли катта бир мулк бор эди, аммо унда фақат иш бошқарувчи яшарди, граф хоним эса ўзининг мулкига фақат бир марта, эрга теккан йили келган, ўшанда ҳам бир ойдан ортиқ турмаганди. Танҳоликда ўтаётган ҳаётимнинг иккинчи баҳорида граф хоним эри билан ёзни ўз қишлоғида ўтказар эмиш, деган гап тарқалди. Дарҳақиқат улар июль ойининг бошида келишди.

Бадавлат қўшнининг келиши қишлоқ аҳолиси учун муҳим бир даврdir. Зодагонлар ва уларнинг хизматкорлари бундай ҳодиса тўғрисида икки ой олдин ва уч йил кейин ҳам сўзлаб юрадилар. Мен-га келганда, очиқ айтаманки, ёш ва гўзал хонимнинг келиш хабари

менга қаттиқ таъсир қилди; сабрим тугаб, кўришга шошилдим, шунинг учун ҳам у келган ҳафта якшанба куни тушдан кейин, зоти олийларига яқин қўшни ва итоатли қул сифатида ўзимни танитмоқ учун қишлоғига йўл олдим.

Хизматкор мени граф кабинетига бошлаб кирди, ўзи эса келганимни билдириш учун кетди. Данғиллама хона турли-туман безаклар билан ясатилганди; деворлар ёнида китоб тўла жавонлар, ҳар қайсисининг устига бронза ҳайкал кўйилган эди. Мармар печь устида катта ойна турар, полга яшил мовут қоқилган ва гиламлар солинганди. Ўз факир масканимда безак кўришдан холи бўлиб, кўпдан бери ўзгаларнинг давлатини кўрмаганим учун чўчиб, узоқ вилоятдан арзга келган ва министринг чиқишини кутган кишидек, қандайдир ҳаяжон билан кутдим... Эшиклар очилиб, ўттиз икки ёшлардаги чиройли бир киши чиқди. Граф очик чехра ва хуш мулозамат билан менга яқинлашди; мен тетикланишга ҳаракат қилиб, ўзимни танитмоқчи бўлган эдимки, у мендан олдин гап бошлади. Биз ўтирик. Унинг эркин ва назокат билан гапириши довдирашимни тез орада тарқатди; мен ўзимнинг одатдаги холимга кира бошлаган эдимки, бирдан граф хоним кириб қолди, аввалгидан баттар довдираб қолдим. У ҳақиқатан ҳам жуда гўзал эди. Граф унга мени танишириди; мен бетакаллуф кўринишни истардим, аммо ўзимни хотиржам тутишга уринганим сайин, баттар нокурай ахволга тушаётгандек эдим. Улар мени яхши қўшни ҳисоблаб, ширин муомала қилиб, ўзимни тутиб олишим ва янги танишувга кўнишишм учун ўзаро сўзлашдилар. Бу орада мен у ёқдан-бу ёққа юриб, китобларни ва суратларни томоша қилдим. Мен суратларга кўп ҳам тушунавермайман, аммо булардан биттаси дикқатимни жалб этди. Бу сурат Швейцариянинг бир манзарасини тасвир этарди; аммо мени ундаги санъат эмас, суратнинг бир жойи икки ўқ билан тешилгани қизиқтиарди. «Қандай яхши отилибди-я!» дедим графга қараб. «Ҳа, – деб жавоб берди у, – жуда яхши отилган. Хўш, сиз яхши ота оласизми?» деб давом этди у. «Тузуккина отаман» дедим, гап ниҳоят менга яқин мавзуга кўчганига қувониб. – Ўзимга маълум тўппончада ўттиз қадам наридан картани ура оламан. – «Ростдан-а? – деди граф хоним жуда эътибор бериб, сен-чи азизим, ўттиз қадам наридан қартани ура оласанми?» – Вакти келганда синаб кўрамиз, – деди граф, – бир вақтлар яхши отардим; лекин мана тўрт йилдирки, кўлимга тўппонча ушлаганим йўқ. «О, ундоқ бўлса, гаров бойлашаманки, зоти олийлари, йигирма қадамдан ҳам картани уролмайсиз, чунки тўппончани кунда отиб туриш керак. Мен буни тажрибада кўрганман. Мен полкимиздаги энг яхши мерганлардан

бири ҳисобланардим. Бир куни тўппончамни тузатишга бериб, бир ой қўлимга тўппонча олмаган эдим, зоти олийлари, қандай ўйларкинлар? Кейин, дастлаб отганимда йигирма беш қадам жойдаги шишани нишонга олиб, тўрт марта устма-уст хато қилдим. Бизда ҳазилкаш, асқиячи бир ротмистр¹ бор эди, у менинг уролмаганимни кўриб: «Ука, шишага кўл кўтаролмайдиган бўлиб қолибсан» деб тегишиди. Йўқ, зоти олийлари, машққа бепарво караш ярамайди, бўлмаса, албатта унутилади. Мен кўрган энг яхши мерган ҳар куни машқ қиласди, жуда бўлмаганда тушлиқдан олдин уч марта отарди. Бу, унга бир қадах ароқдек одат бўлиб қолган эди». Граф билан граф хоним сўзга киришиб кетганимдан хурсанд эдилар. «Мана шундай, зоти олийлари, баъзан шундай бўлардики, деворга пашша қўнганини кўриб қолса, сиз куляпсизми, граф хоним? Худо урсин, тўғри. Пащшани кўрса: Кузька, тўппончамни олиб кел, деб айтарди. Кузька ўқланган тўппончани келтиради, у эса отиб, пащшани деворга ёпишитирарди». – «Таажжуб! – деди гарф. – Хўш, унинг исми нима эди?» – «Сельвио эди, зоти олийлари!» – «Сельвио? – деб қичқирди ўтирган жойидан сакраб туриб граф. – Сиз Сельвиони танийсизми?» – «Нега танимай, зоти олийлари, мен у билан дўст эдим; у бизнинг полкка худди ўзимизнинг оғаний-ўртоқдек қабул килинганди; мана беш йилдирки, ундан умуман хабар йўқ. Зоти олийлари ҳам уни танир эканлар-да?» – «Танирдим, яхши танирдим. У сизга айтганмиди... Йўғ-э, айтмагандир: у сизга жуда қизиқ бир ҳодисани гапириб бермаганмиди?» – «Базмда қандайдир бир дайди урган шапалоқни айтмоқчимисиз, зоти олийлари?» – «У сизга ўша дайдининг исмини айтмаганмиди?» – «Йўқ, зоти олийлари, айтмаганди... Ох! зоти олийлари, – деб давом этдим, ҳақиқатни пайқаб қолиб, – афв этинг... Мен билмабман. Ўша сиз эдингизми?..» – «Мен ўша, – деди граф кайфияти бузилган ҳолда, – бу отилган сурат эса, бизнинг сўнгги учрашувимиз хотирасидир...» – «Ох азизим, – деди граф хоним, – Тангри ҳақи гапира кўрма; эшитсам юрагимни ваҳима босади». – «Йўқ, – деб эътиroz билдириди граф, – мен ҳаммасини айтиб бераман; мен унинг дўстини қандай хафа килганимни-ку, билар экан, Сельвио ҳам мендан қандай ўч олганини майли, билиб қўйсин». Граф мен томонга суриб қўйган оромкурсига ўтириб, мароқ билан қуйидаги ҳикояни эшитдим.

«Бундан беш йил аввал уйландим, – асал ойини мен шу ерда, қишлоқда ўтказдим. Ҳаётимнинг энг яхши дамлари ва энг оғир хотирапларидан бири ҳам мана шу ерда ўтди.

¹ Ротмистр – кавалерияда эскадрон командири.

Кунлардан бир кун биз иккимиз отда сайр қилиб юрардик; рафиқам минган от негадир тисланиб, юрмай қолди; у қўркиб отнинг жиловини менга бериб, ўзи уйга яёв кетди, мен олдинроқ келдим. Ҳовлида бир йўл аравасини кўрдим, менга номини билдирамай, аммо менда иши борлигини айтиб, иш хонамда бир одам кутиб ўтирганини билдиришди. Мен уйга кирдим ва қоронгида соқоллари ўсиб кетган бир одамни кўрдим; у шу ерда тош пеъч олдида турарди. Мен дурустроқ кўриш харакатида унга яқинлашдим. «Сен, мени таний олмадингми, граф?» – деди титрок товуш билан у. – Сельвио! – деб кичқирдим ва эътироф этаманки, соchlарим бирдан тик бўлганини сездим. «Худди шундай! – деб давом этди у, – ўқ узиш навбати менда қолганди; тўппончамни бўшатгани келдим, тайёрмисан?» Унинг ён чўнтағидан тўппончаси кўриниб турарди. Мен икки қадам ўлчаб, рафиқам келиб қолмасидан аввал тезроқ отишини илтимос қилиб, бурчакка бориб турдим. У пайсалга солди – чирок сўради. Шам келтирдилар. Мен эшикларни беркитиб ичкарига ҳеч кимни киритмасликни буюрдим ва яна отишини илтимос қилдим. У тўппончани олиб, мўлжалга ола бошлади. Мен сонияларни санаидим... Рафиқамни ўйлардим... Даҳшатли онлар ортда қолди. Сельвио қўлини туширди. Тўппончамга ўқ ўрнига гилоснинг данаги солинмаганига афсусланаман... – деди у, – ўқ оғир. Менга ҳамон бу дуэль эмас, қотиллик бўлиб кўриняпти: мен куролсиз одамни нишонга олишга ўрганмаганман. Қайтадан бошлайлик; чек ташлаймиз, кимга чиқса, ўша биринчи отади». Бошим айланиб кетди... Мен рози бўлмадим, шекилли... Ниҳоят, биз яна бир тўппончани ўқладик, чек ташладик. У, чекни бир пайтлар ўқим тешиб ўтган фуражкасига солди; менга яна биринчи рақам чиқди. Асло мен унутмайдиган бир истехзо билан у: «Граф, сен жуда ҳам баҳтлисан!» деди. Мен ўзимга нима бўлганини ва у мени бу ишга қандай мажбур қилганини англолмай қолдим... лекин мен отдим, ўқ мана бу суратга тегди. (Граф бармоғи билан ўқ тешган суратни кўрсатди; унинг юзи оловдек қизарди; граф хонимнинг ранги кўйлагидан ҳам баттар оқариб кетди; мен таҳсин айтишдан ўзимни тутолмадим).

Мен отдим, – деб давом этди граф, – Тангрига шукрки, ўқим хато кетди; шунда Сельвио... (шу онда у, ҳақиқатан кўркинчли эди) мени нишонга ола бошлади. Бирдан эшиклар очилди-да, Маша югуриб кирди ва чинкириб бўйнимга ўзини ташлади. Унинг келиши мени тетиклаштириди. – Севгилим – биз ҳазиллашаётшибиз-ку, кўрмаяпсанми? – дедим унга. – Нега мунча кўркиб кетдинг? Бор, бир бордоқ сув олиб кел; сени эски дўстим ва ўртогум билан таништираман. – Маша

ҳамон ишонмасди. У ҳайбатли Сельвиога қараб: «Айтинг, эрим тўғри сўзлаяптими? – Икковингиз ростдан ҳам ҳазиллашяпсизми?» – деди. «У ҳамиша ҳазиллашади, граф хоним! – деб жавоб берди Сельвио: – Бир вақт ҳазиллашиб бир шапалоқ урган эди, яна ҳазиллашиб мана бу фуражкамга отиб тешиб қўйди, ҳозир ҳазил қилиб менга ўқ уздию, ўқи хато кетди, энди менинг ҳам ҳазиллашгим келиб қолди...» Шундай деб, унинг кўз ўнгида мени нишонга олмоқчи бўлди. Маша унинг оёғи остига ўзини ташлади. – Тур, Маша, уят! – деб қичкирдим ғазаб билан, – сиз эса, жаноб, бечора аёлни таҳқирлашдан тўхтайсизми, йўқми? Отасизми, йўқми? – дедим. – Отмайман, – деб жавоб берди Сельвио, – мен мамнунман, чунки сени гангиганингни, қўрқанингни кўрдим; мен сени ўзимга қараб отишга мажбур этдим. Шу билан қаноатландим. Мени ёдингда тутасан. Сени ўз виждонингга топширдим, – деди. У чиқиб кетмоқчи бўлдию, аммо эшик олдида тўхтади ва ўқим тешган суратга қаради. Кейин қўзламасдан деярли суратга қараб бир ўқ уздида, чиқиб кетди. Хотиним ҳушидан кетиб ётарди, одамлар тўхтатишига журъат этолмасдан унга кўркиб қарашарди. У эшикка чиқиб извошлини чақирибди ва мен эс-хушимни йифиб олгунимча жўнаб кетибди».

Граф жим қолди. Шундай қилиб бир вақтлар бошланиши мени ҳайрон колдирган қиссанинг охирини билиб олдим. У қаҳрамон билан мен бошқа учрашолмадим. Айтишларига қараганда, Сельвио – Александр Ипсилантининг¹ қўзголони вақтида, этеристлар² тўдасига саркарда бўлган ва Скуляний³ ёнидаги урушда ҳалок бўлган экан.

¹ A. Ипсиланти (1792–1828). 1821 йилдаги Туркияга қарши курашган грек исёнчиларининг бошликларидан бири.

² Этеристлар – грек яширин этерий жамияти аъзолари, булар Греция мустақиллиги учун курашганлар.

³ Скуляний – Бессарабиянинг Прут дарёси бўйидаги шаҳарча.

БҮРОН

*Отлар ўтар тенадан,
Қалин қорларни босиб.
Турап, ҳов ана эхром
Ёлғиз құчогин очиб.*

*Бирдан құзгалар бүрон,
Көр изиллаб күчади;
Чаналарнинг устида
Қора қарга учади.
Фигони: бу – шум хабар!
Изгири чана отлари,
Зўрга йўлини кўрар,
Тикка бўлган ёллари.*

Жуковский

1811 йилнинг охирида, биз учун унутилмас бир замонда ўзининг Ненарадово деган мулкида хуштабиат Гаврила Гаврилович яшарди. У меҳмондўстлиги ва кўнгли очиқлиги билан бутун атрофга донг таратганди; кўни-кўшнилари емоқ, ичмоқ ва унинг рафиқаси билан беш тийиндан кўйиб қарта ўйнамоқ, баъзилар эса уларнинг ўн етти ёшга кирган, кадди қомати келишган, оппоққина қизлари Марья Гавриловани кўрмоқ учун дақиқа сайин уникига келишарди. У киз сербисот бўлганидан, кўпчилик уни ўзлари ёхуд ўғиллари учун кўзлаб кўйишганди.

Марья Гавриловна француз романлари таъсирида тарбияланган ва шу туфайли бирорвга хуштор ҳам бўлганди. Унинг севган кишиси ўз қишлоғига таътил олиб келган йўқсил бир армия офицери эди. Йигит ҳам зўр эҳтирос билан севарди ва қизнинг ота-оналари уларнинг бир-бирларига кўнгил қўйганликларини сезиб колиб, қизларига у йигит хақида, ҳатто хаёл қилишни ман этишганди. Йигитни эса ишдан бўшаган маъмурдан ҳам ёмонроқ қабул қилишарди. Бизнинг ошиқ-маъшуқларимиз бир-бирларидан мактуб олишар ва ҳар куни карагайзорда ёки кичкинагина эски бутхона ёнида кўришиб туришарди. У ерда улар бир-бирларини то ўлгунларича севишларига онт ичишар, тақдирларидан нолиб, турли фикр юритардилар. Шу кўйда бир-бирларига мактуб ёзиб, гаплашиб юриб, улар (бу мутлақ табиий нарса) қуйидаги фикрга келдилар: модомики биз бир-бirimizsiz яшай олмас эканмиз ва бераҳм ота-оналаримизнинг ихтиёри, бизнинг баҳтиёр

бўлишимизга монелик қилишаркан, у ҳолда биз уларнинг хоҳишлирига бўйсунмасакмикан? Табиийки, бу фикр, аввал йигитнинг миясига келган бўлса, Марья Гавриловнанинг романтик тасавурига ҳам бу жуда маъқул тушди.

Қиши кириб, уларнинг учрашувларига хотима берди. Аммо бирбирларига мактуб ёзиш яна ҳам кучайди. Владимир Николаевич хар мактубида қизга, унга содик бўлиш, махфий равишда никоҳланиш ва бирмунча вакт бирор жойга яшириниш, кейин келиб ота-онасининг оёғига йиқилиш, ота-оналари эса, албатта, уларнинг қаҳрамонона ишлари ҳамда ошиқ-маъшуқларнинг баҳтсизликларидан таъсиrlаниб, ҳеч шубҳасиз: «Болалар! Кучогимизга келинглар», деяжаклар деб таъкидлар эди.

Марья Гавриловна анча вақтгача иккиланиб юрди, қочиш учун тузилган бир талай режалар рад этилди. Ниҳоят, у розилик берди. Таин этилган куни у, кечки таомни емасдан, бош оғриги баҳонаси билан ўз хонасидан чиқмаслиги керак эди. Марья Гаврилованинг хизматкор қизи ҳам бу тил бириктиришда иштирокчи эди. Улар боққа чикиб, боғнинг орқа томонида тайёр турган чанага ўтириб, Ненарадоводан беш чақирим наридаги Жадрино қишлоғига, тўғри черковга кириб боришилари керак эди, у ерда уларни Владимир кутиб турарди.

Белгиланган кундан бир кун олдин Марья Гавриловна туни билан ухламай чиқди. Баъзи буюмларини йигиштириди, кийим-кечакларини тугди, нозик табиатли бир дугонасига ҳамда ота-онасига узундан-узун бир мактуб ёзди. Қиз улар билан энг таъсиrlи сўзлар ёзуб хайрлашар, ўзининг қилмишини муҳаббатнинг қайтариб бўлмас кучи билан изоҳларди. Мактубни, қадрли ота-онасининг оёқларига йиқилиш учун ижозат берилган вақтни умрининг энг кувончли лаҳзаси, деб ҳисоблаяжаги билан тутатди. Икки мактубнинг юзасига одобли ёзувлар ёзилган ва икки нафар ўртангандар юракнинг сурати солинган Тула муҳри билан муҳрлари-да, тонготар пайтида ўрнига ётди ва кўзи уйқуга кетди. Аммо уни кўрқинчли хаёллар дам ўтмай уйғотиб турарди. Унга гўё никоҳланишга жўнаб кетиш учун энди чанага ўтирай, деб турган пайтида отаси келиб ушлаб олиб, гоятда тез қор устидан судраб югуравмиш, коп-коронги, тубсиз бир ертўлага ташлармиш, унинг ҳам англаб бўлмас даражада юраги увишиб борармиш; тоғ Владимирни майса устида ранги оқарган, қонга бўялган ҳолда кўрар, у жон беради, чинкириб, тезроқ никоҳланиш тўғрисида ёлворармиш... бошқа хар турли чалкаш, маъносиз тушлар бирин-кетин ўтиб турарди. Ниҳоят, у одатдагидан кўра сўлғинроқ ва боши оғриб ўрнидан турди. Ота-она-

си унинг безовталанаётганини сездилар. Уларнинг эркалатувчи ғам чекишилари ва «Сенга нима бўлди, Маша? Бетоб эмасмисан, қизим?» деган саволлари унинг юрагини ўрттар эди. У ота-онасини хотиржам қилмоқ учун қўнглини хуш қилиб қўрсатмоққа тиришар, аммо буни ҳеч эплай олмасди. Кеч кирди. Ўз оиласида сўнгти кунни кечираётганини англаб юраги сикилди. Унинг мажоли куриб қолганди; атрофидаги шахслар ва бутун нарсалар билан яширин тарзда видолашди. Кечки таом келтирилди; унинг юраги тез-тез ура бошлади. У титроқ товуш билан таомга хуши йўқлигини баён этди, ота-онаси билан хайрлаша бошлади. Улар уни ўпид қўйишиди ва одатдагидек дуо килишиди, шунда қизнинг йиғлаб юборишига сал қолди. Хонасига киргач, ўзини каравотга ташлади-да, хўнграб йиғлаб юборди. Хизматкор қиз уни юпатди ва тетик бўлишга унади... Барча нарса тайёр эди. Ярим соатдан кейин Маша туғилиб ўсган уйини, ўз хонасини, сокин қизлик ҳаётини тарк этмоғи керак эди... Ташқарида эса бўрон турарди; шамол ғувиллар, дарчалар қимирлар ва тарақларди; барча нарсалар унга ваҳимали ҳамда қўрқинчли бўлиб кўринарди. Кўп ўтмай, уй ичи тинчланди ва сокин ўйкуга чўмди.

Маша шол рўмолга ўраниб, устидан қалин кўйлак кийиб, кўлига қутичасини кўтариб, орқа эшиқдан чиқди. Унинг ортидан хизматкор қиз иккита тугунни кўтариб келмоқда эди. Улар бокқа чикишиди. Бўрон тўхтамаганди; шамол ёш жиноятчи қизни тўхтатмоқчи бўлгандек, рўпарасидан уради. Улар зўрга боғнинг охирига етиб олишди. Йўл ёқасида уларни чана кутиб турарди. Совуқ қотган отлар тек туришмасди. Владимирнинг извошчиси чана шотисининг ёнида отларни тутиб турарди. У ойимқиз билан унинг хизматкорига чанага ўтиришга ва қутича ҳамда тугунларни жойлашга қарашди. Сўнгра жиловни тутганича отларни ҳайдаб кетди. Ойимқизни тақдир тақозоси ва извошли Терёшканинг маҳоратига топшириб, энди ёш ошиғимиздан сўзлайлик.

Владимир кун бўйи у ёқдан-бу ёқка югурди, эрталаб Жадрино руҳонийсининг олдига бориб, уни зўрга кўндириди, кейин ён-атрофдаги қўшнилар ичидан гувоҳ қидиргани кетди. У энг аввал мурожаат этган киши, қирқ ёшлардаги, ишдан истеъфога чиқсан Дравин, жон деб рози бўлди. Дравин, бу саргузашт ўтмиш замонларни ва гусарларнинг шўхликларини ёдга туширади, деб айтди. У Владимирни тушликка таклиф қилиб олиб қолди ва гувоҳларнинг қолгани топилади, деб таскин берди. Ҳақиқатан ҳам, тушлик тугаши билан мўйловли ва этигига темир тепки тақсан Шмит билан капитаннинг яқиндагина қисмига кирган ўн олти яшар ўғли кириб келди. Улар Владимирнинг таклифини

қабул қилибгина қолмадилар, балки унинг учун ўз жонларини фидо этишга тайёр эканликлариға онт ичдилар. Владимир қувонганидан уларни қучоқлади ва ҳозирлик кўргани уйига кетди.

Кеч кириб, қоронғилашганига анча бўлган эди. У ўзининг ишончли Терёшкасига муфассал ва мукаммал топшириқ бериб, тройкаси¹ билан Ненародовога юборди, ўзи учун эса бир отли кичкина чана қўшириб, извошчисиз ёлғиз Жадринога қараб кетди, у ерга икки соатлардан ке-йин Марья Гавриловна етиб келарди. У йўлни биларди, йўл ҳам йиги-ма дақиқалик эди.

Бироқ Владимир қишлоқдан энди дала йўлига чиққан ҳам эдики, бирдан шамол туриб, шундай бўрон бошландики, у атрофдаги ҳеч нарсани кўролмай қолди. Бир онда йўл йўқолди. Атроф оппоқ қор парчалари учиб юрган лойқа, сарғиш ва қоронғилик ичида йўқ бўлиб кетди: осмон ер билан жисплашди. Владимир далага чиқиб қолганди ва яна йўлга тушиб олиш учун бехуда ҳаракат қиласарди; от ўзи хоҳлаган тарафга юриб борар, гоҳ кор уюмига бориб тақалар, гоҳ чуқурга тушиб кетарди; чана эса ҳар онда ағдариларди. Владимир ҳар нима бўлса ҳам йўлни йўқотмасликка ҳаракат қиласди. Бироқ унга вақт ярим соатдан ҳам ошибб кетгандек кўринди, аммо у ҳали Жадринонинг ўрмонзорига етганича йўқ. Яна ўн дақиқа вақт ўтди; ўрмонзор ҳамон кўринмасди. Владимир чуқурликлар кесиб ўтган даладан кетиб борарди. Бўрон тинмас, осмон эса ойдинлашмасди. Отнинг туёқлари тола бошлади, Владимирни эса белига қадар кор босган, ундан дўлдек-дўлдек тер оқарди.

Нихоят, у бошқа тарафга қараб кетаётганини билди. Владимир отини тўхтатди-да, ўйлай, хотирлай бошлади ва ўнг тарафга қараб юриш керак, деган қарорга келди. Ўнг тарафга қараб юрди. Унинг оти зўрга қадам ташларди. Йўлга чиққанига бир соатдан ошганди. Жадринога яқин қолган бўлса керак. Бироқ у ҳамон юриб борар, даланинг эса охир кўринмасди. Ҳамма ер қор уюмлари ва чуқурликлардан иборат эди; чана ҳар онда ағдарилар, у кўтариб қўярди. Вақт ўтиб борарди, Владимир қаттиқ ташвишланди.

Нихоят, бир томондан нимадир қорайиб кўринди. Владимир ўша ёққа қараб бурилди. Яқинроқ борганида, ўрмонни кўрди. Худога шукр, энди яқин қолди, деб ўйлади у. Дарров таниш йўлга тушиб олмоқ ёхуд уни айланиб ўтмоқ ниятида, ўрмонзор ёқалаб кетди; Жадринони шу ўрмонзорнинг ортида деб ўйлаган эди. Кўп ўтмай йўлни топиб олди ва

¹ Тройка – учта от қўшилган чана.

киш ялангочлаб қўйган қоронғи дарахтзор ичига кирди. Бу ерда шамол қаттиқ эмас, йўл анча текис эди. От ғайратга кирди, Владимирнинг хам кўнгли тинчиidi.

Бироқ у тўхтамай борар, бораверар, Жадрино эса қўринмас, ўрмонзор сира тугамасди. Владимир нотаниш ўрмонга кириб қолганини кўриб қўрқиб кетди. Уни умидсизлик босди. У отга қамчи урди, бечора жонивор йўргалади, бироқ қўп ўтмай яна секинлашди ва баҳтсиз Владимирнинг ҳар қанча ҳаракатига қарамай, ўн беш дақиқалардан кейин аста-аста қадам ташлай берди.

Дарахтлар аста-секин сийраклаша борди, Владимир ўрмондан чиқди; Жадрино қўринмасди. Вақт ярим кечага бориб қолган бўлса ке-рак. Унинг кўзларидан ёш юмлади, аммо у таваккал дея юра кетди. Ҳаво тинчланиб, булувлар тарқалди, унинг олдидা тўлқинли оппоқ ги-лам ёйилиб ётарди. Кеча анча ёруғ эди. У яқин бир ерда тўртта-бешта кулбадан иборат бир қишлоқни кўрди. Владимир ўша ёқقا қараб юрди. Биринчи уйнинг ёнидаёқ чанадан сақраб тушди-да, уйга яқинлашиб деразани тақиллатди. Бир неча дақиқадан кейин дарча очилиб, ундан бир чолнинг оппоқ соқоли кўринди.

- Сенга нима керак? – деб сўради чол.
- Жадрино олисми? – деди Владимир.
- Ҳа, ха.
- Олис эмас, ўн чақиримча келади.

Бу жавобни эшигтан Владимир, худди ўлимга хукм қилинган киши-дек сочини чанглаб қимирамай қолди.

– Ўзинг қаердансан? – деб давом этди чол. – Саволларга жавоб бе-ришга Владимирда мадор қолмаган эди.

– Чол – деди у, – Жадринога етиш учун менга от топиб бера оласан-ми?

- Бизда от нима қилсин? – деб жавоб берди қария.
- Ҳеч бўлмаса битта йўлбошловчи топилмайдими? – Сўраганини бераман, – деб гапида давом этди Владимир.
- Шошмачи, – деди чол дарчани ёпа туриб, – ўғлимни чақираман, у сени кузатиб боради. – Владимир кутди.

Бир дақика ўтар-ўтмас яна деразани тақиллатди. Дарча очилиб, соқол кўринди.

- Нима дейсан, – деди у.
- Ўғлинг қани?! – деб сўради Владимир.
- Ҳозир чиқади, кийиняпти. – Совуқ қотдингми? Кир, исиниб ол, – таклиф қилди қария.

– Раҳмат, ўғлингни тезроқ чикар, – деди Владимир.

Дарвоза ғижирлаб очилди. Қўлига гаврон ушлаган йигит чиқиб, олдиндаги қор тепаликлари беркитиб кетган йўлни гоҳ кўрсатиб, гоҳ ахтариб йўлга тушди. Владимир ундан:

– Соат неча бўлдийкин? – деб сўради.

– Тонг отишига оз қолди, – деб жавоб берди йигит.

Шундан кейин Владимир жим бўлиб қолди.

Улар Жадринога етиб боргандарида хўроздар қичқирав, тонг отиб қолганди. Черков берк эди. Владимир йўлбошловчининг ҳақини берди-да, руҳонийнинг кулбасига борди. Ҳовлида унинг тройкаси кўринмасди. Уни қандай шум хабар кутарди?

Бироқ хуштабиат Ненарадово зодагонларига келайлик ва уларда нималар содир бўлаётганини кўрайлик.

Хеч бир нарса бўлганий йўқ.

Чолу кампир эрталаб уйкудан туриб, меҳмонхонага чиқдилар; Гаврил Гавриловичнинг бошида қалпоқ, эгнида тулки мўйнасидан тикилган камзул, Прасковья Петровнанинг сиҳатини ва қандай ухлаганини билмоқ учун хизматчи қизни киргизди. Хизматчи қиз қайтиб чиқиб хонимнинг яхши ухламаганини, бироқ эндиликда анча енгиллашганини ва ҳозир меҳмонхонага чиқажагини билдириди. Дарҳақиқат, эшик очилиб Марья Гавриловна кирди, ота-онаси билан кўришмоқ учун уларнинг олдига келди.

– Соғлигинг қалай, Маша? – деб сўради Гаврил Гаврилович.

– Яхши, отажон, – деб жавоб берди Маша.

– Кеча сенга ис текканми дейман, Маша, – деди Прасковья Петровна.

– Эҳтимол, ойижон, – деб жавоб берди қиз.

Кун омон-эсонлик билан ўтди, бироқ кечаси Машанинг тоби қочди. Табиб келтиргани шахарга одам юбордилар. Табиб кечкурун етиб келди ва бетобни алаҳлаган бир ҳолатда кўрди. Шиддатли иситма бошланди ва бечора бемор икки ҳафтача нари бориб, бери келди.

Қочмоқ ниятидан уйдагилар бехабар эди. Қочиш куни кечаси ёзган мактублари ёндириб юборилган; хизматчи қиз эса хўжайнларининг газабидан кўркиб, хеч кимга хеч нарса демас эди. Руҳоний, истеъфога чиқсан зобит, мўйловдор ер ўлчовчи ва ёш ҳарбий жуда камтарин эдилар, бу бежиз эмасди. Извошли Терёшка, ҳатто қайфи ошганида ҳам оғзидан ортиқча сўз чиқармасди. Шундай қилиб бу сир, воқеада иштирок этган олти-етти кишининг ичидаги сақланиб қолган

эди. Аммо сирни Марья Гавриловнанинг ўзи тинмай алаҳлаган вактда очиб кўйди. Шундай бўлса-да, унинг сўзлари шу қадар чалкаш эди-ки, ёнидан сира силжимай ўтирган онаси, фақат қизининг Владимир Николаевични жудаям яхши кўрганини ва бетоблигига ҳам шу муҳаббатнинг сабабчи бўлганини англади. У эри ва баъзи бир кўни-кўшнилари билан маслаҳатлашди ва ниҳоят, ҳаммалари бир оғиздан Марья Гавриловнанинг тақдири шу экан, қисматни олдиндан билиб бўлмайди, камбағаллик айб эмас, киши бойлик билан эмас, балки одам – одам билан яшайди ва ҳоказо деган қарорга келдилар. Биз ўз қилмишларимизни оқлаш учун сўз тополмаган вақтларимизда, одобахлоққа доир мақоллар кўп фойдали бўлади.

Бу орада ойимкиз тузала бошлади. Гаврил Гавриловичнинг уйига Владимир анчадан буён келмасди... У файритабий равишда қабул этилганидан, тортиниб қолган эди. Унинг олдига одам юбориб, қутимаган бир бахтни, яъни, никохга розилик беришганини айтишди. Бироқ Ненарадово зодагонлари ўз даъватларига ундан савдойиларча ёзилган бир мактуб олиб, кўп ҳайратда қолдилар!.. Владимир ўз мактубида, бундан буён уларнинг уйларига оёқ босмаяжагини айтиб, бирдан-бир умиди ўлим бўлган бир бахтсизни унутишларини сўрайди. Бир неча кундан кейин билдиларки, Владимир армияга жўнаб кетибди. Бу ҳодиса 1812 йилда содир бўлганди.

Бу ҳақда аста-секин согайиб келаётган Машага узоқ вақтгача айтишга журъат этолмай юрдилар. У Владимирни ҳеч оғзига олмасди. Бир неча ойлардан кейин ойимкиз Бородино жангига маҳорат кўрсатганлар ва оғир ярадор бўлганлар орасида Владимирнинг исмини кўриб, хушидан кетди ва ота-онаси яна иситманинг қайтарилишидан кўрқдилар. Лекин, Тангрига шукрки, хушсизликнинг оқибати баҳайр бўлиб чиқди.

Ойимкиз бошқа бир мусибатга учради: Гаврил Гаврилович вафот этди, бутун мулкини қизига мерос қолдирди. Аммо Машага мерос тасалли бермасди. У Прасковья Петровна билан чин юрақдан қайгуарди ва онасидан бир умр ажралмасликка онт ичди; икковлари ҳам аччик хотиралар ўрни бўлмиш Ненарадовони ташлаб, ...даги мулкларига кўчиб кетишиди.

Бу ерда ҳам севимли ва бадавлат қиз атрофида йигитлар айланишар, бироқ у ҳеч бирини зигирча бўлса-да, умидвор килмасди. Онаси баъзан уни ўзига ёстиқдош топишига кўндиromoқчи бўларди. Марья Гавриловна бошини чайқаб, хаёлга чўмиб кетарди. Владимир энди хаёт эмас эди: у французларнинг Москвага киришлари олдидан вафот

этган, унинг хотираси Маша учун муқаддас бўлиб қолганди, ҳар ҳолда уни хотирга соладиган бутун нарсалар: бир вактлар у ўқиган китоблар, унинг учун чизилган расмлар, кўчириб берган шеър ва ноталарининг барчасини эҳтиёткорлик билан сақлар эди. Бу воқеалардан хабардор бўлган қўшнилар унинг сабрига хайрон қолишар ва иффатини сақлаб келаётган ажойиб Артемизанинг¹ қайғули садоқатини енгажак бирон қаҳрамон йигитни интизорлик билан кутишарди.

Шу орада уруш шон-шараф билан якун топди. Бизнинг қўшинимиз хориждан қайтиб кела бошлади. Халқ уларни қаршиламоқ учун кўчаларга чиқарди. Мусиқа ғалаба маршларидан: «Яшасин Генрих IV», Тироль вальсларини ва Жаконда арияларини чаларди. Сафарга ўсмир чоғларида кетган офицерлар жанг майдонларида улғайиб, хоч тақиб келмоқда эдилар. Аскарлар ҳар гапнинг орасига олмон ва француз сўзларини қўшиб, ўзаро хушчақчақ сухбат қуришарди. Бу сира ҳам унудилмас вакт эди! Шон-шуҳратли ва қувончили дамлар эди! Ватан деган сўз эшитилганида руснинг қалби нақадар кучли уради! Учрашув пайтида оқкан кўз ёшлари нақадар лаззатли эди... Халқнинг ғурури ва подшога муҳаббати нақадар яқдиллик билан изхор этиларди!.. Унинг учун бу қандай баҳтли онлар эди!

Аёллар, айниқса рус аёллари у замонларда тенгсиз саналарди. Уларнинг одатдаги совуқконликларидан асар ҳам қолмаган, айниқса голибларни қарши олишда: «Ур-ҳо! Ур-ҳо!» деб қичқиришлари нақадар марокли эди.

У замондаги офицерлардан қай бири рус аёлига энг яхши, энг кимматли мукофот ўзи эканини тан олмаган?

Шу порлоқ бир замонда Марья Гавриловна онаси билан губернада яшарди ва иккала пойтахтда² қўшинларнинг қайтиб келиши шарафига бўлаётган тантанани кўрмасди. Лекин вилоят ва қишлоқларда умумий қувонч, балки яна кучлироқ бўлгандир. Бу ерларда бир офицернинг пайдо бўлиши, унинг учун ҳақиқий тантана, унинг ёнида фрак кийган ошиқларнинг эса ҳолига вой эди.

Марья Гавриловнанинг бепарволигига қарамай, унинг атрофини куёвлар ўраб турганини айтиб ўтган эдик. Аммо унинг саройида ярадор гусар, полковник Бурмин пайдо бўлганидан кейин ҳаммаси орқага чекинди. Бурминнинг кўкрагида Георгий нишони бўлиб, ўша ерли

¹ Артемиза – юонон асотирларида – Юпитернинг қизи ва Апполоннинг синглиси. Ой, ов ва ўрмон худоси; иффатли қиз.

² Илгари вактларда Петербург билан бир қаторда Москва ҳам пойтахт ҳисобланарди.

қизларнинг айтишларича, ажойиб сўлимлиги бор эди. Ёши йигирма олтиларда бўлиб, у Марья Гавриловна қишлоғининг ёнида бўлган ўз мулкига таътил олиб келганди. Марья Гавриловна унга бошқача муносабатда эди. У билан танҳо қолганида одатдаги ўйчанлигини тарқ этарди. У полковникка карашма қиласи деб айтиб бўлмасди; бироқ унинг қилиқларини кўрган шоир:

Бу муҳаббат бўлмаса нима?

дерди.

Ҳақиқатан ҳам Бурмин жуда ёқимли, аёлларга ёқадиган, одобли, сермулоҳаза, бетакаллуф, хушчакчақ бир йигит эди. Унинг Марья Гавриловна билан муомаласи содда ва эркин бўлиб, Марья Гавриловна нима демасин ва нима қилмасин, Бурминнинг қалби ва назар-эътибори ундан четда қолмасди. У мўмин-қобил, ахлоқли кўринарди, бироқ унинг илгари жуда ҳам шўх бўлгани ҳақида ривоятлар юарарди, бу – Марья Гавриловнанинг фикрича унинг қимматини туширмасди, ойимқиз (умуман ҳамма ёш жувонлар сингари) характернинг жасоратли ва жўшқин эканини кўрсатадиган шўхликларни мамнунлик билан кечириб юборарди.

Аммо бундан ҳам ортиқ... унинг мулойимлигидан, ёқимли сўзларию сўлимлигидан, боғлаб қўйилган қўлидан ҳам кўра, ёш гусарнинг камгаплиги қизнинг фикру хаёlinи ўзига тортарди. Ўзининг полковникка ёққанини қиз эътироф қилмай қолмасди, эҳтимол у ҳам ақли, тажрибаси билан ўзининг қизга ёққанини сезган бўлса керак, аммо шу маҳалгача қиз, унинг оёқларига йиқилиб, муҳаббатини изҳор этганини негадир кўрмади? Уни нима тўхтатиб турибди экан? Тортинчоқликми, ғурур ёки айёр бир қизнинг нозими? Бу, Марья Гавриловна учун бир муаммо эди. Кўп ўйлаб кўргач, қиз унинг бирдан-бир сабабини уятчаликда деб топиб, унга қўпроқ эътибор беришга ҳамда вазиятга қараб, ҳатто эркалик қилишга жазм этди. У ногаҳоний бир вақтни мўлжаллар ва романтик ишқнинг баён этилиш пайтини сабрсизлик билан кутарди. Қандай сир бўлмасин, ҳамма вақт аёл қалбини эзади. Унинг тутган йўли орзу этилган муваффакиятларни келтирди: Бурмин хаёлга чўмди, унинг қора кўзлари Марья Гавриловнага шу қадар ёниб боқдики, хал қилувчи пайт этиб келгандек бўлди. Қўни-қўшнилар тўй ҳақида узилкесил ҳал бўлган масаладек гапиришардилар, меҳрибон Прасковья Петровна эса, ниҳоят қизининг ўзига муносиб эр топганига қувонарди.

Бир куни кампир меҳмонхонада қарта билан фол очиб ўтирганида Бурмин кириб келди-да, Марья Гавриловнани сўради.

– У боғда, – деб жавоб берди кампир, – олдига боринг, мен сизларни шу ерда кутаман.

Бурмин кетди, кампир эса бир чўқиниб: қани энди, иш бугуноқ битсайди, деди.

Бурмин Марья Гавриловнани ҳовуз бўйида, мажнунтол тагидан топди, у қўлида китоб ушлаган, оппоқ кийинган, худди романнинг ҳақиқий қаҳрамонига ўхшарди. Бир-икки саволлардан кейин Марья Гавриловна сухбатни жўрттага давом эттирмади, шунинг билан икки орадаги довдирашни кучайтирмоқчи ва ундан факат тўсатдан ҳамда узил-кесил муҳаббат эълон этилиши билан кутулмоқчи бўлди. Дарҳақиқат, шундай бўлди: Бурмин ўзининг қийин вазиятга тушиб қолганини сезиб, юрак дардини очмоқ учун анчадан буён фурсат ахтарганини билдириди ва бир озгина эътибор беришини сўради. Марья Гавриловна китобни ёпиб, розилик ишорати ўлароқ, ерга қараб ўтириди.

– Мен сизни севаман, – деди Бурмин, – мен сизни зўр эҳтирос билан севаман. (Марья Гавриловна қизариб кетди ва бошини яна ҳам пастроқ эгди). – Мен сизни ҳар куни кўрмоқ ва сўзингизни эшитмоқ каби ёқимли одатга берилиб, эҳтиётсизлик қилибман. Энди тақдиримга қарши чиқиш вақти ўтди. Сизнинг хотирангиз, гўзал, мислсиз жамолингиз бундан буён ҳаётимнинг изтироби ва севинчи бўлиб қолажак. Аммо мен даҳшатли бир сирни очишим ва ўртамизга ўтиб бўлмайдиган фов қўйишим керак.

– Бу фов ҳамма вақт бор эди, – деб унинг сўзини дархол бўлди Марья Гавриловна, – мен ҳеч қачон сизнинг рафиқангиз бўла олмасдим.

– Биламан, – деб жавоб берди секингина Бурмин, – ўтмишда сиз бир кимсани севганингиздан хабарим бор, лекин унинг ўлими ва сиз тутган уч йилги мотам... Марҳаматли, севимли, Марья Гавриловна!.. Энг сўнгги умидимдан маҳрум қилишга уринманг. Мен учун баҳт яратишингиз мумкин эканлиги ҳақидаги фикр... сўзламанг, Худо ҳақи, сўзламанг. Сиз мени азобда куйдиряпсиз. Шундай, мен биламан, сезаман, рафиқам бўла олардингиз, аммо мен бадбаҳт... уйланганман!

Марья Гавриловна ҳайратда қолиб, унга қаради.

– Мен уйланганман, – деб давом этди Бурмин, – уйланганимга мана тўрт йил бўлдию, аммо рафиқамнинг ўзи ким, қаерда ва умуман, уни кўйармикинман, билмайман!

– Нима дедингиз? – деб таажжубланди Марья Гавриловна, – жуда ҳам қизик! Давом этаверинг, мен кейинроқ айтиб бераман... давом этаверинг, марҳамат.

– 1812 йилнинг бошида, – деди Бурмин, – Вильнога кетаётган эдим, у ерда бизнинг полкимиз турарди. Бекатга анча кеч келиб, тезроқ арава қўшишни буюрдим, шу топда бирдан даҳшатли бўрон турди, бекат назоратчиси ва извош бўрон пасайганидан кейин жўнашга маслаҳат беришди. Мен кўндим, аммо мени қандайдир англаб бўлмайдиган хавотирлик босди, гўё менга бир киши кетавер, деб тургандек туюлди. Бу орада бўрон босилмасди, тоқатим тугади-да, яна от қўштириб, бўронда йўлга тушдим. Извошли йўлни уч чақиримча қисқартираман деб, дарё ёқалаб кетди. Қирғоклар қорнинг остида кўринмай кетганди. Извошли дарёдан тўғри йўлга чиқадиган жойдан ўтиб кетибди, танимаган бир ердан чиқиб қолибмиз. Бўрон ҳамон босилмас эди; бир ерда чироқ кўринди, ўша томонга бурилишни буюрдим. Қишлоққа кириб келдик, ёғочдан солинган черковда чироқ милтилларди. Черков очик эди, панжаранинг ортида бир нечта чана турарди; черковнинг олдинги бўлмасида бир неча киши юриб турарди. Бир қанча товушлар: «Бу ёқقا!» – деб қичқиради. Извошига черковнинг ёнига бориб тўхташни амр этдим... Кимдир: «Шу маҳалгача қаерда қолдинг, келин хушидан кетиб қолди, руҳоний нима қилишини билмаяпти, биз қайтиб кетмоқчи эдик. Қани, кир тезроқ» деди. Мен индамай чанадан сакраб тушдимда, икки-учта шам билан сал-пал ёритилган черковга кирдим. Қиз черковнинг қоп-коронғи бурчагида, ўриникда ўтиради; бошқа бир киз эса унинг елкасини зўр бериб уқаларди. «Худога шукр» деди буниси, – энди етиб келдингиз-а. Сал бўлса кизгина ўлиб қоларди. Кекса руҳоний менга яқин келди-да: «Бошлашга рухсат этарсиз!» деб сўради. Мен паришон бир ҳолда: «Бошлайверинг, ота, бошлайверинг» дедим. Қизни ўрнидан турғаздилар. Қиз менга анча дуруст кўринди... Англаш қийин, кечириб бўлмайдиган бир енгилтакли... Мен унинг ёнига, стол олдига ўтиб турдим. Руҳоний шошар, уч киши ва хизматкор қиз – келиннинг қўлтиғидан тутиб туришарди. Бизни никоҳладилар. «Ўпишингиз» дешишди бизга. Хотиним ўзининг сўлғин юзини мен томон ўгирди. Уни энди ўпмоқчи бўлиб тургандим, у «Оҳ, у эмас! У эмас!» деб хушидан кетиб йиқилди. Гувоҳлар, кўркув тўла қўзлари билан менга боқдилар. Мен орқамга бурилдим-да, ҳеч қандай тўсикқа учрамай, черковдан чиқдим, извошга чиқиб: «Ҳайда!» деб бақирдим.

– Эй, Парвардигор! – деб қичқириб юборди Марья Гавриловна, – бечора рафиқангизнинг бошига нималар тушганини ҳанузгача билмайсизми?

– Билмайман, – деди Бурмин, – никоҳланган қишлоқнинг номини ҳам билмайман, қайси бекатдан чиққаним ҳам ёдимдан кўтарилди.

У вақтлар бу жиноий шўхликларга шу қадар оз аҳамият берардимики, хатто черковдан бир оз узоқлашгач, ухлаб қолибман, эртасига тонгда, учинчи бекатга бориб етганимда уйғонибман. Ўша вақтдаги қаролим сафарда вафот этди, шунинг учун энди, инсофсиз бир рашида ҳазиллашган ва энди зўр интиқом олган ўша қизни топишга ҳам умидвор эмасман.

– Ох, Тангрим, ох, Тангрим! – деди Марья Гавриловна, унинг қўлини ушлаб олиб. – Ўша сиз эдингизми? Ҳали ҳам мени танимай турибсизми?

Бурминнинг вужудини қалтироқ босди, ранги оқариб кетди... ва унинг оёқларига йиқилди...

ТОБУТСОЗ

*Кўринмасин ҳар кун тобутлар,
Сочлари оқ кекса дунёнинг.*

Державин

Тобутсоз Адриан Прохоровнинг охирги лаш-лушлари ўлиқ ташийдиган аравага уюлган ва бир жуфт ориқ от Басмандан Никита кўчасига тўртинчи марта қатнамоқда эди, тобутсоз бутун уй ичи билан шу ерга кўчиб келди. У дўконни ёлиб, эшигига уй сотилади ёки ижарага берилади, деган эълонни қокиб қўйди-да, янги кўчиб борган жойига яёв кетди. Хаёлини кўпдан буён ўзига жалб қилиб келган ва ниҳоят, анчагина пулга сотиб олган кичкина сариқ уйига яқинлашганида, кекса тобутсоз юраги қувонмаётганини сезиб, таажжубланди. У нотаниш остонадан ўтиб, ўзининг янги уйидаги бесаранжомликни кўрар экан, ўн саккиз йил мобайнида барча буюмлари гоятда тартибли жойлашган эски кулбасини эслаб «ух» тортди. Имиллаб ҳаракат қилаётгандар учун иккала қизини ва хизматкор аёлни коиди ва ўзи уларга ёрдамлашди. Кўп ўтмай тартиб ўрнатилди; Исонинг сурати, идиш-товоқ қўйилган жавон, стол, оромкурси ва каравот уйдан ўzlари учун ажратилган жойларни ишғол қилдилар; ошхона ҳамда меҳмонхонага хўжайнинг нарсалари: ҳар хил ранг ва ҳажмдаги тобутлар, шунингдек, мотам шляпалари, ридо ва машъаллар қўйилган жавонлар жойланди. Дарвозанинг тепасига, боши пастга қаратилган машъал ушлаган хушқомат севги тангрисининг сурати солинган ҳамда «Бу ерда оддий ва бўялган тобутлар сотилади, турли-туман матолар билан жихозланади, шунингдек, ижарага берилади ва эскилари таъмирланади» деб ёзилган эълон тахтаси осилди. Қизлар ўз хоналарига кириб кетишли. Адриан ўз уйини бир айланиб чиқиб, деразанинг олдига ўтирди ва самовар қўйишни буюрди.

Шекспир ҳамда Вольтер Скоттнинг ўз гўрковларини хушчақчақ ва ҳазилкаш кишилар сифатида тасвирилаганлари ва бу қарамақаршиликлар билан бизнинг тасаввуримизга янада қаттикроқ таъсир килиш ниятида бўлганлари маърифатли ўқувчиларга маълум. Биз ҳақиқатга нисбатан ҳурмат сақлаганимиз туфайли уларга эргаша олмаймиз ва тобутсознинг хулқи унинг кўнгилсиз касбига муносиб эди, деб эътироф этишга мажбурмиз. Адриан Прохоров одатда тумшайган ва ўйчан киши эди. У факат қизларини ишсиз, деразадан ўткинчиларга

қараб ўтирганини кўрганида, уларни койимоқ ёки ясаган буюмiga мухтоj бўлиш баҳтсизлигига (баъзан эса лаззатига) дучор кишилардан ўз молига юқори баҳо сўраш учунгина жимликни бузарди. Шундай қилиб, Адриан дераза олдида ўтириб еттинчи пиёла чойни ичаркан, одати бўйича ғамгин бир ўйга толганди. Бундан бир ҳафта муқаддам, у хизматдан бўшаган бир иш юритувчини кўмиш маросими куни, дарвозага яқинлашиб қолган бир вактда қуийб юборган жала ҳақида ўйларди. Ўшанда ёмғирдан кўп ридолар буришиб, ўнлаб шляпалар қийшайиб қолганди. У харажатлар бўлишини олдиндан кўрган, негаки, тобутга доир аллақачонги безаклар, буюмлар ишдан чиққанди. Тобутсоз заараларни бир йилдан буён ўлим тўшагида ётган кекса савдогар аёл Трюхина ҳисобидан тўлдираман, деб умид қиларди. Лекин Трюхина Разгуляйда ўлим топарди, шунинг учун ҳам Прохоров унинг меросхўрлари ўз ваъдаларига қарамай, шундай узоқ жойга одам юборишдан эрин-масмиканлар ва яқинроқдаги пудратчига бериб қўймасмиканлар, деб кўрқарди.

Бу ўйлар тўсатдан эшикнинг уч марта ғалати тақиллаши билан бузилди: «Ким у?» деб сўради тобутсоз. Эшик очилди ва уйга бир қарашдаёқ хунарманд олмон экани билиниб турган бир одам кирди ва очиқ чехра билан тобутсознинг олдига келди.

– Кечирасиз, хурматли қўшни, – деди у, биз ҳамон эшитганимизда ўзимизни кулгидан тўхта олмайдиган рус лаҳжаси билан, – кечирасиз, мен сизга ҳалакит бердим... Мен тезроқ сиз билан танишиб олишни истадим. Мен этикдўзман, исмим Готлиб Шульц, мен кўччанинг нариги тарафида, худди деразангизнинг рўпарасидаги уйда тураман. Эртага уйланганимга йигирма беш йил тўлиши муносабати билан зиёфат бермоқчиман, қизларингиз билан бирга дўстона меҳмон бўлишингизни илтимос қиласман.

Таклиф мамнуният билан қабул қилинди. Тобутсоз этикдўзни ўтиришга ва бир пиёла чой ичишга таклиф этди, шунда Готлиб Шульцнинг очиқкўнгиллиги ортидан улар тез орада дўстона сухбатлаша бошлидилар.

– Жанобларининг савдо-сотиклари қалай? – деб сўради Адриан.

– Э, хе-хе, – деб жавоб берди Шульц, – гоҳ ундоқ, гоҳ бундок. Зорланмайман. Гарчи, молим сизникidek бўлмаса ҳам, тирик одам этиксиз ҳам яшай олади, аммо ўлик тобутсиз ёта олмайди.

– Бу чин ҳақиқат, – деди Адриан, – бироқ тирик этик сотиб олишга пули бўлмаса, жаҳлингиз чиқмасин, оёқяланг ҳам юра беради, аммо бечора ўлик-чи, бепулга бўлса ҳам тобут олади.

Шу тарзда уларнинг сухбати яна бир қанча вақт давом этди. Нихоят, этиқдўз ўрнидан турди ва ўз таклифини қайта айтиб, тобутсоз билан хайрлашди.

Эртасига роса соат ўн иккида тобутсоз ва унинг қизлари, янги сотиб олинган ҳовлиниң эшигидан чиқиб, кўшниникига қараб йўл олишди. Мен бу сафар ҳозирги романчиларимиз тарафидан қабул қилинган одатдан четга чиқиб, Адриан Прохоровнинг русча чопонини ёхуд Акулина билан Дарьянинг оврўпача кийимларини тасвиirlаб ўтирумайман. Аммо бир нарсани айтиб ўтсам ортиқча бўлмас, деб ўйлайман, ҳар икки қиз сариқ шляпа ва қизил бошмоқ кийдилар, бу хол уларда фақат тантанали пайтлардагина рўй берар эди.

Этиқдўзниң тор уйи, кўпчилиги ҳунарманд олмонлар, уларнинг рафиқалари ва шогирдларидан иборат меҳмонлар билан тўла эди. Рус амалдорларидан камтар унвонига қарамай, хўжайиннинг алоҳида хайриҳоҳлигини ўзига карата билган миршаб, финлик Юркагина бор эди. У шу унвон остида, худди Погорельскийнинг почтальонига¹ ўхшаб, чин ихлос ва ҳаққоният билан роса йигирма беш йил хизмат қилди. Қадимий пойтахтни ҳароб этган ўн иккинчи йилги ёнғин, унинг сариқ будкасини ҳам йўқ қилди. Лекин душман қувилган заҳотиёқ, унинг ўрнига кулранг, дорик услубидаги оқ устунли янгиси пайдо бўлди ва Юрка устида со-вут, кўлида чопки билан унинг олдида у ёқдан-бу ёққа юра бошлади. У Никита дарвозаси ёнида яшайдиган олмонларнинг кўпига билан ошна эди: ҳатто улардан баъзилари якшанбадан душанбага ўтар кечаси унинг миршабхонасида тунаб қолган вақтлари ҳам бўлган. Адриан ўша заҳотиёқ у билан танишди, чунки вақти келиб бу одамга иши тушиши мумкин эди, меҳмонлар емак столига ўтиришаркан, улар ёнма-ён жой олдилар. Жаноб Шульц, Шульц хоним ва уларнинг ўн етти яшар қизи Лотхен меҳмонлар билан бирга овқаланишар, уларга мулозамат қилиб, ошпаз аёлга ёрдамлашар эди. Пиво пайдар-пай келиб турар, Юрка тўрт кишининг овқатини пақкос туширас, Адриан эса ундан қолишмасди; қизлари бўлса одоб сақлаб, тортиниб ўтиришарди; олмон тилида сўзлашиб тобора авжга минарди. Бирдан хўжайн улардан эътибор беришларини сўради ва шампан шишиасининг оғзини очиб, қаттиқ овоз билан русчалаб: «Мехрибон Луизамнинг саломатлиги учун!» деди. Шампан виноси кўпирди. Хўжайн қирқ яшар атрофидаги рафиқасининг тиник юзини муҳаббат билан ўпди, меҳмонлар чувиллашиб меҳрибон Луиза-

¹ Антоний Погорельскийнинг «Лафертовская маковница» номли қиссасидаги персонажлардан бири.

нинг саломатлиги учун ичдилар. «Севикли меҳмонларимнинг соғлиги учун!» деди хўжайн, иккинчи шишанинг оғзини очди ва меҳмонлар қадаҳларини бўшатиб, унга ташаккур билдиришди.

Шундан сўнг саломатлик учун қадаҳлар бирин-кетин кўтарила берди. Ҳар бир меҳмоннинг соғлиги учун алоҳида-алоҳида ичишиди, Москванинг ва бир қанча олмон шаҳарларининг тинчлиги, барча цехларнинг¹ осойишталиги, шунингдек, ҳар бир цех учун алоҳида-алоҳида ичдилар. Усталар ва шогирдларнинг соғлиги учун ҳам қадаҳ кўтаришди. Адриан астайдил ичди ва шу қадар кайф қилдики, ҳатто ўзи ҳазил қилиб бир нарсанинг осойишталиги учун қадаҳ кўтаришни таклиф қилди. Тўсатдан меҳмонлардан бири, семиз нонвой қадаҳ кўтариб хитоб қилди:

– Биз ким учун ишласак ўшаларнинг, яъни, мижозларимизнинг саломатлигига олайлик!

Бу таклиф ҳам барча таклифлар сингари хурсандчилик ва яқдиллик билан қабул қилинди. Меҳмонлар бир-бирларига таъзим қилишди; тикувчи этиқдўзга, этиқдўз тикувчига, нонвой уларнинг ҳар иккаласига, барчалари нонвойга ва ҳоказо. Юрка, бу ўзаро таъзимлар орасида кўшнисига қараб қичқириб:

– Хўш қани, жаноб, ўликларингизнинг саломатлиги учун ичинг, – деди.

Ҳамма қаҳ-қаҳ уриб кулиб юборди, аммо тобутсоз хафа бўлиб, қовогини солди. Буни ҳеч ким сезмади, меҳмонлар эса ичаверишди. Улар столдан қўзгалганларида кеч кирганди.

Меҳмонлар кеч тарқалишди ва кўпчилиги кайф бўлиб қолиши. Семиз нонвой ва қизил юзли муқовасоз, қарз тўланиши билан гўзал деган рус мақолига амал қилиб, Юркани кўлтиклаб миршабонасига обориб кўйдилар. Тобутсоз уйга маст ва жаҳли чиқсан холда келди.

– Бу нима деган гап ахир, – деди овозини чиқариб у, – хунаримнинг нимаси ёмон экан? Нима, тобутсоз жаллоднинг акасими? Файридинлар нимага мендан кулишади? Нима, тобутсоз имонсиз, риёкор эканми? Мен янги уйга кўчиб келишим муносабати билан уларни меҳмонга чақиришни ва уларга катта зиёфат беришни истар эдим, энди истатамайман. Энди мен кимлар учун ишласам ўшаларни – «православ мазҳабидаги ўликларни чақираман».

– Сенга нима бўлди, отахон? – деди шу маҳалда уни ечинтираётган хизматчи аёл, – нималар деб алжираяпсан? Тавба де! Ўликларни зиёфатга чақирап эмиш! Қилигини қаранг-а!

¹ Цех – бу ўринда бирор хунарга мансуб бўлган косиблар ташкилоти маъносида.

– Худо ҳақи чақираман, – деб давом этди Адриан, – худди эртагаёқ чақираман. Менинг саодат пешаларим, эртага кечқурун меникига зиёфатга марҳамат қилинг: Тангри нимани раво кўрса, шу билан меҳмон қиласман. – Тобутсоз шу сўзларни айтиб каравотга бориб ётди ва кўп ўтмай хуррак тортди.

Адрианни уйғотганларида ҳали ташқари қоронги эди. Бойвучча Трюхина шу кеча вафот қилди, унинг иш юритувчиси томонидан юборилган чолпар бу хабарни Адрианга етказди. Тобутсоз чолпарга ўн тийин бериб, наридан-бери кийинди ва бир извош олиб Разгуляйга жўнаб кетди. Мархуманинг дарвозаси олдида полиция турар ва савдогарлар ўлик хидини сезган кузғуллардек, у ёқдан-бу ёққа юришар эди. Сап-сариқ мумга ўхшаган, аммо ҳали ҳидланмаган мархума стол устида ётарди. Унинг атрофида қариндошлари, қўни-қўшилари ва уй ичи тўпланишиб туришарди. Ҳамма деразалар очик эди; шамлар ёнарди, руҳонийлар дуо ўқишарди. Адриан Трюхинанинг жияни бўлмиш, олифта кийинган, ёш савдогарга яқинлашди ва унга тобут, шам, парда ҳамда кўмиш маросимига тегишли бошқа нарсаларни ҳозироқ, зудликда муқаммал келтирилишини буюрди. Меросхўр паришон ҳолда миннатдорлик билдириди, савдолашиб ўтираслигини, унинг вижданан иш кўришига ишонганини айтди. Тобутсоз ўз одати бўйича ортиқча олмайман, деб қасам ичди. Кейин иш юритувчи билан маъноли қарашиб олди-да, ишга жўнади. Қуни бўйи Разгуляйдан то Никита дарвозасига ва Никита дарвозасидан Разгуляйга қатнади, кечқурун ҳамма ишни саранжомлаб, извошчига жавоб бериб юбориб уйига яёв кетди. Тун ойдин эди. Тобутсоз Никита дарвозасигача омон-эсон етиб келди. Вознисения кўчаси ёнида бизга таниш бўлган Юрка ким у, деб бақирди ва тобутсоз эканини билиб, унга хайрли тун тилаб қолди. Вакт алламаҳал бўлганди. Тобутсоз уйига яқинлашиб қолганида, бирдан унга кимdir дарвозасига яқинлашгандек, эшикни очгандек ва ичкарига кириб ғойиб бўлгандек туюлди. «Бу ким экан? – деб ўйлади Адриан. – Менда яна кимнинг иши бор экан? Ёки уйимга ўғри кирдими? Ё эси паст қизларимнинг хушторлари келдимикан? Ишқилиб, охири баҳайр бўлсин!»

Тобутсоз дўсти Юркани ёрдамга чақирай, деб ўйлади. Лекин шу заҳотиёқ, яна бирор унинг эшигига яқинлашди ва ичкарига кирмоқчи бўлди. Аммо югуриб келаётган хўжайнини кўриб тўхтади ва учбурчакли шляпасини бошидан олди. Адрианга унинг юзи танишдек кўринди, аммо шошилинчда таниб ололмади.

– Сиз меникига ташриф буюрдингизми? – деди нафаси бўғзига тиқилиб Адриан, – ичкарига марҳамат қилинг.

– Манзират қилмай қўяқол, ҳазрат, – деб жавоб берди тўнғиллаб ҳалиги одам, – олдинга туш, меҳмонларга йўл кўрсат!

Адриан манзират қилиш даражасида эмас эди. Эшик очик бўлиб, зинага қараб юрди, ҳалиги одам эса ортидан эргашди. Адрианга уйда одамлар юргангта ўхшаб туюлди. «Бу қандай бало эди!» деб ўйлади у ва ичкарига киришга шошилди... Аммо шу ондаёқ оёқлари чалишиб кетди. Уйнинг ичи ўликлар билан тўла эди. Ой деразадан уларнинг сарик ва кўкариб кетган юзларини, ўпирилган оғизларини, хира, ярим очик кўзларини ҳамда қанқайиб турган бурунларини ёритарди... Адриан булар ўз саъй-ҳаракати билан кўмилган одамлар, у билан бирга кирган меҳмон эса жала ёққан куни дафн қилинган иш юритувчи эканини билиб, кўрқиб кетди. Улар – хотинлар, эркаклар, таъзим ва саломлар билан тобутсозни ўраб олишди, яқинда бепул кўмилган битта камбағалгина, ўзининг увада хирқасидан уялиб яқинлашмас, серрайиб бир бурчакда турарди. Бошқалар эса дурустгина кийинишганда: марҳумалар қалпок кийган ва тасмалар таққан, ўлган амалдор амал кийимида, аммо соқоллари олинмаган, савдогарлар эса байрам кийимида. «Кўряпсанми, Прохоров, – деди иш юритувчи, барча тавфиқли улфатлар номидан – биз ҳаммамиз таклифингга биноан ўрнимиздан қўзғалдик, уйда факат ўрнидан туролмайдиганлар, тамоман хокка айланганлар ва терисидан ажралиб қоқ сүяқ бўлганлар қолишли, аммо биттасигина чидаб туролмади, чунки у сенинг уйингга келишни жуда истади...»

Шу пайтда кичкина бир скелет тўпни ёриб чиқди-да, Адрианга яқинлашди. Унинг калласи тобутсозга эркаланиб жилмайди. Оч кўк ва қизил мовут парчалари, чирик латталар, худди ходаларга илингандек унинг ҳар ер-ҳар ерида осилиб турарди, оёқ суюклари эса келичадаги келисопдек, узун қўнжли этик ичидаги гурсиллар эди.

– Сен мени танимадинг чоғи, Прохоров, – деди скелет. – Хизматдан бўшаган гвардия сержантини Пётр Петрович Курилкин ёдингдами, ўзинг 1799 йилда биринчи тобутингни, яъни қарагайдан ясалганини эмандан қилинган, деб сотган кишинингни? – Шу сўзларни айтгач, ўлик унга кучогини очди.

Адриан бутун кучини тўплаб қичқирди ва уни итариб юборди. Пётр Петрович гандираклаб бориб йиқилди ва сочилиб кетди. Ўликларнинг орасида газаб ва норозилик садолари кўтарилилди; ҳаммаси ўз ўртоқларининг обрўсини ҳимоя қилдилар, ҳакорат ва таҳдид билан Адрианга ёпишишли. Уларнинг қичқириғидан гаранг бўлган ва эзилган бечора хўжайн эсини йўқотиб, гвардия сержантининг суюклари устига йиқилиб, хушидан кетди.

Куёш тобутсоз ётган тўшакни аллақачон ёритган эди. Нихоят у кўзини очди ва рўпарасида самовар пуфлаётган хизматчи аёлни кўрди, Адриан қўрқув ичида кеча бўлиб ўтган воқеаларни эслади. Трюхина, иш юритувчи ва сержант Курилкин ғира-шира эсига келди. У хизматчи аёл мен билан гаплашар ва кечаги саргузаштнинг оқибатини айтар, деб жим кутди.

– Қандай ухладингиз, отахон Адриан Прохорович, – деди Аксинья унга чопон узатиб. – Сизни сўраб қўшни тикувчи чиқди, бугун тугилган куни шарафига зиёфат беришини хабар қилиб, шу ерлик коровул келди, аммо сиз ухлаб ётганингиз учун уйғотгимиз келмади.

– Мени сўраб марҳума Трюхинадан ҳеч ким келмадими?

– Марҳума? Нима, у ўлибдими?

– Э, ахмоқ! Ахир кеча унинг дағн маросимини тайёрлашда менга ёрдамлашган сен эмасмидинг?

– Нималар деяпсиз, отахон, ақлдан оздингизми ё кечаги кайфингиз ҳали ҳам тарқагани йўқми? Кеча қанақа дағн маросими бўлди? Сиз куни билан этикдўзникида бўлдингиз, маст-аласт кайтдингиз, тўшакка мукка тушиб шу чоққача ухладингиз. Ҳамма аллақачон тушки ибодатни адо этиб бўлди.

– Шунақами! – деди хурсанд бўлиб тобутсоз.

– Худди шунака, – деб жавоб берди хизматчи аёл.

– Хўп, унда тезроқ чой тайёрла, қизларни ҳам чақир.

БЕКАТ НАЗОРАТЧИСИ

*Коллеж регистратори почта
бекатининг диктатори¹*

Князь Вяземский²

Ким бекат назоратчиларининг бошига лаънатлар ёғдирмаган, ким улар билан ўлгудек сўкишмаган? Ким ғазаби қайнаган дамларда, ўзининг жабр кўрганлиги, қўполлик ва тартибсизлик ҳакидаги фойдасиз шикоятини ёзиш учун машъум дафтарни талаб этмаган? Ким уларни кишилар уруғининг энг ваҳшийси деб ҳисобланмаган марҳум подъячийлар³ билан ёки энг камида Муром қароқчилари билан тенг қилмаган? Аммо одил бўлайлик, уларнинг ҳақиқий ахволини тушунишга ҳаракат қиласлик ва эҳтимол улар ҳакида анча андиша билан фикр юрита бошлармиз. Бекат назоратчисининг ўзи нима? Ўн тўртинчи классга⁴ мансуб бир жафокашки, бу амал уни фақат калтак ейишдан сақлаб туради, у ҳам доимо эмас. Князь Вяземский назоратчиларни ҳазилкашлик билан «диктатор» деб атабди, бу диктаторнинг вазифаси қанақа? Ҳақиқий сургун азоби эмасми? Уларда на кундузи, на кечаси тинчлик бор. Сайёҳ ўзининг кўнгилсиз сафаридан йиғиб келган бутун аламини назоратчидан олади. Ҳаво ёмон, йўл узок, ямшик⁵ ўжар, отлар нимжон бўлса – назоратчи айборд. Сайёҳ бу назоратчининг хароб кулбасига киради-ю, унга худди душмандек қарайди, назоратчи бу чақирилмаган меҳмондан тезроқ қутула олса-ку, жуда яхши, лекин отлар бўлмай қолса-чи? Худо сақласин!..

Унинг бошига шундай сўкишлар, шундай пўписалар ёғиладики! Ёмғир ёғиб турса, кўчалар шалаббо бўлиб кетса-да, назоратчи ҳовлима-ҳовли югуришга мажбур; бўрон уриб, чилланинг совуғи изиллатиб

¹ Пушкин даврида темирйўл йўқ эди. Почта йўлининг ҳар жойида бекатлар (станциялар) бўлар ва сафарга чиққанлар шу бекатларда отларни алмаштириб, яна йўлда давом этишарди. Бекат бошликлари (назоратчилар) амал жиҳатидан «коллеж регистратори» увонини олардилар.

² Вяземский (1792–1878) – рус шоири ва танқидчиларидан.

³ Подъячий – русларда Пётр I давригача бўлган паст мансаблардан.

⁴ У вактда амаллар барчаси 14 даражага – классга бўлинарди. Бекат назоратчиси энг паст – 14 даражага мансуб ҳисобланарди.

⁵ Ямшик – бекат извошчиси.

турган бир пайтда, у жаҳли чиққан йўловчининг қичқириқ ва туртишларидан бир дақиқага ҳолироқ туриб дам олиш учун дахлизга чиқади. Генерал келади, назоратчи қалтираб унга охирги уч жуфт отни, булар ичидаги мактуб ташиш учун белгиланган отларни ҳам бериб юборади. Генерал эса унга раҳмат ҳам айтмасдан жўнаб кетади. Беш дақиқадан сўнг қўнғироқнинг овози эштилади ва фельдегерь¹ унинг столига сафар ҳужжатларини ташлайди. Мана шуларнинг ҳаммасини яхшилаб англаб олайлик, ана шунда юрагимиз ғазабнинг ўрнига самимий шафқат билан тўлади. Яна бир-икки оғиз сўз: мен йигирма йил сурункасига Россиянинг барча ерларини айланниб чиққанман, деярли ҳамма почта йўллари менга маълум. Бир неча авлодга мансуб ямшикларни яхши биламан, мен танимаган, гаплашмаган, кўришмаган назоратчи камдан-кам топилади. Қизик, йўлдаги кузатишларим тўпламини яқин замонларда чоп этаман, ҳозирча шуни айтаманки, бекат назоратчилари кўпчиликка бисёр янгилик танитилган. Шунчалик бўхтонга учраган бу назоратчилар тоифаси умуман ювош, табиатан сертакаллуф, одам билан тезда инок бўлиб кетадиган кишилардир. Улар обрў қозонишга кўп ҳам интилмайдилар, уччалик пулпараст ҳам эмаслар. Улар билан сұхбат курсанг (сайёҳ афандилар, улар билан сұхбатлашишни пасткашлик ҳисоблаб беҳуда иш қиласидар) кўп қизик ва ибратли нарсаларни олиш мумкин. Менга келсак иқрор бўламанки, мен ҳукуматнинг хизмати билан кетаётган қандайдир 6-класс амалдорининг сўзларидан кўра, уларнинг сұхбатини афзал кўраман.

Бу ҳурматли назоратчилар тоифасидан ошналарим борлигини энди фаҳмлаб олиш қийин эмас. Ҳақиқатан ҳам улардан бирини ҳеч унумайман. Бир вақтлар баъзи ҳодисалар у билан мени бир-биримизга яқин қилиб қўйган эди ва мен ҳозир ҳурматли ўқувчи билан худди ўша киши ҳақида сұхбатлашмоқчиман.

1816 йилнинг май ойида менга бир губерниядан, ҳозир йўқ бўлиб кетган бир йўлдан ўтишга тўғри келди. Менинг амалим паст бўлиб, подшоликнинг аравасида тайинланган баҳо билан жуфт отга ҳақ тўлаб сафар қиласидарим. Шунинг учун назоратчилар мен билан бетакаллуф эдилар, кўпинча ўз ҳукуқимга яраша менга берилиши лозим бўлган нарсаларни ҳам жанжаллашиб олардим. Ёш ва сержаҳл бўлганим учун назоратчи менга тайёрлаб қўйилган отларни амалдор бир тўранинг аравасига қўшиб юборганида, назоратчининг бу паст-

¹ Фельдегерь – ҳарбий мактубларни ташувчи. Почта ва ҳарбий ҳужжатларни ташиш учун белгиланган отларнинг бошқа ишларга жўнатилиши қатъян ман этилганди.

кашлигидан, виждонсизлигидан ғазабланардим. Губернаторникода тушликка ўтирганимизда, кимнинг ким эканлигини фаҳмлайдиган хизматчи ҳаммадан кейин менинг олдимга таом қўяр эди. Мен бунга анча вактгача кўниколмай юргандим. Ҳозир эса менга у ҳам, бу ҳам тўғри кўринади. Ҳакиқатан ҳам амалига қараб ҳурмат қил, деган мақолнинг ўрнига бошқа бири, масалан: ақлига қараб ҳурмат қил, дейилса, нималар бўлмасди. Қандай тортишувлар, баҳслар юзага келмас эди! Шунда хизматчилар таомни дастлаб кимнинг олдига қўйишарди. Ҳа, майли, ўз қиссамга қайтай.

Ҳаво дим эди. Бекатдан уч чакирим ўтганда томчилай бошланган ёмғир сал ўтмай селга айланиб, мени жиққа хўл қилди. Бекатга келгач биринчи ташвиш – тезроқ бошқа кийим кийиш, иккинчиси – ўзимга чой сўраш бўлди. «Ҳой, Дуня! – деб кичкирди назоратчи, – самоварни қўйиб юбор, қаймоқ олиб кел». Шу сўзлардан кейин тўсик ортидан ўн тўрт ёшлардаги бир қиз чиқди-да, даҳлизга қараб югуриб кетди. Унинг гўзаллиги мени ҳайратда қолдирди. Назоратчидан «Бу сенинг қизингми?» деб сўрадим. «Ҳа, таксир, қизим, – деб жавоб берди у мамнунлик билан, – яна шундай ақлли, шундай чақонки, худди марҳума онасининг ўзи». Шундан кейин у менинг йўл ҳужжатимни дафтарга кўчира бошлади, мен эса унинг ҳашаматсиз, аммо покиза кулбасини безаб турган суратларни томоша қилдим. Бу суратларда бузук ўғилнинг тарихи тасвирланган эди: биринчи суратда қалпок ва шлафорка¹ кийган нуроний мўйсафид бир шўх ўспиринни сафарга жўнатмоқда, ўспирин бўлса шошилиб унинг дуосини ва халтада пул олмоқда. Бошқасида бу йигитнинг бузук ишлари тасвирланган: у стол олдидা, атрофида қалбаки дўстлари ва ҳаёсиз аёллар билан ўтиради. Ундан кейин бор-йўғини кўкка совурган бу ўспирин жанда ва қалпок кийиб олиб, чўчқа боқиб, овқатини улар билан баҳам кўриб юради; унинг юзида ғам ва ўқинч акс этганди. Пировардида, унинг отаси олдига қайтиши кўрсатилган; меҳрибон чол ўша қалпок ва шлафоркани кийиб, унинг қаршисига югуриб чиқмоқда; бузук ўғил тиз чўкиб туради, орқароқда ошпаз семиз бузоқни сўймоқда ва боланинг акаси хизматкордан бундай шодликнинг сабабини сўрайяпти. Ҳар бир суратнинг остида дурустгина ёзилган олмонча шеъларни ўқидим. Гул экилган тувакча, ола пардали каравот ва у вактда атрофида кўринган бошқа буюмлардек, бу суратларнинг барчаси ҳануз менинг ёдимдан чиқмаган. Хўжайниннинг ўзи эллик ёшларда, соғлом ва бақувват киши, унинг ран-

¹ Шлафорка – уйда кийиладиган кийим.

ги ўчиб кетган тасмаларга осилган уч медали, узун кўк фартуги, худди кўз ўнгимда турибди.

Мен ямшигимга ҳақ тўлаб бўлмасимданоқ, Дуня самоварни кўтариб кириб қолди. Бу кичкина нозанин, ўзининг менда қандай таассурот қолдирганини иккинчи қарашимданоқ пайқаб олди; у катта кўм-кўк кўзларини мендан узиб ерга қаради. Мен у билан сўзлаша кетдим, у эса худди кўпни кўрган қиздек, ҳеч тортинаасдан жавоб қайтарар эди. Мен унинг отасига бир финжон пунш таклиф қилдим. Кейин Дуняга бир пиёла чой узатдим ва биз қадрдон танишлардек сухбатлаша кетдик.

Арава аллақачон кўшилган эди, мен эса ҳануз назоратчи ва унинг қизчасидан ажралишни истамасдим. Охири мен улар билан хайрлашдим; отаси менга оқ йўл тилади, қизи эса мени аравагача кузатиб кўйди. Даҳлизда тўхтадим-да, бир ўпич олишга ундан руҳсат сўрадим: Дуня рози бўлди...

*Кўп бўсалар олган эдим мен,
Бу йўлларга киргандан бери...*

Аммо уларнинг ҳеч бири шунчалик узоқ, шунчалар ёқимли хотира қолдирмаган эди, менда.

Орадан бир неча йил ўтди. Яна бир ходиса рўй бериб, мен худди ўша йўл, айнан ўша жойларга келиб қолдим. Кекса назоратчининг қизи эсимга тушди ва мен уни кўрап эканман, деб севиниб кетдим. Аммо эски назоратчининг ўрнига, эҳтимол аллақачон бошқаси қўйилгандир, балки Дуня турмушга чиқиб кетгандир, деб ўйладим. Эҳтимол улардан бири вафот этгандир, деган фикр ҳам миямдан лип этиб ўтди ва ўша қадрдон бекатга яқинлашарканмиз, юрагимни ғашлик босди. Отлар почтахона олдига келиб тўхтади. Уйга киргач, дарров бузуқ ўғил тарихи тасвирланган суратларни танидим, стол билан каравот аввалги ўрнида турибди, аммо деразаларда энди гул экилган туваклар йўқ, атрофдаги барча нарсалар тўзиб, чанг босиб ётибди. Назоратчи пўстинига бурканиб ухларди, келганимни билиб уйгонди ва ёнбошлади... Бу ўша Самсон Вириннинг ўзи эди, лекин шунчалик қариб кетибдик!.. У йўл хужжатимни дафтарга кўчиргунича мен унинг оқарган соchlарига, кўпдан бери соқоли устара кўрмаган юзига, ундаги ажинларга, буқчай-иб қолган белига қараб турдим-да, бу бақувват эркакнинг уч-тўрт йил ичida бундай бедармон қарияга айланиб қолганига ҳайратда қолдим.

– Мени танидингми? – деб сўрадим ундан, – сиз билан биз эски танишлармиз.

– Эҳтимол, – деб жавоб қилди у тумшайган ҳолда, – бу ернинг йўли катта, кўплаб йўловчилар келиб-кетади.

– Қизинг Дуня саломатми? – деб сўзимда давом этдим. – Чол қовоғини солиб:

– Худо билади, – деб жавоб берди.

– Демак, эрга тегиб кетибди-да? – дедим мен. – Чол менинг саволимни эшитмаганликка олди ва шивирлаб йўл хужжатимни ўқийверди. Мен саволларимни тўхтатиб, чой қўйишини буюрдим. Қизикиш мени безовта қила бошлади, шунинг учун пунш бу эски танишимнинг тилини очар, деб умид қилдим.

Мен адашган эканман: ичкилик таклиф қилсам, чол йўқ демади. Сездимки, ичкилик унинг тумшайишини тарқатиб юборди. Иккинчи қадаҳни ичганидан кейин у сергап бўлиб қолди, мени эслади ёки худди эслагандек кўринмоқчи бўлдими, ҳарқалай мен ундан бир кисса эшитдим. Бу қисса ўша пайтда менга қаттиқ таъсир қилиб, хаёлимни бутунлай чулғаб олганди.

– Демак, сиз менинг Дунямни танир экансиз-да? – деб гап бошлади у. – Кимлар уни танимас эди? Эҳ, Дуня, Дуня... Қандай қиз эди-я! Ким ўтса, албатта уни мақтарди, ҳеч ёмон демасди. Тўралардан бири унга рўмолча, бири исирға берарди. Йўловчи афандилар, худди тушлик қилмокчи ёки кечки нонушта емоқчилик бўлиб атайин тўхташарди, аслини олганда эса мақсадлари – унга узокроқ тикилиб, томоша қилиш эди. Ҳар қандай сержаҳл тўра ҳам уни қўрганида, дарҳол ҳовуридан тушар ва мен билан жуда мулоийм муносабатда бўларди. Ишонасизми, афандим: чопарлар, фельдегерлар у билан яrim соатлаб гаплашиб туришарди. Бутун уйни ўз қўлида тутарди: йиғиширишми, таом тайёрлашми – барчасини қойиллатиб бажаарар эди. Мен кекса тентак бўлсан унга қараб тўймас, севинчим ичимга сифмасди. Дуняни шундай яхши кўрадим, овунчогимни шунчалик азиз тутар эдимки, унинг айтганларини мухайё қилишга шу қадар тиришардимки!.. Аммо тақдирда нима битилган бўлса, ундан қочиб кутулиб бўлмас экан.

Шундан кейин у менга бошига тушган кулфатни батафсил сўзлай кетди. – Бундан уч йил аввал бир куни қиши кечаси, назоратчи янги дафтарга чизиклар тортаётган, унинг қизи Дуня эса тўсиқнинг орқасида ўтириб ўзига кўйлак тикаётганида, уч отли арава келади ва телпакли, ҳарбий шинель кийган, бўйнига шолрўмол ўраб олган йўловчи от талаб қилиб уйга киради. Отлар ҳаммаси ҳар қаёққа жўнатилган эди. Буни эшитган сайёҳ жаҳл билан қичкириб, қамчисини ўйната бошлайди,

аммо бу каби ҳодисаларга кўнишиб қолган Дуня тўсиқнинг орқасидан югуриб чиқади ва йўловчига мулойимлик билан: «Бирор нарса еб олгингиз келмаяптими?» деб сўрайди. Дунянинг пайдо бўлиши ўзининг одатдаги таъсирини кўрсатади. Йўловчи жаҳлдан тушади ва отни кутишга кўнади, ўзига кечки нонушта буюради. Хўл, сержун телпагини олиб, шолрўмолини бўйнидан ёзиб тушириб шинелини ечгач, йўловчининг қора мўйловли, ёш, кадди қомати келишган гусар экани маълум бўлди. Гусар назоратчининг олдига ўтириб, у ва унинг қизи билан хушчакчақ гаплашиб кетади. Бу орада кечки нонушта ҳам келтирилади. Кейин отлар ҳам келиб қолади ва назоратчи отларга ем бермасданоқ шу заҳоти йўловчининг кибиткасига¹ кўшилсин, деб буйруқ бериб, уйга қайтиб кирса йигит ҳушидан кетиб, ўзини билмасдан тахтанинг устида ётибди. Унинг ахволи ёмонлашган, боши қаттиқ оғрий бошлаган, жўнаб кетишнинг сира ҳам иложи йўқ... Нима қилиш керак!.. Назоратчи унга каравотини бериб, агар эртага касалнинг ахволи яхшиланмаса қўшни кишлоққа одам юбориб, табиб келтирадиган бўлиби.

Эртасига гусарнинг ҳоли яна-да, ёмонлашади. Унинг одами табиб ахтариб, отда шаҳарга жўнайди. Дуня рўмолчасини сиркага ивитиб, гусарнинг бошини боғлаб қўяди ва унинг каравоти олдида каштасини тикиб ўтиради. Назоратчи уйидалигига гусар доим ух тортар, хеч гапирмасди, лекин шундай бўлса-да, икки финжон қаҳва ичиб олади ва «оҳ-воҳ» деб туриб, ўзига тушлик буюради. Дуня эса доим унинг ёнида бўлади. У ҳар дам сув сўрар ва Дуня ўзи тайёрлаган шарбатдан идишда келтириб берарди. Хаста эса лабларини хўллаб олар ва идишни қайтариб бераётib ҳар гал ўз миннатдорчилигини билдиримоқчи бўлиб, ўзининг кучсиз қўллари билан Дунянинг қўлларини сикар эди. Тушга яқин табиб келади. Беморнинг томирини ушлаб қўриб, у билан олмонча сўзлаша кетади ва русчалаб: «Касалга ором олишдан бошқа ҳеч нарса керак эмас, икки-уч кундан кейин йўлга чиқса бўлади» деб айтади. Гусар табибга йигирма беш сўм беради; тушлик қилишга таклиф этади, табиб кўнади. Иккови ҳам иштаҳа билан таом ейишади, бир шиша винони ичиб тугатишади ва бир-бирларидан жуда рози бўлиб хайрлашишади.

Яна бир кун ўтгач гусар бутунлай соғаяди. У жуда хурсанд эди, gox Дуня, gox назоратчи билан тўхтовсиз ҳазиллашар, хуштак чалар, ўтиб бораётган йўловчиларга луқма ташлар, уларнинг йўл хужжатларини почта дафтарига кўчиради. Назоратчи уни шундай яхши қўриб

¹ Кибитка – ўша замонларда одам ташийдиган арава.

қоладики, учинчи куни эрталаб у ўзининг ёқимли меҳмонидан аж-ралаётганига ачинади. Якшанба куни эди. Дуня кундузги ибодатга бормоқчи бўлади. Гусарнинг кибиткасини тайёрлаб келтиришади. У назоратчи билан хайрлашади, униқида тургани ва еган-ичгани учун мўмайгина пул беради. Дуня билан хайрлаша туриб, уни черковга элтиб қўймоқчи бўлади.

Черков қишлоқнинг нариги чеккасида эди. Дуня нима ҳам дейишни билмай қолади. «Нимадан қўрқасан, – дейди отаси унга, – жаноб бўри эмаски, сени еб қўйса, аравага тушиб черковгача бориб ол». Дуня аравада гусарнинг ёнига ўтиради, хизматчи бўлса иргиб извощининг олдига ўтади. У бўлса ҳуштак чалади ва отлар чопиб кетишиади.

Бечора назоратчи қандай қилиб Дунясига гусар билан бирга кетишига руҳсат берганини, нима учун кўрларча иш тутганини, у вактда ақли ҳуши қаерда эканини тушунолмасди. Ярим соат ўтмай унинг юраги ғаш бўлиб, шунчалик безовталана бошлайдики, чидолмай ўзи черковгага қараб йўл олади. У черковга яқинлашганида ҳалқ аллақачон тарқалиб кетганини кўради, аммо черковнинг на эшиги олдида, на ён-атрофда Дуняни учратмайди. У шошилиб бутхонага киради. Руҳоний меҳробдан чиқиб келмоқда эди; унинг ёрдамчиси шамларни ўчирмоқда, иккита кампир ҳали ҳам бир бурчақда ибодат қилишарди, аммо Дуня бу ерда кўринмасди. Бечора ота руҳоний ёрдамчисидан «қизим ибодатда бўлдими?» деб зўрға нафасини ростлаб сўрайди. У ибодат вақтида қизинг бўлмади, деб жавоб қиласди. Назоратчи тинкаси қуриб, сўлжайиб уйга қайтиб келади. Унда биргина умид бор эди: бундан кейинги бекатда Дунянинг доя онахони турарди. Эҳтимол, ёш Дуня енгилтаклик қилиб ўша бекатгача аравада сайр қилиб бормоқчи бўлгандир. У Дуня кетган аравага қўшилган отларнинг қайтишини азобли бир ҳаяжон билан кута бошлайди. Ямшик ҳа, деганда қайтавермайди. Ниҳоят, у кечаси ёлғиз ўзи маст-аласт ҳолда: «Дуня гусар билан бирга жўнаб қолди» деган даҳшатли бир хабарни олиб келади.

Чол ўз баҳтсизлигига чидай олмай, шу заҳоти кеча ёш ёлғончи ётган каравотга чўзилади. Назоратчи энди барча воқеаларни ўйлаб, унинг ёлғондан ўзини касалликка соганини англааб етади. Бечора қаттиқ иситмалай бошлайди. Уни ўз қишлоғига олиб бориб, ўрнига вақтинча бошқа кишини тайинлашади. Гусар олдига келган табибининг худди ўзи унга қарай бошлайди. У назоратчига йўловчининг тамоман соғ бўлганини, ўша вактдаёқ у йигитнинг ёмон ниятини пайқаганини, аммо қамчисидан кўрқиб индамаганини айтади. Олмон рост гапирдими

ёки фақат ўзининг зийраклиги билан мақтамоқчи бўлдими, унинг бу сўзлари бечора беморни заррача овунтиrolмайди. Назоратчи согайиши билан шаҳар почтмейстеридан¹ меҳнат таътили сўрайди ва пиёда, ўз ниятини ҳеч кимга билдиrmай, қизини қидириб кетади. Йўлланмадан кавалерия зобити Минскийнинг Смоленскдан Петербургга кетаётганини билар эди. Уни олиб кетаётган ямшикнинг сўзига қараганда, Дуня ўз хоҳиши билан жўнаворган бўлиши керак, лекин шундай бўлса-да, у бутун йўл бўйи йиглаб борган. «Адашиб кетган кўзичоққинамни бир Худо ярлақаб уйга олиб келсам кошки», деб ўйлади назоратчи. Шундай фикрлар оғушида у Петербургга етиб келади. Измайловский полкида хизматдан ўзи бўшаб кетган унтер-офицернида тўхтайди (бу киши билан у бир вақтлар армияда бирга хизмат килган экан) ва қизини излай бошлайди. Кўп ўтмай биладики, ротмистер Минский Петербургнинг Демутов меҳмонхонасида туар экан. Назоратчи унинг олдига бормоқчи бўлади.

Назоратчи жуда эрта туриб гусарникига келади ва жанобга, бир кекса аскар сиз билан кўришмоқчи деб, билдиришларини сўрайди. Ҳарбий хизматкор шонга қоқилган этикни ёғлаб туриб: хўжайнин ухляяптилар, соат ўн бир бўлмасдан туриб, ҳеч кимни қабул килмайдилар, дейди. Назоратчи кетади ва тайинланган вақтда қайтиб келади. Халат ва қизил скуфье² кийган Минскийнинг ўзи унинг олдига чикади. «Хўш, оғайни, қандай иш билан келдинг?» деб сўрайди ундан. Чолнинг юраги ўйнаб кетади, кўзларига ёш тўлади ва титраган овоз билан фақат: «Жаноб, илоҳий бир шафқат кўрсатинг» дея олади, холос. Минский ялт этиб унга қараб олади, жаҳли чикади ва уни кўлидан ушлаб хонасига олиб киради ва эшикни ичидан қулфлаб кўяди. «Жаноб! – деб давом этади чол, – ўтган ишга салавот; ҳеч бўлмаса менга қизим Дуняни қайтариб беринг. У билан хўп ўйнаб-кулиб олдингиз-ку, энди уни бехудага хароб қилманг». «Бўлар иш бўлди, деб гангиг қолади йигит, – сенинг олдингда гуноҳкорман ва сендан афв сўраш имконига эга бўлганимдан хурсандман; лекин мени Дунядан ажралади деб ўйлама: у баҳтли бўлади, сенга виждоним олдидা сўз бераман. Сен уни нима қиласан? У мени яхши кўради; у ўзининг аввалги ҳаётини унугтиб юборган. На сен, на у – ҳеч бирингиз, бу ўтган ишларни унумаяжаксиз». Кейин у назоратчининг енгига нимадир қистириб кўяди-да, эшикни очади ва назоратчи қандай қилиб кўчага чиқиб қолганини сезмай қолади.

¹ Почтмейстер – почталарнинг бошлиги.

² Скуфье – уйнинг ичидаги кийиладиган либос.

Чол кўчада узок серрайиб туради, охири енгининг қайтармасида бир ўрам қофозни кўради; уни сугуриб чиқаради ва ёяди: фижимланган бир неча беш сўм ва ўн сўмликлар эканини кўради. Унинг кўзлари яна ёшга, ғазаб ёшларига тўлади! Чол пулларни қаттиқ фижимлаб ерга ташлайди-да, товонлари билан эзгилаб, сўнгра келган ерига қараб жўнайди... Бир неча қадам юрганидан кейин тўхтайди, ўйланиброк қолади... Ортига қайтади... Аммо пуллар энди йўқ эди. Яхши кийинган бир йигит уни кўриб извошчининг олдига югуриб боради, извошга шошилиб ўтиради-да: «Юр!» деб қичкиради. Назоратчи унинг орқасидан кувмайди. У ўз уйига, бекатга қайтишга қарор қиласди, аммо аввал бир марта бўлса ҳам бечора Дунясини кўриб қолмоқчи бўлади. Шу ниятда икки кунча ўтганидан сўнг, у яна Минскийниги қайтиб боради; аммо ҳарбий хизматчи хўжайин хеч кимни қабул қилмайдилар, деб дағал жавоб қайтаради, кўкраги билан уни уйдан итариб чиқаради ва эшикни гурсиллатиб ёпиб кўяди. Чол бечора туриб-туриб, қайтиб кетади.

Худди шу куни кечкурун у Все Скорбящие черковида ибодат қилиб бўлиб, Литей кўчасида кетаётганида, бирдан унинг олдидан жуда олифта бир дрожки¹ ғизиллаб ўтиб кетади ва шунда назоратчи Минскийни таниб қолади. Дрожки уч қаватли уйнинг эшиклари олдига бориб тўхтайди ва гусар зинапоядан югуриб ичкарига кириб кетади. Назоратчининг миясига лип этиб жуда ажойиб бир фикр келади. У ортига қайтиб, извошли билан тенглашиб олганидан сўнг:

– Оғайни, бу кимнинг оти, Минскийни эмасми? – деб сўрайди.

– Худди шундай, – деб жавоб беради извошли, – нима ишинг бор эди?

– Нима ишимми? Хўжайнинг ўзининг Дунясига бир мактубни етказиб қўйишими буюрган эди, мен бўлсам у яшаётган жойни унугиб қўйибман.

– Мана шу ерда, иккинчи қаватда. Сен оғайни, мактубни келтиришга кечикибсан, ҳозир хўжайнинг ўзи унинг олдида ўтириби.

– Ҳечқиси йўқ, – деб жавоб қайтариби назоратчи, унинг юраги алланимадандир жуда безовта бўлиб борарди, – кўрсатиб қўйганинг учун раҳмат, мен ўз вазифамни бажараман. – Шу сўзларни айтиб, у зинапоядан кўтарила бошлайди.

Эшик қулф эди. У қўнғироқни босади, бир неча дақиқани жуда оғир кутишда ўтказади. Калит дағал овоз чиқаради. Эшикни очишиади. «Авдотъя Самсоновна шу ерда турадиларми?» деб сўрайди

¹ Дрожжи – фонусли арава.

у. «Шу ерда, – деб жавоб беради ёш хизматчи аёл, – улар сенга нима учун керак?» Назоратчи жавоб қайтармай, тўғри залга киради. «Мумкин эмас, мумкин эмас! – деб қичқириб қолади хизматчи, – Авдотья Самсоновнанинг олдида меҳмонлари бор». Аммо назоратчи қулоқ солмай, ичкарига қараб кетаверади. Аввалги икки бўлма коронги, учинчисида эса чироқ ёқилган эди. У очик эшик олдига бориб тўхтайди. Яхши жиҳозланган бўлмада Минский ўйчан ҳолда ўтиради. Ўша пайтда расм бўлган барча безаклар билан ясаниб олган Дуня, худди инглиз эгарига миниб олган чавандоздек, гусар ўтирган ўриндикининг ён суянчиғига ўтириб олганди. У Минскийга мулойим жилмайиб қарамоқда эди. Унинг жингалак соchlарини ўзининг ялтироқ бармоқларига ўраб бурарди. Бечора назоратчи! Ҳеч қачон қизи унга бу қадар гўзал кўринмаган эди. У қизига беихтиёр тикилиб қолади. «Ким у?» деб сўрайди қизи бошини кўтармасдан. У ҳануз чурқ этмасдан тураради. Жавоб олмаганидан кейин Дуня бошини кўтардию, «оҳ!» деб гиламга йиқилди. Чўчиб кетган Минский дарров энгашиб Дуняни кўтармоқчи бўлади ва бирдан эшикнинг олдида турган кекса назоратчига кўзи тушиб, Дуняни жойида қолдиради, ғазабдан қалтироқ босган ҳолда унинг олдига келади. «Сенга нима керак? – дейди у тишларини ғичирлатиб. – Нега қаерга борсам, шу ерга ўғридек сукуласан? Ё мени сўймокчимисан? Йўқол!» У кучли кўллари билан чолнинг томогидан бўғиб, зинапояга итариб юборади.

Чол уйига қайтади. Дўсти унга шикоят қилишни маслаҳат беради, лекин назоратчи ўйлаб-ўйлаб, қўл силтайди ва нима бўлса пешанадан, деб кўйиб беришга карор килади. Икки кундан кейин у, Петербургдан ўз бекатига қайтиб кетади ва вазифасига киришади.

«Мана энди уч йилдан бери Дунясиз кун кечиряпман, – деб сўзига якун ясади назоратчиси. – Дунянинг дом-дараги йўқ. Ўликми, тирикми – Худо билади. Бундай ҳодисалар кўп бўлади. Бу ўткинчи саёклар фақат унигина йўлдан оздиришгани йўқ, яна кўпларни йўлдан уришади, бир оз ушлаб туришади-да, ташлаб юборишади. Бугун атласу баркутларга кўмилиб юриб, эртасига қарасанг, майхона ялангоёқлари билан кўча супурадиган ёш тентаклар Петербургда оз эмас. Дуня ҳам эҳтимол шулар ичида ҳароб бўлаётгандир, деган фикр хаёлингга келганида, унинг ўлимини тилашдек гуноҳдан ҳам тоймайсан киши...»

Назоратчи дўстимнинг ҳикояси ана шу бўлди. Ҳикоя қилар экан, у бир неча марта йиғлаб, худди Дмитриевнинг¹ гўзал балладасидаги

¹ Дмитриев (1760–1837) – Пушкин замонасидағи шоир.

тиришқоқ Терентьевичдек этаги билан кўз ёшларини артиб турди. Бу кўз ёшларининг қуйилишига пунш ҳам қисман сабабчи бўлди, чунки ўз қиссаси давомида беш қадаҳ пунш ичиб олганди; аммо шундай бўлса ҳам, бу кўз ёшлари менинг қалбимга қаттиқ таъсир этди. Ажралишиб кетгач, анча маҳалгача кекса назоратчини унотолмадим, бечора Дуняни узоқ вақтгача ўйлаб юрдим...

Яқиндагина ўша қадрдан жойдан ўтиб кетаётиб, дўстим эсимга тушди, суриштириб билдимки, у бошлиқ бўлган бекат йўқ қилинибди. «Кекса назоратчи тирикми?» деган саволимга ҳеч ким аниқ жавоб бермади. Мен таниш жойларга боришга қарор килдим, ижарага отлар олдим ва таниш қишлоққа жўнадим.

Куз пайти эди. Осмонни кулранг булат босган; ҳосили йифиб олинган яйдоқ далалар томондан келаётган совуқ шамол, ўз йўлидаги дараҳтларнинг қизил ва сариқ баргларини супуриб кетмоқда эди. Мен кун ботишига яқин қишлоққа етиб, почтахонанинг олдига келиб тўхтадим. Даҳлизга (худди шу даҳлизда мени бир пайтлар Дуня ўпган эди) семиз бир аёл чиқди, саволларимга кекса назоратчи бундан бир йил аввал вафот этди, унинг уйига пивочи кўчуб кирди, мен ўша пивочининг рафиқаси бўламан, деган мазмунда жавоб берди. Мен бу ерга келганимга ва етти сўм сарф этганимга ачиндим.

– Қандай қилиб вафот этди? – деб сўрадим пивочининг аёлидан.

– Ичкиликдан қазо қилди, – деди у.

– Уни қаерга кўмишиди?

– Қишлоқ дарвозасининг нариги томонига, марҳума рафиқасининг ёнига.

– Мени унинг қабри олдига элтиб қўёлмайсизми?

– Нега элтиб қўймайлик. – Хой, Ванка! Мушук ўйнашни бас қил энди! Жанобни қабристонга олиб бориб, назоратчининг қабрини кўрсатиб қўй.

Аёлнинг шу сўзларидан кейин жулдур кийимли, сариқ ва филай бола олдимга югуриб келди ва мени қишлоқ дарвозасидан нарига олиб кетди.

– Марҳум бекат назоратчисини танирмидинг? – деб сўрадим йўлда.

– Нега танимай? У менга толнинг чўпидан ҳуштак ясашни ўргатиб қўйган. Худо раҳмат қилгур, майхонадан келаётганида биз унинг ортидан: «Бува, бува!.. Ёнғок!» – деб югурадик. У бўлса ҳаммамизга ёнғок берарди. Доим биз билан бирга эди.

– Йўловчилар уни эслашадими?

– Сафарга чиқувчилар эндилиқда камайиб қолишган, гоҳида заседатель¹ ўтиб қолади, унинг ҳам ўлғанлар билан иши йўқ. Шу ёзда бир бариня² ўтиб қолувди, ўша назоратчи чолни суриштириди, ундан кейин унинг қабрига борди.

– Қандай бариня экан? – деб сўрадим қизиқиб.

– Жуда яхши бариня, – деб жавоб берди бола, – олти отлиқ аравада келди, учта боласи, битта энагаси бўлиб, кичкина итни эргаштириб олибди, назоратчи чолнинг вафот этганини эшитиши билан йиглаб юборди ва болаларига: «Қимирламай ўтиринглар, мен қабристонга бориб келаман» деди. Мен уни кузатиб қўймоқчи бўлдим. Бариня: «Йўлни ўзим ҳам биламан» деб айтди. – Ундан кейин менга бир танга берди, – шунақа яхши бариня экан!..

Биз қабристонга, ҳар томони очиқ, ёғоч хочлар билан тўлган, бирорта ҳам дарахти йўқ яйдоқ жойга келдик. Кишининг кўнглига бу қадар ғашлик соладиган қабристонни умримда кўрмаган эдим.

– Мана назоратчи чолнинг қабри, – деди менга бола, ўртасига хоч санчиб қўйилган бир уюм қумнинг устига чиқиб. Хочга мисдан ўйилган Исонинг сурати қокилган эди.

– Бариня ҳам шу ерга келганми? – деб сўрадим.

– Келган эди, – деб жавоб берди Ванька, – мен уни узоқдан кузатиб турдим. У қабр устига ётди-да, анчагача турмади, ундан кейин бойвучча қишлоққа борди, руҳонийни чақириб унга пул берди, кейин жўнаб кетди, менга бўлса бир танга берди, яхши хоним экан.

Мен болага бир танга бердим-да, бу ерга келганимга ҳам, етти сўм сарф этганимга ҳам асло ачинмадим.

¹ Заседатель – маслаҳатчи (революциядан илгари Россияда баъзи идораларга сайлаб қўйилган вакил).

² Бариня – бой аёл.

ҚИШЛОҚИ ОЙМҚИЗ

Ҳар қандай кийимда ҳам, Душенъка яхисан.

Богданович

Узок губерналарнинг бирида Иван Петрович Берестовнинг мулки бор эди. У йигитлик чоғида гвардияда хизмат қилган, 1797 йилнинг бошида хизматдан бўшаб, ўз қишлоғига қайтди, ўшандан буён бошқа ҳеч қаёққа чиқмади. У факир бир зодагон қизига уйланган бўлиб, овда юрган вақтида хотинининг кўзи ёриб вафот этганди. Хўжалик ишлари билан машғул бўлиш унга анча тасалли берди. У ўз режаси бўйича уй солдирди, мовут фабрикасини қурди, даромадни уч баробар ошириди. Петрович ўзини шу атрофда энг ақлли инсон деб ҳисобларди. Итларини эргаштириб, оиласлари билан меҳмон бўлиб келадиган қўшнилари ҳам бунга эътиroz билдиришмас эди. Иш кунларида у чийбахмал камзул кийиб юрар, байрамларда эса уйда мовутдан тўқилган узун белбурма камзул (сюртук) киярди; харажатларини дафтарга ёзиб кўяр ва «Сенатские ведомости»дан бўлак ҳеч нарса ўқимас эди. Одамлар уни димоғдор ҳисобласалар-да, умуман хурмат қилишарди. Факат энг яқин қўшниси Григорий Иванович Муромский у билан чиқиша олмасди. Бу киши асл рус зодагони бўлиб, мулкининг кўп қисмини Москвада совурган, ўша вақтда бева қолганидан ўзининг сўнгги мулкига – қишлоғига келганди. Бу ерда ҳам шўхлигини янгича тарзда давом эттироқда эди: у инглиз русумида боғ барпо этди ва қолган бутун даромадини деярли шунга сарф этди. Унинг отбоқарлари инглиз чавандозлари каби кийиниб юришарди. Қизининг бир инглиз мураббияси ҳам бор эди. У ерларига экинни инглиз усулида эктирарди: аммо ўзга йўсинда рус дони ҳосил бермайди. Харажатнинг анча камайганига қарамасдан, Григорий Ивановичнинг даромади кўпаймас эди; қишлоқда ҳам янги қарзларга ботиш йўлларини топарди; бунинг устига у ақлли киши ҳисобланарди, чунки ўз губернасида зодагонлар орасида биринчи бўлиб мулкини Опекун идорасига гаровга қўйишни ўйлаб топди, у вақтда бундай иш ҳаддан ташқари мураккаб бўлиб, катта жасорат талаб этарди. Уни ёмонлаб юрадиган кишилар орасида Берестов ҳаддан ортиқ гийбат қи-

ларди. Янгиликларни ёмон кўриш унинг хулқ-атворидаги бир хусусият эди. У кўшнисининг инглизпарастлиги ҳакида бепарво гапиролмас, ҳар онда уни танқид қилиб туради. У меҳмонларига ўз мулкини кўрсатиб юрганида, хўжаликни бошқаришдаги тадбирларини мақтаб айтилган сўзларга жавобан муғамбирлик билан жилмайиб: «Шундай! Ишларим кўшнимиз Григорий Ивановичнидек эмас. Биз инглизчасига хона-вайрон бўлолмаймиз! Русчасига тўқ бўлсан бас!» деб қўярди. Мана бу ва шунга ўхшаш ҳазиллар кўшниларнинг саъй-харакатлари соясида, кўшимча ва изоҳлар билан Григорий Ивановичга етказиларди. Инглиз-параст Григорий Иванович бўлса, бизнинг ижодкорлар каби танқидга чидолмас эди. У қаттиқ аччиғланар, жиғибийрон бўлар ва ўзининг тұхматчи кўшнисини тўнка ва қишлоқи деб атарди.

Берестовнинг ўғли қишлоқка келгунига қадар, бу икки мулқдор орасидаги муносабатлар шу тарзда эди. У университетда таҳсил кўрган ва ҳарбий хизматга киришни ният қилганди, лекин отаси бунга розилик бермасди. Ҳарбий хизматдан ташқари вазифаларга эса ўзини бутунлай қобилиятсиз хисобларди. Бу масалада ота-бала бир фикрга келиша олишмади. Алексей ҳозирча зодагончасига яшар ва ҳар эҳтимолга карши мўйлов ҳам кўйганди.

Алексей ҳақиқатан азamat йигит эди. Чиндан ҳам унинг келишган қадди қомати ҳарбий либос киймаса ва от устида ўзига оро бериб юришнинг ўрнига, ёшлигини маҳкама қоғозлари устида эгилиб-букилиб ўтказса, умр ҳайф кетарди. Кўшнилар унинг овда йўлни суриштирмай доимо биринчи бўлиб чопишини кўриб, у ҳеч қачон дурустрок бир амалдор бўлолмайди, дейишарди. Ойимқизлар унга кўз тикишар, баъзилари сукланиб қаради, аммо Алексей уларга оз вақт ажратарди, қизлар эса унинг бепарволигидан бирон гўзал ошиқ бўлса керак, деб ўйлашарди. Ҳақиқатан унинг мактубларидан бирининг манзил нусхаси қўлдан-қўлга ўтиб юради: «*Москвада Алексеев ибодатгоҳининг қаршиисида, мисгар Савельев уйидаги Акулина Петровна Курочкина-га тегсин, бу мактубни А.Н.Р.га топширишингизни сиздан ўтиниб сўрайман*».

Қишлоқда яшамаган китобхонларим, уезд қизларининг нақадар гўзал эканликларини тасаввур этолмайдилар! Тоза ҳавода, олма дараҳтларининг соясида етилган бу қизлар, киборлар жамиятини ва ҳаётни китоблардан билишади. Танҳолик, эркинлик ва мутолаа, бизнинг паришонхотир гўзалларга маълум бўлмаган эҳтирос ва туйгуларни уларда эрта уйғотади. Бу қизлар учун қўнғироқ товуш бир саргузашт, яқин бир шаҳарга бориш ўз ҳаётларида катта бир давр, бирор меҳмоннинг кели-

ши эса, узоқ вақт ва баъзан умрбод хотирада қолади. Табиийки, уларнинг баъзи бир ажойиб қиликлари устидан ҳар ким бемалол кула олади; аммо бундай юзаки қарайдиган одамнинг мазахлари, қизларнинг муҳим фазилатларини ерга уролмайди, улардан муҳимлари: ана шу феъл-авторнинг хусусияти, ўзига хослиги бўлмаса, олмон ёзувчиси Иоган Рихтер айтганидек, инсоний фазилат ҳам бўлмайди. Пойтахтларда аёллар балки яхши таҳсил олишар, лекин киборлар жамияти одатлари уларнинг хулқ-авторини сийқалаштириб, қўнгилларини бош кийимлар каби бир хил қилиб қўяди. Бу сўз қоралаш ёки ғийбат тарзида айтилаётгани йўқ, аммо қадимги бир тафсилотчи олим ёзганидек: «Бизнинг қайд этганимиз ўз кучида қолади».

Бизнинг ойимқизлар орасида Алексей қандай таассурот қолдирганини тасаввур қилиш осон. Йигит илк марта қизларга ғамгин, умидсиз бир ҳолда кўриниш берди ва дастлаб барбод бўлган севинчлари ҳамда хазон бўлган ёшлиги ҳақида сўз очди; бундан ташқари, у бош суягининг сурати солинган бир қора узук тақиб юарди. Буларнинг барчаси губернада катта янгилик ҳисобланар эди. Ойимқизлар у ҳақда сўз кетганида, ўзларини йўқотиб қўйишарди.

Аммо бу гаплар ҳаммадан кўпроқ инглизпастимизнинг қизи Лиза (Григорий Иванович қизини Бетси деб атарди)ни қизиктираарди. Оталари борди-келди қилишмасди. Барча кўшни қизларнинг ўша йигит ҳақида гапиришларига қарамай, Лиза Алексейни ҳали кўрмаганди. Лиза ўн етти ёшга кирган эди. Унинг қора кўзлари қорачадан келган ва жуда ёқимли юзига монанд бўлиб, чараклаб турарди. Лиза отасининг ёлғиз қизи бўлиб, ниҳоятда эрка эди. Унинг ўйнокилиги ва ҳар он қилиб турадиган шўхликлари отасини роса кувонтираарди, аммо юзига упаэлик суриб, қошларига сурма қўйиб, йилда икки марта «Памела»ни¹ ўқийдиган, бунинг учун икки минг сўм пул олиб, бу ёввойи Россияяда зерикиб, ўлар ҳолатга келган қирқ яшар такаббур мураббия Жаксон хонимни ғазаблантираарди.

Лизага Настя хизмат қилиб юарди. Гарчи у Лизадан катта бўлсада, аммо бекаси каби енгилтабиат эди. Лиза уни жуда яхши кўрар, бутун сирларини унга айтар ва у билан бирга ҳар хил қиликларни ўйлаб топарди; хуллас, Прилучина қишлоғида Настя француз фожеаларида акс этган сирдош жориялардан кўра аҳамиятлироқ бир сиймо эди.

– Бугун меҳмондорчиликка боришга рухсат этинг, – деди бир куни Настя, бекасини кийинтиар экан.

¹ «Памела» – инглиз ёзувчиси Ричардсоннинг (1689–1761) романи.

– Майли, бироқ айт, қаерга?

– Тугиловога, Берестовларниги. Ошпаз аёлнинг туғилган куни эди, кечаки бизни зиёфатга чақириб кетганди.

– Буни қара-я, – деди Лиза, – оила бошлиқлари жанжаллашдилар-ку, хизматкорлари эса бир-бирларини меҳмон қилишади-я!

– Бизнинг бошлиқлар билан нима ишимиз бор! – деб эътиroz билдириди Настя, – бунинг устига мен отангизни эмас, сизнинг хизматкорингизман. Сиз ёш Берестов билан уришганингиз йўқ-ку, ҳушига келса, кексалар, майли уришаверсин, бизга нима.

– Алексей Берестовни кўришга ҳаракат қил, Настя, у қанақа ва қандай одам эканини менга батафсил айтиб берасан.

Настя ваъда берди, Лиза кун бўйи сабрсизлик билан унинг қайтишини кутди. Настя кечқурун қайтиб келиб:

– Лизавета Григорьевна, мен ёш Берестовни кўрдим; уни синчилаб кузатдим, кун бўйи бирга бўлдик, – деди.

– Қандай қилиб? Айт, бирма-бир айтиб бер.

– Рухсат этинг: биз йўлга тушдик, мен, Анисья Егоровна, Ненила, Дунка...

– Буни биламан. Хўш, кейин нима бўлди?

– Шошманг, ҳаммасини бирма-бир айтаман. Биз роса таом устига етиб бордик. Уй одам билан лик тўла эди. Колбинскийлар, Захаровлар, гумашта аёл ҳам ўз қизлари билан, Хлупинскийлар...

– Хўш! Берестов-чи?

– Тўхтанг, ахир. Мана биз дастурхон ёнига ўтиридик, гумашта аёл биринчи курсида, мен унинг ёнида... қизлари бўлса шундай қовоқларини солдиларки, афтлари қурсин, менга нима-а?..

– Ох, Настя, ипидан игнасиғача гапирасанки, одам зерикиб кетади...

– Қандай сабрсиз одамсиз-а!.. Ҳа, майли, биз дастурхондан турдик... ўзи ҳам уч соатча ўтирибмиз, тушлик ҳам зўр бўлди, қаймоқ қўшиб тайёрланган турли хил лаззатли сомсалар... биз дастурхондан туриб, кувлашмачоқ ўйнагани бокқа чиқдик.

– Хўш қани? Ростдан ҳам у яхши эканми?

– Жуда ажойиб экан, кўркам деса бўлади. Қомати келишган, новча, ёноқлари қизил...

– Ростданми? Мен бўлса уни рангпар, деб юргандим. Қанақа? У сенга қандай кўринди, ғамгин ёки ўйчан?

– Нималар деяпсиз? Бундай ўта кетган шўх йигитни, умрим бино бўлиб кўрган эмасман. У биз билан ўйнамоқчи бўлди-ю!

– Биз билан ўйнамоқчи бўлди, дедингми?! Бўлмаган гап!

– Жуда бўладиган гап-да. Тағин уни ўйлаб топганини қаранг! Қайси биримизни тутиб олса, ўпади-я!

– Ихтиёр сенда Настя, аммо ёлғон гапирияпсан.

– Аксинча, ихтиёр сизда, ёлғон гапираётганим йўқ. Мен ўзимни ундан зўрга куткардим. У кун бўйи бизга илакишиб юрди.

– Ахир қандай қилиб? Уни ахир бировга хуштор ва ҳеч кимга қарамайди, дейишади-ку?

– Билмадим, аммо у менга жуда қаттиқ тикилди. Таняга ҳам, гумашта аёлнинг қизига ҳам. Колбинскийли Пашага ҳам шундай, тўғриси, ҳеч биримизни ранжитмади, шундай шўхки!

– Буниси қизиқ! Хўш, уйда у ҳақда қандай гаплар бўлди?

– Жаноб тўра жуда яхши, ёқимтой, хушчақчақ одам, – дедилар. – Биргина қилиги ёмон: қизларнинг ортидан кўп юради. Менимча, бу айтарлик айб эмас: вақти билан босилиб қолади.

– Мени қандай кўргим келади-я! – деди Лиза ух тортиб.

– Нимаси қийин? Тугилово биздан у қадар узоқ эмас, ҳаммаси бўлиб уч чакирим. Ўша томонларга сайрга боринг ё от миниб чиқинг; сиз, албаттa унга дуч келасиз, у ҳар куни эрталаб милтигини олиб овга чиқар экан.

– Йўғ-э. Яхшимас. У бу қиз менинг орқамдан тушибди, деб ўйлаши мумкин. Унинг устига оталаримиз орасида можаро бор, ҳар холда у билан танишувим мумкин бўлмас... Оҳ, Настя! Биласанми, мен оддий бир қишлоқи қиз каби кийинаман!

– Ростдан-а, кенг, узун бир кўйлак кийиб олинг-да, қўрқмасдан Тугиловога қараб жўнанг, кафил бўламанки, Берестов сизни кўздан кочирмайди.

– Бу ерлилар тилида яхши сўзлаша оламан. Оҳ, Настя, севикли Настя! Қандай ажойиб фикр!

Лиза ўзининг бу ниятини шаксиз амалга оширишга қасд қилиб, ўринга ётди. Эртасига у ўз режасини амалга оширишга киришди: қалин мато, кўк чит билан мис тутмачалар сотиб олишга одам юборди, Настянинг ёрдамида ўзига кўйлак бичди, бутун хизматкор қизларни тикишга ўтқазди, кечкурун ҳаммаси тайёр бўлди. Лиза кўйлакни кийиб, ойнада ўзини кўрди ва шу чоққача бу қадар жозибадор бўлмаганини эътироф этди. У ўз ролини такрорлар эди; хонада юриб бир неча бор таъзим қилар, сўнгра мушукдек бошини чайқар, дехқонча лаҳжада сўзлар, енглари билан юзини беркитиб кулар ва Настянинг мақтовларига сазовор бўларди. Аммо бир нарса уни кўп қийнарди: ҳовлида ялангоёқ юриб кўрмоқчи бўлганди, нозик оёкларига хас-чўп ботди, кум ва майда

тошлар чидаб бўлмас даражада оғритди. Настя бу ерда ҳам унга ёрдам берди: у Лизанинг оёгини ўлчаб олиб, даладаги Трофим чўпон томонга қараб югурди ва бир жуфт пўстлоқ кавуш буюрди. Лиза эртаси куни тонгда кўзини очди. Бутун уй ичидагилар ҳали ухлашарди. Настя дарвозанинг олдидаги чўпонни кутиб турарди. Шу топда най чалинди ва қишлоқ подаси зодагоннинг ҳовлиси ёнидан ўта бошлади. Трофим Настянинг олдидан ўта туриб, унга бир жуфт ола-була кичик пўстлоқ кавуш тутқазди ва ярим сўм ҳақ олди. Лиза аста-секин қишлоқи қиз тарзида кийиниб олди ва Настяга пи chir lab, Жаксон хонимга тегишли топшириқларни бериб, орқа эшикка чиқди-да, полиздан югуриб ўтиб, дала томон кетди.

Шарқда шафак ярқирап ва олтин булутлар туркуми сарой ахли подшони кутаётганига ўхшарди; тиниқ осмон, тонг салқини, шудринг, шабада ҳамда қушларнинг сайраши Лизанинг қалбини болалик севинчи билан тўлдирди. Бирон танишнинг дуч келишидан кўрқиб, у учгандек тез югуради. Отасининг мулки чегарасидаги чакалакзорга яқинлашар экан, Лиза қадамини секинлатди. Бу ерда у Алексейни кутмоқчи эди. Юраги қаттиқ урар, сабабини ўзи ҳам билмасди, лекин шўх ёшларимизнинг кўрқиб-чўчиб туриши, уларнинг энг яхши латофатидир. Лиза чакалакзор коронгилигига кирди. Чакалакнинг бўғиқ ва тарқоқ шовуллаши қизни гўё кутлар эди. Унинг севинчи сусайди. Аста-секин ширин хаёлларга берила бошлади. У ўйларди... аммо, ўн етти ёшли оймқизнинг баҳор тонги соат олтида, чакалакзорда ёлғиз ўзи нима ҳақда ўйлаётганини аниқлай олиш мумкинми? Шундай килиб, у ҳар икки томондан баланд дараҳтлар кўланка ташлаган йўл бўйлаб, ўйга ботиб борарди, бирдан кўркам бир овчи ит унга қараб хурди. Лиза кўрқанидан қичқириб юборди. Шу пайтда «тинчлан, Сбогар, бери кел», деган товуш эшитилди ва ёш дараҳтлар ортидан овчи йигит кўринди. «Кўрқма дилбар қиз, – деди Лизага, – итим қопмайди». Лиза анча тетиклашиб, шу заҳоти фурсатдан фойдаланди. «Йўғ-э, жаноб, – деди у, гўё кўрқкан ва уялган бўлиб, – кўрқаман, кўрмайсанми, у қандай қопогон. Яна менга ўзини ташламасин». Алексей (уни ўқувчи таниб олгандир) ёш қишлоқи қиздан кўзини узмай қараб турарди.

– Агар кўрқсанг, мен сени кузатиб қўяман, – деди у Лизага. – Ёнингда боришимга розимисан?

– Ким сенга халақит беради? – деб жавоб қилди Лиза. – Йўл элники, хоҳлаган томонга кета оласан.

– Ўзинг қаердансан?

— Прилучинаданман, темирчи Василийнинг қизиман, қўзиқорин тे-
риб юрибман (қизнинг қўлида тўқилган сават бор эди).

— Сен-чи, жаноб? — Тугиловоликмисан дейман?

— Худди шундай, — деб жавоб берди Алексей, — мен ёш тўранинг
хизматкори бўламан.

Алексей ўзини қиз билан тенг қилиб кўрсатмоқчи эди. Аммо Лиза
унга караб, кулиб юборди.

— Алдаяпсан, — деди у, — эси пастга ишинг тушгани йўқ, кўриб ту-
рибманки, сен тўралардансан.

— Нега сен бундай деб ўйлайсан? — Ахир ҳаммаси кўриниб турибди-
ку, — деди йигит.

— Нимадан? Тўрани хизматкордан ажратиб бўлмайдими? Кийи-
минг ҳам ундан эмас, гапинг бўлакча, итни ҳам биз каби чакирмаяпсан.

Лиза тобора Алексейга ёкиб борарди. У дилбар қишлоқ қизлари
билан бетакаллуф муносабатда бўлишга одатланганидан, Лизани
кучоқламоқчи бўлди, лекин қиз сакраб қочди ва бирдан жиддий ҳамда
совуқ тус олдики, Алексей кулиб юборди. Лиза бу ҳаракати билан
Алексейнинг кейинги хужумларидан ўзини сақлаб қолди.

— Агар сен келгусида дўст бўлишимизни истасанг, — деди у жиддий
бир тусда, — эсингни еб қўйма.

— Бу ҳикматли сўзларни сенга ким ўргатди? — деб сўради Алексей
қах-қахлаб.

— Менинг танишим Настя, сизнинг қишлоқдаги бир бека қизнинг
хизматчиси, ўша ўргатди? Қара, маърифат қандай йўллар билан
тарқалади-я!

Лиза ўз ролидан чиқаётганини ҳис этди ва дарров тузатиб олди:

— Бўлмаса, нима деб ўйловдинг? — деди у, — мени хўжайн ҳовли-
сида ҳеч қачон бўлмайди, дейсанми? Албатта, ҳаммасини эшитганман,
кўрганман, сен билан бекорчи гапга овора бўлиб, киши қўзиқорин тे-
ролмай қолади, сен у ёққа кет, мен бу ёққа! Узр сўрайман...

Лиза узоқлашмоқчи эди. Аммо йигит унинг қўлидан ушлаб қолди.

— Жонгинам, исмингни айт.

— Акулина, — деб жавоб берди Лиза бармоқларини Алексейнинг
қўлидан тортиб олишга уриниб, — қўйвор жаноб, уйга кетишм керак.

— Яхши, дўстим Акулина. Мен албатта, темирчи отанг Василийга
меҳмон бўлиб бораман.

— Нималар деяпсан? — деб эътиroz билдириди Лиза, — Тангри ҳақи
бора кўрма, агар сен билан чакалакзорда ёлғиз сўзлашганимни уй-
имдагилар билса, бошим балога қолади; отам — темирчи Василий
ўлгунимча уради.

- Ахир мен, сен билан яна қўришмоқчиман.
- Мен қачон бўлмасин, яна қўзиқорин тергани бу ерга келарман.
- Қачон ахир?
- Хоҳласанг эртага.
- Севикли Акулина, ўпид оларди-ку, ботинолмайман. – Эртага шу пайтда келасан, шундайми?
- Ҳа, ҳа.
- Мени алдамайсан-а?
- Алдамайман.
- Онт ич.
- Худо урсин, келаман.

Ёшлар хайрлашдилар. Лиза чакалакзордан чиқди, даладан ўтиб олди, яшириниб боққа кирди ва шошилиб Настя кутиб турган фермага югуриб келди. У ерда Лиза тоқатсиз сирдошининг саволлариға жавоб бераркан, кийимларини алмаштириди ва меҳмонхонага чиқди. Дастурхон ёзилган, нонушта тайёр, Жаксон хоним юзига упа суриб, бир қултум сув билан ютиб юборгудек бўлиб, тортни юпқа қилиб кесмоқда эди. Отаси эрталаб сайр қилиб келгани учун қизини мактаб:

– Саҳарда уйғонишдан фойдалироқ нарса йўқ, – деди у, бу ўринда инглиз журналларидан ўқиб билгани – одамнинг узок умр қўриши ҳақидаги мисолларни сўзлаб кетди, шуни ҳам қўшиб қўйдики, юз йилдан ортиқ умр қўрган одамларнинг кўпчилиги арок ичмаган, қишу ёз бирдек сахарда турад эканлар.

Лиза унинг гапларини эшитмасди. У эрталабки учрашувнинг бутун тафсилотини, Акулинанинг овчи йигит билан бўлган сухбатини кўнглида такрорлади, аммо негадир виждони азобланба бошлади. У эрталабки сухбат одоб доирасидан чиққани йўқ, бу шўхликнинг оқибати ёмон бўлмайди, деб ўз-ўзини бехуда ишонтироқчи бўларди, виждани идрокидан баландроқ нола қиласди. Эртаги кунга берган ваъдаси ҳаммасидан ҳам унга тинчлик бермасди, у ўзининг берган тантанали қасамёдидан кечишга рози бўлаёди. Аммо Алексей уни кута-кута Василий темирчининг қизи ҳақиқий Акулинани – йўғон, чўтири қизни қишлоқдан ахтариб топиши ва шу тарзда унинг енгилтаклик билан қилган шўхлигини фаҳмлаб қолиши мумкин эди. Бу фикр Лизани қўрқитиб юборди ва эртаси куни яна Акулина бўлиб чакалакзорга боришга аҳд қилди.

Алексей жуда хурсанд ва таажжубда эди, кун бўйи у ўзининг янги таниши ҳақида ўйлаб юрди. Қорачадан келган гўзал қизнинг сиймоси уйқусида ҳам унинг хаёлини банд этганди. У кийиниб олганида, гирашира тонг отганди. Милтигини ўқлашга ҳам сабри чидамай, вафодор

ити Сбогар билан далага чиқди ва учрашувга, вაъда этилган жойга қараб югурди. Ярим соат вақт унинг учун тоқат қилиб бўлмайдиган интизорликда ўтди, ниҳоят, шохлар орқасидан узун кўк кўйлак кўринди ва у севикли Акулина томон югурди.

Лиза, унинг миннатдорлик билан қувонишига қулимсираб қўйди, аммо Алексей шу топда унинг юзида безовталик ва ташвиш изларини кўрди. Алексей бунинг сабабини билмокчи бўлди. Лиза бу қилиги андишасизлик эканини, шунга пушаймон бўлганини, шу сафар берган ваъдаси устидан чиқиш истагини ва бу учрашув сўнгги марта эканини ҳамда бу кўришишлар уларни яхшиликка олиб келмаслигини гапирди, шунинг учун бу учрашувларга хотима беришни сўради. Табиийки, бу сўзлар дехқон лаҳжасида айтилган эди, лекин бу содда қиз учун ғайритабий кўринган фикр ва туйғулар Алексейни ҳайрон қолдирди. У Акулинани ўз ниятидан қайтариш учун гапга чечанлигини ишга солди; ўз истакларининг беғуборлигига Лизани ишонтирмоқчи бўлди, унинг пушаймон бўлишига асло йўл қўймаслигини, ҳар нарсада унга бўйсунишини айтди. Бирдан-бир қувончи бўлган учрашувдан уни маҳрум этмасликни: кун ора бўлса ҳам, ҳафтада икки марта бўлса ҳам учрашиб туришни сўраб, ёлворди. У эҳтирос билан сўзлар ва шу топда, худди ошиқнинг ўзгинаси эди. Лиза уни жим туриб тинглади ва охири: «Менга, қишлоқдан ҳеч қачон ахтармасликка ва мен ҳақимда суриштирмасликка, ўзим белгилагандан бошқа учрашув йўлини изла-масликка ваъда бер», деди.

Бундан сўнг улар ўрмонда сайр қилиб, Лиза Алексейга бас, бўлди дегунча дўстларча сухбатлашиб юрдилар. Улар хайрлашдилар, ёлғиз қолган йигит қишлоқи содда қизнинг икки учрашувдаёқ, унга қандай хукмрон бўлиб қолганини ўйлаб, боши қотди. Акулина билан бўлган муносабати унинг учун ажойиб бир янгилик бўлиб, ғалати қишлоқи қизнинг буйруқлари унга оғир туюлса-да, ўз сўзида турмаслик эсига ҳам келмасди. Қизиги шундаки, Алексей қўрқинчли узук тақиб, сирли мактублар ёзиб умидсизланиб юришига қарамай, оққўнгил ва сергайрат, маъсумлик завқини ҳис қила оладиган соғ юракли йигит эди.

Агар мен ёлғиз ўз истагимга қулоқ согланимда, албатта бу ёшларнинг учрашувларини бутун тафсилоти билан тасвирлаган бўлардим. Борган сари ортиб бораётган икки томонлама майил ва ишончларини, машгулотлари ва сўзларини тўлиқ ёзардим; лекин биламанки, ўқувчиларнинг кўп қисми менинг завқимни маъқул кўрмаслар. Бу тафсилот, умуман чучмал кўринса керак, шунинг учун мен уларни ташлаб

кетаман, факат қисқача шуни айтаманки, икки ой ўтмасданоқ менинг Алексейим, муҳаббатдан ақл-хушини йўқотаёзди. Лиза ҳам, ундан кўра тинчроқ, жимроқ бўлса-да, бепарво эмасди. Ҳар иккиси ҳозирги вазиятдан баҳтиёр ва келажак ҳақида оз ўйлашар эди.

Муҳаббат паймонаси билан ўзаро мустаҳкам боғланганликлари тез-тез ёдларига тушиб турса-да, бу ҳақда бир-бирларига гапирмасдилар. Сабаби равшан эди: Алексей ўз Акулинасини қанчалик севиб қолган бўлмасин, ўзи билан факир дехқон қизи ўртасидаги оралиқнинг узоқлигини ҳамма вақт эсига оларди; Лиза эса оталари бир-бирларини ёмон кўришларини билар ва икки томоннинг ярашиб кетишига кўзи етмасди. Бунинг устига Лизанинг иззат-нафсини, Тугилово заминдорини Прилучина темирчисининг қизи оёклари остида ёлворган ҳолда кўрмоқ каби романлардагидек ғалати бир умид яширинча васвасага солганди. Тўсатдан рўй берган муҳим бир воқеа, уларнинг тутув муносабатларини ўзгартириб кўяёзди.

Эрталаб ҳаво очик кунларнинг бирида (бизнинг Россия кузлари кўпинча шундай бўлади), Иван Петрович Берестов отга миниб сайрга чиқди, ҳар эҳтимолга қарши ўзи билан уч жуфт този ит, жиловдори, кўлларида тартарақ тутган бир неча қарол болаларини бирга олди. Шу вақтнинг ўзиди Григорий Иванович Муромский ёқимли ҳавога қизиқиб, ўзининг калта дум биясини эгарлашга буюрди ва инглизча оро берилган ерлари атрофида ела кетди. Ўрмонга яқинлашаркан, ичи тулки терисидан бўлган чакмон кийиб от устида ғурур билан ўтирган қўшнисини кўрди, у – болалар шовкини ва тартарагидан чўчиб, чакалакдан қочиб чиқадиган қуённи кутиб турарди. Агар Григорий Иванович учраб қолишини олдиндан билганида, албатта бошқа томонга бурилиб кетарди, аммо у Берестовга кутилмаган жойдан чиқиб қолди – оралари бир ўқ отим жой эди. Илож йўқ. Муромский бир оврўпали зиёли сифатида ўз ракибининг ёнига келди ва назокат билан салом берди. Берестов ҳам, занжирдаги айиқ ўз хўжасининг амри билан жанобларга эгилгани каби ҳафсала билан жавоб қайтарди. Шу дақиқада ўрмон оралиғидан бир қуён сакраб чиқди ва дала бўйлаб югурга бошлади. Берестов ва унинг жиловдори товушларининг борича қичкирдилар, тозиларни қўйиб юбориши, ўзлари ҳам орқадан чопа кетдилар.

Муромскийнинг ҳеч қачон ов кўрмаган оти хуркди ва олиб қочди. Ўзини яхши чавандоз деб юрган Муромский отни ўз ҳолига қўйди ва кўнгилсиз ҳамсұхбатдан күткарган бу ҳодисага ичидан хурсанд бўлди. Аммо от чопиб бориб, жар ёқасидан чиқиб қолди ва тўсатдан четга бурилди. Муромский ўзини тутиб қололмади. У музлаган ерга қаттиқ

йиқилди, устида одам йўқлигини сезган заҳоти, худди бир нарса эсига тушгандек дарров тўхтаган думсиз отини лаънатлаб сўкарди. Шу пайтда Иван Петрович етиб келди ва аҳволини сўради. Бу орада унинг жиловдори айбдор отни тутиб келди. У Муромскийнинг отга минишига ёрдам берди, Берестов бўлса уни уйига таклиф қилди. Муромский рад этолмади, чунки ундан миннатдор эди. Шундай қилиб, Берестов қуён овлаб, ўз ракибини ярадор ҳолда, ҳарбий асир вазиятида шараф билан уйига олиб келди. Кўшнилар таом вақтида дўстона сухбатлашдилар. Муромский Берестовдан арава сўради, чунки йиқилганида, зарба еганидан от устида уйга етиб олиш ҳолатида эмаслигини эътироф этди. Берестов уни то эшиккача кузатди, Муромский бўлса, Алексей Иванович билан бирга эртагаёт Прилучинога дўстларча меҳмондорчиликка боришга ваъда олиб кетди. Шундай қилиб, эски ва чукур илдиз ёйган адсоват, калта дум биянинг хурковичлиги соясида тугаётгандек кўринарди.

Григорий Ивановичнинг қаршиисига югуриб Лиза чиқди. «Бу қандай ходиса, ота? – деди хайрон бўлиб, – нега оқсаяпсиз? Отингиз қани? Бу арава кимники?» – «Ўйлаб тополмайсан-да, азизам» деб жавоб берди Григорий Иванович ва бутун воқеани сўзлаб берди. Лиза ўз қулоқларига ишонмасди. Григорий Иванович қизи эсини йигиб олмасданоқ, эртага Берестов билан ўғлининг меҳмонга келишини айтди.

– Нималар деяпсиз? – деди Лиза ранги оқариб. – Берестовлар, отаси билан ўғли! Эртага бизга меҳмон бўлиб? Йўқ, ота! Нима қилсангиз ҳам, мен кўриниш бермайман.

– Нима, эсингни едингми? – деб эътиroz билдириди отаси, – қачондан бери бунақа уятчанг бўлиб қолдинг, ё романлардаги қаҳрамон қиз сингари адсоватни мерос қилиб олдингми? Етар, тентак бўлма...

– Йўқ, ота! Дунёда нима берилса, ҳар қанча хазина ҳадя берманг, мен Берестовларнинг олдига чиқмайман, – деди қиз ўжарлик ила.

Григорий Иванович елкасини қисиб қўйди ва у билан ортиқ тортишмади, чунки қизига қаршилик қилиб бир иш чиқара олмаслигини биларди, у ажойиб сайрининг хордигини чиқариш учун дам олгани кетди.

Лизавета Григорьевна ўз хонасига чиқди ва Настяни чакирди. Иккаки эртага келадиган меҳмонлар ҳақида узоқ мухокама юритишиди. Агар Алексей, яхши тарбия кўрган қизда ўз Акулинасини таниб қолса, нима деб ўйлайди? Унинг ахлоқи, одатлари, акли ҳақида қандай фикрда бўлади? Иккинчи томондан, шу қадар кутилмаган учрашув унда қандай таъсир қолдиришини кўришни жуда истар эди... Бирдан унинг

бошига бир фикр келди. Шу заҳоти фикрини Настяга айтди; иккови ҳам бу янги фикрдан хурсанд бўлишди ва, албатта ижро этишга ахд қилишди.

Эртаси куни нонушта вақтида отаси қизидан, ҳали ҳам Берестовлардан қочиш фикридами, йўқми – сўради.

– Ота, – деб жавоб берди Лиза, – агар сизга зарур бўлса, мен уларни қабул қиласман, аммо бир шартим бор. Мен уларнинг олдига қандай кирмайин, нима қилмайин, сиз мени уришмайсиз ва ҳайронлик ё норозилик аломати кўрсатмайсиз.

– Тағин бирон ўшхликдир-да! – деди кулиб Григорий Иванович. – Хўп яхши, яхши, розиман, нимани хоҳласанг шундай бўлсин, мени қора кўз ўшҳ қизим!

Шундай кейин қизининг пешанасидан ўпди ва Лиза ҳозирлик кўргани чиқиб кетди.

Худди соат иккита олтита от қўшилган, қўлбола извош ҳовлига кириб келди ва ям-яшил чимзор ёнида тўхтади. Кекса Берестов, Муромскийнинг ливрей кийимидағи икки қаролининг ёрдамида эшик зинапоясидан тушди. Унинг ортидан ўғли етиб келди ва отаси билан бирга дастурхон тайёрланган меҳмонхонага кирди. Муромский ўз қўшниларини жуда ҳурмат ва навозиши билан қабул этди. Уларга таом олдидан боғчани, йиртқич ҳайвонларни кўришни таклиф килди ва диққат билан супурилган, қум сепилган йўлакчадан бошлаб кетди. Кекса Берестов шу қадар бемаъни ҳавасга сарф килинган вақт ва меҳнатга ичидан ачинди. Лекин одоб юзасидан индамади. Ўғли на тадбирли отасининг норозилигига, на гердайган инглизпарастнинг севинчига қўшилмасди; у сарбсизлик билан таърифини кўп эшитган, уй эгаси қизининг чиқишини кутарди ва унинг қалби бизга маълум муҳаббат билан банд бўлса-да, дилбар қизни кўрмоқ иштиёқига доим ҳақли эди.

Меҳмонхонага қайтиб киргач, учвлон бирга ўтиришди: кексалар илгариги вақтларни ва ўз хизматларининг ҳангомаларини эслашди, Алексей бўлса Лиза кириб келганида қандай рол ўйнашини фикр килди. У ўзимни паришонхотир тутиш ҳар ҳолда ҳаммасидан тузук бўлар, деб ўйлади ва шунга ҳозирланди. Эшик очилди. У шу қадар лоқайдлик, ғурур билан беписанд қарадики, буни кўрганда энг номи чиққан бир сатангнинг ҳам юраги жиз этиб кетарди. Баҳтга қарши Лизанинг ўрнига юзига упа қўйиб, тор кийимга ўралиб, хира кўзли кекса Жаксон хоним таъзим билан кириб келди, Алексейнинг ҳарбийча гўзал ҳаракати эса бекор кетди. У ҳали ўзини ўнглаб ҳам олмаган эдики, эшик яна очилди ва бу сафар Лиза кириб келди. Ҳаммалари туришди: отаси

мехмонларни таништирай деган эди, лекин бирдан тўхтади ва лабини тишлаб қолди... Лиза, унинг корачадан келган Лизаси, қулоқларига қадар упа суриб, Жаксон хонимдан ҳам баттар сурмага ботган эди; ўзининг соchlаридан анча жилвали соxта соч ўримларини, Людовик XIV нинг ясама соchlаридан тақиб олганди, кўйлагининг елкаси кенг ва оғзи сиқилган енглари Помпадур фижмалариdek бесўнақай, бели X ҳарфи шаклида сиқилган ва онасининг ҳали гаровга қўйилмаган бутун гавҳарлари бармоқларида, бўйнида, қулоқларида ярқираб турарди. Алексей бу кулгили ва ажойиб киз ўз Акулинаси эканлигини билмади. Берестов унинг қўлини ўпмоқ учун ёндаши, Алексей ҳам ижирғаниб туриб ўпди; Алексей Лизанинг оппоқ бармоқларини ушлагандан титраётгандек бўлиб туюлди. Шу орада у қизнинг қасддан олдинга қўйилган ва ҳар хил сатанглик билан пардозланган оёқчаларини кўриб қолди. Бу эса, қизнинг бошқа кийимларидан кўра ўзига муносибдек қўринди. Упа ва сурмага келганда, тўғрисини айтиш керакки, соддадиллик билан илк боқишида англомади, кейин ҳам шубҳа қилмади. Григорий Иванович ўз ваъдасини эслади ҳам хайрон қолганини билдирамасликка уринди, аммо қизнинг шўхлиги унга шу қадар қизиқ бўлиб қўриндики, ўзини кулгидан зўрга тўхтатиб қолди. Такаббур инглиз хоними кулгидан узоқ бўлиб, сурма ва упа унинг жавонидан ўғирланганини пайқаб, газабдан қизарип кетгани, унинг упа чапланган юзидан билиниб турарди. У шўх қизга ўқрайиб қарап, Лиза эса ҳар қандай изоҳни ўзга бир вақтга қўйиб, ўзини ҳеч нарсани сезмагангага соларди.

Дастурхонга ўтиришди. Алексей ўйчанлик ва паришонхотирлик ролини ўйнайверди. Лиза нозланар, тишлари орасидан чўзиб-чўзиб фақат французча сўзлашарди. Отаси ҳар онда унга бокарди, мақсадини тушунмасди, аммо бунинг ҳаммаси унга жуда қизиқ туюларди. Инглиз хоним ҳаддан ташқари аччиғланган, лекин жим ўтиради. Ёлғиз Иван Петрович худди ўз уйидагидек: икки одамнинг овқатини ер, истаганича ичар, тобора иноқлик билан сухбатлашар, хоҳлаганича қаҳ-қаҳ уриб куларди.

Ниҳоят дастурхондан турдилар, меҳмонлар кетишли ва Григорий Иванович кула-кула саволлар берга бошлади.

– Нега сен уларни лақиллатдинг? – деб сўради Лизадан у. – Биласанми нима, упа сенга ярашар экан, мен аёлларнинг пардози қанақа бўлишини билмайман, аммо ўрнингда бўлганимда, упа қўйиб юрардим, табиийки кўп эмас, озроқ қўярдим.

Лиза ўз найрангининг муваффақиятидан жуда хурсанд эди. У отасини кучоқлади ва унинг маслаҳатини ўйлаб қўришга ваъда берди-да,

аччиғланган Жаксон хонимни тинчлантириш учун югурди. Жаксон хоним эшигини очишга ва қизнинг ўзини оқлашини эшитишга зўрга рози бўлди. Лиза таниш бўлмаган меҳмонлар ҳузурига қорачадан келган чехраси билан киришдан уялган эмиш, аммо сўраб олгани ботинолмаганмиш... У шафқатли Жаксон хонимнинг афв этишига ишонганмиш ва ҳоказо... Жаксон хоним Лиза уни мазах қилмаганига ишониб, тинчланди. Лизани ўпди ҳамда ярашув аломати ўлароқ, бир шиша инглиз уласини ҳадя этди, Лиза самимий ташаккур изхор этиб қабул қилди.

Эртасига тонгда Лиза учрашув жойи бўлган чакалакзорга борганини ўқувчининг ўзи ҳам билиб олгандир.

– Жаноб, сен кеча бизнинг хўжайнинкига бордингми? – деди шу замон Алексейга, – қизи қанақа экан? – Алексей мен уни яхши кўролмадим, деб жавоб берди.

– Эсиз, – деди Лиза.

– Нега ахир? – деб сўради Алексей.

– Шунинг учунки, мен сендан ҳалиги... деганлари тўғримикин, – деб сўрамоқчи эдим.

– Нима деганлари?

– Мен ўша ойимқизга ўхшармишман, шу гап тўғрими?

– Бўлмағур гап. Уни сенга солишириб бўлмайди, у хунукдан ҳам хунук.

– Оҳ, тўра жаноблари, бундай дейишинг яхши эмас, бизнинг ойимқиз шундай оппоқ, шундай олифтаки, мени унга қандай солишириб бўлади!

Алексей онт ичиб, сен ҳар қандай оппоқ қиздан ҳам гўзалсан, деди. Ва тамоман қизни хотиржам қилиш учун ойимқизни шундай калака қилиб тасвирладики, Лиза чиндан қаҳ-қаҳ уриб кулди.

– Ойимқиз кулгили бўлса-да, – деди Лиза уҳ тортиб, – барибир, мен унинг олдида саводсиз бир омиман.

– Э-ҳа, – деди Алексей, – шунга хафа бўласанми! – Агар истасанг, мен дарров саводингни чиқариб қўяман.

– О, ростдан ҳам, – деди Лиза, – бир ҳаракат қилиб кўриш керак.

– Рухсат эт, севгилим, ҳозир десанг ҳам майли.

Улар ўтиришли. Алексей чўнтағидан қалам ва ён дафтарини олди. Шундай қилиб Акулина, ажойиб тезлик билан сабоқларни ўзлашира бошлади. Алексей унинг зеҳнига ҳайрон қоларди. Эртасига у ёзишга ҳам киришди. Аввало, қалам айтганига юрмади, аммо бир неча дақиқадан сўнг у ҳарфларни анча яхши ёза бошлади.

— Қандай мұйжиза! — деди Алексей, — бизнинг ўқишимиз, ахир Ланкастер усулидан ҳам тез кетяпти.

Хақиқатан учинчи дарсда Акулина «Бояр қизи Наталья»ни¹ хижжалаб ўқир ва ўқищдан тұхтаб, баъзи фикрларини айтар ва Алексеини чиндан ҳам лол қолдиради. У бир варақ қоғозга шу қиссадан олинган мақолалар, қисқа таъбирларни ёзіб ташлади.

Бир ҳафта ўтди, улар ўртасида мактуб ёзиш ҳам бошланиб кетди. Почта идораси кекса эманнынг қавагига жойлашган эди. Настя яши-ринча мактуб ташувчи вазифасини адо этарди. Алексей катта ҳарфлар билан ёзилған мактубни у ерга келтириб қўяр ва ўз севгилисининг оддий кўк қоғозга ёзилған ажи-бужу хатини олиб кетарди. Акулина яхши жумлалар тузишга ўрганиб, маълумоти ортиб, ақли ҳам анча ўсганлиги кўриниб турарди. Орада Иван Петрович Берестов билан Григорий Иванович Муромскийнинг ошначиликлари борган сари маҳкамлашди ва кўп ўтмай дўстликка айланиб кетди. Иван Петрович вафот этганидан кейин бутун мол-мулки Алексей Ивановичнинг қўлига ўтишини, шунда Алексей Иванович бу губернада бадавлат мулкдорлардан бўлишини, шунинг учун Лизага уйланмасликка ҳеч қандай сабаб йўқлигини Муромский ора-сира ўйлаб қўярди. Кекса Берестов бўлса, қўшнисининг бирмунча телбалиги (ўз тили билан айтганда инглизча тентаклик) га икror бўлса-да, унда анча тузук фазилат борлигини инкор этмасди. Масалан: кам учрайдиган эпчиллик; Григорий Иванович машхур ва кучли граф Пронскийга яқин қариндош, граф эса Алексей учун жуда фойдали бўлиши мумкин, Муромский бўлса (Иван Петрович шундай ўйларди) қизини шундай одамга беришдан хурсанд бўлса керак...

Кексалар шу чоққача ўзларича шундай ўйлашарди, улар ниҳоят бирбири билан сўзлашдилар, кенгашдилар, кучоклашдилар ва масалани навбат билан ҳал этмоққа, ҳар қайсиси ўз томонидан харакат қилишга сўз бердилар. Муромскийнинг олдида бизга маълум зиёфатдан сўнг, қизини ҳанузгача кўрмаган Алексей билан таништириш қийинчилиги турарди. Улар бир-бирига кўп ҳам ёқмагандек кўринарди; бу ақалли Алексеининг ўшандан бери Прилучинога келмаганидан билса бўларди, Лиза эса Иван Петрович уларникига келганида, доим ўз хонасига кириб кетарди. Григорий Иванович: «Агар Алексей ҳар куни уйимга келиб турса, қизим алалоқибат яхши кўриб қолар. Ўзи шунақа бўлади, вақт ўтиши билан ҳаммаси тузалиб кетади», деб ўйларди.

¹ Н.М. Карамзиннинг (1766–1826) тарихий қиссаси.

Иван Петрович ўз ниятининг муваффақияти ҳақида озроқ ташвиш чекарди. Ўша куни кечкурун у ўғлини ўз хонасига чақириб, чубуғини тортар экан, бир оз ўйланиб:

– Нима бўлди Алёша, кўпдан бери ҳарбий хизмат ҳақида гапирмай қўйдинг? – деди. – Ё гусар мундирни сени бошқа қизиқтирмай қўйдими?

– Йўқ, отажон! – деб жавоб берди ҳурмат билан Алексей. – Гусар бўлишим сизга ёқмаслигини кўриб турибман, вазифам сизга бўйсунишдир.

– Яхши, – деди Иван Петрович. – Кўриб турибман, сен итоаткор фарзандсан, бу менга тасалли беради. Мен ҳам ўз ихтиёрингга қўяман, ҳарбий бўлмаган... бирон идора ишига... киришингни ҳам истамайман. Ҳозирча сени уйлантирмоқ ниятидаман.

– Кимга экан, отажон? – деди Алексей ҳайрон бўлиб.

– Лизавета Григорьевна Муромскаяяга, – деб жавоб берди Иван Петрович. – Яхши қаллик, шундай эмасми?!

– Отажон, мен ҳали уйланиш ҳақида ўйлаб кўрганим йўқ.

– Сенинг ўйлашинг шарт эмас, мен аллақачон сен учун ўйлаб, ҳаммасини пишишиб қўйдим.

– Ихтиёрингиз, аммо Лиза Муромская менга, умуман ёқмайди.

– Кейин ёкиб қолар. Вакт ўтади, севишиб ҳам кетарсизлар.

– Мен уни баҳтили килишга қобил эмасман.

– Лиза баҳтининг ғамини емай кўя қол. – Нима? Сен отангнинг хоҳишига шундай муносабатдамисан? Яхши!

– Истаганингизни қилинг, мен уйланишни истамайман ва уйланмайман.

– Уйланасан, бўлмаса сени оқ қиласман, Худо ҳақи! – Бутун мол-мулкимни сотаман, совураман, сенга сариқ чақа ҳам қолдирмайман. Ўйлаб кўришингга уч кун вакт бераман, ҳозирча кўзимга кўринма.

Алексей отасининг бошига бир фикр келиб қолса, Тарас Скотинин айтганидек, омбир билан ҳам суғуриб олиш қийин эди. Аммо Алексей ҳам отасининг ўзи, уни маҳв этиш ўшандек қийин. У ўз хонасига кирди ва ота-она ҳокимиятининг чегараси ҳақида, Лизавета Григорьевна тўғрисида, отаси уни ҳеч вақосиз қолдирмоқчи бўлгани ва, ниҳоят Акулина ҳақида ўйлай кетди. Биринчи марта Алексей уни каттиқ севганини аниқ ҳис этди. Ҳаёлига романларда ёзилгандек қишлоқи қизга уйланиш ва ўз меҳнати соясида кун кўриш фикри келди. Бу қатъий қарори ўзига тобора маъқул кўринарди. Ёғингарчилик бўлгани учун анчадан бери ҷалакзордаги учрашувлар тўхтаган эди. У Акулинага ҳарфларини аниқ қилиб, оташин ифодалар билан бир мактуб ёзди ва икковига хавф со-

лаётган жудоликни билдириди ҳамда шу номада унинг ўзига турмушга чиқишини сўради. Кейин зудликда мактубни почтага, эманнинг кавагига ташлаб келди ва қилган ишидан хурсанд бўлган ҳолда ухлаш учун ётди.

Ўз фикрида қатъий туриб олган Алексей, эртасига эрталаб, бор хақиқатни айтиш учун Муромскийнинг уйи томон кетди. У уй эгасининг олижаноблигига суюниб, уни ўз томонига оғдирмоқ умидида эди. Отини Прилучино саройи ёнида тўхтатиб:

- Григорий Иванович уйдами? – деб сўради.
- Йўқ, – деди хизматкор. – У киши эрталаб кетгандилар...
- Афсус, – деди Алексей. – Ҳеч бўлмаса, Лизавета Григорьевна уйдами?
- Уйдалар!

Алексей отдан сакраб тушди. Тизгинини хизматкорнинг қўлига тутқазди ва рухсат олмасдан ичкарига кирди.

Емакхонага яқинлашар экан, «ҳаммаси ҳал бўлади, деб ўйлади йигит, – унинг ўзи билан сўзлашаман». У хонага кирди... ва қотиб қолди! Лиза... Йўқ! Акулина, севимли, қорачадан келган Акулинаси узун енгиз кўйлакда эмас, эрталаб кийиладиган оқ кўйлакда, дераза ёнида ўтирас ва унинг мактубини ўқирди. Лиза мактуб ўқишга шу кадар берилиб кетган эдики, йигитнинг кириб келганини ҳам сезмай қолди. Алексей севинганидан қичқириб юборди. Лиза чўчиб тушди, бошини кўтариб қичқириб юборди ва қочмоқчи бўлди. Алексей уни ушлаб қолишга юргурди. «Акулина, Акулина!..» Лиза унинг кўлидан чиқишига уринарди. «Қўйворинг жаноб, ақлингизни йўқотдингизми?» юзини буриб, шу сўзларни такрорларди қиз. «Акулина, жоним Акулина!» дерди Алексей, унинг қўлларини ўпиб. Бу манзаранинг гувоҳи бўлган Жаксон хоним нима қилишини билмасди. Шу топда эшик очилиб Григорий Иванович кириб келди ва:

- Э-ха, сизнинг ишингиз жуда яхши йўлга қўйилганга ўхшайди... – деди.

Ҳикоянинг хulosасини ёзишдек ортиқча мажбуриятдан ўқувчиларим мени халос этарлар, деб ўйлайман.

И. П. Белкин қиссалари тугади.

ДУБРОВСКИЙ

БИРИНЧИ ТОМ

І Б О Б

Бундан бир неча йил илгари, ўз мулкларининг бирида, қадимги рус боёни Кирила Петрович Троекуров яшарди. Бойлиги, аслзодалиги ва таниш-билишларининг кўплиги туфайли Троекуров мулклари мавжуд губерналарда катта обрўга эга эди. Кўни-кўшнилари унинг арзимас бир орзусини амалга оширсалар бошлари кўкка етар, губерна зодагонлари унинг исмини эшитганларида дир-дир титрашарди. Кирила Петрович одамларнинг бу иззат-икромини ўзига муносиб хурмат, деб қаарди. Унинг хонадони ҳамиша меҳмонлар билан тўла, улар Троекуровнинг шовқин-сурон, баъзан эса тўс-тўполон базмларида иштирок этиб, унинг боёнларга хос шўхликларини қондиришга тайёр эдилар. У таклиф этганда келмасликка ёки маълум кунларда Покровское қишлоғига келганда унга салом бермай кетишга ҳеч кимнинг ҳадди сигмасди. Кирила Петрович оила ҳаётида билимсиз одамларнинг барча нуқсонларини яққол кўрсатарди. Атрофидаги кўпгина нарсалардан талтайиб кетган бу одам, бебош хулқининг ва калтароқ ақлининг ҳамма истакларига тўла эрк беришга одатланганди. Жисмоний жиҳатдан фавқулодда кучли бўлишига қарамай, бу одам хафтада икки марта мечкайликдан азоб тортар ва ҳар оқшом ичмасдан туролмас эди. Ховлидаги уйларнинг бирида, ўз жинсларига муносиб кўл хунари билан шугулланиб ўн олти чўри қиз яшарди. Бу уйнинг деворларига ёғоч панжаралар ўрнатилган, эшиклари қулфланган бўлиб, калитлари Кирила Петровичда сақланарди. Ёш роҳибалар рухсат этилган соатлардагина, икки кампирнинг назорати остида бокка сайр килгани чиқишарди. Вақти-вақти билан Кирила Петрович уларнинг баъзиларини эрга берар ва буларнинг ўрнига янгилар келарди. У дехконлар билан хизматкорларни жуда қаттиқ назорат қиласар ва истаганича жазоларди; шундай бўлса-да, улар Кирила Петровичга садоқатли эдилар. Улар хожаларининг давлати ва шуҳрати билан фахрланишар ҳамда унинг ҳимоя қилишига ишониб, кўни-кўшниларга нисбатан анчагина номаъкулчиликлар қилишарди.

Троекуровнинг доимий машгулоти мулкларининг атрофини айланишдан, аллавақтгача чўзиладиган базмлар ҳамда шўхликларда иштирок этишдан иборат эди; ҳар куни янги-янги шўхликлар чиқиб турар ва одатда янги танишлардан бирортаси қурбон бўларди. Андрей Гаврилович Дубровскийдан бошқа ҳеч ким, унинг эски ошналари ҳам, бу шўхликларнинг оқибатидан қутулиб қололмасди. Хизматдан бўшаган гвардия кичик офицери Дубровский Кирила Петровичнинг яқин қўшниси бўлиб, етмиш жоннинг¹ эгаси эди. Энг юкори мартабали одамларга ҳам кибр билан муомала қиласидиган Троекуров, бечораҳол Дубровскийни хурмат қиласиди. Бир вақтлар иккиси битта аскарий кисмда хизмат қиласиди ҳам ўртоқ эдилар, шунинг учун Дубровскийнинг гап кўтармас ва чўрткесар бир одам эканини Троекуров яхши биларди. Шароит уларни узоқ вақт бир-биридан жудо қилди. Дубровский камбағаллашиб қолгач хизматдан бўшашибга ва ўз қўлида қолган қишлоққа чиқиб яшашга мажбур бўлди. Кирила Петрович ўртоғининг аҳволидан хабардор бўлиб, унга ўз ҳомийлигини таклиф этди, бироқ Дубровский унга миннатдорлик билдириди, факирликда бўлса ҳам, ўз мустақиллигини сақлаб қолди. Бир неча йил ўтгач Троекуров генерал-аншеф² мансабидан истеъфога чиқиб, ўз мулкига қайтиб келди, икки дўст бир-бириларини кўриб, хурсанд бўлишди. Ўшандан буён улар ҳар куни бирга бўлишар ва бир умр бирорвонига бормаган Кирила Петрович, эски қадрдонининг кўргончасига бетакаллуф бориб туради. Улар тенгкур бўлгандиклари, бир табақдан чиққанлари, бир хилда тарбияланганниклари туфайли феъл-атвор ва майллари бир-бириларига ўхшаб кетарди. Баъзи жиҳатдан уларнинг тақдирлари ҳам бир хил эди: иккови ҳам севиб уйланган, иккови ҳам кўп ўтмасдан бева қолган. Иккисининг ҳам қўлида биттадан фарзанд қолган. Дубровскийнинг ўғли Петербургда тарбияланар, Кирила Петровичнинг қизи эса ўз уйида яшар эди. Кўпинча Кирила Петрович дўсти Дубровскийга: «Менга қара, оғайни, Андрей Гаврилович, Володканг йўлини топиб кетса, унга қизим Машани бераман. Ҳеч нарсаси йўқлигига ҳам қарамайман» дерди. Андрей Гаврилович эса бошини чайқаб туриб, одатда бундай жавоб берар эди: «Йўқ, Кирила Петрович, Володкам Марья Кириловнага муносаб эмас. Ўғлим ўзига ўхшаган камбағал зодагоннинг қизига уйлангани дуруст. Эрка-тантиқ бир бойваччага гумашта бўлгандан кўра, ўз уйида бошлиқ бўлгани маъкул».

¹ Боёнларда қул каторида хизмат қиласидиган дехқонлар.

² Генерал-аншеф – XVIII асрда рус армиясидаги энг юкори мансаб.

Такаббур Троекуров билан унинг камбағал кўшниси ўртасидаги бу тотувликка барчанинг ҳаваси келар, Кирила Петровичнинг дастурхони устида ўтирган чоғларида, мезбоннинг фикрига тўғри келмаслиги га қарамасдан, Дубровский ўз фикрини дангал айтаверишини кўриб, ҳамма унинг журъатига таажжубланар эди. Баъзи бирорлар Дубровскийдан ўрнак олиб, итоат доирасидан чиқишига уриниб кўрганларида, Кирила Петрович уларни шу қадар кўрқитиб кўйдики, бундай ҳаракатга ҳеч ким ҳеч қачон журъат қилмайдиган бўлди, ёлгиз Дубровскийгин на умумий қоидадан четда қолди. Аммо кутилмаган бир ҳодиса барча ишни бузиб, ўзгартириб юборди.

Кузнинг бошланиш пайтида Кирила Петрович узоқроқ бир дала-сига чиқмоқчи бўлди. Бир кун аввал итбоқарлар ва жиловдорларга эрталаб соат бешда тайёр бўлиши ҳақида буйруқ берилди. Чодир ва қозон-товоқлар Кирила Петрович овқатланадиган жойга олдинроқ жўнатилиган эди. Хўжайнинг билан меҳмонлар итхонага қараб юришди, у ерда беш юздан ортиқ исковуч ва този итлар ўз тилларида Кирила Петровичнинг сахийлигини мақтаб, нозу неъмат тўла иссиқкина жойда яшардилар. Шу жойнинг ўзида касал итлар учун алоҳида бир шифохона бўлиб, уни Тимошка деган бош табиб назорат киларди, бундан ташқари, зотдор итларнинг болалаши ва ўз болаларини эмизиши учун алоҳида хона ажратилган эди. Кирила Петрович ўзининг бу ажойиб иши билан фахрланар ва ҳар бир меҳмон бу ерни камида йигирма марта кўрганига қарамай, қулай пайт келди дегунча, итхонани мақташ имкониятини қўлдан бермасди. Кирила Петрович атрофини меҳмонлар қуршаган ҳолда итхонани айлана бошлади. Тимошка билан бош итбоқар унинг ортидан юрар эди. У баъзи итхоналар олдида тўхтаб, гоҳо касал итларнинг соғлигини суриштирас, гоҳо бир оз қаттиқ ва асосли танбеҳлар берар, гоҳо таниш итларни чақириб олиб эркалар ва уларга гапиради. Меҳмонлар Кирила Петровичнинг итхонасидан завқланишни ўз бурчлари деб билардилар. Ёлгиз Дубровскийнинг дами чиқмас, қовоғи солиқ эди. Гарчи у овга жуда ишқибоз бўлса-да, давлати фақат бир жуфт овчи ит ва бир гала този ит саклашга имкон берарди. Бу ажойиб итхонани кўргач, жиндаккина ҳасадини яшиrolмади. «Нега қовоғингни солдинг, биродар, – деб сўради Кирила Петрович. – Ё менинг итхонам сенга ёқмадими?» «Йўқ, – деб жавоб берди у жиддий равишида. – Итхонангиз жуда яхши, аммо одамларингиз итларингиздек яхши яшамаса керак». Бу гапга итбоқарлардан бири хафа бўлди. «Аввало Худо, қолаверса хожамнинг давлатлари соясида, – деди у, – биз ўз турмушимиздан нолимаймиз, лекин яширишнинг ҳожати йўқ, баъзи

бир зодагонлар қўраларини шу итхоналардан қайси бирига алиштирсалар ҳам ютқазмайдилар. Негаки, бу ерда тўқ ва иссиқроқ яшайдилар». Кирила Петрович ўз қаролининг бу одобсизлигидан мириқиб кулди, меҳмонлар бу танбехнинг ўзларига ҳам тегишини сезганлари ҳолда, ҳар нечук Кирила Петровичга эргашиб, қах-қах уриб қулишди. Дубровскийнинг ранги оқарди, лекин дамини чиқармади. Ўша топда Кирила Петровичга бир сават янги туғилган кучукларни олиб келишиди; у кучук болалари билан бир оз машгул бўлга, иккитасини танлаб, қолганларини сувга ташлаб юборишга буюрди. Бу орада Андрей Гаврилович секингина чиқиб кетди ва буни ҳеч ким сезмай қолди.

Кирила Петрович меҳмонлар билан бирга итхонадан келиб кечки нонуштага ўтирди ва шундагина Дубровскийнинг йўқлигини билди. Хизматкорлар унинг уйига кетганини айтдилар. Троекуров дўстининг ортидан етиб бориб, албатта олиб келишни буюрди. Кирила Петрович бир умр Дубровскийсиз овга чиқмаган эди, чунки Андрей Гаврилович итларнинг феълини яхши билар ва ҳар қандай ов можароларини қийналмай ҳал киларди. Дубровскийга юборилган хизматкор, меҳмонлар дастурхондан турмасдан қайтиб келиб, Андрей Гавриловичнинг гапга кўнмаганини, қайтишга унамаганини Троекурова айтди. Ўз одатича ичкилик билан бир оз қизишиб олган Кирила Петрович бу хабарни эшишиб аччиғланди ва ўша хизматкорни яна изига қайтариб, агарда Андрей Гаврилович дарҳол Покровскоега келиб, шу ерда ётиб қолмаса, бир умр у билан юз кўрмас бўламан, деган гапни бориб айтишни буюрди. Хизматкор яна югуриб кетди. Кирила Петрович бўлса, дастурхондан туриб меҳмонларга рухсат берди ва ухлагани кириб кетди.

Эртаси куни эрталаб унинг биринчи саволи: «Андрей Гаврилович шу ердами?» деган сўз бўлди. Жавобнинг ўрнига учбурчак бир мактуб олди. Кирила Петрович мактубни мирзасига бериб, баланд овоз билан ўқишини буюрди ва мана бу сўзларни эшитди:

«Ҳурматли жсаноб!

Сиз то ўша итбоқар Парамошканни кечирим сўрамоқ учун олдимга юбормагунингизча, мен Покровскоега бормоқчи эмасман. Унинг гуноҳини кечиши ёки унга жазо берииш ўз ихтиёrimда бўлади, чўриларингизнинг ҳазили у ёқда турсин, Сизнинг ҳазилларингизни ҳам кўтара олмайман, чунки мен масҳарабоз эмасман, тагли-тугли боёнман. Шунинг билан сизга содиқ камина:

Андрей Дубровский».

Хозирги ахлоқ қоидасига мувофиқ, бу мактуб анчагина беодоблик билан ёзилган эди, лекин бу мактуб ўзининг ажойиб услуби, иншоси ва моҳияти билан Кирила Петровичнинг аччиғини келтирди: «Нима! – деб бақирди Кирила Петрович, ётган ўрнидан ялангоёқ пастга тушиб. – Мен одамларимни унинг олдига кечирим сўрагани юборар эмишман, кечириш ё жазолаш унинг ихтиёрида бўлармиш! Қандай хомхаёлларни ўйлади у, ким билан ўйнашаётганини биладими ўзи? Ҳали қараб турсин... Бир таъзирини есин, Троекуров билан олишишнинг нималигини билиб қўйсин!»

Кирила Петрович кийимларини кийди-да, одатдаги дабдаба билан овга чиқиб кетди. Лекин ов ўнгидан келмади. Куни бўйи биргина куён кўришди, уни ҳам қочириб юборишиди. Далада, чодирнинг ичидаги тортилган таомнинг ҳам мазаси бўлмади, ҳар ҳолда Кирила Петровичга ёқмади. У ошпазни тутиб олиб урди, меҳмонларни сўқди ва қайтишда бутун ошналари билан жўрттага Дубровскийнинг ерларини босиб ўтди.

Бир неча кундан кейин ҳам икки қўшни ўртасидаги адоварат кўтарилимади. Покровское қишлоғига Андрей Гавrilovich келмас, Кирила Петрович усиз зерикар, хуноби ошиб, оғзидан боди кириб, шоди чикар эди. Ўша ерли зодагонларнинг сайъ-харакати билан бу гаплар пишитилган ва тўлдирилган ҳолда Дубровскийнинг қулогига етиб турарди. Шу орада рўй берган бир ҳодиса, сўнгти ярашув умидини ҳам барбод қилди.

Бир куни Дубровский ўзининг кичкинагина мулкини айланиб юрган эди. Қайнзорга яқинлашганида болтанинг товушини, бир оздан кейин йиқилган дараҳтнинг гурсиллаганини эшилди. У юрганича қайнзорга кириб борди ва дараҳтларини бемалол ўғирлаётган Покровское мужикларининг устидан чиқиб қолди. Мужиклар қочмоқчи бўлишганди, Дубровский извошчиси билан бирга улардан иккитасини тутиб олди ва қўлларини орқасига боғлаб ховлисига олиб келди. Душманга қарашли отлардан учтаси ғолибининг қўлига тушди. Дубровский ниҳоятда ғазабланди, негаки Троекуровнинг одамлари учига чиқкан қароқчи бўлишларига қарамай, хожалари билан унинг ўртасидаги қалин дўстликни билганлари учун, авваллари унга қарашли ерларда бебошлиқ қилишга сира ботинолмас эдилар. Дубровский энди улар орасидаги совуқчиликдан фойдаланиш пайига тушишганини англади. Шунинг учун уруш қоидалари тўғрисидаги тушунчаларнинг ҳеч бирига риоя қилмай, қўлга тушган асиirlарни қайнзорда ўзлари кесган новдалар билан яхшилаб савалашга, отларни эса ўз ийлқиларига қўшиб юборишга аҳд қилди.

Бу воқеа ҳақидаги гап ўша куниёқ Кирила Петровичнинг қулоғига етди. Унинг қони қайнаб кетди ва ғазаби жўш урган дастлабки пайтда барча хизматкорлари билан бирга Кистеневкага (қўшнисининг қишлоғи шундай деб аталарди) ҳужум қилмоқчи, уни ер билан яксон этмоқчи, зодагонни эса ўз қўргонида қамал қилмоқчи бўлди. Бундай ботирликлар унга бегона эмас эди. Аммо кўп ўтмай, унинг фикри бутунлай ўзгарди.

У меҳмонхонада вазмин қадам ташлаб у ёқдан-бу ёққа юриб турган эди, бехосдан нигоҳи деразага тушди ва учта от қўшилган бир арава-нинг дарвоза олдига келиб тўхтаганини кўрди; бошига чарм қалпок, эгнига дағал юнг матодан тикилган шинель кийган кичкина бир одам аравадан тушиб, гумашта турадиган уй томонга қараб юрди. Троекуров бу одамнинг маслаҳатчи Шабашкин эканини билиб, уни ўз ёнига чақиртирди. Бир оздан кейин Шабашкин Кирила Петровичнинг олдига келди, қайта-қайта таъзим қилиб, Троеворнинг буйруғини эшлиши учун иззат-хурматни бажо келтириб турди.

– Омонмисан, ҳа, исминг нимайди? – деди Троекуров. – Хўш қандай юмуш билан келдинг?

– Шахарга кетаётган эдим, жаноб олийлари, – деди Шабашкин. – Жаноби олийларидан бирорта буйруқ йўқмики, деб Иван Демьяновга учраган эдим.

– Хўп вақтида келдинг-да, ҳа, исминг нимайди? Менга жуда керак эдинг. Ароқдан ичиб, гапимга қулоқ сол.

Бундай хушмуомалалик маслаҳатчини жуда ҳайратта солди. У ароқни ичмай, Кирила Петровичнинг сўзларига астойдил қулоқ солди.

– Менинг бир қўшним бор, – деди Кирила Петрович. – Мулки кичик, ўзи дағал бир одам, мен ўшанинг мулкини ўзимга ўтказсан дейман, сен шунга нима дейсан?

– Жаноби олийларининг қўлларида биронта ҳужжат ёки...

– Валдирама, биродар, ҳужжатинг нимаси, қўлингдан келса ҳужжатсиз тортиб олиш керак-да. Шошма, бир оз сабр қил. Бир замонлар бу мулк бизники эди. Спицин деган аллақандай бир одамдан сотиб олиниб, кейин Дубровскийнинг отасига сотилганди. Шундан бир нуқсон топсак бўлмасмикин?

– Қийинрок бўлар, мўътабар жаноби олийлари, ҳар ҳолда ўша олди-сотди қонуний йўл билан амалга оширилган бўлса керак.

– Ўйлаб кўр, биродар, бир йўлини топ.

– Агар сиз жаноби олийлари, бир амаллаб қўшнингиздан мулкни тасарруф қилиш ҳақидаги рўйхат ёки васиқани қўлга киритсангиз, унда албатта...

– Биламан, лекин ҳамма бало шундаки, барча ҳужжатлар унинг кўрғонига ўт тушган пайтда ёниб кетган.

– Нима дедингиз, жаноби олийлари, қоғозлари ёниб кетган дейсизми? Ундан бўлса жуда яхши. Агар рухсат берсангиз, қонунга мувофиқ иш тутамиз ва шубҳасиз, муродингиз ҳосил бўлади.

– Рост айтяпсанми? Майли ҳаракат қилиб кўр. Кўлингдан келганича ғайрат қил, мукофот борасида кўнглинг тўқ бўлсин.

Шабашкин ергача эгилиб таъзим қилди-да, чиқиб кетди, ўша кундан бошлаб қасд қилган ишига киришди. Шабашкиннинг ғайрати ортида роса икки ҳафтадан кейин Дубровский шаҳардан бир қоғоз олди. Бу қоғозда, Дубровскийнинг Кистеневка қишлоғига эгалигини тасдиқлайдиган хукуқлари ҳакида дарҳол изоҳ бериш талаб қилинган эди.

Бу кутилмаган сўровдан ҳайрон бўлган Андрей Гаврилович ўша куннинг ўзидаёқ, анчагина қўпол жавоб ёзиб юборди, бу жавобида у: Кистеневка қишлоғи марҳум отасидан мерос қолганини, Троекуровнинг бунга ҳеч қандай дахли йўқлигини, кимки бу мулкка даъвогар бўлса, бу даъво фақат извогарлик ва муттаҳамликдан бошқа нарса эмаслигини билдириди.

Мазкур жавоб суд маслаҳатчиси Шабашкинга мойдек ёқиб тушди. Чунки у биринчидан Дубровскийнинг иш билмаслигини, иккинчидан орқа-олдини суриштирмайдиган жizzаки одам эканлигини шу мактубнинг мазмунидан билиб олди ва шунинг учун ҳам бундай одамни осонгина қўлга туширишга унинг ҳеч қандай шубҳаси қолмади.

Андрей Гаврилович маслаҳатчининг саволларини совуққонлик билан ўқиб чиққач, батафсил жавоб ёзиш кераклигини англаб етди. У анчагина пухта жавоб ёзиб юборди, аммо кейинчалик бунинг ҳеч қандай фойдаси бўлмади.

Иш чўзилиб кетди. Ўзининг ҳақлигига ишонган Андрей Гаврилович бу борада ортиқ ташвиш чекмади, теварак атрофга пул сочишга унда на истак, на имкон бор эди, қалам аҳлининг сотқин виждонини ҳаммадан кўра кўпроқ мазах қилиб келган бўлса-да, арзимаган бир извонинг қурбони бўлиш унинг ҳаёлига ҳам келмасди. Иккинчи томондан Троекуровнинг ўзи ҳам қўзгаб қўйган ишининг ютиб чиқиши устида ортиқ уринмади, унинг номидан у ёқда Шабашкин зўр бериб ишлар, судьяларни кўрқитар, пора билан қўлга олар, турли-туман қонунларни ўз фойдасига буриб, 18... йил февраль ойининг тўққизинчи кунида Дубровский шаҳар полицияси орқали бир чақирув қоғози олди, унда у юқори унвонли офицер Дубровский билан генерал-аншеф Тро-

екуров ўртасидаги мулк жанжали ҳақида маҳаллий суднинг хукмини эшишиш, ўзининг ўша хукмдан рози ёки норозилигини билдириш учун суд маҳкамасига ҷақирилган эди. Дубровский ўша куниёқ шаҳарга жўнаб кетди. Йўлда Троекуров унга етиб олиб, ўтиб ҳам кетди. Улар бир-бирларига кибр билан қараб қўйишди, шунда Дубровский ўз рақибининг юзида ёвуз бир илжайиш кўрди.

П Б О Б

Андрей Гаврилович шаҳарга келиб бир савдогар ошнасиникига тушди, у ерда бир кечада тунаб, эрталаб маҳаллий суд маҳкамасига кирди. Унга ҳеч ким эътибор бермади. Ундан кейин Кирила Петрович етиб келди. Мирзалар ўринларидан туриб, қаламларини қулоқларига қистирдилар. Суд аъзолари уни иззат-икром билан қарши олиб, марта-баси, ёши ва насл-насабига ҳурмат юзасидан унга курси қўйиб беришди; у очиқ эшик ёнига ўтирди. Андрей Гаврилович бўлса деворга суюниб тик турди, бу вақт чукур жимлик чўқди-да, суд котиби шанғиллаб суд хукмини ўқий бошлади.

Бу рус тупроғида бизнинг ҳар биримиз, мутлақ ўзимизники деб юрган мулкимиздан ажраб қолишимиз мумкинлигини исбот қиласидиган йўллардан бирини билиб қўйиш барча учун қизик бўлар, деган умид билан хукмномани сизга тўлиқ ҳавола этамиз.

18... йил октябрь ойининг 27 куни эдиким ** шахрининг маҳаллий суд маҳкамаси ** губернаси Кистеневка қишлоғида ** жон эрқак, ҳам ** десятина экин ери, ўтлок ва бошқалардан иборат бўлган ва генерал-аншеф Кирил Пётр ўғли Троекуровга қарашли мулкнинг гвардия офицери Андрей Гаврил ўғли Дубровский томонидан нотўғри тасарруф қилиниши борасидаги ишни кўриб чиқди. Мазкур ишдан маълум бўлишича: генерал-аншеф Троекуров ўтган 18... йил, июнь ойининг 9 куни ушбу суд маҳкамасига ариза бериб маълум килдики, мазкурнинг марҳум отаси коллеж асессори¹ ва кавалери Пётр Ефим ўғли Троекуров 17... йил, август ойининг 14 кунида маҳаллий маҳкамада вилоят котиби мансабида турган чоғида, зодагонлардан ва девонхона хизматчиларидан бўлмиш Фадей Егор ўғли Спициндан бир парча ер сотиб олган экан, мазкур ер эса ** округида юқорида зикр этилган Кистеневка қишлоғида экан (у қишлоқ бир замонлар Кистенев висилкалари деб аталган экан) тўртингчи тафтиш бўйича мазкур қишлоқда эрқак жинсидан ** жон мавжуд экан, уларнинг барча рўзгорлари, уй-жойлари, экила-диган ва экилмайдиган ерлар, ўрмонзорлар, пичанзорлар, Кистеневка деб номланган дарёда балиқ овландиган жойлар ҳамда ушбу мулкка қарашли ҳамма экин ерлар, мулк сохибининг ўзига хос ёғоч иморат, хуллас, мазкур зодагонга ўз марҳум отаси зодагон

¹ Асессор – Чор Россиясида кичик амалдорларга берилган 8-даражали унвон ва шу унвоннинг эгаси.

ва урядник¹ Егор Терентий ўғли Спициндан мерос тариқасида колган ва мазкур во-рисининг тасарруфида бўлмиш мол-мулкнинг хаммаси, одамлардан бир жон ва ерлар-дан бир карич хам қолдирилмай 2 500 сўм бараварига кавалер Троекуровга сотилиб, ўша куннинг ўзида ** суди палатасида олди-сотди муомаласи ва мустаҳкам васика коидалари бажо келтирилиб, мазкур мулкнинг тасарруфи ** шахарининг маҳаллий суд маҳкамаси томонидан ушбу генерал-аншеф Троекуровнинг отасига ўтказилиб, мазкур мулк аввалги эгасининг тасарруфидан чиқарилган экан. Ниҳоят, 17... йил сентябрь ойининг 6 куни ушбу генерал-аншеф Троекуровнинг отаси тақдирнинг хукми ила жон таслим қиласди, аммо унинг ўғли, ҳозирда ариза берувчи генерал-аншеф Троекуров эса 17... йилдан, яъни қарийб болалик чоғидан бўён ҳарбий хизматда бўлиб, кўп вақтни хорижий мамлакатларда, жангларда ўтказибди, шу сабабдан у ўз отасининг вафоти ва унинг вафотидан сўнг, қанча мулк қолгани ҳакида маълумот ололмабди. Эндилика мазкур генерал ҳарбий хизматдан тамом озод бўлиб, ўз отасининг ** губерналар ҳамда ** маҳаллий худудларнинг турли қишлоқларидағи 3 000 жондан иборат мулкига қайтиб келиб кўрадики, мазкур мулклардан юқорида кўрсатилган ** қишлоғидаги бир кисм мулкининг (ҳозирги тафтишга кўра бу қишлоқда, хаммаси бўлиб ** жон) ерларини барча-мулклари билан ҳеч бир асоссиз ва ҳужжатсиз юқорида зикр этилган мазкур гвардия офицери Андрей Дубровский тасарруф қиласди экан, шу сабабдан ушбу ариза бараварида, мазкур бир кисм мулкни сотувчи Спицин томонидан ушбу аризани берувчининг отасига берилган мустаҳкам васиқани топшириб, суд маҳкамасидан сўрайдиким, мазкур мулка ноҳақ эгалик қилювчи Дубровскийдан олиб ўз эгасига, яъни, мазкур Троекуровнинг тасарруфига ўтказилса ҳамда Дубровский ўша мулкни ҳақсиз эгаллаб олиб, шунчак пайт тасарруф қилиб, кўп даромад олгани сабабидан тегишил текширувлар сўнгиди мазкур Дубровскийдан ариза берувчининг, яъни Троекуровнинг фойдасига қонун бўйича тегадиган ҳақларни ҳам ундириб берилса.

** маҳаллий судининг бутун олиб борган тафтишларида маълум бўлдики, мана шу жанжалга сабаб бўлган мулкининг эгаси гвардия офицери Дубровский, ҳозирги пайтда ўз тасарруфида бўлган ўша мулк ҳакида, дворян маслаҳатчисига қўйдагича изоҳ берган: Кистеневка қишлоғидаги, яъни, ҳозирги чоғда ўз тасарруфида бўлмиш мулк ** жон ва барча ерлари билан отаси, артиллерия офицери Гаврила Евграф ўғли Дубровский томонидан, айни замонда даъвогар бўлган собиқ вилоят котиби ва кейинроқ коллеж асессори Троекуровдан сотиб олинган бўлиб, унга мерос тариқасида қолган ** маҳаллий судида 17... йил август ойининг 30 куни ишонч васиқасини унвон маслаҳатчиси* Григорий Васил ўғли Соболевга ўтказилган бўлиб ва шу орқали висиқасини топширмоғи лозим бўлган, мана шу висиқада айтилишича, у, Троекуров, яъни, Спициндан олинган мулк** жон ери билан унинг отасига, Дубровскийга сотилган бўлиб, шартнома бўйича кўрсатилган ақчани – 3 200 сўмни кайтармаслик шарти билан отасидан олиб, ўргада турган Соболев орқали юқорида зикр этилган тилхатни топширишни буйруқ берган. Ана шу ишонч қофози билан бутун ақчани тўлагандан кейин, ўша сотиб олинган мулкнинг эгасидек ўз тасарруфига олгани сотувчи Троекуровга ҳамда ҳозирги мулк эгасига маълум эмас. Боз устига ишонч қофози сақланган Соболевдан қачон ва кимнинг олдида унинг отасига ана шундай висиқани топширилгани унга, Андрей Дубровскийга маълум эмас, негаки ўша пайтда у сағир бўлиб, отасининг вафотидан кейин ҳам мана шундай висиқани ахтариб тополмаган, эҳтимол 17... йилда қишлоқнинг бутун ахолисига маълум бўлган, яъни, буларнинг ҳовлисига ўт кетганида куйиб кетган бўлса. Бу мулк Троекуров томонидан сотилган ҳамда Соболевга ишонч

¹ Урядник – Чор Россиясида маҳаллий полициянинг энг кичик унвони.

vasikası ўтказилган, яъни, 17... йил, отаси вафот килган 17... йилдан бўён шу юкорида зикр килинган мулкни, кишлек аҳолисидан 52 кишининг қасамёд қилиб терговда берган жавобларига кўра улар, Дубровскийлар ўша жанжалли мулкни 70 йилдан бўён ўз тасарруфида саклаб келганлар, аммо бу ҳақда акт ёки вакиға борлиги маълум эмас. Бу иш ҳақида юкорида қайд этилган шу мулкни сотиб олувчи собиқ вилоят котиби Пётр Троекуровнинг шу мулкка эгалик қилган-қилмагани ҳақида бир нарса дея олмайдилар. Дубровский жанобларининг бундан 30 йил муқаддам кечаси ўт кетиб бутунлай ёниб кетган кўраси, ўргадаги холис кишиларнинг гувохлик беришича мана шу жанжалли мулк, ўша замоннинг қийинчилигини эътиборга олганда ҳам, ҳар йили камида 2 000 сўмдан даромад келтирган.

Аксинча, шу йил 3 январь куни суд маҳкамасига генерал-аншеф Кирила Пётр ўғли Троекуров кириб, юкорида зикр килинмиш гвардия офицери Андрей Дубровскийдан терговда мархум отаси Гаврила Дубровский томонидан сотиб олинган мулкнинг унвон маслаҳатчиси Соболевга қолдирилган ишонч қофозини олиб келишини талаб қилгани, мазкур Дубровский ҳақиқий вакиға ў ёқда турсин, ҳатто 1752 йилги фармойиш ва генерал регламентнинг 29 бобида эслатилган кўрсатмаларга мос келувчи бирор далил ҳам тополмаган. Бундан маълум бўладики, ўша ишонч қофози, ҳозирги пайтда берувчининг вафотидан кейин, 1818 йил майда чиқкан фармойиш натижасида ўз-ўзидан бекор бўлган хисобланади. Бундан ташқари, кимда етарли хужжат бўлса, ўша жанжалли мулк хужжат эгасининг тасарруфиға топширилади.

Унинг отасига қарашли бўлмиш мулк ҳақида у исбот учун конуний вакиға кўрсатгани сабабли, фармойишда кўрсатилишича юкорида зикр этилган Дубровский ноҳақ тасарруф қилгани натижасида, уни ўша мулкдан маҳрум килиш билан мулкнинг ҳақиқий меросхўри бўлмиш Троекуровга берилсин. Ўз тасарруфида ўзига қарашли бўлмаган ва ҳеч кандай вакиғаси йўқ мулкдан келган даромаддан нотўғри фойдаланиб келгани сабабли, шунакалар қанча бўлса ҳам ўз кучида қолиб... зодагон Дубровскийдан ундирилиб, Троекуровнинг талаби қаноатлантирилсин. Конун ва тафтиш масалалари бўйича ** маҳаллий судида куйидагилар аниқланди:

Юкорида зикр этилган ҳозирги пайтда гвардия офицери Андрей Гаврила ўғли Дубровский тасарруфида бўлган Кистеневка кишлогоғидаги, шу кунги... тафтишда аниқланишига кўра, хаммаси бўлиб эрлар ** жон, ер ва бошқа тегишли нарсалар бўлган мулкка генерал-аншеф Кирила Пётр ўғли Троекуров томонидан мукаммал хужжат тақдим этилди, мархум отаси томонидан сотилгани учун вилоят котиби, кейинчалик коллеж асесори бўлган 17... йил, дворян хизматчиси Фадей Спицин тарафидан, бундан ташқари ўша сотиб олувчи, яъни, юкоридаги вакиға текширилганда маълум бўлдики, яъни, ** маҳаллий суди томонидан ўша мулк унга рад қилиниб, аксинча гвардия офицери Андрей Дубровскийга мархум сотиб олувчи Троекуров томонидан унвон маслаҳатчиси Соболевга – Дубровскийнинг отаси исмига, аммо мана шундай ҳоллар жонсиз мулк ашёларини ўз тасарруфиға олиш, фармойиш бўйича қатъий ман этилган бўлиб, бундан ташқари ўшандай ишонч вакиқалари берувчининг вафотидан кейинроқ ўз-ўзидан йўқ этилгусидир.

Бундан ташқари, жанжалли мулк ишини қаерда ва қачон бўлганини аниқлаб берадиган, яъни, иш бошидан 18... йилдан бошлаб ҳозирга кадар Дубровский томонидан судга бирор ҳақиқий хужжат тақдим этилгани йўқ. Шу билан биргаликда ушбу суд шуни назарда тутадики, мазкур бир қисм мулк, ** жон одамлари ҳамда ерлари барча мол-мулки билан, ҳозир кандай ахволда бўлса ўша ҳолиҷа, қўлида мустаҳкам вакиғаси бўлган генерал-аншеф Троекуровнинг мулки деб хисоблансин; у мулкнинг

тасарруфидан гвардия офицери Дубровский маҳрум килиниб, мулкни Троекуровга ўтказиш хақида ** маҳаллий судига фармойиш берилсин. Бундан ташқари, генерал-аншеф Троекуровнинг ота-бобосидан колган мулкни, гвардия офицери Дубровский ўз қарамига олиб ва мазкур ердан келган даромадлардан бир неча йиллар мобайнида ноҳақ фойдаланиб келгани учун пул маблағи даъво этилган.

Кексаларнинг гувоҳлиги билан маълум бўлдики, мазкур мулк бир неча йиллар давомида Дубровскийлар қарамида бўлиб келган ва генерал-аншеф Троекуров бўлса шу пайтгача мазкур ердан Дубровскийларни ноҳақ фойдаланиб келганига даъво ҳам қилмаган. Конун бўйича агар бирор киши ўзга бир кишининг ерини экса ёки кўргонлаб олса, буни нотўғри эгаллаганлиги тўғри исбот этилганда ҳақ томонга мулкни барча экин ерлари, кўргонлари ва солинган бинолари билан бирга берилиши мумкин, акс ҳолда исботи аниқ бўлмагани учун генерал-аншеф Троекуров томонидан гвардия офицери Дубровскийга килинган маблағ даъвоси бу ўринда рад килинсин: чунки унга карашли бўлган мулкнинг бирор нарсасини ҳам камайтирмай ўзига қайтариб берилди. Борди-ю, генерал-аншеф Троекуров бу хукмдан норози бўлса, агар ўз даъвосининг ҳақлигини аникроқ бирор далил билан исбот қилса, у ҳолда тегишли бўлган юкори маҳкамаларга арз қилмоғи ҳам мумкин. Бу хукмни даъвогарга ҳам, жавобгарга ҳам ўқиб эшиттирилгач, иккала томоннинг ҳам рози ёки норози эканига полиция орқали имзоларини чектирмок зарур.

Бу хукмга судда иштирок этганларнинг барчаси имзо чекдилар.

Котиб жим бўлди, маслаҳатчи ўрнидан турди ва икки букилиб Троекуровга таъзим қилди. Кейин қофозни унинг ёнига қўйиб имзо чекишини сўради. Тантана қилган Троекуров маслаҳатчининг қўлидан қаламни олди-да, суд хукми остига мамнуният билан имзо чекди.

Навбат Дубровскийга келди. Котиб қофозни унинг ёнига келтирди, Дубровский бошини куйи солганича қимир этмасдан ўтиради.

Котиб унга ўз илтимосини такрорлади ҳамда хукмдан тамоман рози бўлганини, борди-ю, ўз ишининг ҳақ эканига ишончи комил бўлиб, тегишли жойга шикоят қилмоқчи бўлса, мутлақо норози эканини билдириб имзо чекишини сўради. Дубровский чурқ этмади... Кейин бирданига бошини кўтарди, кўзлари ўтдек чақнаб кетди, ер тепинди, сўнгра кучининг борича котибни шундай қаттиқ итариб юбордики, у ағдарилиб тушди, сиёҳдонни олиб маслаҳатчига отди. Ҳамма ваҳимага тушди. У: «Бу нима деган гап! Худонинг черковини оёқ ости қилишлик! Йўқолларинг беорлар» деб бакирди. Кейин Кирила Петровичга қараб: «Бу қандай гапки, жаноб олийлари, итбоқарлар Худонинг уйига итларини олиб киришса! Черковда итлар изғиб юришса! Шошманг, бир адабингизни бериб қўймасам бўлмайди...»

Шовқин-суронни эшитган қоровуллар югуриб киришиб, уни зўрга кўлга олдилар. Сўнгра, ташқарига олиб чиқиб чанага ўтқизишиди. Ундан кейин Троекуров чиқди, уни бутун суд аҳли кузатиб қўйди. Дуб-

ровскийнинг кутилмаганда тентакка айланиши Троекуровга қаттиқ таъсир этди ва дилини сиёҳ қилиб қўйди.

Троекуровдан илтифот кутган судьялар, ундан бир оғиз ёқимли сўз эшитолмадилар. У ўша куниёқ Покровское қишлоғига жўнаб кетди. Бу орада Дубровский касал бўлиб ётиб қолди; унинг баҳтига унча нодон бўлмаган маҳаллий табиб ундан қон олди, сўнгра зулук билан шпан кўнғизи солди. Кечга яқин бемор бир оз ўзига келди. Эртаси куни, уни энди деярли кўлидан кетган Кистеневка қишлоғига олиб кетишиди.

III Б О Б

Орадан хийлагина вакт ўтди, бироқ бечора Дубровскийнинг аҳволи ҳамон оғир эди. Рост, тентаклик ортиқ хуруж қилмади, лекин кундан-кунга унинг куч-куввати кетарди. У ўзининг аввалги машғулотларини унугиб қўйган, уйидан камдан-кам чиқар ва туну кун хаёл сурарди. Бир пайтлар Дубровскийнинг ўғлини тарбиялаган Егоровна деган яхши бир кампир, энди унинг ўзига энага бўлиб қолганди. Бу кампир уни худди бир гўдак боладек парвариш қилас, қай маҳал ухлаш, қай пайтда овқатланиш кераклигини айтар, таом едирап ва ўрнига ётқизар эди. Андрей Гаврилович кампирнинг ҳамма айтганларига қўнар ва ундан бошқа ҳеч ким билан гаплашмасди. Андрей Гавриловичнинг ўз ишлари, рўзгор ва хўжалик юмушлари ҳақида ўйлашга дармони етмай қолди. Буни кўрган Егоровна барча воқеадан ёш Дубровскийнинг ўғли бу вактда Петербургдаги гвардиячи пиёда аскарлар полкларининг бирида хизмат қилас эди. Харажат дафтаридан бир варакни йиртиб олиб, кампир Кистеневка қишлоғининг бирдан-бир саводхони ошпаз Харитонга мактуб ёздириди. Мактубни ўша куниёқ шаҳар почтасидан жўнатди.

Энди ўқувчини қиссамизнинг асл қаҳрамони билан таништириш вакти келди.

Владимир Дубровский кадетлар бўлинмасида тарбияланиб, уни гвардия корнети унвони билан якунлади; Дубровский ўғлини зориқтирмаслик учун ҳеч нарсани аямади, шунинг учун бу йигит уйидан кутганидан ортиқ ёрдам олиб турди. Жуда исрофгар ва шуҳратпараст бўлганидан ортиқча ҳою ҳавасларга берилди; ҳамма камбағал йигитлар сингари, ахир бир куни серсеп бир қизга уйланиб олиш ҳаёли билан ўзининг келажаги ҳақида ўйламади, қиморга берилди, тобора кўпроқ қарзга ботди.

Бир куни кечкурун бир неча офицер ошналари уникуга келиб, унинг каҳрабодан ясалган чубукларидан чекиб, юмшоқ диванларида ёнбошлиб ётишганда, хизматкори Гриша унга бир мактуб келтириб берди, мактубнинг ёзуви ва устидаги муҳри йигитни ҳайрон қолдирди. У шошиб мактубни очди ва мана шуларни ўқиди:

«Валинеъматимиз Владимир Андреевич, мен ким кампир энаганг, отангнинг аҳволини сенга хабар қилмоқчиман. Унинг аҳволи жуда ёмон, эртадан кечгача тентак болага ўҳшаб, индамасдан ўтиради, баъзан пойма-пой гапиради. Банданинг жони – Худонинг моли, деганлар. Тулпорим болам, тезроқ етиб кел. Сени олиб келиши учун Песочноега от-арава жўнатамиз. Эшилдикки, маҳаллий суд бизникуга келиб барчамизни Кирила Петрович Троекуровнинг қўлига топширас эмиши. – Нима учун дессанг, биз унга қарашили эмишимиз, ваҳоланки, биз азалдан сизларни бўламиз, умримиз бино бўлиб, бу каби гапларни эшишмаган эдик. Сен ахир, Петербургда турибсан, бу аҳволни бир оғиз гап билан подшоҳимизга билдириб қўйсанг, бизга бу қадар озор етишига йўл қўймасди, деб сенинг вафодор чўринг, энаганг:

Орина Егоровна Бузирева.

Шу мактуб билан бирга Гришага ҳам ўзимнинг оналик саломимни юбораман; у сенга яхши хизмат қиляптими? Бу ерда икки ҳафтадан бери тинимсиз ёмғир қўймоқда, Миколина ҳайитига яқин подачи Родя қазо қилди».

Владимир Дубровский бу каби анчагина тўмтоқ мисраларни зўр ҳаяжон билан бир неча марта ўқиб чиқди. У болалигига онасидан айрилган, отасини ҳам тузуккина билмасдан туриб, саккиз ёшида Петербургга олиб келинган эди – шундай бўлса-да, у отасига жуда қаттиқ кўнгил қўйган, оила ҳаётининг сокин онларини жуда оз тотганига қарамай, бу ҳаётни ҳам қаттиқ севарди.

Отасидан ажраб қолиш фикри унинг юрагини парчалар, энагасининг мактубидан бечора беморнинг аҳволи анча оғир эканлигини фахмлар ва бу нарса уни ваҳимага соларди. У узоқ бир қишлоқда, эси паст бир кампир билан хизматкорлар қўлига қараб қолган, аллақандай хавф-хатарга маҳкум этилган ва бирор кимсадан ёрдам кўрмай ҳам жисмоний, ҳам руҳий азоблар ичida сўниб бораётган отасини кўз ол-

дига келтирди. Шундан кейин у ўзини кечириб бўлмайдиган бепарвоникда айблади. У кўп вақтдан бўён отасидан хат-хабар олмаган ва уни сафарда ёки хўжалик ташвишлари билан оворадир, деб унинг ҳолидан хабар олиши ҳам ўйламаган эди.

Модомики, бемор отанинг ахволи Владимирнинг ўша ерда бўлишини тақозо қиласа экан, у дарҳол отасининг олдига жўнашга, ариза бериб хизматдан бўшашга карор қилди. Унинг безовталанганини кўрган дўстлари уй-уйларига жўнаб кетишди. Владимир ёлгиз қолгач, таътил учун руҳсат сўраб ариза ёзди, кейин чубуғини тутатиб чуқур хаёлларга гарқ бўлди.

Ўша куни ёқ таътил олишга ҳаракат қилди. Уч кундан кейин йўлга тушди.

Владимир Андреевич Кистеневка қишлоғига буриладиган бекатга яқинлашиб келмоқда эди. Унинг кўнгли гаш, отасини кўрмай қолишдан ваҳимага тушар, бундан буён қишлоқда ўтадиган диққинафас ҳаётни кўз олдига келтиради. Бу ҳаёт унинг кўзига чекка бир қишлоқда, танҳоликда ўтадиган факирлик ҳамда умуман, нотаниш ишлар ортидан югуришдек кўринар эди. Бекатга етиб келгач, назоратчининг олдига кириб, бўш от борми, деб сўради. Бекат назоратчиси унинг қайси қишлоққа боришини суриштириб билганидан кейин, Кистеневкадан келган от-арава уни тўрт кундан бери шу ерда кутиб ётганини айтди. Кўп ўтмай, Владимир Андреевичнинг олдига кекса извошли Антон кириб келди. Бу одам бир замонлар Владимирни отхонага олиб кириб, отларни томоша қилдирар ва унинг тойчасини боқар эди. Владимир Андреевични кўрган ҳамон Антон кўзига ёш олди, икки букилиб таъзим қилди, сўнгра кекса боённинг ҳозирча тирик эканини айтиб, аравани кўшгани югарди. Владимир Андреевич нонушта қилмасданоқ, шошиб жўнаб кетди. Антон отни қишлоқ йўлига солди, йўл-йўлакай икковлари сўзлашиб кетишди.

– Марҳамат қилиб айт-чи, Антон, отам билан Троекуровнинг ўртасида нима гап ўтди?

– Худонинг ўзи билади буни азизим Владимир Андреевич... хўжайинимиз, афтидан Кирила Петрович билан чиқишолмай қолди, шундан кейин гарчи ўзидан ўтадиган суд бўлмаса-да, у судга берди. Боёнларнинг ишига аралашиш биз факирларнинг иши эмас. Очифини айтганда, отангиз Кирила Петрович билан олишиб бекор қилди, унга тенг келиб бўлармиди.

– Бундан чиқдикни, Кирила Петрович бу ерда истаган ишини қиласа экан-да?

– Шундоқ бегим, у маслаҳатчини сариқ чақага олмайди, маҳаллий полиция бошлиғи унинг хизматида югуриб юради. Амалдорлар қуллук қилиб, унинг уйига келиб туришади, хўрак бўлгандан кейин чўчка келаверади-да, бегим.

– У одам бизнинг ерларимизни тортиб олмоқчи бўлгани ростми?

– Э-э, тақсирим, биз ҳам шундай деб эшитдик – яқинда оқсоқолимиз бола чўқинтириш маросимини ўтказган эди, шунда Покровское қишлоғининг руҳонийси: «Ўйин-кулгини бас қилинглар, Кирила Петровичнинг қўлида ҳамманг адабингни ейсанлар», деди. Шунда темирчи Митка туриб: – Бўлмағур гапларни кўй, Савельич, кўнгилни ғаш қилма, меҳмонларнинг орасига ғулгула солма. Кирила Петрович ҳам ўз йўлига, Андрей Гаврилович ҳам ўз йўлига, ҳаммамиз Худонинг ва подшоҳнинг қулларимиз, элнинг оғзига элак тутиб бўладими, гапираверишади-да, – деди.

– Бундан чиқди, Троекуровнинг қўлига ўтишни хоҳламас экансизлар-да?

– Кирила Петровичнинг қўлига ўтиш дейсанми? Худо сакласин ундан, ўз одамлари қийналиб ўлаётиди-ку, бегоналар унинг қўлига тушса борми, терисини эмас, этларини ҳам шилиб олади. Йўқ, Худо Андрей Гавриловичнинг умрини узоқ қилсин, агар қазоси етиб, Яратган ўз ҳузурига чакирса, сендан бошқа бизга ҳеч кимнинг кераги йўқ. Сен бизни бериб қўймасанг бас, биз сен учун маҳкам турамиз. – Шу сўзларни айтаркан, Антон қамчисини отларнинг устида ўйнатди, тизгинни силтаб тортди, отлар шиддат билан йўртиб кетди.

Кекса извоҷчининг вафодорлигидан таъсиранланган Дубровский жим бўлиб, хаёлга чўмди. Бир соатдан кўпроқ вақт ўтгач дабдурустдан Гриша: «Ана Покровское!» деб унинг хаёлини қочириб юборди. Дубровский бошини кўтарди: арава кенг бир йўл ёқасидан борар, кўлдан чиқаётган анҳор эса, олисдаги адирлар орасидан буралиб оқар эди. Бу адирларнинг бирида ҳашаматли ғиштин иморатнинг шийпони ва кўкка бўялган тунукаси кўринарди; иморатнинг атрофи ям-яшил ўрмон; иккинчи адирга беш қуббали черков ва қадимий бир жомхона қурилган эди. Ён-атрофни эса, полизлари ва қудуклари билан дехқонларнинг кулбалари тўлдирганди. Дубровский бу жойларни яхши биларди, бир замонлар худди шу адирнинг устида Троекуровнинг қизи Маша билан ўйнаб юргани унинг эсига тушди, ўзидан икки ёш кичик бўлган бу қизнинг келажакда гўзал бўлиши ўша вақтдаёқ билиниб турарди. Дубровский Антондан киз ҳақида баъзи нарсаларни сўрамоқчи бўлди-ю, лекин негадир уялиб сўролмади.

Кирила Петровичнинг ҳовлисига яқинлашганида, оппоқ кўйлагини ҳилпиратиб боғчадаги дарахтлар орасида бир аёлнинг юрганини кўрди. Барча қишлоқ извошлилари сингари ғуурдан холи бўлмаган Антон, отларга қаттиқ қамчи босиб кўприкдан ва қишлоқ ёнидан чоптирганича ўтиб кетди. Қишлоқдан чиққач, арава тепаликка кўтарила бошлади; тепаликда Владимирнинг кўзига қайназор кўринди, чапда – сайхонликда эса нурсизгина, тунукаси қизилга бўялган бир бинони кўрди-да, юраги така-пуга бўла бошлади. У Кистеневка қишлоғи ва отасининг уйи қаршисида туарар эди.

Ўн дақиқалардан кейин ўзининг ҳовлисига кириб борди. У ён атрофга ниҳоятда ҳаяжонланиб қаради, ўн икки йилдан бери туғилиб ўсган жойини кўрмаган эди-да! Болалигига деворлар тагига ўтқазилган қайнин дарахтлари ўсиб, серсоя бўлиб кетган. Бир замонлар бу ҳовлига режа билан яхшилаб тортилган уч тахта ажойиб гулзор ҳусн бериб турарди. Шу гулзорнинг ўртасида чиннидек супуриб туриладиган кенггина йўлка бўларди; энди эса бу ерни тизза бўйи ўт босган, тушовланган бир от юарди. Итлар бир қур хуришганди, Антонни кўриб жим бўлиб қолишидди, пахмок думларини қимирлатишидди. Хизматкорлар уй-уйларидан чикиб, шовқин-сурон билан ўз қувончларини билдириб, ёш боённи куршаб олишидди. Владимир улар орасидан зўрға ўтиб, эски пешайвон томонга ўтди. Даҳлизда унга Егоровна дуч келди. Кампир ўзи тарбиялаган болани бағрига босиб, юм-юм йиглади. Бу яхши кампирни ўз бағрига босаркан: «Ҳа, омонмисиз, омонмисиз энажон, – деди Владимир. – Хўш, отамга нима бўлди? Каерда ўзи? Ахволи қалай?»

Шу вақт меҳмонхонага зўрға қадам босиб, бўйи баланд, ранги олинган, озгин, яктак ва қалпоқ кийган бир чол кириб келди.

Чол эшитилар-эшитилмас:

– Омонмисан, Володка! – деди. – Владимир жон-жаҳди билан отасини қучоқлади. Шодлик беморга қаттиқ таъсир қилганидан бўлса керак, унинг дармони қуриб, оёқлари буқчайиб кетди, агар Владимир ушлаб қолмаганида чол йиқилар эди.

– Нега ўрнингиздан турдингиз? – деди унга Егоровна. – Оёқ босгани ҳоли йўғ-у, тағин одамларнинг кетидан югурмоқчи бўлади.

Чолни ўз хонасига олиб кириб ётқизишидди. У харчанд ўғли билан сўзлашиб тиришмасин, фикрлари чалкашиб кетиб, оғзидан маъносиз пойма-пой сўзлар чиқар эди. Кейин овози чиқмай, жим бўлиб қолди. Отанинг ахволи Владимирга қаттиқ таъсир қилди, у отаси ётган уйга жойлашди-да, бошқаларни чиқариб юбориб, ўзи беморнинг бошида қолди. Шундан кейин Гришани ўртага олишиб, уни хизмат-

корлар хонасига бошлаб боришли, қишлоқча одат билан обдон меҳмон қилиши, ҳол-аҳвол сўрашиб, тур хил саволлар билан унинг тинка-мадорини қуритиши.

IV Б О Б

*Нози неъмат столида
Энди тобут турибди.*

Ёш Дубровский ўз уйига қайтиб келганидан бир неча қун кейин ишга киришмоқчи бўлди, бироқ отасининг керакли маълумотларни беришга дармони етмаганидан ишни нимадан бошлашни билмади. Бунинг устига Андрей Гавrilovichning мирзаси йўқлиги, ишни яна ҳам қийинлаштириб юборди. Отасининг қофозларини кўздан кечирав экан, маслаҳатчининг биринчи мактуби билан унга ёзилган жавобнинг дастлабки нусхасини топиб олди. Бу қофозлар мазмунидан отасининг бошига тушган мусибат ҳақида аниқ бир тасаввурга эга бўлолмади, шундан кейин бу ишнинг отаси фойдасига ҳал бўлишига умид боғлаб, унинг натижасини кутишга қарор килди.

Бу орада Андрей Гавrilovichning аҳволи ниҳоят даражада оғирлашди. Владимир отасининг яқин орада вафот этишини билиб, гўдак мисоли чолнинг ёнидан ажралмасди.

Устига-устак норозилик аризасини топшириш муддати ҳам ўтиб кетди. Кистеневка қишлоғи, энди Троекуровнинг ихтиёрига ўтди. Троекуровни қутлаш ва унга чукур эҳтиром изхор этиш ҳамда қўлга киритилган мулкни идора қилиш ишига марҳаматли жаноби олийларининг қачон киришмоқчи эканликларини, ушбу мулкнинг тасарруфига ўзлари киришадиларми ё бошқа бирор кишига ваколат берадиларми – мана шуларни сўрагани Шабашкин Кирила Петровичнинг олдига келди. Аслида унинг табиатида фаразгўйлик йўқ эди. Ўч олиш нияти уни бутунлай адаштириб юборганидан виждани азоб чекарди. Болалигидан ўртоқ бўлиб бирга ўсган, аммо эндиликда душманига айланган одамнинг ҳозир қай аҳволда ётганини билар, шунинг учун ҳам бу ғалаба унинг кўнглини қувонтирмас эди. Бирон баҳона топиб, Шабашкинни сўқиб бериш мақсадида хунук бир важоҳат билан унинг юзига тикилди, бироқ арзигулик важ тополмай: «Тур, йўқол, сенга кўзим учеб тургани йўқ» деб жеркиб ташлади.

Шабашкин, Кирила Петровичнинг кайфияти дуруст эмаслигини кўриб, таъзим қилди ва тезгина чиқиб кетди, Кирила Петрович ёлғиз

қолгач «Зафар гулдуроси янгра!» қуйига ҳуштак чалиб, хонанинг у босидан бу бошига қараб юрди, бу ҳол унинг кўнгли ғоятда безовталигини кўрсатарди.

Нихоят, у пойга аравасига от қўшишни буюрди, қалинроқ кинди-да (чунки сентябрь ойининг охирлари эди), аравани ўзи ҳайдаб кетди.

Кўп ўтмай Андрей Гавриловичнинг уйи кўринди ва Кирила Петровичнинг кўнгли қарама-қарши ҳислар билан тўлди. Қасос олиб кўнгилнинг таскин топиши ва ғуур, олижаноб ҳисларни бир қадар босиб кетди. Нихоят, олижаноб ҳислар тантана қилди. Кирила Петрович қадрдан қўшниси билан ярашишга, мол-мулкини қайтариб бериб, орадаги адоват изларини тамомила йўқотишга аҳд этди. Ана шундай яхши ниятлар билан кўнглига таскин бериб, қўшнисининг кўрғони томон отларни елдириб кетди ва тўппа-тўғри ҳовлига кириб борди.

Бу вақтда бемор ўз ётоғининг деразаси олдида ўтиради. Кирила Петровични кўриб, унинг юзида ваҳимали бир безовталик пайдо бўлди: ҳар доим оқариб турадиган юзига қизиллик югурди, кўзлари чақнаб, фўлдираб қолди. Ёнида хўжалик дафтарларини кўздан кечириб ўтирган ўғли бошини кўтариб отасига қаради-ю, унинг ахволига ҳайрон қолди. Бемор ваҳима ва ғазаб ичидаги бармоғи билан ташқарига ишора қилди. У ўрнидан турмокчи бўлиб апил-тапил чопонининг этакларини йиғиширди, юмшоқ курсидан бир оз кўтарилди-ю... бирдан ийқилди. Ўғли отаси томон отилди. Чол ҳушсиз, якканрафас бўлиб қолган эди. «Тез бўлинг, шахарга, табибга югуринг!» деб бақирди Владимир. Бу орада хизматкор кириб: «Сизни Кирила Петрович сўрайяпти» деди. Владимир унга даҳшатли назар ташлади.

– Кирила Петровичга чиқиб айт, эшикдан ҳайдаб чиқаришимни кутмасдан тезроқ йўқолсин. Бор! – Хизматкор, хўжайинининг буйруғини бажариш учун хурсанд бўлиб, югуриб чиқиб кетди. Егоровна эса қўлини силкитиб, чийиллаган овоз билан:

– Жон болам, бошингни кулфатга кўйма! Кирила Петрович ҳаммамизни еб ташлайди, – деди.

– Жим бўл, энажон, – деди Владимир аччиғланиб. – Антонни хозир шахарга, табибга юбор.

Энага чиқиб кетди. Уйда ҳеч ким йўқ, одамлар Кирила Петровични кўриш учун ташқарига чиқишганди. Энага зинадан кўтарилаётган пайтда, Кирила Петрович ёш хўжайн номидан айтилаётган сўзларни эшилди, унинг юзи тун сингари қорайиб кетди, нафрат билан кулимсираб кўйди-да, хизматкорларга дарғазаб бир назар т ашлади, сўнгра

отини аста-секин йўрттириб ҳовлидан узоклашди. У бундан бир дақиқа олдин Андрей Гаврилович ўтирган деразага қараганди, аммо ҳозир уни кўрмади. Энага бўлса, ёш хўжайнинг буйругини эсидан чиқарib, зинапояда серрайиб турарди. Бошқа хизматкорлар эса шовқин кўтариб, бўлиб ўтган ҳодиса ҳакида сўзлашардилар. Бирдан Владимир одамларнинг олдига чиқди-да, дона-дона қилиб:

– Энди табибнинг кераги йўқ, отам вафот этди, – деди.

Олаговур кўтарилиди. Одамлар катта хўжайнин ётган уйга қараб югуришди. Владимир уни оромкурсига ётқизган эди, унинг ўнг қўли полга тегай-тегай деб турар, боши кўкрагига энгашганди. Ҳали совумаган, аммо жони узилиши билан важоҳати ўзгарган танада хаётдан асар йўқ эди. Егоровна фарёд кўтариб йиғлади. Хизматкорлар жасадни ўраб олишди, ювинтириб, 1779 йилда тикирилган мундирини кийдиришиди, кўтариб катта столнинг устига ётқизишли. Бу стол атрофида улар хўжайнларига бир неча йиллар хизмат қилишганди.

В Б О Б

Уч кундан сўнг кўмиш маросими бўлди. Бечора чолнинг жасади кафанга ўралган, атрофида шамлар ёқилган ҳолда стол устида ётарди. Емакхона хизматкорлар билан лиқ тўла. Тобутни олиб чиқиш вақти яқинлашди. Владимир билан яна учта хизматкор тобутни кўтарилилар. Рухоний олдинга тушди. Ёш роҳиб жаноза оятларини ўқиб рухонийнинг ортидан юрди. Кистеневканинг эгаси сўнгги марта ўз ҳовлисининг бўсағасидан ташқарига чиқди. Тобутни ўрмондан олиб ўтдилар. Черков ўрмоннинг орқасида эди. Ҳаво очиқ ва совуқ, дараҳтлардан кузги япроқлар тўкиларди.

Ўрмондан чиқилгач, Кистеневка қишлоғининг ёғочдан қурилган черкови, кекса жўка дараҳтлари билан ўралган қабристони кўринди. Владимирнинг онаси шу ерга кўмилган эди, унинг ёнидан кеча янги бир қабр қазилди.

Черковнинг ичи хўжайнларига охирги марта таъзим қилиш учун келган Кистеневка дехқонлари билан тўлган эди. Ёш Дубровский тобут ёнида тураркан на йиғлар ва на ибодат қиларди, аммо авзойи жуда бузуқ эди. Мотам маросими тугади. Мархум билан хайрлашгани даставвал Владимир, унинг кетидан хизматкорлар келишиди; қопқоқни олиб, тобутни михладилар. Хотин-қизларчуввос солиб йиғлашди; мужиклар кўз ёшларини муштлари билан артиб қўярдилар. Владимир билан ўша учала хизматкор тобутни кўтариб қабристон томон йўл олишди, бутун қишлоқ аҳолиси уларнинг ортидан юрди. Тобут

қабрга туширилди, ҳамма бир сиқимдан тупрок ташлади, кейин қабрга тупрок тортилди, гўрга таъзим қилишди ва тарқалишди. Владимир жадал юриб барчадан ўзиб кетди ва Кистеневка ўрмонига кириб ғойиб бўлди.

Егоровна руҳоний ва черковнинг бошқа хизматчиларини Владимирнинг номидан фотиҳа ошига чақирди ва бунда ёш боённинг иштирок этмаслигини айтди; шундай қилиб руҳоний Антон, рафиқаси Федотовна, ёшроҳиб ва Егоровна тўртталаси боённинг ҳовлисига яёв кетишиди, улар йўл-йўлакай марҳумнинг хайр-саҳовати, унинг вориси бошига тушиши мумкин бўлган воқеаларни гаплашиб бордилар. (Троекуровнинг Кистеневкага келгани, унга ёш Дубровский-нинг қилган муомаласи маҳалла-қўйга тарқалган, ундаги сиёsatчи-лар бу воқеанинг қандай якун топишини айтардилар).

– Нима бўлса кўрамиз, – деди руҳонийнинг хотини. – Аммо бошимизга Владимир Андреевич турмаса ёмон бўлади. Ўзи яхши йигит, омон бўлгур!

Егорова унинг сўзини бўлиб:

– Бизнинг бошимизда у турмасдан ким турарди? – деди. – Кирила Петрович кўп кутурмасин, ундан кўрқадиган одам йўқ; менинг лочиним ўзини ўзи ҳимоя қилолади, Худо хоҳласа яхши одамлар уни ёлғиз кўймас. Ўлгудек юзи қора одам бу Кирила Петрович, аммо менинг Гришкам унга «Йўкол, қари кўппак! Чик ҳовлидан!» деб бақирганида думини қисиб қолди-ку!

– Эҳ, Егорвона, – деди ёшроҳиб. – Кирила Петровични шундай ҳақорат қилгани Григорийнинг қандай тили борди! Мен энг каттамизга ит бўлиб ириллайманки, аммо Кирила Петровичга сира ҳам бетлай олмасдим: уни кўрган захотим жоним чиқиб, дир-дир титраб, тиззаларим ўз-ўзидан букилиб, бошим эгила бошлайди...

– Ҳаммаси бекор гап, – деди руҳоний. – Бир кун келиб, мана шу Андрей Гавrilovichга ўхшаб, Кирила Петровичнинг ҳам жанозаси ўқилади, жуда бўлмаганда унинг фотиҳа оши бунивидан каттароқ бўлар, аммо Худонинг даргоҳида барибир...

– Э, таксир, биз ҳам фотиҳа ошига маҳалла-қўйдагиларнинг барчасини чакирмоқчи эдик, аммо Владимир Андреевич унамади. Ҳар қалай бизда ҳамма нарса мўл, нимани истасангиз шу билан сийлаб, нима десангиз шуни тайёрлаб бера оламиз. Майли энди, маҳалла-қўй бўлмаса, сизларни яхшилаб сийлармиз, азиз меҳмонлар.

Бу totли ваъдалар ҳамда сертаом дастурхонга етишиш умиди сұхбатдошларнинг қадамларини жадаллаштириди, улар сиҳат-саломат

мархумнинг ҳовлисига етиб келишди: меҳмонхонага киришганида дастурхон ёзилган, таом ва ичимликлар бисёр эди.

Бу орада Владимир кўнглидаги қайгуни йўл юриб ва чарчашиб билан тарқатмоқчи бўлиб, ўрмоннинг ичкарисига кириб кетди. У тўғри келган йўлдан борар эди; шоҳлар унинг у ер-бу ерига тегиб тимдалар, оёқлари тез-тез лойга ботар, бироқ ўзи ҳеч нарсани сезмасди. Ниҳоят у, тамоман ўрмон билан ўралган кичик пасткам бир жойга чиқди; куз пайти ярим ялангчланган дараҳтлар ёнидан буралиб-буралиб сокингина бир ариқча оқиб ўтарди. Владимир шу ерда тўхтади, муздек чимга ўтиреди, шу топда унинг кўнглига бир-биридан хунук ўйлар келди... у ўзининг ёлғизлигини қаттиқ хис этди. Келажак унинг кўзига қора булатлар билан қопланган ҳолда кўринарди. Троекуров билан бўлган душманлик янги бахтсизликлардан хабар берарди. Унинг кичик давлати бошқа одамга ўтиб кетиши, бундан кейин у факирликда қолиши мумкин эди. Бир нечта қуриган баргларни оқизиб кетаётган ариқчанинг оҳиста оқимиға тикилиб, қимир этмасдан узоқ ўтиреди, бу оқим унга хаёт оқимини эслатди. Ниҳоят, у коронғи туша бошлаганини пайқаб, ўринидан турди ва уйига кетадиган йўлни излай бошлади; йўлни топгучиба бу нотаниш ўрмонда анчагача адашиб юрди ва охири бир сўқмок йўлга тушди-да, тўппа-тўғри ўз уйининг олдидан чиқиб қолди.

Дубровский йўлда ўз тобелари билан келаётган рухонийни кўрди. Шу пайт унинг хаёлига: бу яхшилик аломати эмас, деган фикр келди... У беихтиёр бир четга бурилиб, ўзини дараҳтларнинг панасига олди... Улар Дубровскийни кўришмади, ўзаро қизғин гаплашиб, унинг ёнидан ўтиб кетишли.

– Ёмон ишга ёндашма, яхши ишдан адашма, – деди рухоний ўз хотинига. – Бу ерда қолишимизга ҳожат йўқ. Иш қандай якун топмасин, буни сенга дахли йўқ.

Рухонийнинг хотини алланималар деб жавоб қайтарди, бироқ уни Владимир эшитмади.

Дубровский уйига яқинлашгач, бир тўда оломонни кўрди; унинг ҳовлиси дехқонлар ва хизматкорларга тўла эди. Олисдан шовқин ва олағовур эшитилди. Омборнинг олдида учтадан от кўшилган икки фойтун турарди, мунидирли камзул кийган бир нечта нотаниш одам алланарсанинг маслаҳатини қилишарди.

– Бу қандай гап? – деб аччиғланиб сўради Владимир югуриб келган Антондан. – Булар ким, қандай иш билан келишибди?

– Эҳ, тақсирим Владимир Андреевич, – нафаси бўғзига тиқилиб жавоб берди чол. – Булар суд одамлари. Бизни Троекуровга топширишяпти.

Сизнинг лутфи карамингиздан бизларни жудо қилишмоқчи. – Владимир бошини қуий солди, одамлари баҳтсиз хўжайинни куршаб олишди.

– Отахонимиз, – улар Владимирнинг қўлларини ўпиб қичқиришар эди. – Сендан бўлак боённи истамаймиз, амр этсанг суд ходимларининг таъзирини берардик, ўлсак ўламизки, сени хафа қилдириб қўймаймиз.

Владимир уларга қааркаркан, кўнглини ғалати хислар тўлқинлатар эди. «Сизлар жим туринглар, – деди у ўз одамларига қараб. – Бу амалдорлар билан ўзим гаплашаман». Оломон орасидан унга «Ха, гаплашинг, отахон, таъзирини беринг, бу муттаҳамларни» деб қичқиришди.

Владимир амалдорларнинг ёнига борди. Шабашкин, бошида телпак, икки қўли белида, кибр билан ён-атрофга қарап эди. Баланд бўйли, тўладан келган, ёши элликларга борган, қизил юзли ва узун мўйловли маҳаллий полиция бошлиғи ўзи томон келаётган Дубровскийни кўргач, бир томоқ қириб олди-да, хирқироқ овоз билан гапира кетди: «Шундай қилиб айтган гапларимни яна такрорлайман: маҳаллий суднинг ҳукмига мувофиқ, ушбу кундан эътиборан ҳаммангиз Кирила Петрович Троекуровнинг қарамогига ўтасиз. У киши ўз измларини Шабашкин жанобларига бердилар. Бу одамнинг барча буйрукларига сўзсиз итоат қилурсиз... Сиз аёллар эса, бу кишини севинг ва хурмат қилинг, у сизларга жуда ўч». – Бу ҳазил пайтида полиция бошлигининг ўзи ҳам хохолаб кулди. Шабашкин ва бошқалар ҳам унга қўшилишиб кулишди. Владимирнинг қони қайнаб кетди. Ўзини ясама совуққонликка солиб, полиция бошлигидан сўради:

– Марҳамат қилиб айтинг-чи, бу нима деган гап ўзи?

– Бу шундай гапки, – деб жавоб берди ҳийлагар амалдор, – биз бу ерга мана шу мулкни Кирила Петрович Троекуровга ўтказгани ҳамда бошқа бекорчиларнинг яхшиликча бу ердан жўнаб қолишларини сўрагани келдик.

– У ҳолда боённинг ҳукмронлиги бекор қилинганини одамларимга айтгандан кўра, ўзимга айтсангиз бўлмасмиди. – Сен кимсан ўзинг? – деди Шабашкин ўқрайиб қараб. – Собиқ боён Андрей Гаврилович ўғли Дубровкий қазоси етиб ўлиб кетди, биз сизни танимаймиз, танишни ҳам истамаймиз.

– Бу киши ёш боёнимиз Владимир Андреевич бўладилар, – деди оломон ичидан бир киши.

– Ким у оғзини очган? – деди полиция бошлиғи ўдағайлаб. – Қанақа боён, қандай Владимир Андреевич? Сизларнинг хўжайинингиз – Кирила Петрович Троекуров бўлади, эшитдингизми, гаранглар?

– Үндоқ эмас, – деди яна ўша овоз.

– Бу исён-ку! – деб қичқирди полиция бошлиғи. – Ҳой, оқсоқол, қаердасиз?

Оқсоқол олдинга чиқди.

– Ҳозирок бил-чи, ким экан у мен билан айтишган, бир адабини береб қўйя!

Оқсоқол ким гапирганини оломондан сўради. Ҳеч ким чурқ этмади, кўп ўтмай орқада шивир-шивир гап бошланди ва тобора кучайиб бир зумда даҳшатли олағовурга айланди. Полиция бошлиғининг нафаси ичига тушиб, вазиятни ётиғи билан оломонга тушунтиromoқчи бўлди. «Нега қараб турибсизлар, йигитлар! Йўқолсин улар!» деб қичқирди ҳалойиқ ва босиб кела бошлади. Шабашкин ва бошқа амалдорлар шошиб-пишиб ўзларини даҳлизга урдилар ва ичкарига кириб эшикни ичидан беркитиб олдилар.

– Йигитлар, босинглар! – деб қичқирди яна ўша овоз. – Оломон ёпирилаверди...

– Тўхтанглар, – деб бакирди Дубровский. – Аҳмоқлар! Бу нима қилганингиз? Бекорга ўзингизни ҳам, мени ҳам нобуд қиласиз. Тарқалинг уй-уйингизга, мени ўз ҳолимга қўйинг! Кўрқманг, подшоҳимиз одил, мен ундан илтимос қиласман, у бизни ранжитмайди... Ҳаммамиз ҳам унинг фарзандларимиз. Агар сиз бундай исён кўтариб, кароқчилик йўлига ўтсангиз, у сизни ҳам ҳимоя қилолмайди.

Ёш Дубровскийнинг бу сўзи, жаранглаган овози ва келишган қадду комати оломонга қўнгилдагидек таъсир қилди. Ҳалойиқ ҳовуридан тушиб, уй-уйига тарқалди, ҳовли бўшаб қолди. Амалдорлар даҳлизда ўтиришарди. Ниҳоят, Шабашкин эшикни секингина очиб айвонга чиқди ва Дубровскийга эгилиб таъзим қилди, меҳрибонлик билан ҳимоя қилгани учун унга миннатдорчилик билдириди.

Владимир унинг сўзларини нафратланиб туриб тинглади-ю, аммо жавоб қайтармади.

– Ижозатлари билан, – деб сўзида давом этди маслаҳатчи. – Бу кеча шу ерда тунашга аҳд қилдик; негаки коронги тушиб қолди, тагин муҗикларингиз йўлда бизга хужум қилиб ўтирасин. Марҳаматингизни дариф тутмай, хизматкорларингизга буйруқ берсангиз, меҳмонхонага ҳеч бўлмаса пичан солиб берсалар. Тонг отар-отмас жўнаб кетамиз.

– Билганингизни қилинг, – деб жавоб берди Дубровский совуққина. – Мен энди бу ерда хўжайин эмасман.

Шу сўзларни айтиб, отасининг уйига кириб кетди ва эшикни ичидан беркитиб олди.

VI БОБ

«Шундай қилиб ҳаммаси тамом бўлди, – деди у ўз-ўзига; – бугун эрталаб бошпанам ва бир бурда ноним бор эди. Эртага ўзим туғилиб ўсган ва отам вафот этган уйни, отамнинг ўлимига ҳамда менинг гадойга айланишимга сабабчи бўлган кишига ташлаб кетишим керак». Унинг кўзлари онасининг суратига тикилганича қолди. Рассом онасининг панжарага суюнган ва эрталабки оқ кўйлакда, сочига биттагина атиргул таққан ҳолда тасвирлаган эди. «Бу сурат ҳам оиласининг душманига қолади, – деб ўйлади Владимир. – Уни синик курсилар билан бирга омборга ташлашади ё бўлмаса итбоқарларига мазах ва эрмак бўлиш учун даҳлизга осиб кўйишади; онамнинг ётоқхонасига, отам жон берган хонага унинг иш юритувчиси кўчуб киради ёки ўзи учун ҳарам қилиб кўяди. Йўқ! Йўқ! Менга насиб бўлмаган бу қайгули мақон, унга ҳам насиб бўлмайди!» Владимир тишларини маҳкам қисди, унинг миясида кўрқинчли ўйлар туғилди. Қулоғига пораҳўрларнинг овози эшитилди. Энди улар хўжайнлик қилишар, дам уни, дам буни талааб этардилар, бу эса унинг ғамгин ўйлари орасида ёқимсиз овунчоқ каби туюларди. Ниҳоят, ҳаммаёқ осудаликка ғарк бўлди.

Владимир кийим жавони ва ғаладонларни очиб марҳум отасининг қоғозларини кўздан кечира бошлади. Уларнинг қўпчилиги хўжалик рақамлари ва турли ишларга оид мактублардан иборат эди. Владимир уларни ўқимасдан йиртиб ташлади. Буларнинг орасидан бир қофоз халта чиқди, устига – «рафиқамнинг мактублари» деб ёзиб кўйилганди. Қаттиқ ҳаяжонланган ҳолда мактубларни ўқий бошлади: улар Туркия юриши вактида ёзилган бўлиб, Кистенёвка қишлоғидан армияга жўнатилган эди. Онаси ўз мактубларида эрига ғариб ҳаёти ва рўзгор юмушлари ҳақида ёзаркан, ёқимли сўзлар билан айрилиқдан шикоят этиб, уни ўз уйига, севимли кучогига чорларди. Мактубларининг бирида у кичкина Владимирнинг саломатлиги борасида ташвишланаётганини айтган, яна бирида эса фарзандининг ҳалитдан барқ ураётган қобилиятига қувонганини айтиб, келажаги баҳтли ва порлоқ бўлишини изҳор этганди. Владимир мактубларни ўқишига берилиб, барча нарсани унутди, вужуди билан оиласвий фарогатни ҳис этиб, вақтнинг ўтганини билмай ҳам қолди. Девор соати ўн бирга занг урди. Владимир мактубларни чўнтагига солди-да, шамни қўлига олиб, хонадан чиқди. Мехмонхонада, тахта полда амалдорлар ухлаб ётишарди, столнинг устида улар бўшатган шишалар турар, бутун уй ичини ромнинг ўткир хиди тутиб кетган эди. Владимир эшикни очиши ҳамон бир одамни кўрди: у ўзини бир бурчакка олиб турар,

қўлида эса болта ялтиради. Владимир шамни яқин тутиб, унинг темирчи Архип эканини билди. «Бу ерда нима қилиб турибсан?» деб сўради у. – Э-э, Владимир Андреевич, сизмисиз – деб жавоб берди пичирлаб Архип. – Худо ўз паноҳида сақласин! Яхшики шам билан чиқдингиз! – Владимир унга ҳайрон бўлиб қаради. – «Нега бу ерда беркиниб турибсан?» деб сўради темирчидан.

– Ҳамма бормикин... Шу ердамикин... бир хабар олай... – деб дудукланиб оҳиста жавоб берди Архип.

– Болтани нега олиб юрибсан?

– Болта дейсизми? Шундай вақтда болтасиз юриб бўладими? Бу амалдорлар, мен сизга айтсам, шундай юзи қора одамларки, ҳаш-паҳ дегунингизча...

– Маст экансан, болтани ташла, бор ухла.

– Мени маст дедингизми? Отаконим, Владимир Андреевич, Худо ҳақи бир қултум ҳам ичганим йўқ... Шундай вақтда томоқдан ичкилик ўтадими, шу ҳам инсофданми ахир, бу порахўрлар адабимизни беришмоқчи, порахўрлар хўжайинимизни ўз кўргонидан ҳайдаб чиқаришмоқчи... Роса хуррак тортишяпти-да, лаънатилар; ҳаммасини бирданига бопласақ, ҳеч ким сезмас эди.

Дубровский қовоғини солиб: «Менга қара, Архип, – деди ва бир оз жим қолгач. – Бу ишинг яхшиликка бошламайди. Айб амалдорларда эмас. Чирокни ёқ-да, ортимдан юр».

Архип боённинг қўлидан шамни олди, печканинг орқасидан шамчироқни топди, уни ёқди ва иккови бирга оҳистагина зинапоядан тушиб, ҳовли томон кетишиди. Қоровул чўянга тахтани урди ва итлар ҳуриди.

– Қоровул ким? – деб сўради Дубровский.

– Биз, Василиса билан Лукерья, – деб ингичка бир овоз жавоб берди.

– Уйларингга кетинглар, – деди Дубровский уларга. – Бу ерда сизларнинг керагингиз йўқ.

– Тамом, – деб қўйди Архип.

– Минг бор ташаккур, отакон, – дейишиди иккала аёл ва дарҳол уйларига караб кетишиди.

Владимир нари борди. Икки киши унга яқин келди ва боённи чақиришиди. Дубровский Антон ва Гришани овозидан таниди. «Нега ухламай юрибсизлар» деб сўради улардан. «Уйку келадими шундай вақтда, – деди Антон. – Қандай кунларга қолдик, бундай бўлишини ким ҳам ўйлаган эди...»

– Жим! – деб унинг сўзини бўлди Дубровский. – Егоровна қаерда?

– Хўжайнинг уйида, ўз хонасида, – деб жавоб берди Гриша.

– Бор, олиб кел уни, бизникларнинг ҳаммасини бу ёққа олиб чик, уйда анави амалдорлардан бошқа ҳеч ким қолмасин. Сен Антон. Аравани кўш.

Гриша кетди ва бир неча дақиқалардан кейин онаси билан бирга қайтиб келди. Кампир бу кеча мижжа қоқмаганди; умуман, амалдорлардан бошқа ҳеч ким кўз юммаган эди.

– Ҳамма шу ердами? – деб сўради Дубровский. – Уйда ҳеч ким қолмадими?

– Порахўрлардан бошқа ҳеч ким қолмади, – деди Гриша.

– Энди пичан ёки похол олиб келинглар, – деди Дубровский.

Одамлар отхонага югуриб кетишиди, кучоқ-кучоқ пичан кўтариб келишиди.

– Зинанинг тагига қўйинглар. – Ха, балли. Қани йигитлар, ўт қўйинглар!

Архип фонусни очди, Дубровский қўлидаги тутантариқни унга тутди.

– Шошма, – деди у Архипга. – Шошилинчда даҳлиз эшигини беркитиб чиқсанга ўхшайман, тез бориб очиб кел.

Архип югуриб даҳлизга кирди – эшик очиқ эди. Архип уни кулфлади-да, оҳистагина: «Очиб қўй эмиш, очиб қўйиб бўлибман!» деб Дубровскийнинг ёнига қайти.

Дубровский тутантариқни пичангга тутди, пичан ловиллааб, алангиси осмонга кўтарилиди ва бутун ҳовлини ёритиб юборди.

– Вой, – деб нолиб қичкирди Егоровна. – Бу нима қилганинг, Владимир Андреевич?

– Жим тур, – деди Дубровский. – Хўш, йигитлар, хайр энди, Худо қаёққа бошласа ўша ёққа кетдим; янги хўжайнин билан баҳтиёр бўлинглар.

– Э, отахонимиз, валинеъматимиз, – деб жавоб беришиди одамлар, – ўлсак ўламизки, сендан айрилмаймиз, ҳаммамиз бирга кетамиз.

Аравани келтиришиди; Дубровский Гриша билан бирга извошга чиқди, улар учрашиш жойи этиб Кистенев ўрмонини белгилашди. Антон отларни қамчилади ва улар дарвозадан чиқиб кетишиди.

Шамол кўтарилиди. Бирпасда бутун уйни аланга ўраб олди. Қизгиш тутун тунука устида бурқсиради. Ойналар чарсиллааб, синиб ерга тушар, ёниб турган харилар ағдарилилар, амалдорларнинг: «Ёньяпмиз, кутқаринг, кутқаринг» деган дод-войи эшитилар эди. «Ёқяптими?» деб

кўйди заҳархандалик билан Архип, ёнгинга қарап экан. «Архипушка, – деди унга Егоровна. – У лаънатиларни қутқар, сенга Худодан қайтади».

– Қалай, ёқяптими? – деди темирчи.

Шу топда дераза ёнида амалдорлар кўринди, улар икки қават деразани синдирмоқчи бўлишди. Шунда «гурс» этиб том босди, дод-вой тиниб қолди.

Кўп ўтмай барча хизматкорлар ховли сахнига тўпланишди. Аёллар дод-вой қилиб буюмларини сақлаб қолишга тиришар, ёш болалар ёнгинга хурсанд бўлиб иргишилашарди. Учкунлар олов бўронидан учар ва қишлоқ уйларига туташар эди.

– Энди ҳаммаси жойида, – деди Архип. – Қандай ёнмоқда? Покровскоедан туриб томоша қиласидаги бўлди!

Шу пайтда янги бир воқеа унинг дикқатини жалб этди; ёниб турган саройнинг томида бир мушук у ёқдан-бу ёққа югурап, чор атрофи аланга билан ўрлагани учун ўзини қаерга кўйишини билмас эди. Бечора жони-вор одамнинг раҳми келадиган миёвлаши билан ёрдамга чақирап, унинг питирлашини кўрган болалар қотиб-қотиб кулишарди. «Нега куласизлар, шайтонваччалар, – деди темирчи аччигланиб. – Худодан қўрқмайсизлар, Унинг бир маҳлуки ўляпти-ю, сиз, эси пастрлар, куласизлар-а!»

Шу сўзларни айтгач, темирчи ёниб турган томга шоти қўйиб мушукни кутқаргани чиқди. Мушук унинг ниятини пайқади ва шошилинч бир миннатдорлик билан қўлига илашди. Баъзи жойи куйган темирчи қўлидаги ўлжаси билан ерга тушди. «Хўш, йигитлар, хайр энди, – деди у ҳайрон бўлган одамларга, – бу ерда бошқа қиласидаган ишим қолмади. Яхши қолинглар, орамизда ёмон гап ўтган бўлса кечиринглар».

Темирчи кетди, ёнгин яна анчагача давом этди. Ёнгин ниҳоят босилди ва алангаси сўнган чўғлар тун қоронғисида анча вақтгача қизарип турди. Уйнинг атрофида хонумони куйган кистеневкаликлар дайдиб юради.

VII Б О Б

Эртаси куни ёнгин ҳақидаги хабар бутун атрофга ёйилди. Ёнгин тўғрисида ҳар ким турли хил гумон ва тахминлар гапиради. Баззилар Дубровскийнинг одамлари ўликни кўмиб келишган куни маст бўлишиб, эҳтиётсизлик қилиб уйга ўт қўйиб юборишган деб ишонтироқчи бўлса, баъзи бирлари, бу ишда уйни қўлга киритишлари муносабати билан айш-ишрат қилишган амалдорларни айбларди, кўпчилик, маҳаллий суд ҳамда бутун хизматкорлар ўзидан ўзи куйиб кетганини исбот

қилмоқчи бўлишарди. Баъзилар ҳақиқатни англаб, бундай фалокатга, ғазаби ва жаҳлини жиловлай олмаган Дубровскийнинг ўзи сабабчи бўлганини сўзлар эди. Ёнгин бўлган жойга эртаси куни Троекуровнинг ўзи келиб, барчасини кўздан кечириб, текшириб чиқди. Бунда полиция бошлиги, маҳаллий суднинг маслаҳатчиси, идора ходими, мирза ҳамда Владимир Дубровский, энага – Егоровна, хизматкорлардан Григорий, извошчи Антон ва темирчи Архиплар қаёққадир йўқолишган эди. Хизматкорлар, амалдорлар том йиқилганида қуйиб кетгандарига гувоҳлик беришди; уларнинг куйган суюклари кавлаб топилди. Василиса билан Лукерья деган аёл Дубровский билан темирчи Архипни ёнгиндан бир оз аввал кўрганларини айтишди. Кўпчиликнинг сўзига қараганда, темирчи Архип тирик бўлиб, афтидан якка ўзи бўлмаса-да, ёнгиннинг энг катта айбори бўлган. Асосий гумон Дубровскийдан эди. Кирила Петрович содир бўлган воқеа ҳақида батафсил ёзиб губернаторга юборди ва янги бир ишнинг очилишига сабабчи бўлди.

Ҳадемай турли хил овозалар тарқалиб, одамларнинг қизиқишилари ва гап-сўзлари бошқача тус олди. Нима дейсан, ** да қароқчилар пайдо бўлиб, бутун теварак атрофга қўркув солаётганмиш, деган хабар ёйилди. Уларга қарши ҳукумат томонидан кўрилган тадбирлар кутилган натижани бермади. Бир-биридан даҳшатли ўғриликлар рўй бераверди. На йўлларда тинчлик бор, на кишлокларда. Ичи қароқчиларга тўла уч отлиқ аравалар куппа-кундузи бутун губернани айланиб саёҳатчилар ва почталарнинг йўлини тўсадиган, зодагонларнинг уйларини талаб, ўт кўйиб кетадиган бўлишди. Ўғриларнинг бошлиғи ўзининг зийраклиги, довюраклиги ва аллақандай олижаноблиги билан ном чиқарди. У ҳақда ажойиб гаплар юарди. Барчанинг оғзида Дубровскийнинг исми. Ботир босқинчиларга бошчилик қилаётган ўшанинг ўзи эканига ҳамма ишонарди. Бир нарсага кўпчилик ҳайрон: улар негадир Троекуровнинг кўргонига тегишимас эди. Қароқчилар унинг биронта саройига яқинлашмаган, биронта ҳам аравасини талашмаганди. Ўзининг одатдаги манманлигига бориб, Троекуров буни икки нарсадан кўрарди: биринчиси – ўзининг бутун губернани кўркитиб олганидан деб билса, иккинчиси – ўзига қарашли қишлоклардаги полицияларнинг жуда яхши ишлаганидан, деб ўйларди. Аввал кўни-кўшнилар Троекуровнинг ўзига бино қўйишидан кулишди ва чақирилмаган меҳмонларнинг Покровское қишлоғига келишини ҳар куни кутишди, чунки бу ерда роса мириқиши мумкин эди, аммо ахийри кўшнилар Троекуровга тан беришга ва қароқчиларнинг унга нисбатан аллақандай хурмат сақлаётганликларига амин бўлдилар... Троекуров ўзида йўқ хурсанд,

хўроздек керилар ва Дубровскийнинг ҳар бир янги босқинчилиги хақида хабар келганида, губернатор, полиция бошлиғи ҳамда рота қўмондонларини масхара қилиб гапиравар, чунки Дубровский доим уларнинг кўлидан соғ-саломат чиқиб кетар эди...

Бу орада биринчи октябрь куни – Троекуров яшаган қишлоқдаги ибодатхонанинг байрами бўлди. Аммо бу тантанали маросимни ва ундан кейинги воқеаларни баён қилишдан аввал, ўқувчиларни янги ёки қиссамизнинг бошида исмлари оз-моз айтиб ўтилган кишилар билан таниширишимиз лозим.

VIII Б О Б

Ўқувчиларимизнинг ўзлари ҳам пайқаган бўлишса керак, юкорида бир-икки сўз билан исми зикр этилган Кирила Петровичнинг қизи – қиссамизнинг қаҳрамонидир. Биз тасвирлаётган даврда, у 17 ёшда бўлиб, хусни камолга етган эди. Отаси уни ниҳоятда севар, лекин қизига нисабатан ўз билганидан қолмас эди-ю, бироқ баъзида унинг ҳар бир инжиқлигини кўтарар, баъзида бўлса дағаллик ва каттиққўллик билан уни чўчитарди. Қизининг яхши кўришини билса-да, ҳеч қачон унинг ишончига сазовор эмас эди. Маша ўз хиссиётлари ва фикрларини ундан яширишга одатланган, чунки уларни қандай қабул қилишини ҳеч қачон билмасди. Қизнинг дугоналари йўқ, ёлғиз ўсган эди. Кўни-кўшниларининг хотин ва қизлари Кирила Петровичнигiga кам киришар, чунки у ердаги сухбат ва базмларга аёллар эмас, эркаклар ҳозир бўларди. Бу гўзал киз, отаси зиёфат берган кезларда ҳам эркаклар орасида кам бўларди. Аммо XVIII асрдаги француз ёзувчиларининг асарларидан иборат бўлган катта кутубхона қизнинг ихтиёрига берилган эди. Умри давомида «Пазанда ошпаз» деган китобдан бошқа ҳеч нарсани ўқимаган отаси, китоб танлашда қизига маслаҳатчи бўлолмасди, шунинг учун ҳам Маша турли китобларни роса титиб кўрганидан кейин, романларни ўқишга киришганди. У бир замонлар Мими хоним мураббийлигига бошлаган тарбиясини мана шу равишда камолотга етказганди. Мими хонимга Кирила Петровичнинг ишончи ҳамда илтифоти катта эди; бу яқинликнинг оқибати равshan бўлгач, уни киши билмас, бошқа ерга жойлаштиришга мажбур бўлди. Мими хонимдан ёқимли бир хотира қолди. У яхши киз бўлиб, Кирила Петровичга анчагина таъсири кўриниб турган бўлса-да, бу таъсирини ҳеч қачон ғаразлиқ билан кўлламади. Кирила Петрович ҳам уни бошқалардан кўра кўпроқ севар эди, нега десангиз Мими хонимга ўхшаган тўққиз яшар қора кўз

ва шўх бола Кирила Петровичнинг ёнида парвариш топди ва унинг ўғли деб ҳисобланди, ҳолбуки айнан Кирила Петровичга ўхшаган бир қанча ялангоёқ болалар унинг деразаси олдида югуриб юришар ва булар хизматкорларнинг болалари деб ҳисобланарди. Кирила Петрович ўзининг кичкина Сашаси учун Москвадан бир француз муаллимини таклиф этди, биз тасвирлаган воқеалар содир бўлаётган пайтда ўша муаллим Покровское қишлоғига етиб келган эди.

Бу муаллим ёқимли кўриниши ва содда муомаласи билан Кирила Петровичга маъқул бўлди. У Кирила Петровичга ўзининг шаҳодатномасини ҳамда Троекуровнинг бир қариндоши ёзид берган мактубни топширди, муаллим ўша мактуб берган кишиникда тўрт йил мураббийлик қилган эди. Кирила Петрович хужжатнинг ҳаммасини кўриб чиқди ва аммо, негадир унга муаллимнинг ёшлиги маъқул бўлмади, бу ажойиб камчиликнинг сабаби, баҳтсиз муаллим унвони учун катта бардош ва тажрибага мос тушмаслиги бўлмай, Кирила Петровичнинг баъзи шубҳалари бор эди, уларни дарҳол изҳор этишга аҳд килди. Бунинг учун Машани ёнига чакиртирди (Кирила Петрович) французча билмасди, қизи таржимонлик қилди.

– Бери кел, Маша: бу жанобга айтгин, майли мен уни хизматга оламан; аммо шарт шуки, қизларимнинг кетига туша кўрмасин, йўқса мен бу итваччани... шундай деб таржима қил, Маша.

Маша қизариб кетди ва муаллимга қараб, француз тилида отам сизнинг камтар ва одобли бўлишингиздан умидвор, – деди.

Француз қизга таъзим қилди-да, ҳатто менга илтифот кўрсатмаганларида ҳам, ҳурматларига сазовор бўлишга харакат қиласман, деб жавоб берди.

Маша унинг жавобини оқизмай-томизмай таржима қилди.

– Яхши, яхши, – деди Кирила Петрович, – унинг на илтифоти ва на ҳурмати керак. Унинг иши Сашага қараш ва унга грамматика ҳамда география ўргатиш, шундай деб таржима қилиб бер унга.

Марья Кириловна таржимасида отасининг қўпол сўзларини силлиқроқ қилиб айтди, шундан кейин Кирила Петрович французни унинг учун ажратилган хонага чиқариб юборди.

Зодагонлик хурофтлари билан тарбияланган Маша ёш французга унчалик эътибор қилмади, муаллим унинг учун бир хизматкор ёки бир уста қаторида эди, хизматкор ва устани эса, у эркак ўрнида кўрмасди. Маша жаноб Дефоржни маҳлиёқ қилиб кўйганини ҳам, муаллимнинг қизариб, қалтираб кетганини ҳам, ҳатто овозининг ўзгарганини ҳам пайқамади. Кейинчалик қиз бир неча кун сурункасига муаллим билан

кўришиб турди, бироқ ўшанда ҳам унчалик эътибор бермади. Кутимаган бир воқеа рўй бериб, кизда муаллим ҳакида бутунлай янги фикр пайдо бўлди.

Кирила Петровичнинг ҳовлисида одатда бир нечта айик боласи боқилар ва улар Покровское зодагонининг суюкли эрмакларидан бири эди. Ёш айик болаларини меҳмонхонага олиб келишар, бу ерда Кирила Петрович уларни мушуклар ва кучуклар билан уришириб, соатлаб овора бўларди. Катта бўлгандаридан улар занжирларга солиб қўйилар, энди ҳақиқий «ов»ни кутиб ётардилар. Баъзидан уларни Кирила Петровичнинг деразаси олдига, ҳовлига олиб чиқилиб, ҳамма ерига учи сиртига қаратиб мих қоқилган бўш вино бочкаларини уларнинг олдига юмалатиб юборардилар; айик бочкаларни исқаб кўрар, кейин секингина панжасини теккизар, панжасига мих кириб ғазабланар, яна қаттикроқ итариб юборар ва панжаси баттар оғрир эди. Айиқни қаттиқ ғазаблантирган бочкани бечора ҳайвоннинг олдидан тортиб олмагунларича бочкага ёпишаверарди. Ҳатто шундай воқеа ҳам бўлар эди: бир жуфт айиқни аравага қўшиб, унга меҳмонларни мажбуран ўтказиб, югуртириб Худонинг иродасига топширишарди. Аммо Кирила Петровичнинг энг яхши қўрган ҳазили қўйидагича эди:

Бўш уйнинг деворига ҳалқа қоқиб, унга оч айиқни арқон билан боғлашарди. Арқон шунчалик узун бўлардики, айик факат ҳалқанинг рўпарасидаги бурчакка етолмас, бу ер даҳшатли ҳайвоннинг хужумидан қутулиш жойи эди. Одатда янги келган одамни мана шу уйнинг эшиги олдига олиб боришарди-да, тўсатдан айиқнинг олдига итариб юбориб, орқасидан эшикни беркитиб қўйишар, ҳалиги бечора, айик полвон билан ёлғиз қоларди. Шўрлик меҳмон, этаклари йиртилган, ҳаммаёғи тимдалангтан, конига белангтан ҳолда тезда ҳалиги хавфсиз бурчакни топиб олар, аммо деворга маҳкам ёпишган ҳолатда, баъзан уч соатгача чидаб туришга, қутурган айиқнинг ўзидан икки қадам нарида бўкирганини, сапчиганини, олдинги оёқларини баланд кўтариб тикланганини, унга етиб олиш учун зўр бериб интилганини кўриб туришга мажбур бўларди. Рус боёнининг олижаноб ҳазиллари мана шунаقا бўларди! Муаллим келгач, Кирила Петрович бир неча кундан кейин уни эсга олди ва айик ётган уйида уни ҳам бир меҳмон қилиб қўйишни мўлжаллади. Шу мақсадда, бир кун эрта билан уни чақиртириди, коронғи йўлаклардан ўзи бирга бошлаб борди, шунда бирданига ён эшик очилиб, икки хизматкор французни уйнинг ичига итариб юборди ва эшикни қулфлаб қўйишди. Муаллим эсини йиғиб олгач, рўпарасида ҳалқага боғланган айиқни қўрди; айик, меҳмоннинг исини

олиб пишқирди, кейин бирдагини оёққа туриб унга қараб яқинлаша бошлади... Француз пинагини бузмади, қочмади ҳам, хужумни кутиб турди. Айиқ яқинлаши, шунда Дефорж чўнтағидан кичкинагина тўппончасини олди-да, оч ҳайвоннинг пешанасини мўлжаллаб туриб отди. Айиқ ёnlамачасига ағдарилди. Одамлар югуриб келишиди, эшик очилди, хонага ўз ҳазилининг оқибатидан ҳайрон қолган Кирила Петрович кирди.

Кирила Петрович бунинг сабабини: Дефорж учун яширинча ҳозирланган бу ҳазилдан уни ким хабардор қилганини ва нима учун у чўнтағида ўқланган тўппонча олиб юришини, албатта билмоқчи бўлди. У қизига одам юборди. Маша дарҳол етиб келиб, отасининг саволларини французга таржима қилиб берди.

— Айиқнинг борлигидан хабарим йўқ эди, — деб жавоб берди Дефорж. — Аммо доим ёнимда тўппонча олиб юраман, чунки менга озор етказгандар билан олишишга кучим етмайди, ўзимга етадиган озорни кўтаролмайман.

Маша ҳайрон бўлиб унга қаради ва Дефоржнинг сўзларини Кирила Петровичга таржима қилиб берди. Кирила Петрович индамади, айиқни олиб чиқиб терисини шилишни буюрди, кейин ўз одамларига қараб: «Оббо шоввоз-эй. Кўркмади-я, пинагини ҳам бузмади» деди. Шундан кейин у Дефоржни яхши кўриб қолди ва уни синаб кўришни ўйламади ҳам.

Бироқ бу ходиса Марья Кириловнага янада кучлироқ таъсир қилди. Чунки у айиқнинг ўлиб ётганини, Дефорж эса айиқнинг жасади тепасида туриб, ўзи билан хотиржам гаплашганини кўрди. У мардлик ва иззат-нафсни ардоқлаш фазилатларининг фақат бир тоифага хос эмаслигини билди, шу пайтдан бошлаб ёш муаллимни хурмат қила бошлади ва бу хурмат кундан-кунга ортиб борди. Улар орасида илиқ бир муносабат пайдо бўлиб, қизнинг товуши яхши ва мусиқага қобилиятли бўлганлигидан Дефорж унга дарс бермоқчи бўлди. Қиз бу борада ўзига ишонмаса-да, муаллимни севиб қолганини англаш ўқувчи учун унча қийин бўлмаса керак.

ИККИНЧИ ТОМ

IX Б О Б

Байрамга бир кун қолганида меҳмонлар кела бошладилар, баъзилари Кирила Петровичнинг уйига ва хоналарига, баъзилари эса гумаштаникига, баъзилари руҳонийникига, баъзилари эса бойроқ дехқонларникига тушишди. Отхоналар меҳмонларнинг отлари-ю, ҳовли ва саройларнинг саҳни эса турли аравалар билан тўлди. Эрта билан соат тўққизда ибодатга занг урилди ва ҳамма Кирила Петрович курдирган, ҳар йили безатиб туриладиган янги гиштин черков томон йўл олишди. Бообру художўйлар шу қадар кўп эдик, оддий дехқонлар черковга сифмай, эшикнинг олдида ва ташқарида қолишли, Кирила Петрович келмагунча ибодат бошланмади. Кирила Петрович олтита от кўшилган извошда келди-да, кизи Марья Кириловнанинг кузатувида, тантанали равишда ўз жойига қараб юрди. Барча эркак ва аёлларнинг кўзи кизда бўлди, эркаклар унинг чиройига хайрон қолса, аёллар унинг кийимига эътибор билан қарашар эди. Ибодат бошланди. Кирила Петровичнинг хонаки ҳофизлари викор билан туриб хониш қилишли. Кирила Петрович ҳам уларга қўшилар, ўнг-сўлига қарамасдан ҳадеб ибодат қиласр эди. Ёшроҳиб баланд овозда мана шу ибодатхонанинг курчини тилга олганида, Кирила Петрович гуурули бир бўйсуниш билан ергача эгилди.

Ибодат тугади. Дастлаб хочнинг олдига Кирила Петрович келди. Ундан кейин барча унга эргашди, айникса қўшнилар ҳурмат билан Кирила Петровичга яқинлашишли, хонимлар Машани ўртага олишиди. Кирила Петрович черковдан чиқаётib ҳаммани меҳмонга таклиф килди-да, извошга ўтириб уйига кетди. Бошқалар ҳам унинг ортидан жўнашди. Уйлар меҳмонлар билан тўлди. Тез-тез янги меҳмонлар келишар, хўжайниннинг ёнига зўрга ўтишар эди. Модадан чиққан, эски, бироқ қимматбаҳо кийимлар кийган, марварид ва бриллиантлар таққан хонимлар ярим давра қуриб сипоҳлик билан ўтиришарди. Эркаклар эса ичкилик билан балиқ увилдириги атрофида тўпланиб, баланд овозда ўзаро гаплашишарди. Меҳмонхонада саксон кишига дастурхон солинмокда эди. Хизматкорлар у ёқдан-бу ёққа юришар, шиша ва қўзачаларни столнинг устига қўйишар, дастурхонларни тушашарди. Нихоят эшик оғаси: «Таом тайёр» деб хабар берганди, аввал Кирила Петрович стол томонга қараб юрди, унинг ортидан хонимлар эргашишли, катта-кичикликка риоя қилиб савлат билан ўз жойларига, қизлар эса бир гала хуркак оҳуга ўхшаб, бир ерга тўпланишиб, ёнма-ён

ўтиришди. Уларнинг қархисига эркаклар жойлашди. Столнинг охирига кичкина Саша билан бирга муаллим ҳам ўтири.

Хизматкорлар ликопларни ҳар кимнинг даражасига караб қўйишар, ақллари етмай қолган тақдирда Лафатернинг айтгандарига амал қилишар ва деярли янгишмасдилар. Ликоплар ҳамда қошиқларнинг жарангланиши меҳмонларнинг ғовур-ғувурларига қўшилар, Кирила Петрович ўзи ёздирган дастурхонга завқ билан қараб, очиққўл бир мезбон эканини ўйлаб, хурсанд бўларди. Худди шу пайтда ҳовлига олтита от қўшилган извош кирди. «Ким у?» деб сўради Кирила Петрович. Бир қанча овоз «Антон Пафнutyч» деб жавоб кайтарди. Эшик очилиб, эллик ёшларга кирган юмалоқ ва чўтири юзли, бақбақаси уч қават осилган Антон Пафнutyч Спицин кеч қолгани учун узр сўрамоқчи бўлиб эгилиб, кулимсираб, емакхонага отилиб кирди. «Санчқи, кошиқ беринглар! – деб қичкириди Кирила Петрович, – қани марҳамат, Антон Пафнutyч, ўтири, кейин бизга айт-чи, бу қандай гап: ибодат вақтида бўлмадинг, таомга ҳам кечикиб келдинг. Бу сенга ярашмайди, ахир, сен художўй ва емакни яхши кўрадиган одам эдинг-ку». «Кечиринг, – деб жавоб берди Антон Пафнutyч, сочиқни нўхот рангли чакмонига қистиаркан, – кечиринг, отахоним Кирила Петрович! Мен-ку йўлга эрта чиққандим, ўн чакирим ҳам йўл юрмай туриб, олдинги ғилдиракнинг чамбари иккига бўлиниб кетса бўладими? Хайриятки, қишлоқ якин эди, қишлоққа судраб олиб бориб, темирчини топиб у ёқ-бу ёгини ўнглагунимизча роса уч соат ўтиб кетди, иложи бўлмади. Якин йўл билан – Кистеневка ўрмони орқали юришга ботинолмадим, нариги тарафдан айланиб кела қолдим...»

– Э-хе! – деди Кирила Петрович унинг сўзини бўлиб. – Ҳали марди майдонлардан эмас экансан-да: нимадан қўрқасан?

– Нега қўрқмай, отахоним Кирила Петрович, Дубровский-чи, бир фалокат босиб қўлига тушиб қолсан борми, ў-хў, у шунақаки, хеч кимни аямайди, мени қўлга туширгудек бўлсами, нақ теримни шилиб олади-я.

– Нега терингни шилиб оларкан, а, оғайни?

– Нега шилиб олмасин, отахоним Кирила Петрович? Марҳум Андрей Гавриловичга қилинган даъво-чи? Сизни хурсанд қиласман деб, яъни, виждан ва адолатнинг талабига мувофиқ, Дубровскийлар Кистеневкани ноҳақ, фақат сизнинг илтифотингиз туфайли эгаллаб ётиби, деб исбот қилган мен эмасми, ахир? У марҳум (жойи жаннатда бўлсин) мен билан бошқача гаплашмоқчи эди, энди ўғли отасининг айтганини қиласа керак. Ҳозиргача Худо сақлаб келди. Бор-йўғи, бир омборимни талаб кетишиди, холос, ҳадемай қўргонимга келишмаса гўрга эди.

– Кўргонингга келишса роса маза қилишади, – деди Кирила Петрович. – Менимча, қизил сандинг олтинга тўла бўлса керак...

– Қаёқда дейсиз, отахоним Кирила Петрович! Илгари тўла эди, ҳозир бутунлай бўшаб қолди!

– Ёлгонни қўй, Антон Пафнutyч. Биз сени яхши биламиз; шунча пулни сарф қилиб бўпсан, ейишинг чўчқадан баттар, меҳмон чақирмасанг, музыкларингни роса шилсанг: топганингни йигасан-да, бошқа нима ҳам қиласдинг.

– Сиз доим кесатасиз, отахоним Кирила Петрович, – деб мингилади Антон Пафнutyч кулимсираб. – Биз азбаройи Худо, хонавайрон бўлдик. – Кейин Антон Пафнutyч, уй эгасининг боёнча ҳазилларини ёғлиқ сомсаларга қўшиб ура бошлади.

Шундан сўнг Кирила Петрович уни тинч қўйиб, илк марта меҳмон бўлиб келган ва столнинг нариги четида муаллимнинг ёнида ўтирган янги полиция бошлиғига мурожаат қилди.

– Қани айтинг-чи, Дубровскийни сиз ушлай оласизми, йўқми, бошлиқ жаноблари?

Полиция бошлиғи қўрқиб кетди, таъзим қилди, жилмайди ва ниҳоят тутила-тутила:

– Ҳаракат қиламиз, жаноби олийлари, – деди.

– Ҳа, ҳаракат қиламиз, кўпдан бўён ҳаракат киляптилар-у, фойдаси бўлмаяти-да. Дарвоқе, уни тутишнинг ҳожати йўқ. Дубровскийнинг босқинлари сизлар учун бир неъмат-ку: у ёқقا югар, бу ёқка югар, тергов ва турли хил баҳоналар билан чўнтакка пул қўйилади. Бундай неъматни қаердан топиб бўлади, дейсиз? Тўғрими, бошлиқ жаноблари?

– Айни ҳақиқат, жаноби олийлари, – деб жавоб берди, бутунлай довдираб қолган полиция бошлиғи.

Меҳмонлар қаҳ-қаҳ уриб юбориши.

– Мана шу тўғрисўзлиги учун яхши кўраман буни, – деди Кирила Петрович. – Аммо мархум полиция бошлиғимиз Тарас Алексеевичга ачинаман, агар уни куйдириб юборишмаганида, чор атрофда бу кадар нотинчлик бўлмасди. Хўш, Дубровский ҳақида қандай гаплар бор? Сўнгти марта уни қаерда кўришибди?

– Меникида, Кирила Петрович, – деб гулдиради йўғон овозли аёл. – Ўтган сешанба куни у меникида тушлик қилди.

Ҳамма Анна Савишна Глобовага қаради. У бева аёл бўлиб, одобли ва қувноқ бўлгани учун, уни ҳамма севар эди. Барча қизиқиб унинг гапига қулоқ солди.

— Аввали шуки, бундан уч ҳафта илгари ўғлим Ванюшага пул юбормоқчи бўлиб гумаштамни почтага жўнатувдим. Мен ўғлимни унчалик эркалатмайман, эркалатишга қурбим ҳам етмайди, аммо биласизларки, гвардия офицери яхши ҳаёт кечириши керак, шунинг учун мен даромадимни ўғлим билан баҳам кўраман. Шундай қилиб, Дубровскийнинг борлиги неча марта хаёлимга келса-да, Худога таваккал қилиб, ўғлимга икки минг сўм юбордим, шаҳар якин, атиги етти чақирим, дедим. Бир пайт кечқурун, гумаштам ранги ўчган, кийимлари йиртилган, ўзи яёв келяпти, кўрдиму, воҳ деб юбордим. «Нима гап? Нима бўлди сенга?» дедим. У менга: «Онажоним Анна Савишина – мени қароқчилар талади: ўзимни ўлдиришларига оз қолди, уларнинг орасида Дубровский ҳам бор эди, у мени осмоқчи бўлди, кейин раҳми келиб, кўйиб юборди. Аммо ҳамма нарсани тортиб олди, отни ҳам, аравани ҳам» деди. Эсим оғиб, «Э, Худованди карим, энди Ванюшам нима килади?» деб ўйладим. Бошқа чора йўқ эди: ўғлимга бир мактуб ёздим, бўлиб ўтган воқеани батамом айтдим, бир чақа юбормай, дуо қилиб қўя қолдим.

Орадан бир-икки ҳафта ўтди. Бир куни тўсатдан ҳовлимга бир извош кириб келди. Қандайдир бир генерал мен билан кўришмоқчи эмиш, марҳамат қилсинлар, дедим. Хонага ўттиз беш ёшларда, буғдој ранг, қора соч, соқол-мўйлови худди Кульневнинг¹ суратига ўхшаган бир кимса кириб келди. Ўзини марҳум эрим Иван Андреевич билан бирга ишлаган ва якин дўстларидан деб таништириди; шу йўлдан ўтаётib эдим, бу ерда яшашингизни билиб, марҳум дўстимнинг бевасими кўрмай ўтишни эп билмадим, деди. Баҳоли қудрат, меҳмон қилдим, у ёқ-бу ёқдан гаплашиб ўтиридик, ниҳоят, сўз Дубровский ҳакида борди. Мен бошимга тушган мусибатни айтдим. Генералнинг қовоғи солинди. «Бу қизиқ гап, – деди у. – Дубровский ҳаммани талайвермайди, бойларнигина талайди, шунда ҳам бутунлай қоқлаб кетмасдан оз-моз қолдириб кетади, деб эши туувдим. Одам ўлдиришда уни ҳеч ким айбламайди, бу ерда ёлғон аралашганга ўхшайди, ўша гумаштангизни бу ерга чақиришга буюрсангиз». Гумаштамни чақиритирдим. У келди: генерални кўриши ҳамон тошдек қотди.

– Қани, менга айт-чи, оғайни, Дубровский сени қандай қилиб талади; сени қай тарзда осмоқчи бўлди, – деди. Гумаштам дир-дир қалтираб, ўзини генералнинг оёғи остига ташлади.

– Отахоним, айб менда, ёлғон айтиб эдим, – деди у.

¹ Кульнев Я.П. – швед-рус урушида донғи чиққан ҳарбий арбоб.

- Ундай бўлса, – деди генерал, – воқеани бекангга бир чеккадан айтиб бер, мен эшитай. – Гумаштам эсини йўқотиб кўйди.
- Хўп бўлмаса, – деб ўзи сўзлади генерал, – қани, айт-чи, Дубровскийга қаерда йўқлиқдинг?
- Кўшқарағайнинг ёнида, тақсирим, кўшқарағай ёнида.
- У сенга нима деди?
- У мендан кимнинг қароли эканимни, қаерга ва нима учун кетаётганимни сўради.
- Хўш, ундан кейин-чи?
- Ундан кейин мактуб билан пулни сўради.
- Хўш.
- Мен унга мактуб билан пулни бердим.
- У-чи? Хўш, у-чи?
- Тақсирим, айб менда.
- Хўш, у нима қилди?
- У менга мактуб билан пулни қайтариб бериб: бор энди кетавер, буни почтага топшир, деди.
- Хўш, сен нима қилдинг?
- Тақсирим, айб менда.
- Мен азизим, сенинг таъзирингни бераман, – деди генерал ғазаб билан. – Сиз хоним, бу муттаҳамнинг сандигини топишга буоринг, ўзини менга топширинг, адабини бериб қўяй. Шуни билиб кўйингки, Дубровскийнинг ўзи ҳам гвардия офицери бўлган, у ўз дўстларини асло ранжитмайди.

Генерал жанобларининг ким эканлигини тушуниб етдим, ортиқча гапнинг ҳожати йўқ эди. Гумаштани извошчилар аравага тиқишиди. Пул топилди; генерал меникода тушлик қилди, кейин гумаштамни олиб жўнаб кетди.

Эртаси куни гумаштамни ўрмондан топишиди: у эман дарахтига боғланган ва худди жўка дарахти сингари териси шилинган эди.

Анна Савишнанинг ҳикоясига ҳамма, айниқса, қизлар жимгина қулоқ солишиди. Уларнинг кўпчилиги, шунингдек, Радклифнинг¹ қўрқинчли романларини ўқиган ва ундан таъсириланган ажойиб хаёлпаст Марья Кириловна каби Дубровскийни романтик қаҳрамон билиб, унга кўнгилларида хайриҳохлик билдиришиди.

– Сен, Анна Савишна, сеникига Дубровскийнинг ўзи келди, деб ўйлайсанми, – деб сўради Кирила Петрович. – Катта хато қиласан,

¹ Радклиф Анна (1764–1823) – инглиз ёзувчиси.

хузурингга кимнинг келганини билмайман-у, ҳар ҳолда Дубровский бўлмаса керак.

– Нега Дубровский бўлмасин, тақсирим? Катта йўлга чиқиб, ўтганни тўхтатиб, бир чеккадан текшириб ўтказса, у бўлмасдан ким бўлсин.

– Унисини билмадим, лекин у Дубровский эмасдир. Мен уни болалигимдан биламан, билмадим, ҳозир соchlари қорайиб қолганмикан, у пайтда жингалак сариқ соч бола эди, аммо шуни аниқ биламанки, Дубровский менинг Машамдан беш ёш катта, демак, у ҳозир ўттиз бешда эмас, балки йигирма учларда.

– Тўғри айтасиз, жаноби олийлари, – деди полиция бошлиғи. – Чўнтағимда Владимир Дубровскийнинг барча аломатлари ёзилган қоғоз бор, унда аниқ кўрсатилган, унинг ёши йигирма учда.

– Ҳа! – деди Кирила Петрович. – Яхши бўлди: қани ўқи-чи, бир эшитайлик; унинг аломатларидан хабардор бўлсанк яхши башарти учраб қолса, қочиб қутула олмайди.

Полиция бошлиғи чўнтағидан анча кирланиб қолган бир парча қоғоз олди, савлат тўқиб очди, сўнгра кироат билан ўқий бошлади.

«Владимир Дубровскийнинг аломатлари, мазкурнинг собиқ хизматкорларининг сўзларига биноан ёзилди.

Ёши йигирма учда, ўрта бўйли, юзи тоза, соқолини киртишлаб юради; қўй кўз, соchlари сарфиш, қиррабурун. Бундан боишқа унга хос аломатлар: улар йўқ».

– Шугинами? – деди Кирила Петрович.

– Ҳа, – деб жавоб берди полиция бошлиғи қоғозни букларкан.

– Табриклайман, бошлиқ жаноблари. Зап қоғоз эканми! Бу қоғоз билан Дубровскийни топиш сизга чўт эмас. Бўйи ўртача, сочи сарфиш, қиррабурун, қўй кўз бўлмаган ким бор! Гаров боғлашаман, агар қарама-карши ўтириб Дубровскийнинг худди ўзи билан уч соат гаплашсанг ҳам, Худо сени ким билан рўпара қилиб қўйганини билмайсан. Бу маҳкама ахлининг калласи хўб ишлайди-да!

Полиция бошлиғи ҳалиги қоғозни чўнтағига индамай солиб қўйдида, дамини чиқармасдан, қарам билан фоз гўштини тушираверди. Бу орада хизматкорлар ҳар бир меҳмоннинг олдига бир неча мартадан келиб, бўшаган қадаҳларни тўлдириб кетишиди. Горское ва Цимильянское номли мусалласларнинг бир неча шишиаси «пак-пук» очилди ва илтифот билан ҳақиқий шампан виноси ўрнида қабул қилинди, шундан сўнг юзлар қизариб, суҳбат авж олди, алжираш ва хурсандчилик бошланди.

– Йўқ, – деб Кирила Петрович сўзида давом этди. – Раҳматлик Тарас Алексеевичдек бошлиқни биз энди кўрмаймиз! У одам бунақа анқов, лапашанг эмасди. Афсуски, ёқиб юборишди азаматни, йўқса, унинг кўлидан бутун бошли тўданинг биронта ҳам аъзоси қочиб кутула олмасди. У ҳаммасини қўймай тутиб оларди, – ҳатто Дубровскийнинг ўзи ҳам қўлга тушмай қолмасди. Тарас Алексеевич ундан поранику оларди-я, аммо ўзини ҳам қўлдан чиқармасди. Раҳматликнинг одати шунақа эди. Қандай қиласлиқ, энди бу ишга ўзим аралашиб, қароқчиларнинг устига одамларим билан ўзим бостириб бораман, шекилли. Дастлаб йигирма кишини олиб чиқаман, улар ўғрилар уясини тўзитиб ташлайди. Одамларим довюрак, ҳар биттаси бир айикқа қарши чиқадиган азаматлар, қароқчилардан қўрқишмайди.

– Отахоним Кирила Петрович, айифингиз омонми? – деди Антон Пафнutyич. У бу саволни бераркан, ўзи дуч келган паҳмоқ ошнасини ва бир замонлар бошига тушган мусибатни ўйлаб қолди.

– Қолғанларнинг умри узок бўлсин, – деди Кирила Петрович. – Бизнинг айиқ полвон, душман қўлида шарафли ўлим топгандек бўлди. Ана, ундан зўр келган киши! – Кирила Петрович француз Дефоржни кўрсатиб. – Сен ҳам менинг французимга ўхша. У сен учун ўч олди... Агар жоиз бўлса... Эсингдами?

– Албатта, эсимда, – деди Антон Пафнutyич қашиниб, – жуда яхши эсимда. Айиқ полвон ўлиб кетди денг? Аттанг! Азбаройи Худо, ачиндим! Қандай яхши эди! Қандай эслик эди! Ундей айикни, энди топиб бўлмайди. Бу жаноб нега уни ўлдирди?

Кирила Петрович ўзига қарашли ҳар нарса билан мақтаниш қобилиятига эга бўлганидан, катта бир завқ билан французнинг ботирлигини сўзлай кетди. Мехмонлар айиқ полвоннинг ўлими ҳақидаги хикояни диққат билан тинглашди ва ҳайрон бўлиб Дефоржга қарашди, у эса гап ўзининг ботирлиги ҳақида кетаётганини билиб, жойида жимгина ўтиаркан, шўх шогирдига ахлок ва одобга оид танбехлар берар эди.

Нихоят, уч соатча давом этган зиёфат тугади; уй эгаси сочиғини бўйнидан олиб, столнинг устига қўйиши билан ҳамма ўрнидан турди ва меҳмонхонага ўтишди. У ерда меҳмонлар қаҳва ичишди, қарта ўйнашди, емакхонада ажойиб тарзда бошланган майхўрликни давом эттиришди.

Х Б О Б

Кечқурун соат еттиларда баъзи бир меҳмонлар кетмоқчи бўлиб туришганида, пунш ичиб кайфи ошиб қолган мезбон дарвозаларни беркитишни буюрди ва эрталабгача уйдан ҳеч ким чиқарилмайди, деб эълон қилди. Кўп ўтмай мусиқа садолари янграб, меҳмонхонанинг эшиклари очилиб, базм бошланиб кетди. Мезбон билан унинг яқин кишилари бир бурчакда ўтиришиб, бирин-кетин қадаҳларни бўшатишар ва ёшларнинг хурсандчилигини кузатишарди. Кампирлар қарта ўйнарди. Улан отлиқларидан биронта бригада турмаган жойларда хонимларга қараганда эркаклар озроқ бўлганидек, бу ерда ҳам эркаклар аёллардан оз эди, шунинг учун ҳам рақсга ярайдиган эркакларнинг ҳаммаси аллақачон эгаллаб олинганди. Муаллим ҳаммадан ажралиб турар, барчадан кўра кўпроқ ўйинга тушар, барча қизлар уни танлар ва у билан рақсга тушиш роса ёқимли дейишар эди. Марья Кириловна билан у бир неча марта рақсга тушди, қизлар эса уларни эрмак қилиб кузатиб туришди. Нихоят, ярим кечага яқин мезбон чарчаб, рақсларни тўхтатди-да, кечки емакни беришни буюриб, ўзи ухлагани кириб кетди.

Кирила Петровичнинг йўқлиги меҳмонларни анча яйратиб, жонлантириб юборди. Эркаклар хонимларнинг ёнига ўтиришга журъат қилди. Қизлар кулиб, ёнидагилар билан пичирлашар, хонимлар эса столнинг нариги тарафидагилар билан шангиллаб сўзлашар эди. Эркаклар ичкилик ичиб, гап сотиб, қаҳ-қаҳ уриб ўтиришар, хуллас кечки емак катта хурсандчилик билан ўтиб, базм аҳлида кўпгина ажойиб хотиралар қолдириди.

Бу умумий хурсандчиликка факат бир одам қўшилмас эди: Антон Пафнутич қовоғи солик ва индамасдан ўз ўрнида ўтирас, аллақандай паришонлик билан таом тановул қилас ҳамда жуда безовта қўринарди. Қароқчилар ҳақидаги гаплар уни ташвишга солиб қўйганди. Унинг безовталангани бежиз эмаслигини биз ҳадемай билиб оламиз.

Антон Пафнутич ўзининг қизил сандигини бўш деганда ёлғон гапирмаган ва гуноҳга ботмаган эди: сандик чиндан ҳам бўшаган, бир замонлар унда сакланган пуллар ҳозир чарм халта ичига кўчган, ўша халтани у кўкрагида, кўйлаги остида сакларди. У ўзидағи ҳеч кимга ишонмаслик ва доимий қўрқоқлик касалини халтачага бўлган эҳтиёткорлик билан босиб турарди. Антон Пафнутич бировнинг ҳовлисида тунашга мажбур бўлганидан кейин, ўғрилар осонлик билан кира оладиган бирор хилват уйда ётиб қолмай деб қўрқиб, ўзига ишончли бир ҳамдам изларкан, у ёқ-бу ёққа қаради-да, охири Дефорж-

ни маъқул топди. Муаллимнинг бақувват одам эканига далолат берадиган ташқи кўриниши, ундан ҳам кўра, бечора Антон Пафнутич эслаганида вужудида қалтироқ турадиган, йигитнинг айиқ билан учрашган вақтда кўрсатган довюраклиги, уни ташлашига сабаб бўлди. Столдан туришганида Антон Пафнутич томоқ қириб, йўталиб, ёш французнинг атрофида айланана бошлади ва ниҳоят, унга мурожаат қилди:

– Жаноб, шу бир кечани сизнинг қулбангизда ўтказсам майлими, зеро, мен сизга айтсам...

Дефорж назокат билан таъзим қилиб:

– Тақсир, қандай хизмат бор? – деб сўради.

– Оббо, шўрим қурсин, сиз жаноб русчани ҳали ўрганмаган экансизда. Же ве, муа, ше ву күш¹ тушундингизми?

– Жуда яхши, марҳамат қилиб тегишли одамларга буйруқ беринг, – деб жавоб килди Дефорж.

Француз тилига иштиёқмандлигидан хурсанд бўлган Антон Пафнутич, ўша оннинг ўзидаёқ буйруқ бергани кетди.

Мехмонлар бир-бирлари билан хайрлашгач, ўзлари учун ажратилган хоналарга қириб кетишиди. Антон Пафнутич эса муаллим билан бирга унинг хонаси томон юрди. Тун қоронфи, Дефорж қўлидаги шамчироқ билан йўлни ёритиб борди, Антон Пафнутич эса пулнинг ўзида эканини билиш учун халтасини бағрига боса-боса, унинг ортидан анча дадиллик билан юрди.

Хужрага келгач муаллим шамни ёқди, кейин иккаласи ечина бошлади; бу орада Антон Пафнутич қулфлар билан деразаларни кўздан кечирабкан, бу кўнгилга ором бермас кўрик таъсиридан бошини чайқай-чайқай, уй ичидা айланиб юрди. Эшикларнинг илгаклари биттадан, деразаларнинг ромлари ҳали икки қават қилинмаган экан. Бу хақда Дефоржга нолимоқчи бўлди, аммо француз тилини яхши билмаганидан бунчалик мураккаб фикрни баён қилолмади, муаллим унинг муддаосини тушунмади; шундан сўнг, Антон Пафнутич ўз нолишидан воз кечишга мажбур бўлди. Ўринлари рўпарама-рўпара солинган эди, иккаласи ҳам жойларига қириб ётишгач, француз шамни ўчирди.

– Пуркуа ву туше, пуркуа ву туше², – деб бақирди Антон Пафнутич, русча «тушу» деган феълни француз тили қоидасига чалакамчатти ишлатиб. Дефорж унинг сўзига тушунмади, унга «яхши ётиб туринг», деди.

¹ Мен хонангизда ётсам, дейман.

² Қоронгига ухломайман.

— О, лаънати кофир, — деб тўнгиллади Спицин кўрпага ўранаркан. — Шамни ўчириб кўйди-я! Ўзига ёмон бўлади-ку. Мен қоронгида ухломайман. Ҳой жаноб! Жаноб! — деди у яна, — же ве авек ву парле¹. — Бироқ француз жавоб бермади ва дарров хуррак тортди.

— Бу лаънати француз хурракни роса тортяпти, — деб ўйлади Антон Пафнутьевич. — Мени кўзимга уйқу келмайди, — ҳадемай очик эшикдан ўғрилар кириб келишса ё бўлмаса деразадан ошиб тушишса борми: бу лаънатини тўп отиб ҳам уйготиб бўлмайди. — Жаноб! Ҳой жаноб! Жин урсин сени!

Антон Пафнутьевич жим бўлиб қолди, ҳоргинлик ва майнинг кайфи аста-секин унинг ваҳимасини енгди, у мудрай бошлади ва ҳадемай қаттиқ уйқуга кетди.

Унинг уйгониши ғалати бўлди. Кўзи уйқуда-ю, кўйлагининг ёқасидан аллаким оҳистагина тортаётганини сезди. Антон Пафнутьевич кўзини очиб, ғира-шира куз тонгида, қархисида Дефоржни кўрди: француз бир кўлида тўппонча, бошқа кўли билан олтинга тўла халтани ечар эди. Антон Пафнутьевич ҳанг-манг бўлиб қолди.

— Кесь ке се, мусъе, кесь ке се² — деди у қалтираган овоз билан.

— Жим, дамингизни чиқарманг! — деб жавоб берди муаллим соф рус тилида. — Овозингизни чиқарсангиз, ҳалок бўласиз, мен Дубровский бўламан.

XI БОБ

Энди ҳикоямизнинг ҳозиргача айтолмаган сўнгги ҳодисаларини, аввалги воқеалар билан бирга англатишга ўқувчидан ижозат сўраймиз.

** бекатида, юқорида зикр этилган назоратчининг уйида, бир бурчакда, афтидан ювош ва бардошли одам экани кўриниб турган бир йўловчи ўтиради; ҳар ҳолда бу одам ё обрўли табақадан бўлмаган зиёли ёки ажнабийлардан бўлиб, бу почта йўлларида гапсўзи ўтадиганлардан эмас эди. Унинг ўз араваси ҳовлида мойлангани кўйилганди. Аравада кичкинагина бир жомадон бўлиб, бу эгасининг камбағаллигидан дарак бериб турарди. Йўловчи ўзига на чой буюрди, на қаҳва; у деразадан кўзини узмас ва тахта девор орқасида ўтирган назоратчи аёлнинг ғашини келтириб, хуштак чаларди.

¹ Мен сиз билан гаплашмоқчиман.

² Бу нима гап азизим, нима гап.

– Худойим бизга зап хуштакчини юборган экан-да, – дерди ҳалиги аёл пичирлаб. – Тўхташни билмайди-я, сира! Ер ютсин илоҳим, бу кифирни!

– Ҳа, нима бўпти? – деди назоратчи. – Нима зарари бор? Чалса, чалар.

– Нима зарари бор дейсан-а? – дер эди хотини аччиғланиб. – Бунинг ёмонлик аломати эканини билмайсанми?

– Қанақа ёмонлик дейсан? Ҳуштак чалса, кўлдан давлат кетади, деганими? Э! Пахомовна, бизницида хоҳ ҳуштак чалсин, хоҳ чалмасин – барибири: давлатнинг ўзи йўқ-ку.

– Жўнатиб юбора қол, Сидорич. Уни олиб ўтириб нима қиласан? Улов керак бўлса тезрок бер, йўқолсин бу ердан.

– Тура турсин, Пахомовна; отхонада аравага қўшиладиган учта от бор холос, тўртинчиси дам оляпти. Ҳадемай яхши йўловчилар келиб қолишади; бу француз учун бошим билан жавобгар бўлишни истамайман. Ҳа-а ана, айтганим келди! Юргурганича келяпти. Эҳ-хе, югуриши ни қара, генерал бўлмасин тагин?

Эшик олдига извош келиб тўхтади. Хизматкор ундан иргиб тушиб, эшикни очди, ҳарбий шинель ва оқ қалпоқ кийган бир йигит бир оздан кейин назоратчининг олдига кирди. Унинг ортидан хизматкор кутича олиб кириб деразага қўйди.

– Менга от бер! – деб буюрди офицер.

– Ҳозир, – деб жавоб қилди назоратчи. – Йўл хужжатларини марҳамат қилиб тақдим этсалар.

– Менда ҳеч қандай хужжат йўқ. Мен чекка вилоятга кетаман... Мени танимадингми?

Назоратчи ҳовлиқиб извошчиларини шоширди. Йигит эса уйнинг ичида у ёқдан-бу ёққа юриб туриб, тахта деворнинг нариги тарафига ўтди ва назоратчининг аёлидан секингина: «Ким у?» деб сўради.

– Худо билади, – деди назоратчининг аёли, – аллақандай француз. Беш соат бўлди, улов кутяпти, ҳуштак чалади, холос. Жонимга тегди, ет ютгур.

Йигит йўловчи билан французча гаплашди.

– Марҳамат қилиб қаёққа кетмоқдасиз? – деб сўради ундан.

– Шу яқиндаги шаҳарга, – деди француз. – Ундан кейин бир амалдорникига бораман. У киши мени сиртдан муаллимликка ёллади. Мен шу бугун у ерга етиб бораман деб ўйловдим, аммо назоратчи жаноблари бошқача ўйладилар. Бу ерларда улов топиш мушкул экан, офицер жаноблари.

– Бу ердаги амалдорлардан қайси бирининг хизматига кирдингиз? – деб сўради офицер.

– Троекуров жанобларининг хизматларига, – деб жавоб берди француз.

– Троекуров? Ким экан у Троекуров?

– Билолмадим, офицер жаноблари. – Мен у кишининг яхши томонларини кам эшитганман. Эштишимга қараганда, у жуда такаббур, ўжар, ўз одамларига қаттиққўл, хеч ким билан чиқишишас, унинг исми ни эшитганда барча дир-дир титрар, муаллимларни ҳам аямас, иккита сини ўлгунича калтаклаган эмиш.

– Кечирасиз! Ҳали сиз шунаقا золим одамнинг хизматига кирдингизми?

– Қандай килай, офицер жаноблари. У менга яхшигина маош, яъни, йилига уч минг сўм бермоқчи, бундан ташқари, ҳамма нарса унинг ўзидан. Эҳтимол, мен бошқалардан баҳтилироқ бўларман. Мени кекса онам бор, маошимнинг ярмини унга юбораман, шу билан тириклик қиласи. Қолган маблағни беш йилгача тўплаб борсам, келажақда бирорвга муҳтоҷ бўлмайдиган жиндаккина дастмоя ҳам йиғиб оламан, шундан кейин хайр-маъзур килиб Парижга жўнайман-да, савдо-сотик ишига кираман.

– Троекуровникида сизни бирор кимса танийдими? – деб сўради офицер.

– Ҳеч ким, – деб жавоб берди француз. – Мени Москвадаги бир ошинаси орқали чакириди, у одамнинг ошпази ватандошим эди, мени ўша тавсия қилди. Билиб қўйишингиз керак, аслида мен муаллимликка эмас, қандолатчиликка ўқиган эдим, аммо менга, мамлакатингизда муаллимлик жуда қулай иш, дейиши...

Офицер ўлланиб қолди.

– Менга қаранг, – деди офицер. – Ўша келажагингизнинг ўрнига сизга нақд ўн минг сўм бериб, шу ондаёқ Парижга жўнаб кетишингизни талаб қилсалар нима дер эдингиз?

Француз ҳайрон бўлиб офицерга каради, жилмайди ва бошини чайқади.

Кириб келган назоратчи:

– Отлар тайёр, – деди. Хизматкор ҳам тасдиқлади.

– Ҳозир, – деди офицер. – Бир оз холи қолдириинглар. Назоратчи билан хизматкор чиқиб кетишиди. Офицер сўзида давом этди: – Мен ҳазиллашаётганим йўқ, ўн минг сўмни сизга бераман, менга факат сизнинг бу ердан кетишингиз ва ҳужжатларингиз керак. – У шу

сўзларни айтаркан, ҳали қутичани очиб ичидан бир неча тахлам қоғоз пул олди.

Французнинг кўзлари ола-кула бўлиб кетди. Нима дейишини ҳам билмай қолди.

– Менинг кетишим... менинг хужжатларим, – деб ҳайрон қолиб такрорлади у. – Мана хужжатларим... Лекин сиз мен билан ҳазиллашяпсиз: сизга хужжатларим нима учун керак?

– Бу билан ишингиз бўлмасин. Мен сиздан яна бир бор сўрайман: розимисиз шунга ё йўқми?

Ҳали ҳам ўз қулоқларига ишонмаган француз, хужжатларини ёш офицерга узатди, у эса дарҳол олиб кўздан кечирди.

– Бу паспортингиз... яхши. Тавсиянома, кўрамиз. Туғилган йилингиз ҳакида гувоҳнома, жуда соз. Мана бу сизнинг пулингиз, энди қайтиб кетаверинг. Хайр.

Француз ҳанг-манг бўлиб қолди.

Офицер қайтиб келди.

– Мен энг муҳим нарсани унугаёзибман. Сиз менга вижданан, бу ишлар иккимизнинг ўртамида қолади, деб сўз беринг.

– Вижданан сўз бераман, – деди француз. – Факат хужжатларимга ҳайронман, уларсиз қандай қиласман?

– Дастлаб қайси шаҳарга борсангиз, Дубровский томонидан таландим деб айтинг. Сўзингизга ишониб, тегишли гувоҳномалар беришади. Хайр энди, тез фурсатда Парижга етиб бориб, кекса онангизни соғсаломат кўришни Худо сизга насиб этсин.

Дубровский уйдан чиқиб извошга ўтириди-да, отларни чоптириб кетди.

Назоратчи дераза олдида қараб турарди, извош жўнаб кетгач, у хотинига қараб: «Хой, Пахомовна, бир гапдан хабаринг борми? Ҳозирги келган кимса Дубровский эди» деди.

Назоратчининг аёли юрганича деразанинг ёнига келди, лекин кеч қолди: Дубровский анча узоклашиб кетган эди. Сўнгра эрини койий бошлади:

– Сен, Сидорич, Худодан қўрқмайсан, нега менга аввалроқ айтмадинг, Дубровскийни қўриб қолардим, энди яна қачон йўли тушади-ю. Инсоф деган нарса йўқ сенда, чиндан ҳам инсофсизсан!

Француз қоқкан қозикдек турарди. Офицер билан бўлган аҳдлашуви, пул, буларнинг ҳаммаси унга бир тушга ўхшаб қўринарди. Бироқ боғлам-боғлам пуллар чўнтағида бўлиб, бу ажойиб ҳодисанинг ҳақиқат эканини исботлар эди.

У шаҳаргача улов кира қилмоқчи бўлди. Аравакаш секин ҳайдаб борганидан, шаҳарга кечаси етиб борди. Соқчилар бўлинмаси ўрнида вайронга бир кулба турган ерга етмасданоқ, француз аравани тўхтатишни буюрди, ундан тушди-да, арава билан жомадонни ичкилик олиб ичиш учун аравакашга ҳадя қилганини имо-ишора орқали тушиунирди ва шаҳарга қараб пиёда кетди. Дубровскийнинг таклифига француз қандай ҳайрон қолган бўлса, унинг бу саҳийлигига аравакаш ҳам шу қадар лол қолди. Аммо аравакаш уни аҳмоққа йўйиб, астойдил таъзим килди-да, шаҳарга боришини эп кўрмай, эгаси ўзига яхши таниш бўлган машҳур бир ишратхонага қараб йўл олди. Бутун кечани у ерда ўтказиб, арава билан жомадонидан айрилиб, учта яйдоқ отга эга бўлиб, эрталаб юzlари шишган ва кўзлари қизарган ҳолда боши оққан томонга қараб равона бўлди.

Дубровский французнинг қоғозларини қўлга киритиб, юқорида хабардор бўлганимиз каби Троекуров хузурига дадил келди ва унинг уйига жойлашиб олди. Унинг яширин мақсадлари қандай бўлмасин (биз буни кейинроқ билиб оламиз), аммо унинг феълу атворида айбуга саналадиган ҳеч нарса йўқ эди. Тўғриси, Сашанинг тарбияси билан оз шуғулланди, боланинг шўхликларига кенг йўл қўйди, расмият учун бериладиган дарсларни қаттиқ суриштирмади. Лекин қиз шогирдининг мусиқадаги муваффакиятларини катта қизиқиши билан кузатди ва кўпинча фортепъяно ёнида бирга соатларча ўтирадиган бўлди. Бу ёш муаллимни барча севарди – Кирила Петрович ов пайтида кўрсатган чаққонлиги учун, Марья Кириловна чексиз ихлоси ва хушмуомаласи учун, Саша ўзининг шўхликларига йўл қўйилгани учун, хизматкорлар яхшиликлари ва ўз ахволига тўғри келмайдиган саҳийлиги учун яхши кўришар эди, у ўзини шу оиласга баҳшида этилган ва унинг бир аъзоси деб хисобларди.

Унинг муаллим унвони билан хизматга кирганига, ҳалиги унуптилмас байрам кунигача бир ойга яқин вақт ўтган бўлса-да, бу камтарп ёш француз қиёфасида, ёлғиз биргина исмнинг ўзи теварак атрофдаги бойларни вахимага солган, даҳшатли қароқчи юрганини ҳеч ким хаёлига ҳам келтирмади. Шу муддат орасида Кирила Петрович яшаган Покровское қишлоғидан Дубровский ҳеч қаёққа чиқмаган бўлса-да, унинг босқинчиликлари тўғрисида овозалар босилмаганди, бунга эса қишлоқ аҳолисининг ихтирочи хаёллари сабаб бўлди, ундан ташқари, тўда сардорсиз ўз ишини давом эттираётган бўлиши ҳам мумкин.

Ўзининг шахсий душмани ва ўз бошига келган фалокатларнинг асосий айбдорларидан бири, деб хисобласа бўладиган одам билан бир

үйда тунаган Дубровский ўзини тиёлмади. У чарм халтанинг борлигидан хабардор эди, уни қўлга туширишга аҳд қилди. Бирданига муаллимдан босқинчига айланиб, бечора Антон Пафнутични қандай ҳайратга согганини биз юқорида билиб олдик.

Покровскоеда тунаб қолган меҳмонлар эрталаб соат тўққизда бирин-кетин меҳмонхонага тўпланишди, у ерда самовар қайнаб турар, самоварнинг олдида эса эрталаб кийиладиган кўйлақда Марья Кириловна ўтирас, Кирила Петрович – устида паҳмок камзул, оёқларида туфли – косадек катта пиёлада чой ичар эди. Ҳаммадан кейин Антон Пафнутич келди; унинг ранги шу қадар оқарган ва шунчалик паришон кўринардики, бу ҳолни кўриб ҳамма ҳайрон бўлди ва Кирила Петрович ундан бетоб эмасмисан, деб сўради. Спицин довдираб жавоб қайтарди ва шу ерда ҳеч нарса кўрмагандек хотиржам ўтирган муаллимга ваҳимага тушиб қараб кўйди. Бир неча дақиқадан кейин хизматкор кириб Спицинга извош тайёр бўлганини билдириди. Антон Пафнутич апил-тапил ўрнидан турди-да, ҳаммага тъзим қилиб, уй эгасининг илтимосига қарамай, тезгина уйдан чиқди ва жўнаб кетди. Унга нима бўлганини билишолмади. Кирила Петрович эса кўп овқат еб бўкиб қолгандир, деб ўлади. Эрталабки чой ва ҳайрлашув нонуштасидан сўнг, меҳмонлар ҳам уй-уйларига тарқалишди, кўп ўтмай Покровское қишлоғи бўшаб қолди ва ҳамма нарса ўз ўрнига тушди.

XII Б О Б

Орадан бир неча кун ўтди, бироқ бу вақт ичидаги ҳеч қандай мухим ходиса юз бермади. Покровское қишлоғи аҳолисининг кунлари бир хилда ўтар эди. Кирила Петрович ҳар куни овга чиқар; Марья Кириловна эса китоб ўқир, сайд қилар, мусика дарсларини олар, улар билан кўпроқ ва жиддий шуғулланарди. У ўз қалбини англай бошлади ва кўнгли ёш французнинг фазилатларига бепарво эмаслигини беихтиёр алам билан эътироф этди. Шу билан биргага, француз ҳам одоб ва хурмат доирасидан четга чиқмас, бу билан у қизнинг ғурурига, ҳуркак гумонларига таскин берар эди. Қиз одамни ўзига жалб этувчи одатларга тобора кўпроқ ишонч билан берилиб борар; Дефорж бўлмаса зерикар, у бор пайтларда эса доим у билан машғул бўлар, ҳар бир нарса ҳакида унинг фикрини билишга уринар ва унинг барча фикрларига кўшиларди. Қиз, балки уни ҳали севганича йўқдир, лекин илк марта дуч келадиган тасодифий бир тўсқинлик ёки тақдирнинг ногаҳоний бирон жабри орқасида қизнинг кўнглида эҳтирос олови алангаланиши мумкин эди.

Бир куни ўзини муаллим кутиб турган меҳмонхонага кириб келган Марья Кирилловна, унинг оқарган юзида довдираш аломатлари борлигини сезиб ҳайрон қолди. Қиз фортепъянони очди, бир нечта нотани чалди, лекин муаллим боши оғриётганини баҳони қилиб узр сўради, дарсни тўхтатди ва ноталарни ёпаркан, кизнинг қўлига яширинча бир мактуб узатди. Марья Кирилловна ўйламасдан туриб мактубни олди ва ўша ондаёқ бу ишга ўқинди, бироқ Дубровский хонадан аллақачон гойиб бўлган эди. Марья Кирилловна хонасига кириб, мактубни очди ва куйидагиларни ўқиди:

«Бугун соат 7 да ариқ бўйидаги шийпончага келинг. Сиз билан сўзлашадиган зарур гапларим бор».

Бу мактуб уни ниҳоятда қизиқтириди. Ўзи истаган ва қўрқкан бу эътирофни киз кўпдан буён кутар эди. Машага анчадан бери пайқаб юрган нарсанинг чинга айланишини эшлиши ёки тушса-да, бироқ фақирилиги туфайли ҳеч қачон унинг розилиги насиб бўлмайдиган одамдан, бундай эътирофни эшлиши одобдан эмаслигини қиз яхши биларди. Шундай бўлса-да, ҳам у учрашгани бормоқчи бўлди, аммо бир нарсага ҳайрон эди: муаллимнинг таклифини қай йўсинда қабул қиласди – зодагонча ғазаб биланми, ё дўстона ўйтитлар ва кўнгилли ҳазиллар биланми ёки индамай «хўп» дейиш биланми? Ҳолбуки, ўзи ҳар онда соатга қараб кўярди. Қоронги тушди, шамлар ёқилди, Кирила Петрович меҳмон бўлиб келган қўшнилари билан қарта ўйнашга ўтириди, ошхонадаги соат чоракам еттига занг урди. Марья Кирилловна оҳистагина зинапояга чикди, у ёқ-бу ёққа қараб олди-да, боф томонга қараб югуриб кетди.

Кеча қоронги, кўк юзини қора булат қоплаган, икки қадам нарида ҳеч нарсани кўриб бўлмасди; факат Марья Кирилловна қоронгидага ўзига таниш бўлган йўллардан юриб, бир дақиқадан кейин шийпончага етиб келди; у нафасини ростлаб олиш ва ўзини Дефоржга бепарво ҳамда хотиржам кўрсатиш учун шу ерда тўхтади. Бироқ Дефорж унинг рўпарасида турар эди.

– Раҳмат сизга, – деди у оҳиста ва ғамгин овоз билан, – менинг ўтингчимни рад этмадингиз. Агар келмаганингизда, қаттиқ ранжиган бўлардим.

Марья Кирилловна олдиндан тайёрлаб кўйган жавобини берди:

– Умид қиласманки, истагингизга рад жавобини берганим учун мени ўкинишга мажбур этмассиз.

У тўё гапга киришмоқ учун нафасини ростлаётгандек, жим бўлиб қолди.

– Шароит шуни талаб қиласи... Мен бу ердан кетишга мажбурман, – деди у нихоят. – Яқинда, балки эшишиб қоларсиз. Фақат айрилишдан аввал сиз билан сўзлашиб олишим керак...

Марья Кириловна жавоб бермади. У бу сўзларни кутилган изҳорнинг муқаддимаси, деб ўйлади.

– Мен сиз ўйлаган одам эмасман, – деб сўзида давом этди у бошини ғиб. – Мен француз Дефорж эмас, Дубровский бўламан.

Марья Кириловна қичқириб юборди.

– Худо ҳаки қўрқманг, сиз исмимдан қўрқмаслигингиз керак. Тўғри, мен ўша, отангиз бир бурда нонидан маҳрум қилган, отаси-нинг уйидан хайдаган, энди катта йўлларда босқинчилик қилаётган бечораман. Фақат сиз отангиз учун ҳам, ўзингиз учун ҳам мендан қўрқмасангиз бўлади. Бўлар иш бўлган. Мен унинг айбларини кечирганман. Билиб қўйинг: уни сиз қутқариб қолдингиз. Биринчи марта мен қонли қасосни ундан олишим керак эди. Қаердан ўт қўйса, қай томондан унинг ётоқхонасига кириш мумкин, унинг қочадиган йўлларини тўсиб ташлаш қай тарзда бўлади деб, унинг ҳовлиси атрофика ўйлаб юрганимда, ёнимдан само фариштаси сингари сиз ўтиб қолдингиз, шундан кейин кўнглим юмшаб кетди. Мен, сиз яшаган уй муқаддас, сизга қариндош бўлган ҳар бир кимса нафратимдан четда эканини тушундим. Ўч олиш фикрини телбалик деб билиб, воз кечдим. Сизнинг оқ қўйлагингизни йирокдан бўлса ҳам бир қўриш ниятида, куни билан Покровское боғларида кезардим. Сиз бепарволик билан сайр-томоша қилиб юрган чоғларингизда, мен яширинча хозир бўлган ерда сиз учун ҳеч қандай хавф-хатар йўқ, деган ширин хаёл билан дарахтлар орасида бекиниб, сизни кузатиб юрардим. Нихоят, бир тасодиф билан ҳовлингизга жойлашиб олдим. Бу уч ҳафта менинг энг баҳтли кунларим бўлди. У кунларнинг хотираси ғамгин ҳаётимда катта юпанч бўлажак... Мен бугун бир хабар олдим, бундан кейин бу ерда қолишим мумкин эмас. Мен сиз билан бугун... мана ҳозирнинг ўзида видолашаман... Лекин кейинчалик мени лаънатлаб, нафратланниб юрмаслигингиз учун, аввало, сирларимни сизга айтишим керак эди. Баъзи-баъзида Дубровскийни хотирлаб қўйинг. Шуни билиб қўйингки, у бошқа бир ҳаёт учун дунёга келган эди, унинг қалби сизни севди, энди ҳеч қачон...

Сўз шу ерга келганида оҳистагина ҳуштак овози эшитилди, Дубровский жим бўлиб қолди. У қизнинг қўлидан маҳкам ушлаб, ўтдек қизгин лабларига босди. Яна ҳуштак овози келди.

— Кечирасиз, — деди Дубровский. — Мени чакиришяпти, бир оз ҳаялласам ҳалок бўлишим мумкин. — У сал нари кетди. Марья Кириловна қимирламай туради.

Дубровский қайтиб келди-да, яна қизнинг кўлидан тутди. Сўнгра мулоим ва таъсири билан:

— Агар қачондир бошингизга бирор кулфат тушса, ҳеч кимдан ёрдам ва ҳимоя кўролмасангиз, ўшанда ўзингизни қутқариш учун мендан кўмак сўрашга ваъда берасизми? — деди. — Менинг сизга бўлган садоқатимни рад қиласликка ваъда берасизми?

Марья Кириловна товуш чиқармай йиғлар эди. Учинчи марта хуштак овози келди.

— Сиз мени ҳалок қиласиз? — деб қичкирди Дубровский. — То жавоб бермагунингизча кетмайман, ваъда берасизми, йўқми?

— Ваъда бераман, — деб пицирлади бечора гўзал.

Дубровский билан учрашувдан ҳаяжонга келган Марья Кирилвна боғдан қайтди. Қараса, ҳовлидаги одамлар ҳар томонга югуришган, бутун хонадон ҳаракатга келган, ҳовлида одам кўп, эшикнинг олдида уч отлиқ арава турибди, қиз узоқдан Кирила Петровичнинг овозини эшитгач, ўзининг йўқлиги билиниб қолмасин деб, шошганича уйга кирди. Мехмонхонада уни Кирила Петрович қарши олди, бу пайтда меҳмонлар, бизга таниш бўлган полиция бошлигини ўртага олиб, ҳар томондан унга саволлар беришар эди. Сафар либоси кийган ва бошдан оёғигача куролланган бошлиқ эса аллақандай сир ҳамда бетоқатлик билан уларга жавоб берарди.

— Каерда эдинг, Маша? — деб сўради Кирила Петрович, — жаноб Дефоржни кўрмадингми? — Маша базўр йўқ, деган маънода жавоб қила олди, холос.

— Буни қара энди, — Кирила Петрович сўзида давом этди. — Полиция бошлиги уни қўлга олмоқчи бўлиб келибди. Дубровский шунинг ўзи, деб мени ишонтиromoқчи бўляпти.

— Ҳамма аломатлари, жаноби олийлари, — деди бошлиқ хурмат билан.

— Ҳой, биродар, — дея Кирила Петрович унинг сўзини бўлди. — Бор, жўна бу ердан, ўша аломатларинг билан! Ҳамма ишни ўзим текшириб кўрмагунимча, французимни сенга бермайман. Антон Пафнутич ўлгудек кўрқоқ, ёлғончи одам, унинг сўзига ишониб бўладими? У ваҳима бўлиб қолибди, муаллим уни таламоқчи бўлган эмиш! Нимага ўша куни эрталаб менга бир оғиз айтмади?

– Француз уни қўрқитибди, жаноби олийлари, – деди полиция бошлиғи. – Ҳеч кимга айтмайсан, деб қасам ичирибди.

– Бўлмаган гап, – деди Кирила Петрович. – Ҳозир мен барчасини аниқлайман, масалага ойдинлик киритаман. Муаллим қани, ахир? – деб сўради у эшиқдан кириб келган хизматкордан.

– Ҳеч қаердан топилмади, – деди хизматкор.

– Топ, қидириб топ! – деб бақирди хизматкорга, ўзи ҳам гумонсираб. Кейин полиция бошлиғига: – Қани, ўша мақтаган аломатларингни менга кўрсат-чи! – Бошлиқ дарҳол қоғозни узатди. – Ҳм, йигирма уч ёш... Бу шундай-ку, аммо бу билан ҳали ҳеч нарса исбот бўлмайди. Қани муаллим дейман?

– Топилмади, – деб жавоб беришди. Кирила Петрович ташвишланди. Марья Кириловнанинг эса бу пайтда ранги оқариб, хушини йўқотиб турар эди.

Отаси буни пайқаб:

– Рангинг ўчган қизим, – деди. – Сени қўрқитиб юборишибди-да.

– Йўқ отажон, – деди Маша. – Бошим оғрияпти.

– Бор Маша, хонангга кир, ташвиш тортма!

Маша отасининг қўлини ўпди-да, тез-тез хонасига юриб кетди. У ерда ўзини каравотга ташлади ва эсини йўқотиб, хўнграб йифлади. Ҷўри қизлар югуриб келиб, ечинтиришди, совук сув ва турли-туман дорилар билан зўрға тинчитиб, жойига ётқизишди-ю, шу билан қиз ухлаб қолди.

Бу орада француз ҳеч қаердан топилмади. Кирила Петрович меҳмонхонанинг у бошидан бу бошига бориб келар, «Зафар гулдуроси янгра!» қўшиғига ғазабланиб ҳуштак чаларди. Мехмонлар ўзаро пичирлашди, полиция бошлигининг бекорга югуриб, аҳмок бўлгани қолди, француз топилмади. У олдиндан хабар топиб қочган эди. Лекин унга ким ва қандай хабар берган? Бир сир очилмай қолди.

Соат 11 бўлиб қолса-да, ҳеч кимнинг уйқуси келмади. Ниҳоят, Кирила Петрович полиция бошлиғига зарда қилиб деди:

– Ҳўш, қани? Тонг отгунча пойлаб ўтирасанми бу ерда? – Менинг ховлим майхона эмас ахир, агар у Дубровский бўлганида ҳам, сен бундай чаққонлигинг билан уни тутиб бўлибсан, биродар. Қаердан келган бўлсанг ўша ёққа жўна, бундан буён эпчилроқ бўл. Кейин меҳмонларга караб: – Энди сизлар ҳам кетсанглар бўлади. Араваларингизни қўштиринг, менинг уйқум келди.

Троекуров меҳмонлари билан шундай совуққина хайрлашди.

ХІІІ Б О Б

Яна бир қанча вақт ўтди, муҳим бир воеа рўй бермади. Лекин янаги ёз бошларида Кирила Петровичнинг оилавий ҳаётида кўп ўзгаришлар бўлди.

Кирила Петрович яшаган жойдан ўттиз чақиримча нарида князь Ве-рейскийнинг катта мулки бор эди... Бу князь кўп йиллар хориж мамла-катларида яшади, ўзи бўлмагандга унинг мулкини истеъфога чиқкан бир майор бошқарди, Покровское билан Арбатово қишлоқлари ўртасида ҳеч қандай алока йўқ эди. Май ойининг охирларида князь хориждан ўз қишлоғига қайтиб келди, бу қишлоқни у шу пайтгача кўрмаганди. Эркин яшаб ўрганганд бу одам, ёлғизлиқка чидолмай келганидан уч кун кейин, бир вақтлар таниши бўлган Кирила Петровичникига меҳмон бўлиб борди.

Князь эллик ёшларда бўлса-да, анча кекса кўринарди. Ортиқча ҳою ҳаваслар унинг саломатлигини нуратиб, суробини тўғрилаб кўйган эди. Шунга қарамай, у истараси иссиқ ва жозибадор бўлиб, улфат-чилик кўрганлиги уни, айниқса хотин-қизлар орасида илтифотга са-зовор қиласди. У доим улфат қидирап ва ҳамиша зерикарди. Кирила Петрович бу одамнинг меҳмон бўлиб келганига жуда севинди, чун-ки бу ташрифни, у киборлар жамиятини кўрган бир кишининг ўзига кўрсатган хурмати деб билди; одати бўйича меҳмонга ўз жойларини кўрсатар экан, уни ҳам итхонасига олиб кирди. Кўланса ҳид димоғига урилиб, князнинг нафаси бўғилди ва атир сепилган рўмолчаси билан бурнини беркитиб, у ердан чикиб кетишга шошилди. Каллакланган аргувонли, чор бурчак ҳовузли ва бир текис чўзилиб кетган хиёбон-ли эски боғ унга маъқул бўлмади; у инглиз боғларини ва табиат де-йилган кенглигни яхши кўтарди, шундай бўлса ҳам, кувонч билдириб, мақтаб юрди; хизматкор келиб, таом тайёр бўлганидан хабар берди. Улар овқатлангани кетишли. Бу кезишдан чарчаган ва меҳмонга кел-ганига пушаймон бўлган князь пича оқсанброқ қадам босар эди. Аммо меҳмонхонада уларни Марья Кириловна кутиб олгач, бу шаддод, дил-бар қизнинг ҳуснини кўриб лол қолди. Троекуров уни қизининг ёнига ўтқазди. Қизнинг ёнида князга жон кирди: кувониб, очилиб кетди ва қизиқ ҳикоялар айтиб бериб, қизнинг эътиборини бир неча бор ўзига қаратди. Емакдан кейин Кирила Петрович отда сайр қилайлик, деб так-лиф қилганди, князь оёғидаги баҳмал этикларини кўрсатиб узр сўради ва ўзидағи ясси товонидан кулган бўлиб, кўп ўринли аравада сайр қилишни афзал кўрди, мақсади севимли қўшнисидан айрилмаслик

эди. Икки чол билан бир гўзал аравага ўтириб, жўнаб кетишиди. Сухбат тўхтамади. Марья Кириловна бу киборлар тоифасига мансуб одамнинг хушомад ва кўнгилочар гапларини жон деб тинглар экан, шу пайт Верейский дабдурустдан Кирила Петровичдан бу иморат нега куйган? Сизникими?.. деб сўраб колди. Кирила Петрович қовоғини солди; ёниб кетган қўргон туфайли қўзғаладиган хотиралар унга ёқмас эди. Бу жойлар ҳозир меники, илгари Дубровскийга қарапди, деб жавоб қилди.

– Дубровскийга? – деб такрорлади Верейский, – ўша машхур қароқчигами?

– Отасига, – деди Троекуров, – отаси ҳам ўлгудек қароқчи эди.

– Бизнинг Ринальдо¹ қаерда экан? – У тирикми ёки қўлга тушганими?

– Тирик ҳам, озод ҳам, бизнинг полициячилар билан ўғрилар ўртасида тил бирлиги давом этадиган бўлса, уни тутиб бўлмайди; айтганча, князъ, Дубровский сенинг Арбатовангда ҳам бўлди, шекилли?

– Ҳа, ўтган йили у алланарсага ё ўт қўйибми, талабми кетганди, шекилли... Нима дейсиз, Марья Кириловна, шу романтик қаҳрамон билан яқиндан танишилса жуда қизик бўларди-да, а?

– Нимаси қизик бўларди? – деди Троекуров. – Бу йигит билан таниш, у бунга уч хафта мусикадан дарс берди, Худога шукрки, дарслари учун хеч нарса олмади. – Шундан кейин Кирила Петрович ўз ховлисида яшаган француз муаллимини таърифлаб кетди. Марья Кириловна бетоқат ўтиради. Верейский эса эътибор билан қулоқ солди, бу нарсалар унга жуда ғалати қўриниб, гапни бошқа ёққа бурди. Қайтиб келгандаридан сўнг дархол аравасини қўшишга буюрди-да, Кирила Петровичнинг ётиб қол, деб айтганига ҳам қулоқ солмай, чойдан кейиноқ жўнаб кетди. Аммо кетмасидан аввал, Кирила Петровични қизи билан бирга меҳмонга таклиф қилди ва мағрур Троекуров ҳам розилик берди, чунки у князлик даражасига, икки юлдуз нишонига, ота-бобосидан қолган уч минг жони бор мулкка эга князъ Верейскийни ўзига тенг, деб ҳурмат қиласиди.

Орадан икки кун ўтгач, Кирила Петрович қизи билан Верейскийнинг қўргонига меҳмонга борди. Арбатовага яқинлашганида, у дехқонларнинг озода ва қўркам кулбаларига, князнинг инглиз саройларига монанд солинган катта гиштин иморатига қизиқиб қаради. Иморат олдида серўт қўм-қўк ялов ётар, у ерда швейцария сигирлари қўнгироқларини жиринглатиб ўтлаб юради. Иморатнинг тўрт то-

¹ Ринальдо – афсонавий бир йўлбарс, кўплаб асарларнинг қаҳрамони.

мони кенг боф эди. Мезбон ўз меҳмонларини эшик олдида кутиб олди ва ёш гўзалнинг кўлидан ушлаган холда зинадан олиб чиқди. Улар ажойиб бир меҳмонхонага киришди, у ерда уч киши учун дастурхон ҳозирланган эди. Князъ меҳмонларни дераза ёнига олиб борди ва уларнинг кўз олдиларида ажойиб бир манзара очилди. Деразадан яrim чақирим узоқликда Волга дарёси оқиб ётар, унда таранг елканли юқ ортилган кемалар сузиб юрар, азобижон деб жуда маъноли ном берилигтан балиқчи қайиқлари онда-сонда кўриниб қолар эди. Дарёнинг у юзида адирлар ва далалар чўзилиб кетган, теварак атрофни бир неча қишлоқ жонлантириб туради. Кейин улар князънинг хориж давлатлардан сотиб олган бир қанча суратларини томоша қилишди. Князъ Марья Кириловнага бу суратларнинг мазмунини ва рассомларнинг тарихини айтиб бериб, фазилатлари ва камчиликларини англатди. У суратлар ҳақида сўзлар экан, эзма билимдонларнинг қуруқ тилларида гапирмасдан, туйғу ва завқ билан сўзларди. Марья Кириловна унинг гапларини мамнунлик билан тинглади. Дастурхонга ўтилди. Троекуров бу меҳмондўст мезбоннинг шароби ва ошпазининг ҳунарига қойил қолди, Марья Кириловна эса умрида иккинчи марта кўрган бу одам билан ҳечам ўнғайсизланмай баҳузур гаплашаверди.

Тушлиқдан кейин уй эгаси меҳмонларни боққа таклиф қилди. Улар ўртасида ороллари кўп, кенг бир кўл бўйидаги шийпончада ўтириб қаҳва ичишди. Шу пайт бирданига мусиқа овози эшитилди-ю, олти эшкакли бир қайиқ шийпонча олдига келиб тўхтади. Улар қайиқка тушиб кўлда сайр этишди, оролларнинг ёнларидан ўтишди, уларнинг баъзиларига тушиб томоша қилишди; бирида мармардан ясалган одам ҳайкали, бирида хилват бир ўнгир; яна бирида сирли ёзувлари бўлган бир ҳайкални кўришди, бу сирли ёзувлар Марья Кириловнада ёш қизларга хос бир қизиқиши хиссини кўзғатди-ю, бироқ князънинг қасдан айтмаганлиги ортида у хис тугал қаноатланмади. Шу билан кун ҳам тезда ўтиб, оқшом туша бошлади. Князъ ҳавонинг совуқлигини ва шабнамни баҳона қилиб, уйга қайтишга шошилди; чунки уйда самовар қайнаган эди. Князъ Марья Кириловнадан кекса бўйдоқнинг уйида бекалик қилишни сўради. Қиз илтимосни қабул қилиб, бу севимли маҳмадонанинг битмас-туганмас ҳикояларини тинглаб, чой куйиб бериб ўтирди. Шу чоғ бирданига ўқ овози эшитилиб, мушакнинг шульласи кўкни ёритди. Князъ Марья Кириловнанинг елкасига шол рўмол ташлаб, уни ва Троекуровни айвонга таклиф қилди. Уйнинг олдида, тим қоронғилик ичida турли рангдаги оловлар туташиб гир-гир айланар, бошоқ, хурмо дарахти, фонтан сингари осмонга кўтарилар,

сўнгра ёмғир ва юлдузлардек ерга тўқилиб бир нафас сўнар, шундан кейин яна авж оларди. Марья Кириловна, худди ёш боладек севинар эди. Буни кўрган князь Верейский қувонар, Троекуров эса князнинг бу чиқимларини ўзига кўрсатилган хурмат ҳамда ўзига ёкиш истагининг нишонаси, деб ундан жуда хурсанд бўлди.

Кечки емак ҳам кундузгисидан қолишмайдиган бўлди. Меҳмонлар ўзларига аталган хоналарга кириб кетишиди, эрталаб ёқимли мезбон билан хайрлашилар экан, тез фурсадта яна қўришишга бир-бирларига ваъда бердилар.

XIV Б О Б

Марья Кириловна ўз уйида, очик дераза олдида, гардишга солиб кашта тикиб ўтиради. У муҳаббат кўйида қизил гулни зангор ипак билан тиккан Конраднинг паришин мавъшуқаси каби ипакларни чалкаштирмас эди. Унинг чеварлик билан игна тутиши орқасида асл нусханинг нақшлари тўрга бехато кўчирилар, шундай бўлса-да, кизнинг хаёли каштада эмас, аллақаёкларда кезар эди.

Бирдан деразадан бир кўл чўзилиб, гардишга аллақандай мактубни кўйди ва Марья Кириловна эс-хушини йиғиб олгунича кўздан ғойиб бўлди. Шу вақтда хизматкор кириб, Кирила Петрович чакираётганини айтди. Қиз қалтираб туриб мактубни дуррасининг остига яширди-да, шошиб отасининг хонасига чиқди.

Кирила Петрович ёлғиз ўзи эмасди. Унинг ёнида князь Верейский ўтиради. Марья Кириловна кириши ҳамон князь ўрнидан турди ва ўзида ҳозирга қадар кўринмаган бесаранжомлик билан индамасдан кизга таъзим қилди.

– Яқинроқ кел, Маша, – деди отаси. – Сенга бир янги гап айтаман, ўйлайманки, хурсанд бўласан. Мана бу киши сенинг куёвинг бўлади, князь сенга ўйланмоқчи.

Қиз қотиб қолди, юзи мурдадек оқарди, аммо чурк этмади. Князь яқинроқ келиб, кизнинг қўлидан тутди ва ҳаяжонланган бўлиб, мени баҳтли қилишга розимисиз, деб сўради. Маша индамади.

– Рози, албатта рози, – деди Кирила Петрович. – Ўзинг биласан, князь, қизлар бундай сўзни тилга ололмайди. Хўш, фарзандларим, баҳтли бўлинглар.

Маша қимир этмасди, кекса князь келиб унинг қўлидан ўпган эди, кизнинг рангсиз юзидан бирданига кўз ёшлари оқди. Князь хўмрайгандек бўлди.

— Ана холос, ана холос, — деди Кирила Петрович. — Бор, кўз ёшигни артиб, қувноқ бўлиб кел! — Сўнгра Верейскийга деди, — бундай пайтда қизлар доим йиглайди, бу уларга одат бўлиб қолган... Қани энди князь, иш ҳақида, яъни, сеп борасида гаплашиб олсак.

Марья Кириловна чиқиб кетиш имкониятидан дарров фойдаланди, юрганича хонасига кирди, эшикни ичкаридан беркитиб олди-да, ўзини кекса князнинг рафиқаси деб тасаввур қилиб, йифига зўр берди; князь бирданига унга жирканч ва хунук бўлиб кўринди... Бу никоҳ қизни, худди дор ва қабрдек кўрқитди... У ғазабига чидай олмасдан ўз-ўзига: «Йўқ, йўқ, бўлмайди! Ўлганим, ибодатгоҳга кирганим, Дубровскийга текканим яхшироқ» дерди. Шу топда унинг ёдига бояги мактуб тушди, у мактуб Дубровскийдан эканини сезгандек, ҳовлиқиб очди-да, шоша-пиша ўқий бошлади. Дарҳақиқат, мактуб Дубровскийдан бўлиб, куйидаги сўзлардан иборат эди:

«Кечқурун соат ўнда аввалги жойда кўришсак».

XV Б О Б

Осада июль кечаси, ойдин, гоҳ-гоҳ ёқимли шабада эсиб, боғда енгил бир шитирлаш кезади.

Гўзал ёш қиз учрашув белгиланган жойга қушдек учиб келди. Хеч ким кўринмади, шунда кутилмаганда шийпонча орқасидан Дубровский чиқиб, қизнинг рўпарасида пайдо бўлди.

— Мен ҳаммасидан хабардорман, — деди у секин ва қайгули овоз билан. — Берган ваъдангизни эсланг.

— Сиз менга ўз химоянгизни таклиф қиляпсиз, — деди қиз. — Лекин хафа бўлманг: мен бундан кўрқаман. Қандай қилиб, сиз менга ёрдам берса оласиз?

— Сизни ўша ёмон кўрган кишинингиздан қутқара оламан.

— Худо ҳаки, сиз унга тега кўрманг, агар мени севсангиз, унга сира яқинлашманг; мен бирор даҳшатли воқеанинг гуноҳкори бўлишни истамайман...

— Мен унга тегмайман, сизнинг истагингиз мен учун муқаддас, у ўз хаёти учун сизга миннатдор бўлиши керак. Сизни деб, хеч қачон бирон ёвузлик қилмайман. Мен жиноят қилганимда ҳам сиз пок бўлишингиз лозим. Хўш, сизни бу золим отанинг кўлидан қандай қутқарсан бўлади?

— Ҳали умид бор. Кўз ёшларим ва доду фифоним билан унга таъсир қила оларман, деб ўйлайман. У ўжар одам, аммо мени яхши кўради.

– Беҳуда умид боғламанг: у сизнинг кўз ёшларингизни севиб эмас, керакли бир манфаат юзасидан эрга тегувчи барча ёш қизларга хос оддий кўркоқлик ва нафрат деб ўйлади. Борди-ю, хоҳишингизга қарамай, сизни баҳтли қилишни ўз зиммасига олса, тақдирингизни кекса бир кишининг қўлига топшириш учун зўрлик билан никоҳ қилгани олиб борса...

– Унда, унда ҳеч қандай чора қолмайди, мени олиб кетгани келинг, мен сизнинг рафиқангиз бўлишга тайёрман.

Дубровский титраб кетди, унинг оппоқ юзи қизарди ва шу ондаёқ ранги аввалгидан баттар оқарди. У бошини куйи солиб анчагача жим қолди.

– Ўзингизни дадил тутинг, отангизга ёлворинг, унинг оёқларига йиқилинг, келажакнинг бутун даҳшатини, нимжон ва фосиқ бир чолнинг қучогида гулдек сўлишингизни кўз олдига келтиринг. Қаттиқ тегадиган гаплардан ҳам тортинманг: агар ўша ўжарлигида турা берса, ўзингизга... даҳшатли бир ҳимоячи топа олишингизни айтинг... Бойлик сизга бир он ҳам баҳт келтирмаслигини, зеб-зийнат фақат камбағал бечорани қизиқтира олишини айтинг. Бўш келманг, унинг ғазабидан, дўйк-пўписаларидан кўрқманг, умиднинг қуруқ бир кўланкаси қолганда ҳам, Худо ҳаки, бўш келманг. Бошқа ҳеч бир чора қолмаса, у ҳолда...

Шу топда Дубровский қўли билан юзини тўсди, унинг нафаси бўғилаётгандек эди, Маша эса йиғларди...

– Ох, менинг шўрлик, шўрлик тақдирим! – деди у аччик бир оҳ тортиб. – Сиз учун жонимни берардим, сизни узоқдан кўриш, қўлингизни ушлаш мен учун бир ҳузур эди. Энди сизни ҳаяжонланаётган қалбимга босиб: эй фариштам, ўлсак бирга ўрайлик дейишга имкон бўлганда, мен шўрлик бу ҳузур-ҳаловатдан ўзимни тортишга, уни бутун куч-куватим билан ўзимдан нари суришга мажбурман... Сизнинг оёғингизга йиқилишга ва арзимас бир кишига нолойиқ берилган катта ноз-неъмат учун Худога шукр қилишга менда журъат йўқ. О, мен ўша одамдан накадар нафратланишим керак... Бироқ сезиб турибманки, хозир менинг кўнглимда нафрат билан қарашга жой йўқ.

У қизнинг келишган қаддини оҳистагина қучоқлади ва секингина ўз бағрига тортди. Қиз ҳам бошини ёш қароқчининг елкасига ишонч билан қўйди. Иккови ҳам жим қолишиди.

Вақт эса ўтиб борарди. Ниҳоят, Маша «хайрлашайлик» деди.

Дубровский уйқудан уйғонгандек бўлди. У қизнинг қўлини ушлаб, жимжилогига узук тақиб қўйди.

— Агар ёрдамим керак бўлса, — деди у, — узукни олиб келиб, мана шу дарахтнинг кавагига қўйсангиз бўлди, у ёгини ўзим биламан.

Дубровский қизнинг қўлидан ўпди-да, дарахтлар орасида гойиб бўлди.

XVI Б О Б

Князь Верейскийнинг уйланиши энди қўни-қўшнилар учун сир эмасди. Кирила Петровични ҳар томондан қутлашар, тўй ҳозирликлари кўрилар эди. Маша узил-кесил айтадиган сўзини тобора орқага суарди. Лекин кекса күёвга совуқ ва ўлганининг кунидан муомала қилас, князь бунга парво қилас, қизнинг индамаслигини розилик аломати деб билиб, шунга қаноатланар ва муҳаббат ҳақида, умуман ташвиши тортмас эди.

Аммо вақт ўтиб борарди. Ниҳоят, Маша ҳаракат қилишга жазм этди-да, князь Верейскийга мактуб ёзди; у князнинг кўнглидаги олижаноблик туйгусини кўзгатмоқчи бўлди, унда кўнгли йўклигини очик айтди, менинг баҳримдан ўтсангиз, отамнинг зўрлашидан мени ҳимоя килсангиз, деб ёлворди. Кейин мактубни секингина князга берди, князь мактубни хилватда ўқиб кўриб, қаллигининг бу ошкора гапларидан сира ҳам таъсирланмади. Аксинча, тўйни тезлатиш кераклигини ўйлаб, мактубни бўлғуси қайнотасига кўрсатишни лозим топди.

Кирила Петровичнинг жони чиқиб кетди; лекин мактубнинг мазмунидан хабардор эканини қизига билдирамасликка, князь уни базур кўндириди. Кирила Петрович мактуб ҳақида қизига индамасликка ваъда бериб, вақтни ўтказмаслик учун индинга тўйни тайин этди. Князь буни жуда маъқул топди-да, бу ердан чиқиб тўғри қаллигининг олдига кирди, ҳалиги мактубни ўқиб кайғурганини, лекин ҳар ҳолда, бир кунмас-бир кун муҳаббатини қозона олишга умиди борлигини, қиздан ажralиб қолиш ўзи учун ўлим каби оғир эканини, аммо ўз ўлимига рози бўлиш қўлидан келмаганини айтди. Шундан кейин хурмат билан қизнинг қўлидан ўпди-да, Кирила Петровичнинг индинга тўй деганини қизга айтмасдан, ўз кўргонига қайтиб кетди.

У ҳовлидан кўчага чиқар-чиқмас, қизнинг ёнига отаси келди ва унга индинга тўйга тайёр бўлишини буюрди. Князь Верейскийнинг сўзларидан ташвишда қолган Марья кўз ёшига зўр берди ва отасининг оёқларига йиқилди.

— Отажон! — деб қичқирди ачинарли овоз билан. — Отажон, мени жувонмарг қилманг. Мен князни севмайман, унга турмушга чикишни истамайман...

– Бу нимаси тагин! – деди Кирила Петрович дўқ қилиб. – Шу пайтгача индамай келдинг, ўзинг рози эдинг, энди фишт қолипдан кўчганидан кейин хархаша қилишга ва бўйин товлашга тушибсан-да. Тентакликни қўй, бу билан сен мендан илтифот кўролмайсан.

– Жувонмарг қилманг! – деб тақорлади бечора Маша. – Нега мени ўзингиздан узоклаштириб, севмаган кишига узатяпсиз? Ё мен жонингизга тегдимми, мен аввалгидек уйда қолмоқчиман. Отажон, мен бўлмасам сиз сиқилиб қоласиз, менинг бахтсиз эканимни ўйласангиз, яна баттар сиқиласиз, отажон, мени зўрлаб берманг, мен эрга тегишини истамайман...

Бу сўзлар Кирила Петровичга таъсир қилди, лекин у ўзининг хижолат тортганини яширди ва қизини туртиб, жаҳл билан деди:

– Бекор гаплар, билиб қўй. Сени баҳтли қилиш учун нима кераклигини, мен сендан кўра яхшироқ биламан. Кўз ёшларингдан фойда йўқ, индинга тўй.

– Индинга, – деб қичкирди Маша. – Э, Худойим! Йўқ, йўқ, бўлиши мумкин эмас, бу бўлмағур иш. Отажон, агар сиз мени жувонмарг қилишга қасд қилган бўлсангиз, энди менинг гапимни ҳам эшиting: мен шундай ҳимоячини топаманки, у сизнинг хаёлингизга келмаган, кўрасиз, кўрқиб кетасиз, мени сиз шу даражага олиб келдингиз.

– Нима? Нима? – деди Троекуров. – Дўқ! Менга дўқ, ха, беҳаё қиз! Биласанми, мен, бошингга шундай кунларни соламанки, хаёлингга ҳам келтиrolмайсан. Сен мени ҳимоячинг билан кўркитмоқчимисан. Кўрамиз, ким экан, сенинг ҳимоячинг?

– Владимир Дубровский, – деб жавоб берди Маша жаҳл устида.

Кирила Петрович, қизни жинни бўлган деб ўйлаб, унга ҳайрат билан қаради.

– Хўп, – деди у бир оз жим тургандан сўнг. – Кимни хоҳласанг, шуни ҳимояга чақирапсан, аммо ҳозирча шу уйда ўтириб тур, то тўйгача бу ердан ҳеч қаёққа чиқмайсан. – Шуларни айтгач, Кирила Петрович хонадан чиқиб кетди-да, эшикни ташқаридан беркитиб қўйди.

Бечора қиз бошига тушадиган кунларни ўйлаб, узоқ йиғлади, лекин бу қизгин тушунтиришлар унинг кўнглини анча бўшатди: энди у ўз тақдири ва бундан сўнг нималар қилиш кераклигини бемалол ўйлаши мумкин. Унинг учун муҳим иш: ўзи ёмон кўрган никоҳдан кутулиш эди; ҳозирланган қисматдан кўра қароқчига ёр бўлиш, унга жаннатдек туюларди. Қиз Дубровский берган узукка қаради. Маша у билан ёлгиз учрашиб, бу ҳал килувчи дамлар олдида яна бир бор узоқ гаплашиб олишни зўр иштиёқ билан истарди. Кечқурун Дубровскийни боғдаги

шийпонча яқинидан топишини күнгли айтиб турар, шунинг учун ҳам қоронғи тушар-тушмас ўша жойга бориб, уни кутишга аҳд қилди. Қоронғи ҳам тушди. Маша хонадан чиқмоқчи бўлди, бироқ эшик ташқаридан қулфланган эди. Оқсоч хотин ташқаридан Кирила Петрович уни чиқармасликка буюрганини айтди. Қиз хонага қамалганди. Қаттиқ ҳақоратланган Маша деразанинг олдида, кийимларини ҳам ечмасдан, қоронғи осмонга тикилганича, алламаҳалгача қимир этмасдан ўтирди. Тонг отар пайтида кўзи уйқуга кетди, унинг қисқа уйқуси ёмон тушлар билан безовта бўлди ва чиқаётган қуёшнинг илк нурлари уни уйқудан уйготиб юборди.

XVII Б О Б

Қиз уйқудан уйғониши билан, аввало аҳволи жуда даҳшатли эканини тасаввур қилди. Қиз кўнғироқ чалди, чўри қиз кириб унинг саволларига, Кирила Петрович кеча кечқурун Арбатовага кетиб эди, у ёқдан жуда кеч қайтди ва қизни хонадан чиқарманлар, у билан ҳеч ким гаплашмасин, деб қатъий буйруқ берди; тўйга унча катта ҳозирлик бўлмаса ҳам, руҳонийга ҳеч қандай баҳона билан қишлоқдан жилмасликка буйруқ берилди, деб жавоб қилди. Шуларни айтгач, чўри қиз Марья Кириловнанинг олдидан чиқиб кетди ва эшикни қулфлаб қўйди.

Унинг сўзлари бу ёш тутқинни қаттиқ ғазаблантириди, миясида турли фикрлар қайнади, қони тўлқинланди, воқеани Дубровскийга билдирамоқчи бўлиб узукни келишилган дараҳтнинг кавагига қўйдириш учун тадбир ўйлай бошлади; шу пайтда ўзи ўтирган уйнинг деразасига кичкина бир тош келиб тегди, ойна чирсиллаб кетди. Марья Кириловна ҳовлига қараб, кичкина Сашанинг унга сирли имолар қилаётганини кўрди. Қиз бу боланинг ўзини яхши кўришини биларди, шунинг учун хурсанд бўлди ва деразани очди.

– Салом Саша, – деди у. – Мени нега чақирияпсан?

– Опажон, менга бирор ишингиз йўқми, деб келган эдим. Отамнинг жаҳли чиқиб ҳеч кимни сиз билан гаплаштиrmай қўйди, қандай юмушингиз бўлса менга айтаверинг, ёрдам қиласман.

– Раҳмат, укажоним Сашенка, менга қара: шийпонча олдидаги каваги бор кекса эман дараҳтини биласанми?

– Биламан, опажон.

– Агар мени яхши кўрсанг, ғизиллаб бориб, ўша дараҳтнинг кавагига мана шу узукни қўйиб кел, лекин эҳтиёт бўл, ҳеч ким кўрмасин.

Шу сўзларни айтгач, у узукни болага ташлади-да, деразани ёпди.

Бола узукни олиб, жон-жаҳди билан югуриб кетди ва уч дақиқа ичида кекса эман дарахтнинг олдига етиб борди. У шу ерда тўхтади, халлослаб туриб теварак атрофга қаради, узукни кавакнинг ичига қўйди. Ишини эсон-омон битириб, энди бу ҳақда тез Марья Кириловнага хабар бермоқчи эди, бирданига шийпончанинг ортидан сап-сариқ ва ғилай, жулдур кийим кийган бир бола чиқиб келди-да, ўзини тўғри дарахтга урди ва кавакка қўлини тиқди. Саша олмахондан ҳам тезроқ харакат билан болага қараб югурди ва икки қўллаб маҳкам тутди.

- Нима қиляпсан бу ерда? – деди у, ўшқириб.
- Нима ишинг бор? – деб жавоб берди бола, унинг қўлидан чиқишига уриниб.
- Узукка тегма, сариқ қуён, – деди Саша, – бўлмаса таъзиiringни бераман!

Бола жавоб бермасдан Сашанинг юзига мушт солди, Саша болани қўйиб юбормай, товушининг борича: «Ўғри келди, ўғри келди, бу ёққа, бу ёққа...» деб қичкирди.

Бола унинг қўлидан чиқиб кетишига уринди. У афтидан Сашага қараганда икки ёшлар чамаси катта ва кучлироқ эди, лекин Саша ундан кўра эпчиллик килди. Улар бир неча дақиқа олишишди. Нихоят, сариқ бола Сашадан зўр келди. У Сашани ерга ағдарди-да, бўғзига чанг солди.

Худди шу вақт боланинг сариқ ва қаттиқ соchlарига кучли бир қўл келиб ёпишди, уни боғбон Степан ердан яrim газча юқори қўтарди...

- Эй, сариқ алвости, – деди боғбон. – Ҳали сен кичкина боённи урадиган бўлиб колдингми...

Саша ўрнидан ирғиб турди-да, ўзини ўнглаб олди.

– Сен менинг қўлтиғимдан олдинг-да, – деди у. – Бўлмаса ҳеч қачон йикитолмас эдинг. Узукни бу ёққа бер, йўқол бу ердан.

– Ундей эмас! – деб жавоб берди сариқ бола, бирдан бурилиб сочини Степаннинг қўлидан бўшатиб олди ва зингиллаб қоча бошлади, Саша етиб бориб елкасидан итариб юборди, бола ортига тисарилиб йикилди. Боғбон уни яна ушлаб олди-да, белбоғ билан маҳкам боғлади.

- Узукни бер! – деб қичкирди Саша.
- Шошма, бойвачча, – деди Степан. – Биз буни гумаштага топширамиз, у жазосини беради.

Боғбон тутқинни боённинг қўргонига олиб кетди, ўзининг йиртигани ва майсада кўкарган шимига ташвиш билан қарай-қарай, уларнинг ёнида Саша бораради. Бирдан улар отхонага бораётган Кирила Петровичнинг олдидан чиқиб қолишиди.

– Нима гап? – деб сўради у Степандан.

Степан воқеани қисқача сўзлаб берди. Кирила Петрович унинг сўзларини дикқат билан эшилди.

– Ҳой, саёк! – деди у Сашага қараб. – Нима ишинг бор, у билан?

– Кавакдан узук ўғирлади бу, отажон, айтинг қайтариб берсин.

– Қанақа узук, қайси кавакдан?

– Ҳалиги, менга Марья Кириловна... ҳалиги... узук...

Саша хижолат тортиб, пойма-пой гапира бошлади. Кирила Петрович қовоғини солди, сўнгра бошини чайқаб туриб деди:

– Бу ишга Марья Кириловна аралашганми? Воқеани айтиб бер, бўлмаса шундай калтаклайманки, эсинг тескари бўлиб кетади.

– Худо урсин, отажон, мен отажон... Марья Кириловна менга хеч нарса дегани йўқ, отажон.

– Степан, қайнин дарахтидан битта яхши, қирчиллама хивич кесиб кел.

– Шошманг отажон, мен сизга ҳаммасини айтиб бераман. Мен бугун ҳовлида ўйнаб юрувдим. Опам Марья деразани очиб қолди. Мен олдиларига югуриб бордим, ундан кейин опам билмасдан қўлидаги узукни ерга тушириб юборди, мен уни кавакка яшириб қўйгандим... мана бу малла бола узукни ўғирламоқчи бўлди.

– Ўзи билмасдан тушириб юборганмиш-у, сен яшириб қўйган эмишсан... Степан, хивичга югур.

– Отажон, шошмай туринг, ҳаммасини айтиб бераман. Опам Марья менга узукни бериб, кавакка қўйиб кел, деб айтди, мен обориб кавакка қўйдим. Ундан кейин, манави ярамас бола...

Кирила Петрович ярамас болага қараб, пўписа билан:

– Сен кимсан? – деб сўради.

– Мен жаноб Дубровскийнинг хизматкориман, – деди сариқ бола.

Кирила Петрович хўмрайди.

– Демак, сен мени хўжайнин деб тан олмас экансан-да, яхши, – деди у. – Менинг богимда нима қилиб юрувдинг?

– Маймунжон ўғирлагани тушувдим, – деди бола бепарволик билан.

– Дуруст, – деди Кирила Петрович, – хизматкори ҳам хўжайнинга ўхшабди, богимда маймунжон эман дарахтида ўsar эканми?

Бола жавоб бермади.

– Отажон айтинг, узукни берсин, – деди Саша.

– Сен жим тур, Александр, – деб жавоб қилди Кирила Петрович. – Эсингда бўлсин, мен сен билан ҳали гаплашаман. Бор, хонангга кир.

Хўш, сен ғилай, анча зийрак болага ўхшайсан. Узукни бер-да, уйингга кетавер.

Бола бармоқларини ёзиб, қўлида ҳеч нарса йўқлигини кўрсатди.

– Сен менга бўлган гапни айтиб берсанг, сени қалтакламайман, бир мири ёнғоқ пули ҳам бераман. Бўлмаса, қора кунларни бошингта со-ламан. Қани!

Бола индамади ва ўзини тентакликка солиб, бошини эгганича ту-раверди.

– Яхши, – деди Кирила Петрович. – Қамаб кўйинглар, қараб туинглар, қочиб кетгудек бўлса, ҳаммангизнинг терингизни шилиб оламан.

Степан болани қаптархона олиб бориб қамади, қушларга қаровчи кампир Агафъяга қараб туришни буюрди.

– Ҳозир шаҳарга бориб, полиция бошлигини айтиб келинглар, – деди Кирила Петрович, – болани кўзлари билан қузатаркан, – имкон қадар тезроқ боринглар!

«Энди ҳаммаси равшан. Демак, у лаънати Дубровский билан муно-сабатда бўлган. Наҳотки, чиндан ҳам ўшани ёрдамга чақирган бўлса? – деб ўйлади Кирила Петрович хонанинг у бошидан бу бошига бориб ке-лар ва «Зафар гулдироси янгра!» кўшигини ғазаб билан хуштак қилиб ҷаларкан. – Балки, мен унинг изига тушгандирман, энди у биздан қочиб қутулолмайди. Бу фурсатдан фойдаланамиз. Шошма! Кўнғирок овози, ха, Худога шуқр, полиция бошлигининг ўзи келиб қолди».

– Ҳой, ҳалиги тутилган болани олиб чиқ бу ёққа!

Бу орада бир арава ҳовлига кириб келди ва ўзимизга таниш полиция бошлиғи ҳаммаёғини чанг-тупрок босган ҳолда меҳмонхонага кирди.

– Севинчли хабар, – деди унга Кирила Петрович. – Мен Дубров-скийни тутдим.

– Худога шуқр, жаноби олийлари, – деди полициячи севинган бўлиб. – Қани у?

– Яъни, Дубровскийнинг ўзини эмас, унинг тўдасидан бир одамни. Ҳозир уни олиб келишади. Бу ўша йўлтўсарни тутишимизга ёрдам бе-ради. Ана, олиб ҳам келишди.

Баҳайбат бир қароқчини кўраман, деб ўйлаган полициячи анча заиф, ўн уч ёшлар атрофидаги болани кўриб ҳайрон қолди, у ҳеч нарсани ту-шунмагандек Кирила Петровичга қаради, ундан изоҳ қутди. У Марья Кириловна ҳақида оғиз очмай, эрталабки ҳодисани гапириб берди.

Полиция бошлиғи Кирила Петровичнинг сўзларини дикқат билан тингларкан, ҳар лаҳза бола қаарарди, бола эса ўзини тентакликка солиб, гўё атрофида бўлаётган воқеаларга бепарводек эди.

– Рухсат берсангиз, жаноби олийлари, сиз билан хилватда гаплашсам, – деди ниҳоят полициячи.

Кирила Петрович уни бошқа уйга олиб кириб, эшикни беркитди.

Ярим соатдан кейин улар яна меҳмонхонага кириб келишди, у ерда тутқун ўз такдиригининг ҳал қилинишини кутиб туради.

– Ҳой бола, – деди полициячи унга. – Боёнимиз сени шаҳар авахтасига қаматиб, роса қамчилатмоқчи, ундан кейин бадарға қилдириб юбортиromoқчи эди, аммо мен сенинг тарафингни олиб, гуноҳингни сўрадим. – Ечинг қўлларини!

Боланинг қўлларини бўшатиши.

– Боёнга қуллуқ қил, – деди полициячи. Бола Кирила Петровичнинг ёнига бориб, унинг қўлидан ўпди.

– Энди уйингга бор, – деди Кирила Петрович болага. – Аммо бундан кейин дараҳтларнинг кавагидан маймунжон ўгирилаб юрма.

Бола меҳмонхонадан чиққач, севинганидан зинапоядан ўзини ташлади, сўнгра ортига қарамай, далама-дала Кистенёвкага қараб югуриб кетди. У қишлоқка ўтгач, унинг четидаги ярим хароба бир уйнинг олдида тўхтади-да, дарчани чертди. Дарча очилиб, ундан бир кампир кўринди.

– Буви, нон беринг, – деди бола. – Эрталабдан буён ҳеч нарса еганим йўқ, очдан ўлаёздим.

– Ҳа, сенмисан Митя, қаерларда қолиб кетдинг, дайдивой? – деди кампир.

– Кейин айтиб бераман, бувижон. Худонинг йўлига бир бурда нон беринг!

– Уйга кир, ахир.

– Вақтим йўқ, буви яна бир жойга учрайман. Нон беринг, Худонинг йўлига бир бурда нон беринг.

– Ҳа, саёқ ўлгур, – деб ғудурлади кампир. – Ма, мана бир бурдагина. – Ва бир бурда кора нон узатди. Бола нонни тишлаб, кавшанганича йўлга тушди.

Қоронғи туша бошлади. Митя ғалла қуритиладиган бинолар ҳамда полизлардан ўтиб, Кистенёвка ўрмонига кириб борди. Ўрмоннинг илгор пойлокчилари бўлиб, ҳамма дараҳтлардан олдинда турган кўшқарағай ёнига етгач тўхтади, у ёқ-бу ёққа синчилаб қараб қўйди, қаттиқ ва узиб-узиб ҳуштак чалди, сўнгра тинглади, унга жавобан се-кин ҳамда чўзиқ ҳуштак овози эшитилди-да, ўрмон ичидан аллаким чиқиб болага яқинлашиди.

XVIII Б О Б

Кирила Петрович хуштагини одатдагидан кўра қаттиқроқ чалиб, қўшиғини куйлаган ҳолда, меҳмонхонанинг у бошидан бу бошига бориб келарди. Бутун хонадон харакатда – хизматкорлар у ёқдан-бу ёққа югуришар, оқсоч қизлар ивирсиб юришар, саройда извошлилар арава кўшар, ҳовли саҳнига одамлар тўплантган эди. Қизининг пардозхонасидаги кўзгунинг олдида оқсоч аёллар ўраб олган пардозчи хотин, ранги ўчган ва ҳайкалдек тош қотган Марья Кириловнани ясантирап эди, унинг бош бриллиантлар оғирли остида толиқиб энгашган, пардозчи аёл эҳтиётсизлик билан игна саншиб олса, у енгилгина бир силкиниб олар, лекин кўзгуга бепарво қарагани ҳолда, дамини чиқармас эди.

Эшик олдидан Кирила Петровичнинг:

- Тезроқ бўласизларми? – деган овози эшитилди.
- Мана, хозир, – деб жавоб қилди пардозчи аёл. – Марья Кириловна ўрнингиздан туриб бир қаранг-чи, чиройли чиқдимикан?

Марья Кириловна ўрнидан турди, ҳеч нарса демади. Эшик очилди.

- Келин тайёр, – деди пардозчи аёл Кирила Петровичга, – буюринг, извошга чиқишин.

– Худога шукр, – деб Кирила Петрович столдан бутни олди, меҳри товланиб. – Бери кел, Маша, мен сендан розиман... – Бечора қиз отасининг оёғига йиқилди ва хўнграб ыйғлади.

- Отажон... отажон, – деди кўз ёшлари шашқатор бўлиб, бироқ унинг овози бўғилиб қолди.

Кирила Петрович шошиб фотиха берди, қизни турғизиши-да, оёғини ерга тегизмай олиб чиқишиди. Унинг ёнига вакил онаси билан оқсоч аёллардан бири ўтириди. Улар черковга қараб жўнашди. У ерда уларни куёв кутиб турарди. Куёв келинчакни қарши олгани чиқди, қизнинг ранги ўчган, ўзи аллақандай кўринарди, бунга куёв ҳайрон бўлди. Кўёв билан келин бўш ва совуқ черковга киришди; улар киргандаридан кейин черков эшигини ёпиб кўйишиди. Рухоний меҳробдан чиқиб, дарҳол никоҳ ўқишига киришди. Марья Кириловна ҳеч нарсани кўрмас, ҳеч нимани эшиитмас, фақат биргина нарсани ўйлар эди. Қиз эрталабдан бери Дубровскийни кутар, бир нафас ҳам ундан умидини узмасди, рухоний унга одатдаги саволни берганида, бир сесканиб тушди-да, жим қолди, у ҳали ҳам жавоб қилмаган, истаганини кутар эди; рухоний қизнинг жавоб беришини кутмасдан, эр-хотинни умрбод бир-бирига боғловчи хутбани ўқиб юборди.

Никоҳ маросими тамом бўлди. Қиз илтифотсиз куёвнинг совук ўпичларини сезди, ҳозир бўлғанларнинг хурсандлик билан қутлашларини эшилди, шунда ҳам у, ўз ҳаётига умрбод киshan солинганига, Дубровский уни қутқариб олиш учун етиб келмаслигига ҳамон ишонмасди. Князъ ёқимли сўзлар билан унга юзланди, аммо қиз у сўзларга тушунмади, черковдан чиқиши, эшик олдига Покровское дехқонлари тўпланган эди. Қизнинг нигоҳи уларга бирров тушгач, яна бояги хиссизлигича қолди. Куёв-келин бирга извошга ўтириши-да, Арбатовага қараб кетиши; уларни қарши олиш учун Кирила Петрович ҳам у ерга кетганди. Ёш қаллифи билан ёлғиз қолган князъ қизнинг совук қарашига эътибор қилмади. У қалбаки ширин сўзлар ва бемаъни ҳазиллар билан қизнинг асабига тегмади, унинг сўзлари содда бўлиб, жавоб берилиши ҳам кепрак эмасди. Шу тарзда улар ўн чакиримча юриши, отлар қишлоқнинг ўйдим-чукур йўлларидан жуда тез чопиб борар, инглиз рессорли извош ҳеч силкинмас эди. Шунда бирданига қувиб келаётганларнинг овозлари эшитилди, арава тўхтади, бир тўда куролланган одамлар уни ўраб олиши, юзининг ярмигача никоб тутган бир киши араванинг ёш хоним ўтирган томондаги эшигини очди-да, унга қараб: «Сиз озодсиз, тушинг» деди. «Бу нима деган гап, – деб қичқириди князъ, – кимсиз?..» «Бу киши Дубровский» деди ёш қаллиқ.

Князъ пинагини бузмасдан чўнтағидан кичик тўппончасини олдида, никоб тутган қароқчига қараб отди. Ёш хоним қичқириб юборди ва қўрқанидан иккала қўли билан юзини тўсади. Дубровский елкасидан яралangan эди, қон оқарди. Князъ фурсатни бой бермай, яна бошка тўппонасини олди, бироқ унга иккинчи марта ўқ узишга имкон беришмади, извошнинг нариги эшиги очилиб, бир нечта кучли қўл уни ташқарига судраб тушириди ва тўппончасини қўлидан тортиб олиши. Кейин унинг боши устида пичоқлар ярқиради.

– Унга тегманг! – деб бақириди Дубровский, шундан кейин унинг баджаҳл шериклари ўзларини бир четга олиши.

– Сиз озодсиз, – деб сўзини давом эттириди Дубровский, ранги ўчган ёш хонимга мурожаат қилиб.

– Йўқ, – деди қиз. – Кеч қолдингиз, никоҳ ўқилган, мен князъ Ве-рейскийнинг рафиқасиман.

– Бу нима деганингиз? – деб қичқириди Дубровский жаҳл билан.

– Йўқ, сиз унинг рафиқаси эмассиз: сизни зўрлаб узатишган, сиз ҳеч қачон рози бўлишингиз мумкин эмас...

– Мен рози бўлдим, қасам ичдим, – деди у қатъият билан эътиroz билдириб. – Князъ менинг эrim, одамларингизга айтинг, уни қўйиб

юборишин, мени у билан бирга қолдиринг. Мен сизни алдаганим йўқ. Сўнгги дақиқаларгача кутдим... Лекин, энди мен сизга айтсам, вақт ўтди. Бизни қўйиб юборинг.

Дубровский энди унинг сўзларини эшитмасди, жароҳатнинг оғриғи ва юракнинг қаттиқ ҳаяжонга келиши уни ҳолсизлантирган эди. У гилдиракнинг ёнига йиқилди, шериклари уни ўраб олишди. У шерикларига бир неча оғиз сўз айта олди, холос, қароқчилар уни отга миндиришди, иккитаси уни ушлаб борди, биттаси отининг жиловидан ушлади, шундай қилиб, ҳаммаси бир томонга қараб кетишли. Извош кўчанинг ўртасида қолди, одамлар боғланган, отлар чиқарилган, бироқ қароқчилар извошдаги бойликка қўл теккизмай, ўз хожаларининг учини олмай, бир томчи ҳам қон тўкмай кетишли.

XIX Б О Б

Қалин ўрмоннинг ўртасидаги торгина ялангликда чоғроқкина бир кўрғон, у тупроқ ва хандақдан иборат бўлиб, унинг ичидаги неча чайла ва ертўла бор эди.

Кўрғон ҳовлисида одам кўп, бу одамларнинг кийимлари турли-туман бўлишига ва ҳаммаси қуролланганига қараб, уларнинг қароқчилар эканини дарҳол англаш мумкин эди; улар ялангбош ўтириб, бир қозондан таом ейишарди. Тупроқ девор устидаги кичкина тўпнинг ёнида чордана қуриб соқчи ўтиради; у моҳир тикувчидек эпчиллик билан игна ушлаган, кийимининг баъзи бир жойларини ямар ва ҳар дам теварак атрофга қараб қўяр эди.

Гарчи бир неча киши бир чўмичдан овқат еса-да, бу тўда ўртасида ажойиб бир осудалик ҳукм сурарди; қароқчилар овқатларни еб бўлиб, бирин-кетин ўринлардан туришди-да, Худога ибодат қилиб, баъзилари чайлаларига, баъзилари ўрмонга кириб кетишли, ё бўлмаса рус одатига кўра ухлагани чўзилиши.

Соқчи ўз ишини тугатиб, кийимини қоқди-да, ямоқни кўздан кечиргач, ингани енгига санчиб қўйди ва тўпга айри миниб, овозининг борича, куйидаги ғамгин қўшиқни айта бошлади:

*Шовуллама жонум, эй, сен кўм-кўк эманзор,
Халал берма менга, ўллайдиган ўйим бор.*

Шу вақт чайлалардан бирининг эшиги очилди ва бўсағада бошига оқ рўмол ўраган, устига озода ва савлатли либос кийган бир кампир кўринди. «Бас қил энди, Стёпка, – деди у аччиғланиб, – боён ухляяп-

ти; нега ҳадеб бақираверасан! На инсофни биласан, на раҳмни!» «Кечир, Егоровна, – деб жавоб берди Стёпа. – Хўп, қўшиқ айтишни бас қиласман, майли бизнинг отахонимиз ором олиб, тезроқ қувватга кирсин».

Кампир кириб кетди, Стёпка бўлса тупроқ девор устида юра бошлиди.

Кампир чикқан чайланинг алоҳида бўлинган жойида, сафар каравотида, ярадор Дубровский ётарди. Олдидаги столда унинг тўппончалари тураг, қиличи эса бош томонида осиглиқ эди. Ертўланинг ери ва деворларига қимматбаҳо гиламлар тўшалган, бурчакда аёлларнинг кумушдан ясалган зийнат тақинчоқлари ҳамда тошойна бор эди. Дубровскийнинг қўлида очиқ бир китоб бўлса ҳам, қўзлари юмилганди. Бўлманинг нариги томонидан қараган кампир, унинг ухлаганини ё бўлмаса хаёл суриб ётганини билолмасди.

Бирдан Дубровский чўчиб тушди: кўрғонда хавфни билдирувчи овозлар эшитилди. Стёпка дарчадан бошини сукиб:

– Отахонимиз Владимир Андреевич, – деб қичқирди. – Одамларимиз ишора беришди, бизни ахтариб келаётганмишлар.

Дубровский ўрнидан иргиб турди-да, тўппончасини қўлига олиб чайладан чиқди. Қароқчилар шовқин-сурон билан ҳовлига тўпланишган эди; уни кўрган замон ҳаммалари жим бўлиб қолишиди. «Ҳамма шу ердами?» деб сўради Дубровский. «Сокчилардан бошқа ҳамма бор» деб жавоб беришди. «Ҳамма ўз жойига борсин!» деб қичқирди Дубровский. Шундан кейин қароқчиларнинг ҳар бири маълум жойга турди. Худди шу пайт учта соқчи юрганича дарвоза олдинга келди, бу ёқдан Дубровский бориб уларни қарши олди. «Нима гап?» деб сўради. «Ўрмонда аскарлар юрибди, – деб жавоб берди улар, – бизни ўрашмоқда». Дубровский дарвозани беркитишга буйруқ бериб, ўзи тўпни кўздан кечиргани кетди. Ўрмон томондан бир неча одамнинг овози келди, одамлар яқинлашмоқда эди, қароқчилар жимгина кутардилар. Бирдан ўрмондан уч-тўртта аскар кўринди-да, ўша заҳотиёқ ўзларини панага олишиди ва осмонга караб ўқ отиб, шерилларига ҳабар беришди. «Жангга тайёр туринглар!» деди Дубровский, бу орада қароқчилар бир гурунглашиб, яна жим бўлиб қолишиди. Сўнгра келаётган аскарларнинг овозлари эшитилди. Дараҳтлар орасидан қуроллар яркираб кўринди, юз элликтача аскар ўрмондан чиқиб, қичкиришиб ўзларини тупроқ кўргонга уришди. Дубровский пилттани тўғрилаб отди: мўлжаллаб отганидан, аскарлардан бирининг калласини учириб кетди, иккитасини ярадор қилди. Аскарлар гангигб қолишиди, лекин офицер

олдинга интилди, қолганлар унинг ортидан хандаққа қараб югуришди; қароқчилар милтиқ ва тўппончалардан ўқ узиб, болталар билан тупрок қўргонни мудофаа қила бошладилар, чунки бу пайтда қаҳр-ғазаби қайнаган аскарлар, хандақ ичида йигирматача ярадор шерикларини қолдириб, тупроқ қўргонга тармаша бошлаган эди. Юзма-юз жанг бошланди, аскарлар тупроқ деворга чиқиб олишди, қароқчилар бўлса чекина бошлашди. Бироқ шу чоқ Дубровский офицерга яқинлашиб, мўлжаллаб туриб қўкрагига ўқ узди, офицер чалқанчасига йиқилди, бир неча аскар уни кўтариб тезгина ўрмонга олиб кетишиди, бошқалар эса қўмондонсиз қолишиди. Дадиллашиб қолган қароқчилар бу парокандалиқдан фойдаланиб, уларни суриб ташлашди ва хандаққа олиб бориб тиқишиди, қамал қылганлар қоча бошлади, қароқчилар эса қийкиришиб уларнинг ортидан кувиб кетишиди. Қароқчилар ғалаба қозонишди. Дубровский душман тумтарақай бўлиб кетгани учун ўз одамларини тўхтатди, сўнgra соқчиларни икки марта қўпайтиришга, ҳамманинг жойидан жилмасликка ва ярадорларни йиғиб олишга буйруқ бериб, ўзи қўргонга кириб кетди.

Дубровскийнинг дадил босқинлари натижасида рўй берган сўнгги ходисалар, хукуматнинг чинакам диққатини жалб этди. Унинг турган жойи ҳақида маълумот тўпланди. Уни ё ўлик, ё тирик қўлга тушириш учун бир неча юз аскар юборилди. Унинг одамларидан бир неча кишини қўлга туширишиди ва сўроқда Дубровскийнинг улар ўртасида бўлмаганини билишди. Бир неча кундан кейин Дубровский ўз одамларини йиғиб, уларни бутунлай ташлаб кетмоқчи эканини айтиб, уларга ҳам ўз турмушларини ўзгартиришга маслаҳат берган. «Қўл остимда бой бўлдингиз, ҳар бирингиз энди хавф-хатарсиз бирон узоқроқ губернага бориб, қолган умрингизни у ерда ҳалол меҳнат билан баҳузур ўтказа оладиган аҳволдасиз. Лекин ҳаммангиз муттаҳамсиз, балки бу касбингизни ташлагани унамассиз». Шу сўзлардан кейин у ёнига ёлғиз отини олиб, улардан ажралди. Унинг қаерга кетганини ҳеч ким билмади. Аввал бу маълумотларга ишонишмади, чунки қароқчиларнинг ўз йўлбошчиларига садоқатли эканликлари маълум эди. Қўлга тушган қароқчилар саркардаларини қутқариб қолиш ҳаракатида, деб ўйлашди. Бироқ бу маълумотлар тўғри чиқди; қўрқинчли ёнгинлар ва талончиликлар барҳам топиб, йўллар хавотирсиз бўлиб қолди. Бошқа гап-сўзларга қараганда, Дубровский хорижга кетган экан.

ҚОРА ХОТИН

*Қора хотин – яширин
бадхөжлик аломатидир
Янги фол китобидан.*

ІБОБ

*Ёмғир ёққан қунларда,
Тез-тез тұпланышарди.
Элликдан юзга ошиб,
Пулларни шошиб-тишиб,
Таваккал тикишарди.
Ютса ҳам,
Ютқизса ҳам
Бүр билан ёзишарди.
Ёмғир ёққан қунларда,
Шундай банд бўлишарди.*

Кунлардан бир куни, отлиқ гвардиячи Нарумовнинг хонадонида қартабозлик бўлди. Қишининг узундан-узоқ кечаси қандай ўтгани сезилмади. Тонгги соат бешда кечки нонуштага ўтиришди. Ўйинда ютганларнинг иштахаси карнай, бошқалар хаёлга чўмид, дастурхонга қўл урмай ўтишарди, аммо шампан виноси пайдо бўлиши ҳамон, сухбат қизиб, ҳамма гапга тушиб кетди.

– Хўш, ҳолинг қалай, Сурин? – сўради хонадон эгаси.

– Ҳар доимгидек, ютқиздим. – Ростини айтсам, омадим йўқ; довни оширмай, ҳовлиқмай, шошмай ўйнайману, нуқул ютқизаман!

– Шундай бўлса-да, бирон марта таваккал қилмадингми? Ҳеч бўлмаганда бир марта қартани кўтара ютишга тикиб кўрмадингми? Пишиқлигингга ҳам ҳайронман-да.

– Германни айтмайсизми, – деди меҳмонлардан бири ёш муҳандисни кўрсатиб. – Умрида қўлига қарта ушламаган, бирон ўйинда қатнашмаган, соат бешгача ўтириб, ўйнимизни томоша қилди-я!

– Қарта ўйинига роса қизиқаман-у, – деди Германн. – Аммо ортиқча ақча ютиб оламан деб, қўлимдаги нон пулидан ҳам айрилиб қолмай дейман-да.

– Герман ҳақиқий олмон: ҳар бир чақанинг ҳисобини оладиган одам! – деб қўйди Томский. – Лекин мени ҳайратда колдириб юрган одам ким десангиз, бу ўзимнинг бувим граф хоним Анна Федотовна.

– Қанақасига? Нималар деяпсиз? – дейишди бирдан меҳмонлар.

– Ўйлаб тагига етолмайман, – деб давом этди Томский. – Нега энди бувим қимор ўйнамас экан!

– Бунинг ҳайрон қоларли жойи йўқ-ку, – деди Нарумов. – Ахир, кампир саксон ёшда-ку!

– Сиз кампир хақида ҳеч нарсани билмас экансиз.

– Тўғри, ҳеч нарса билмайман.

– Ундай бўлса қулоқ солинг. Бувим бундан олтмиш йил илгари Парижга боради ва у ерда таърифи ёйилади. Одамлар la Vénus mascovite – москвалик фариштани кўрамиз, деб тез-тез зиёрат қилиб туришади. Ришелье ҳам унинг орқасидан қолмайди ва бувимнинг айтишига қараганда, унга рўйхуш бермагани сабаб ўзини отиб қўйишига сал қолган экан. У замонларда хонимлар орасида қиморнинг фиръавн, яъни, ўн киши йиғилиб ўйнайдиган тури машҳур эди. Бир куни бувим, киролнинг саройида Орлеан герцогига жуда катта пул ютқизиб қўйибди ва уйга келиб юзига ёпиштирган сунъий холини қўчириб, шиширма лиbosларини ечар экан, бобомга ютқизганини айтиб, қарзни дарров тўлашини буюрибди. Худо раҳмат қилгур бобом, ҳали ҳам эсимда, бувим эшик оғасига қариндош эди. Бобом хотинидан оловдан кўрқандек кўрқарди. Шундай бўлса-да, бундай даҳшатли ютқизиқни эшитиб, бобом ғазабга тўлиб, харажатномаларни вараклаб, олти ой ичида ярим миллион сарф этганларни, Парижда Москва яқинидаги ёки Саратовдаги каби қишлоқлар йўқлигини бувимга тушунтирибди ва бой берилган пулни тўлашдан бош тортиби. Шунда бувим бобомнинг юзига бир тарсаки тортиби-ю, илтифотсизлик аломати сифатида тўшагини бошқа солибди.

Эртасига эрталаб бувим хонаки жазо таъсир қилгандир, деган умидда эрини чақиради, аммо бобомнинг сўзиidan қайтмаганлигини кўради. Бувим илк марта ялиниб-ёлвориб вазиятни тушунтирибди, ётиғи билан далиллар келтириб, уни уялтирмоқчи ҳам бўлибди, қирол билан аравакаш ўртасида фарқ бўлганидек, қарзнинг ҳам қарздан фарқи бор десада, фойдаси бўлмабди. – Қаёқда дейсиз! Бобомнинг ҳам қайсарлиги тутибди: гап тамом, вассалом. Қарзни тўлаш ҳақида гап бўлиши мумкин эмас, деб туриб олибди. Бувим эса чорасиз қолибди.

Бувимга бир оз таниш, хўп яхши бир инсон бор экан. Сиз граф Сен-Жермэн деганни эшитгандирсиз. У ҳақда ажойиб гаплар кўп. Биласизми, у ўзини Боқий Жухудга чиқарганди. Яна ўзини тириклик суви, ҳикматлар тоши ва бошқа гаройиб нарсаларнинг кашфиётчиси тарзида ҳам кўрсатар экан. Унинг устидан бир фирибгардан кулгандек

кулишарди. Казанова ўзининг «Хотиралар»ида уни жосусликда айблаган. Лекин Сен-Жермэн шундай қизик бир зот бўлишига қарамай, тузуккина савлатлик ва жамоат ўртасида жуда ёқимли одам экан. Бувим ҳозиргача уни севади ва ким уни бехурматлик билан тилга олса, қаттиқ ранжиди. Хуллас, бувим Сен-Жермэннинг пулдор одамлигини биларкан. Ундан кўмак сўрамоққа аҳд қилибди. Шунинг учун унга тўрт энлик мактуб йўллаб, тез етиб келишини илтимос қилибди.

Аломат чол дархол етиб келиб, бувимни қайгуга ботган ҳолда учратади. Бувим эрининг ваҳшийлигидан нолиб, ахволини бўрттириди. Кеъин илтифотли жанобнинг дўстлиги ва марҳаматига умид боғлаганини айтади. Сен-Жермэн ўйлаб туриб: «Мен сизга, албатта пул бераман, лекин биламанки, қарзни менга тўламагунингизча тинчланолмайсиз, мен эса сизни яна ташвишга солишини истамайман. Аммо бунинг бошка бир йўли ҳам бор: қайтадан қимор ўйнаб қарздан қутулсангиз бўлади», дебди. «Хурматли граф, – дебди бувим. – Мен сизга, умуман пулимиз йўқлигини айтаяпман, ахир». «Пулнинг кераги йўқ» дебди Сен-Жермэн. – Менинг сўзларимга қулоқ солинг», – деб қария бувимга шундок бир сирни очадики, уни билмоқ учун ҳар биримиз бор мол-мулкимизни сарфлашга рози бўлиб юборардик.

Ёш қиморбозлар энди бутун дикқат-эътиборларини унинг оғзига қаратишиди. Томский чубугини тортди ва керишиб олди-да, сўзида давом этди.

– Ўша куни кечқурун бувим Версалга – қироличанинг қимор кечасига боради. Орлеан герцоги бу довда ўйинбоши экан. Бувим аллақандай бир сабабни важ қилиб, қарзни келтира олмагани учун узр сўраган бўлади ва герцог билан қимор ўйнайди. Бувим учта қартани танлаб олиб, бирин-кетин тика бошлайди. Учта карта ҳам тикилган пулларни ютади, шунда бувим қарздан батамом қутулади.

- Бу тасодиф! – деди меҳмонлардан бири.
- Чўпчак! – деб қўйди Германн.
- Балки, қарталар қалбакидир? – деб гапга кўшилди учинчиси.
- Ундей эмас, – деди Томский жиддий тарзда.
- Ана холос! – деди Нарумов. – Бирйўла учта ютадиган қартани танлашни билган бувинг бор экан, нега сен шу пайтгача унинг сирини ўрганиб олмадинг?
- Ўргатса ўрганасан-да, – деди Томский. – Бувимнинг тўртта ўғли бўлиб, уларнинг биттаси менинг отам эди; тўрттови ҳам учига чиқкан қиморбоз, агар бувим кўллаб юборса уларга, қолаверса, менга ҳам зарар қилмасди, аммо бувим бу сирни бирортасига ҳам айтмаган. Лекин

бир гапни амаким граф Иван Ильич ҳақиқат деб, қасам устида мен-га айтиб берганди. Ҳалиги бутун бошли миллионларини қиморгага бой берип, охири гадо бўлиб ўлган Чаплицкий бор эди-ку, Худо раҳмат қилгур. Ўша ёшлигига бир куни, адашмасам, Зоричга уч юз мингни юткизади ва дунёдан бутунлай умидини узиб қўяди. Ёшларнинг бе-бошлигига нисбатан қаҳри каттиқ бўлган бувим, негадир Чаплицкийга раҳми келади-ю, учта қартани танлаб беради ва бирин-кетин тикишини уқтиради, лекин бундан кейин ҳеч қачон қарта ўйнамасликка қатъий ваъда олади. Чаплицкий ҳалиги пулларни ютиб олган одамнинг олдига боради: ўтириб қарта ўйнашади. Биринчи қартага эллик минг тикиб ютиб олади, кейинги ўйинларда қарзидан ҳам қутулади, яна яканли ҳам бўлиб қолади... Қани энди ухлайлик, вақт ҳам чоракам олти бўлибди.

Ҳақиқатан ҳам тонг отмоқда эди. Йигитлар қадаҳларини бўшатдилар-да, уй-уйларига тарқалдилар.

П Б О Б

– Сиз хонимчалар даврасини афзал
кўрасизми дейман?
– Нимасини айтасиз, улар ёши-да.

Киборлар сұхбатидан.

Кекса граф хоним пардоз хонасида кўзгуга қараб ўтирибди. Атропида уч қиз парвона. Биттасининг қўлида упа-элик шишаси, бирида соч тўғногичлар солингган қутича, яна бири чўғдек қизил тасмалик бош кийимни ушлаб турибди. Граф хоним аллақачонлар адо бўлган ҳуснidan умидини узиб бўлган, аммо ёшлигидаги бутун қиликларини сақлаб келмоқда, етмишинчи йилларнинг удумларию, пардоз-андозига қаттиқ риоя қиласди. Ҳозир ҳам олтмиш йил аввалгидек ҳафсала билан, узоқ кийинади. Дераза токчасида эса, унинг бўйи етган асранди кизи кашта тикиб ўтирибди.

– Салом grand'maman, – деди эшикдан кирган ёш зобит. – Bon jour, mademoiselle Lise. Grand'maman, олдингизга бир илтимос билан келгандим.

– Қандай илтимос экан, Paul?

– Ижозат берсангиз, дўстларимдан бирини сиз билан таништириб, сўнгра жума кунги зиёфатингизга олиб келсам, дегандим.

– Сен уни зиёфатга олиб келавер, кейин мен билан таништиарсан. Кеча *** ларникига бордингми?

– Албатта! Роса кўнгилхушлик қилдик; ўзиям тонгги бешгача ракс тушдик. Елецкая шунаقا ҳам гўзал бўлибдики!

– О, азизим, шу ҳам гўзаллик бўлди-ю! Унинг бувиси Дарья Петровнани ёшлигига кўрганингда эди!.. Айтгандек, князъ рафиқаси роса кексайиб қолгандир-а?

– Қандай қилиб кексаяди? – деди Томский ўйчанлик билан. – Ахир, вафот этганига етти йил бўлди-ку!

Ойимқиз бошини кўтариб, йигитга ишора қилди. Кекса граф хонимга тенгдошларининг вафотларини билдирамасликлари зарурлиги йигитнинг ёдига тушиб, лабини тишлаб қолди. Хайриятки, граф хоним бу янгиликни анчайин бепарволик билан эшидти.

– Вафот этган, – деди у. – Мен буни эшитмаган эканман. Биз иккимиз бир вактлар қироличанинг сарой канизи этиб тайинлангандик. Ўзимизни таништираётганимизда қиролича...

Граф хоним бу хикояни юзинчи марта набирасига гапириб берди.

– Қани, Paul, – деди кекса граф хоним. – Ўрнимдан туришимга ёрдамлашиб юбор, Лизавета тамакидоним қаерда?

Граф хоним пардоз-андозини якунлаш мақсадида, бояги қизлар билан чодир ортига ўтди. Томский ойимқиз билан қолди.

– Ким билан таништирмоқчисиз? – аста сўради Лизавета Ивановна.

– Нарумов билан, сиз уни танийсизми?

– Йўқ! У ҳарбийми ёки гражданларданми?

– Ҳарбий.

– Мухандисми?

– Э, йўқ! Отлик аскар. Нега сиз уни мухандис деб ўйладингиз?

Ойимқиз кулиб юборди ва жавоб қайтармади.

– Paul, – деб қичқирди графиня чодир ортидан. – Менга биронта янги роман бериб юбор, факат барака топгур, ҳозирги романлардан бўлмасин.

– Қанақасидан бўлсин, grand'maman?

– Шундай роман бўлсинки, унинг қаҳрамони ота-онасини асло ранжитмасин, яна сувга чўкиб ўлганлар ҳам бўлмасин. Ғарқ бўлиб қазо қилганлар мени ваҳимага солади.

– Ҳозир унақа романлар йўқ-ку. Рус ёзганига қалайсиз?

– Руслар ҳам роман ёза бошлашибдими? Унда бемалол бериб юборсанг бўлади.

– Grand'maman, афв этинг, шошиб турибман... Афв этинг, Лизавета Ивановна! Нега сиз энди Нарумовни мухандис деб ўйладингиз?

Шундай деб, Томский пардозхонани тарк этди.

Лизавета ёлгиз қолди. Кўлидаги каштасини бир чеккага қўйиб, дебраздан қарай бошлади. Кўп ўтмай, кўчанинг нариги томонида жойлашган кўмурхонанинг орқасидан ёш зобит чиқиб келди. Қизнинг икки юзига қизиллик югурди. Каштасини яна қўлига олиб, бошини қуи солди. Шу пайт хонага кийиниб, ясаниб бўлган граф хоним кириб келди.

– Лизавета чиқиб айтсанг, – деди у, – аравани қўшишсин, сайди килиб келамиз.

Ойимқиз ўрнидан туриб, тикаётган каштасини йигиштира бошлади.

– Нима бўлди, онагинам, гарангмисан! – қичқирди граф хоним. – Айт, аравани тезроқ қўшишсин!

– Ҳозир! – деди қиз секингина ва юрганича даҳлизга чиқди.

Хизматкор келиб, князь Павел Александрович юборган китобларни граф хонимга берди.

– Жуда соз. Унга миннатдорлигимни етказиб қўй, – деди граф хоним. – Лизавета, Лизавета! Қаёқка шошяпсан?!

– Кийиниб олай.

– Кейин кийинасан, шошма, онагинам. Бу ерга ўтири. Биринчи жилдни очгин-да, баланд овоз билан ўқи...

Киз китобни қўлига олиб, биринчи сахифадан бир неча сатр ўқиди.

– Баландроқ ўқисанг-чи! – деди граф хоним. – Сенга бир бало бўлганми, Лизавета! Ё овозинг бўғилиб қолдими?.. Шошма, аввал курсини берироқ сур. Яқинроқ... Ҳа, шундай.

Лизавета Ивановна китобдан яна икки сахифа ўқиди. Граф хоним эснаб қўйди.

– Тўхта, ўқишини бас қил, – деди у. – Ҳаммаси сафсатабозлик. Китобни князь Павелга қайтариб юбор, раҳмат дейишни унтишмасин. Ҳа, айтгандай, извош нима бўлди?

– Извош тайёр, – деди ойимқиз, кўчага бир қараб олгач.

– Нега ҳануз кийинмадинг? – деди кекса граф хоним. – Доим сени кутиш керак! Шу одатинг қолмади-да, онагинам.

Лизавета юрганича хонасига кириб кетди. Орадан икки дақиқа ўтар-ўтмас, граф хоним бор қучи билан қўнғироқ чала бошлади. Уч қиз бир эшиқдан, хизматкор иккинчи эшиқдан кириб келди.

– Нега бир чакирганда келмайсизлар? – деди граф хоним уларга. – Лизаветага айтинг, мен уни кутиб ўтирибман.

Лизавета Ивановна ёпинчиқ ҳамда қалпокча кийганича кириб келди.

– Вой, қизалог-э! – деди граф хоним. – Бунча ясан-тусаннинг нима кераги бор? Кимга ёқмоқчисан? Ҳаво қандай? Шамол бошландими?

– Йўқ, хоним. Ҳаво беғубор, – деди хизматкор.

– Сиз доим билмай туриб гапирасиз! Деразани очинг. Ана, айтганимдек, шамол! Тағин совуқ шамол! Извошни қайтаринг. Лизавета сайрга чиқмайдиган бўлдик. Ясанмасанг ҳам бўлар экан.

– Шўрим курсин! – деди ойимқиз ичида.

Ҳакиқатан ҳам Лизавета Ивановна баҳтсиз бўлиб, машхур италия ёзувчиси Данте айтганидек, нони миннатли, кулбаси тор эди. Бирорвга тобе бўлиш азобини кампирнинг асрандиси билмай, ким билсин? Граф хоним, албатта бераҳм эмасди, лекин бир сўзлик, анчайин тантик, барча кексалардек хасис ва ўз хузур-ҳаловатини ўйладиган, фақат ўз давринигина севиб, ҳозирги замонга мутлақо бегона бир аёл эди. У киборлар жамиятининг барча йигинларида қатнашади; базму жамшидлардан қолмайди, юзларида упа-элик, эгнида қадимги русумда тикилган кийимлар; хунук бўлса ҳам меҳмонхонага қўйилиши зарур бўлган жиҳозга ўхшаб бир бурчакда ўтиради. Меҳмонлар урфга кўра, аввал унинг олдига келишади, таъзим бажо келтиришади, кейин ҳеч ким унга эътибор бермай кўяди. Кампир унча-мунча одамини танимаса-да, уйида деярли бутун шахарни қабул қиласди, одоб ва қоидаларга қаттиқ риоя қиласди. Унинг даҳлизи ва хоналарида семириб, соchlари оқаргунча яшаётган беҳисоб хизматкорлари бўлиб, нимани истасалар, шуни қилишади. Бир оёғи гўрда бўлган граф хонимнинг мол-дунёсини совуриб ётишибди. Аммо Лизавета Ивановна бу уйнинг жонкуяри, жафокаши эди. У чой қуяди, баъзида қанднинг кўп сарф бўлгани учун танбех эшитади; баланд овоз билан кампирга китоб ўқиб беради ҳамда ёзувчининг барча хатолари учун айбдор саналади; кампир сайрга чиқса ҳамроҳ бўлади, ҳаво айниса ҳам, тош йўл нотекис бўлса ҳам қиз бечора сабабчи.

Қизга ойлик маош белгилаб қўйилган, лекин ҳеч қачон тўлиқ тўланмайди. Шундай бўлишига қарамай, унга ҳамма каби, тўғриси, жуда озчилик каби озода ва саришта кийинишни буюрадилар. Киборлар жамиятида унинг қадри йўқ эди. Барча танийди-ю, лекин ҳеч ким эътибор бермайди; зиёфатларда фақат жуфт етишмай қолгандагина рақсга таклиф этилади. Мабодо, хонимлардан биронтасининг кийими ни тўғриламоқ лозим бўлса, уни қўлтиқлаб пардоҳонага олиб кетишиади. Ойимқиз ғуурурли бўлиб, ўз кадр-қимматини биладиганлар тоифасидан эди. Баъзан теваракка тикилиб, сабрсизлик билан халоскорини кутардиди; гарчи Лизавета Ивановна ёш жаноблар тиз чўкаётган сурбет

ва совуқ қизлардан минг чандон дилбар ва ёкимли бўлса-да, бу мағрур йигитлар – дунё ва обрў тамагирлари унга киё боқмасдилар. Кўп бора у кўнгилсиз ва ҳашаматли меҳмонхонадан аста чиқиб, деворларига гулқоғоз ёпиширилган, бўялган оромкурси, кийим жавони, ойначалар қўйилган ҳамда мис шамдонда бадбўй мум милтилаб турган ўзининг гариб хонасига бориб йиглар эди.

Бир куни қизиқ бир воқеа бўлди: қиссанинг бошида айтиб ўтилган зиёфатдан икки кун кейин ва биз тўхталган кўринишдан бир хафта аввал, Лизавета дераза тагида ўтириб кашта тикарди. Бехосдан кўчага кўзи тушди-ю, ёш муҳандисни кўриб қолди, у тош қотганича деразага тикилиб турарди. Қиз бошини қуи солиб, кашта тикишда давом этди. Беш дақиқалар ўтиб қиз яна кўчага қаради, не кўз билан кўрсинки, зобит ҳамон кўзгалмай турарди. Ўткинчи зобитларга ноз-карашма қилишга одатланмаган Лизавета бошқа қайтиб қарамади ва чамаси икки соатлар тикишдан бошини кўтартмади. Тушлик келтирилди. Қиз ўрнидан туриб, ишини йиғишириди ва бехосдан кўчага кўз ташлаб яна бояги зобитни кўрди. Бу холат унга жуда қизиқ туюлди. Тушликдан кейин у бир оз тоқатсизланиб, деразага яқинроқ келди, аммо зобитни учратмади, қиз уни унутди...

Икки кундан сўнг, граф хоним билан извошга чиқмоқчи бўлиб турган қизнинг нигоҳи яна ўша йигитга тушди. У юзини кундуз ёқаси билан тўсиб, эшик олдида турарди: қалпоғи остида қора кўзлари чақнаб турибди. Лизавета Ивановна нима учун кўрқиб кетганини ўзи ҳам тушунмай, англаб бўлмас бир хавотир билан извошга чиқди.

Ўйга қайтибоқ, қиз дархол бориб деразадан қаради. Зобит илгариги жойида унга тикилиб турарди. Ёш хоним ўзини четга олди. Ўзи учун мутлақо янги бир қизиқиши ва безовталиқ қийноғида қолди. Унинг учун бу нотаниш бир янги туйғу эди.

Ўша кундан бошлаб ёш йигит канда қилмай, маълум бир соатда қизнинг деразаси тагига келадиган бўлиб қолди. Йигит билан қизнинг ўртасида ногаҳоний муносабат пайдо бўлди. Кашта тикиб ўтирган жойида қиз йигитнинг яқинлашиб келаётганини сезади, бошини кўтариб узоқ тикилади. У шундай қилса, гўё йигит хурсанд бўлаётгандек. Ҳар сафар нигоҳлари тўқнаш келганда, қиз йигитнинг қонсиз юзига қизил юрганини ёшликтининг тийрак нигоҳи ила кўради. Орадан бир хафта ўтгач, қиз йигитга қараб жилмайиб қўйди.

Томский дўстини танишириш мақсадида граф хонимдан ижозат сўраганида, бечора қизнинг юраги ўйнаб кетди, аммо Нарумовнинг муҳандис эмас, отлик гвардиячи эканлигини билгач, енгиллик қилиб

берган саволи билан ҳовлиқма Томскийга сир бой бериб қўйганига ачинди.

Германн руслашган олмоннинг ўғли эди, отасидан унга озроқ жамғарма қолган, ўзининг мустақил ҳаётини пухталаш кераклигига қаноат ҳосил қиласган Германн бу сармоянинг фоизига ҳам кўл урмай, фақат маош билан яшар, озгина бўлса ҳам ҳою ҳавасга берилмасди. У камгап ва ғурурли бўлганидан ошналари унинг камхаржлигидан кулишга камдан-кам журъат этишарди. Германн гоятда кучли эҳтирос ва ёрқин тасаввурга эга эди. Аммо қатъияти уни одатда ёшларда бўладиган хато йўлга киришдан асраб келарди. Масалан, қарта ўйинини жону дилидан яхши кўрса-да, ҳеч қачон қўлига қарта олмасди, чунки (ўз таъбири билан айтганда) Германнинг ҳикоя бошидаги гапини бериш керак (қаноат ҳақида шекилли), шундай бўлса ҳам узоқ кечаларни қарта столи атрофида ўтказар ва ўйиндаги кутилмаган вазиятларни катта қизикиш билан кузатиб ўтиради.

Учта қарта ҳақидаги ҳикоя унга қаттиқ таъсир килди ва тун бўйи умуман хаёлидан кетмади. «Қани эди, – деб ўйлар эди эртасига кечкурун, Петербургни айланиб юриб. – Қанийди граф хоним менга сирини айтса! Ўша учта омадли картани танлаб берса кифоя эди! Ўз тақдиримни бир синаб кўрсам, нима қилибди?.. У билан танишсан, унинг кўнглини топсан, қўйинг-чи, ўйнаш бўлишга ҳам рози эдим, лекин бу ишларга вақт керак, у бўлса саксон еттига кирган, эрта-индин дабдурустдан ўлиб қолса нима бўлади? Борингки, ўша ҳикояни олсан... Унга ишониб бўладими?.. Йўқ! Ҳисоб-китоб, тежамкорлик ва меҳнат – мана менинг учта омадли картам. Мана шуларгина давлатимни уч баравар, хатто етти баравар зиёд қилади, менга тинч, осуда ва мустақил ҳаёт баҳш этади!»

Шундай хаёл суриб юраркан, ўзини Петербургнинг катта кўчаларидан бирида, қадимги услубда курилган бир уйнинг рўпарасида кўрди. Кўча кўшк ароба ва извошларга тўла, улар бир-бирининг ортидан чироқлари порлаб турган йўлак олдига келишарди. Извошдан баъзан кўхликкина, келишган, қомати расо гўзал аёл, баъзан оғир пойабзалли, баъзан олачипор пайпоқ ва дипломатлар пойабзалини кийганлар тушиб келишарди. Пўстин ва чакмон кийганлар эшик тагида фўдайиб турган хизматкор ёнидан ўтиб, тезгина ичкарига ўтар эдилар. Германн жойида таққа тўхтади.

– Бу уй кимники? – деб бурчакда турган посбондан сўради.

– Граф хоним ***ники, – деб жавоб берди посбон.

Германнинг вужудини қалтироқ босди. Эшигтан ҳикояси унинг хаёлини қамраб олганди. У уйнинг атрофида кезар экан, граф хонимнинг

гаройиб қобилияти ҳақида ўй сурарди. Ўзининг осуда ҳужрасига жуда кеч қайтди, узоқ вақтгача ухлолмади, кейин уйқу ғолиб келди, тушига қарталар, ям-яшил стол, боғлам-боғлам қофоз пул ва уйилиб ётган тилла тангалар кирди. У дадиллик билан кетма-кет қарта ва пуллар тикди, тинмай ютди, тиллаларни йигиштириди ҳамда қофоз пулларни чўнтағига солди. Уйкудан кеч турди, пулларни рўёсида кўрганига афсусланди ва чукур нафас олди. Яна шаҳарни кезмоқчи бўлиб ташқарига чиқди ва ўзини граф ... хонимнинг уйи олдида кўрди. Номаълум бир куч уни доим ўша уй томон тортар эди. У тўхтаб, бинонинг деразаларига тикила бошлади. Деразаларнинг бири олдида китоб ўқиб ёки эшитиб, бошини қўйи солиб ўтирган аёлнинг қора сочига кўзи тушди. Аёл бошини кўтарди. Германнинг нигоҳи лўпигина юзлар ва қоп-қора кўзларга тушди. Ана шу дақиқалар унинг қисматини ҳал этди.

III Б О Б

*Сиз менга мактуб ёзганингизда
тўрт саҳифа ёзасиз маликам,
мунча кўп, ўқиб улгурулмайман.*

Мактублардан.

Лизавета Ивановна уст-бошини энди ечган ҳам эдики, граф хоним уни яна чакиртириди ва қайтадан извошни ҳозирлашни буюрди. Улар извошга ўтироқчи бўлдилар. Икки хизматкор кампирни кўтариб, извошнинг эшигидан киритаётган пайтда, Лизаветанинг нигоҳи ғилдираклар ёнида турган муҳандисга тушди. Йигит кизнинг қўлини ушлаган эди, киз кўрқанидан ҳушини йўқотаёзди. Аммо йигит бир неча сонияда ғойиб бўлди ва кизнинг қўлида мактуб колди. Қиз мактубни қўлқопи ичига яширди ва йўл бўйи ўзига келолмади. Граф хоним ҳар доимдагидек извошда тез-тез савол берарди: – Бояги бизга дуч келган кимса ким эди? – Бу қандай кўприк? – Ана у дўкон эшигига нима деб ёзилибди? Бу сафар Лизавета Ивановна берилган саволларга пойма-пой жавоб қайтариб, граф хонимнинг анчагина асабига тегди.

– Сенга бир нарса бўлдими, ойимқиз! Қоқшол бўп қолдингми, нима бало? На гапни эшитасан, на жўяли бир жавоб берасан. Худога шукр, ҳозирча дудук-пудуқ эмасман, ҳали эс-хушим ҳам жойида!

Лизавета унга қулоқ солмади. Улар уйга қайтишганида, қиз юрганича хонасига кириб кетди ва қўлқопидаги мактубни олди: у елимланмаганди. Ойимқиз мактубга кўз югуртириди: унинг мазмуни муҳаббат изҳоридан иборат эди: у назокат ва юксак дид билан

ёзилган бўлиб, бошдан-оёқ олмонча романдан кўчирилганди. Лизавета Ивановна олмон тилини билмаганлигидан ўша романларни ўқимаганди. Бу сўзларни ёш зобитнинг дил изҳори деб ўйлаб, роса қувонди.

Шундай бўлса-да, бу каби мазмундаги мактубни олиш уни ташвишга солди, чунки навқирон йигит билан бундай яширин ва яқин муносабатда бўлиши илк марта эди. Йигитнинг журъати уни чўчитиб қўйди. Ўйламай-нетмай қилган иши учун ўзини қойир ва энди қандай йўл тутишини билмасди. Боши қотди, дераза олдида ўтиришни бас қиласинми, ё совуққонлик қилиб ёш муҳандиснинг кўнглини қолдирсинми? Ё мактубни қайтариб юборсинми? Ё мактубга совуқ ва кескин жавоб ёзсинми? Энг ачинарлиси, кизнинг маслаҳатгўйи йўқ: унинг на дугонаси, на насиҳат қилгувчи одами бор! Ахийри, Лизавета Ивановна мактубга жавоб ёзишга аҳд қилди.

Қиз ёзув столининг олдига ўтирди. Қоғоз-қалам олиб, ўйга толди. У бир неча марта мактуб ёзишни бошлади, аммо уларни йиртиб ташлади. Негадир мактубдаги баъзи жумлалар ҳаддан ташқари мулойим, баъзилари эса жуда кўполдек туюлар эди, ниҳоят, охирги ёзган гаплари ўзига маъкул тушди.

«Мен шунга аминманки, – дея ёза бошлади мактубида қиз. – Сиз яхши ният билан менга мактублар йўлламоқдасиз, бу билан мени таҳкирламоқчи эмассиз, лекин бизнинг танишишимиз бу тарзда бошланмаслиги лозим. Менга юборган мактубингизни қайтариб юбордим ва бундан кейин менинг шаънимга тегадиган номаъқулчиликлар бўлмайди, деган умиддаман».

Эртасига Германнинг кўчадан юриб келаётганини кўриб, Лизавета Ивановна каштасини қўйиб меҳмонхонага чиқди, дарчани очиб, ёш зобитнинг чаққонлигига умид қилганича, мактубни пастга ташлади. Германн югуриб келиб мактубни олди, баққоллик дўконига кирди ва мактубни очди. Ўзи ёзган мактубни ва Лизаветанинг жавобини кўрди. У шундай бўлишини билган эди. Бундан кейин қандай йўл тутиш кераклигини ўйлай-ўйлай уйига кетди.

Орадан уч кун ўтиб, ёшгина, шаддод бир қиз либослар дўконидан мактуб олиб келди. Лизавета Ивановна тўлов талабномаси бўлса керак, деган хавотирда уни очди ва Германнинг дастхатини таниб қолди.

– Азизам, сиз янгишганга ўхшайсиз, – деди у. – Бу мактуб менга эмас.

– Йўқ, бу мактуб айнан сизга, – деди шаддод қиз маккорона илжайиб. – Аввал бир ўқиб кўринг!

Лизавета мактубга кўз югуртириб чиқди. Германн учрашишни илтимос қилганди.

– Бўлмаган гап! – деди Лизавета Ивановна, йигитнинг бу қилифи ва шошилинч илтимосидан чўчиб. – Бу мактуб менга ёзилган эмас! – Лизавета мактубни майда-майда қилиб йиртиб ташлади.

– Мактуб сизга бўлмаса, нега уни йиртиб ташладингиз, – деди қиз. – Мен уни ёзган одамга қайтариб берар эдим-ку!

– Азизам! – деди Лизавета Ивановна қиз томонидан берилган танбехга аччиғланиб. – Бундан кейин менга, умуман мактуб келтирманг, яна ўша сизни юборган одамга айтинг: озгина уялсин...

Аммо Германн, Лизавета Ивановнага турли йўллар билан хар куни мактуб жўнатиб турди. Бу мактублар энди олмон тилидан таржима эмас, балки ўзининг дил изҳори эди. Йигит ҳиссиётлари жўш уриб, ўзига хос тилда сўзлар, унда Германн истагининг қатъйлиги ҳам, паришонлиги ҳам намоён эди. Лизавета Ивановна энди мактубларни қайтариб юбормасди. Аксинча, уларни мириқиб ўқирди, жавоб ёзарди. Қизнинг жавоб хатлари тобора узунроқ ва латифроқ бўлиб бора бошлади. Бир куни қиз дарчадан Германнга шундай тарзда битилган мактуб ташлади:

«Бугун *** элчисининг уйида зиёфат бўлади. Граф хоним ҳам ўша ерга боради. Биз у ерда соат иккиларгача қоламиз. Бу иккимизнинг холи учрашувимиз учун қулай пайт. Граф хоним кетгани ҳамон, унинг одамлари ҳам тарқалишади. Эшиқда факат дарбон қолади. У ҳам ўз хужрасига кириб кетади. Соат ўн бир яримда келинг. Тўғри зинадан кўтарилинг, агар дахлизда бирор учраб колса, граф хоним уйдами деб сўранг. Сизга, йўқ деб жавоб беришади, демак, қайтиб кетишинингизга тўғри келади. Қайтишдан ўзга чора қолмайди. Лекин ҳеч ким учрамаслиги аниқ. Қизлар ўз хужрасида бўлади. Даҳлиздан чапга бурилинг, тўғри граф хонимнинг ётогигача боринг. Ётокази тўсиқпарда ортида иккита кичкина эшикни кўрасиз: ўнг томонда маҳсус хужра бўлиб, граф хоним у ерга сира ҳам кирмайди; чап томондагиси йўлак, ўша ернинг ўзидаёқ ингичка айланма зина бор: ўша менинг ётогимга олиб боради».

Германн қафасга тушган йўлбарс каби тоқатсизланиб, учрашув онларини кутарди. У кечки соат ўнда граф хонимнинг уйи олдида пайдо бўлди. Ҳавонинг авзойи бузук эди; изгирин турган, паға-паға лайлак қор ёғарди, фонуслар хира нур сочар, кўчада бир инсон кўринмасди. Бирорта саёқ йўловчини учратиш умидида аҳён-аҳёнда бир ориқ от кўшилган энг арzon киракаш арава ўтиб қоларди. Германн йўл-йўл камзулда, на қор ва на изгиринни сезади. Ниҳоят, граф хонимнинг из-

воши пайдо бўлди. Сувсар пўстин кийган, буқчайиб қолган кампирни хизматкорлар кўлтиқлаб олиб чиқишганини, унинг ортидан эса юпқа ёпинчиқка ўралиб олган, соч турмагига янги очилган гулларни қистирган асранди қизнинг лип этиб извошга чиққанини Германн аниқ кўрди. Извошнинг эшиги ёпилиб, юмшоқ қор узра енгил юриб кетди. Хизматкор маҳобатли уйнинг эшикларини беркитди. Деразаларда чироқ ёғдуси сўнди. Германн сокинликка чўумган уй атрофида айланаб юра бошлади: у фонуснинг тагига келиб, соатига қараганида ўн бирдан йигирма дақиқа ўтганди. У фонуснинг тагида тош қотди. Кўзларини тез-тез соат милига тикар ва қолган дақиқаларни шу тарзда кутарди. Ўн бир яримда у граф хонимнинг остонасига қадам қўйди ва ёруғ йўлакка кирди. Дарбон жойида кўринмади. Германн зинадан югуриб чикиб, даҳлизнинг эшигини очди. Шу пайтда у, чироқнинг тагида алмисоқдан қолган ирkit оромкурсида ухлаб ётган хизматчини кўрди. Германн аста-секин, ниҳоятда эҳтиёткорлик билан унинг ёнидан ўтди. Катта уй ва меҳмонхона қоп-қоронғи, фақат даҳлиздаги чироқ хира нур таратарди. Йигит ётоқхонага кирди. Санамлар билан лиқ тўла жавон қаршисида тилла шамчироқ ёниб турарди. Жилдлари титилиб кетган шойи оромкурсилар, ҳаллари кўчган, пар ёстикли юмшоқ каравотлар, деворга ёпиширилган хитой гулқоғозларига ҳамоҳангдек тизилишиб, ғамгин бир манзара касб этарди. Деворда машҳур француз рассоми Лебрун томонидан яратилган иккита сурат осилиб турибди. Унинг бирида лўппи юзли, кўринишдан бақувват, эгнида яшил рангли ҳарбий кийим кийган ва юлдуз таққан қирқ ёшлардаги эркак киши тасвирланган. Бошқасида эса – қирғий бурун ёш гўзал аёлнинг чаккаларидаги соchlари силлиқ қилиб таралган ва упа-элик сепилган ясама соchlарига атиргул қистириб олган ҳолати маҳорат билан ифода этилганди. Уйнинг ҳар тарапини чиннидан ишланган чўпон қизлар, машҳур соатсоз Лерой ясаган ошхона соатлари, турли хил кутичалар, аёлларнинг елтигичлари, ўтган асрнинг охирида Монгольфер шари ҳамда Месмернинг магнетизми каби бирталай ўйинчоқлар эгаллаганди. Германн тўсиқпарда ортига ўтди. Бу ерда кичкинагина темир каравот бўлиб, ўнг томонда маҳсус хужрага олиб борадиган эшик, чапда эса йўлакка чиқадиган эшик бор эди. Германн чапдаги эшикни очиб, асранди қизнинг ётоғига олиб чиқадиган торгина айланма зинани кўрди... Лекин ортига қайтиб қоронғи хужрага кирди.

Вақт имиллаб ўтмоқда эди. Ҳаммаёқда сукунат ҳукмрон. Ётоқдаги соат ўн иккига занг урди, унга қўшилиб барча хоналардаги соатлар ҳам кетма-кет занг ура бошлади. Кейин яна ҳаммаёқни қабристон сукуна-

ти босди. Германн хотиржамлик билан совуқ печкага суюниб турса-да, хатарли, лекин муҳим бир ишга бел боғлаган одамдек юраги секин ва бир текис уради. Ногаҳон узоқдан келаётган извошнинг овози эши-тилди. Йигитнинг вужудини қалтироқ босди. Извош эшик олдига келиб тўхтади. У извош босқичининг шарақлатиб туширилганини эшитди. Уйда ғала-ғовур бошланди. Одамлар зир-зир югуриб қолишиди. Турли овозлар эшитилиб, хоналарда чироқлар ёқилди. Уч кекса оқсоқ ётоқхонага югуриб киришиди. Граф хоним ҳам уларнинг ортидан хонага базур кириб келди ва ўзини катта оромкурсига ташлади. Германн эшик тиркишидан кузатиб турарди: ойимқиз унинг ёнидан ўтиб кетди. Йигит қизнинг зинадан шошилиб чиқаётганини пайқади. Шу топда унинг қалбida қандайдир виждан қийноғига ўхшаш ҳиссиёт пайдо бўлди-ю, аммо тезда ғойиб бўлди. У жойида қимирамай турарди.

Граф хоним қўзгунинг олдиди ечина бошлади. Аёлдан атиргуллар қадалган бош кийимини, ундан кейин такир бошидан упа сепилган ясама сочини ҳам ечиб олишиди. Тўғногичлар унинг атрофига ёмғирдек тўкилди, кумушдан гул тикиб зийнатланган сариқ шойи кўйлаги шишган оёқларига тушди. Германн унинг пардозидаги жирканч сирларнинг гувоҳи бўлди; нихоят, граф хоним тунги кўйлаги ва қалпоғида қолди. Бу кексаларга хос кийимда, аёл у қадар қўрқинчли ва хунук кўринмас эди.

Граф хоним барча кексалар каби уйқусизлик дардига мубтало бўлганди. Кампир дераза олдидаги катта юмшоқ курсига ўтириди ва оқсоқ хотинларга жавоб бериб юборди. Ёниб турган шамларни олиб кетишиди. Хонада биттагина шамчироқ қолди. Граф хоним осилган лабларини қимиратиб, гоҳ чапга, гоҳ ўнгга тебраниб ўтиради. Унинг сўлғин чехраси, нурсиз қўзларида ҳеч қандай фикр ифодаси йўқ. Унга қараган киши бу ғалати кампир ўз ихтиёри билан эмас, балки қандайдир сирли бир кувват таъсиридан тебраниб ўтирибди, деб ўйларди.

Бирдан унинг ўликларники каби жонсиз юзи ўзгариб кетди. Пичирлаб турган лаблар ҳаракатдан тўхтаб, кўзларда ҳаёт аломати пайдо бўлди: граф хонимнинг қаршисида нотаниш эркак турарди.

– Худо ҳақи, мендан чўчиманг! – деди у аста ва мулойимлик билан. – Сизга зиён етказиши мақсадим йўқ, факат илтифот қилишингизни сўраб келдим.

Граф хоним унинг сўзларини эшитмаётгандек, индамай қараб турарди. Германн кампирни яхши эшитмаса керак деб ўйлади, энгашиб унинг қулогига бояги айтган сўзларини яна такрорлади. Кампир тош қотиб ўтиради.

— Ҳаётимни, — дея гапида давом этди Германн, — баҳтиёр қилиш фақат сизнинг қўлингиздан келади. Бу сиз учун ҳеч нарса эмас. Мен бир нарсага аминман, сиз бирйўла омад келтирувчи учта қартани танлаш йўлини биласиз...

Йигит сўзлашдан тўхтади. Граф хоним ўзидан нимани сўрашаётганни англагандек ва жавоб бериш учун сўз қидираётгандек эди.

— Йигитча бу ҳазил эди, — деди граф хоним. — Сизга онт ичib айтамки, бу бор-йўги бир ҳазил эди.

— Бўлмаган гап, бу билан ҳазиллашиб бўлмайди, — деди Германн жаҳли чиқиб. — Лоақал, ўз қарзларингиздан қутулишга ёрдам берган Чаплицкийни эсланг.

Граф хоним хижолат тортди шекилли, киёфасида руҳий изтироб зухур топгандек кўринди, аммо бир неча сонияда аввалги ҳолатига қайтди.

— Ўша омад келтирувчи учта қартани менга айта оласизми? — деб гапида давом этди Германн.

Граф хоним чурқ этмади. Германн:

— Сиз бу сирни ким учун асраяпсиз? — деди. — Набираларингизами? Улар шундок ҳам бой, бунинг устига пулнинг кадрини ҳам билишмайди. Бундайларга сизнинг қартангиздан бирон фойда борми? Ота месроснинг қадрига етмаган одам, хар қанча меҳнат қиласин, алалоқибат қашшоқликда ўлиб кетади. Мен пулнинг қадрига етадиган одамман. Сиз айтадиган учта қарта зое кетмайди. Қани, айтинг!

У сабрсизлик билан жавоб кутарди. Аммо граф хоним тош қотиб турарди. Охири Германн тиз чўқди.

— Қачонлардир, — деди у, — қалбингиз муҳаббат туйғусига лиммо-лим бўлган бўлса, агар бирон марта дунёга келган чақалоқнинг йигисини эшифтанингизда қувонган бўлсангиз, кўксингизда бирон марта инсоний ҳислар уйғонган бўлса, аёллик, маъшуқалик, оналик туйғулари ҳақи, ҳаётдаги жамики муқаддас нарсалар ҳурмати, сиздан ўтиниб сўрайман, илтимосимни рад этманг, ўша сирни менга айтинг. Сирни яширганингиздан не фойда? Эҳтимол, бу сир одамнинг икки дунёси ни куйдирувчи мудҳиш шайтоний гуноҳларга боғлиқдир. Ўзингиз ҳам бир ўйлаб кўринг: анча кексайиб қолгансиз, бир оёғингиз ерда бўлса, бири гўрда, ахир! Мен сизнинг ҳам гуноҳингизни бўйнимга олишга тайёрман. Факат ўша сирни айтсангиз бўлгани. Кўз олдингизга келтиряпсизми, бир одамнинг баҳту саодати сизнинг қўлингизда; факат мен эмас, балки фарзандларим, набираларим, эвараларимгача ҳақингизга дуо қиладилар ва доим эҳтиром билан ёдга оладилар...

Кампир ҳамон индамай ўтирап эди.

Германн ўрнидан турди.

– Ҳа, қари алвасти! – деди у тишларини ғижирлатиб. – Барибир сени гапиришга мажбур қиласман.

Шуларни айта туриб, у чўнтағидан тўппончасини олди.

Тўппончани кўриб граф хоним иккинчи марта қаттиқ кўркувга тушди. Бошини сарак-сарак қилиб, ўзини ўқдан ҳимоя қилмоқчилик қўлларини юкори кўтарди, кейин кутилмагандан, дабдурустдан полга думалаб тош қотди.

– Майнавозчиликни бас қилинг, – деди Германн унинг қўлидан ушлаб. – Охирги марта сўрайман: омад келтирувчи учта қартани айтасизми ё йўқми? Граф хоним ҳеч қандай жавоб қайтармади. Германн кампирнинг жон таслим қилганини кўрди.

IV Б О Б

*18** 7 май*

Ахлоқсиз ва осий банда

Мактубдан.

Лизавета Ивановна базмга кийиб борган кийимларини ечмай туриб, чукур хаёлга толганича, ўз хонасида ўтирап эди. Уйга қайтиб келганида, уйкудан истамайгина туриб хизматини таклиф қилган оқсоқ қизни ўзим ечинаман деб жўнатиб юборди ва шошганича хонасига кириб кетди. Шу топда унда Германни кўриш истаги ва кўрмаслик умиди туғилган эди. Бир қарашда унинг келмаганлигига ишонч ҳосил қилди ва тақдирнинг бу учрашувга моне бўлгани учун шукrona келтирди. Ойимқиз кийимларини ечмай туриб, қисқа вақт ичида ўзини шунчалик йирокларга судраб кетган кўргилик устида фикр юрита бошлади. Йигитни илк бор деразадан кўрганига ҳали уч ҳафта бўлгани йўқ, лекин ўзаро мактуб алмашиш жадаллашиб кетди, ҳатто йигит ундан тунда учрашишга изн олди. Қиз унинг исмини баъзи мактубларга қўйган имзосидан билиб олди. Энг қизиги, улар ҳали сўзлашганлари йўқ. То шу кечага қадар у ҳақда бирон гап ҳам эшитмаганди... Ажабо, қизиқ иш бўлди! Ҳудди шу кеча зиёфатда Томский доим ўзи билан бирга олиб юрадиган ёш князь қизи Полина, бошқаларнинг олдида нозу фироқ қилгани учун рашки келиб, ундан ўч олиш мақсадида ўзини бепарво кўрсатди: у Лизавета Ивановнани полякча раксга таклиф этди. У ракс бошланганидан тамом бўлгунига қадар, қизнинг муҳандис зобитларга суюги йўқлиги ҳақида ҳазиллашди. Қиз ўйлаганидан ҳам кўра кўпроқ

нарсалардан хабари борлигини айтиб, уни ишонтироқчи бўлди. Унинг баъзи ҳазиллари нақ нишонга етиб бориб, Лизавета бир неча бор, бу менинг сирларимдан хабардор бўлса керак, деган фикрга борди.

– Сиз буларни кимдан эшитдингиз? – деди қиз жилмайиб.

– Сизга таниш бўлган одамнинг дўстидан, – деб жавоб берди Томский. – Ажойиб бир инсондан!

– Ким экан, ўша ажойиб инсон?

– Унинг исми Германн.

Лизавета Ивановна жавоб қайтармади, аммо аъзойи бадани бўшашиб кетди...

– Ўша Германн, – дея сўзида давом этди Томский, – ҳакиқий романларга қаҳрамон бўлишга арзигулик бир шахс: унинг сурати фирт Наполеоннинг ўзи, руҳи эса иблисники. Фикру ожизимча, бу одам камида учта ёвузликни амалга оширган кимсалардан. Нега рангингиз оқариб кетди?

– Негадир, бошим оғрияпти... Хўш, ўша Германн дегани сизга нималар деди?

– Германн дўстидан жуда норози, мен унинг ўрнида бўлганимда, мутлақо бошқача йўл тутган бўлардим, дейди. Агар адашмаётган бўлсам, Германнинг ўзи ҳам сизга кўз тикиб юрган бўлса керак. Нима бўлганда ҳам, дўстининг ишқий ох-воҳларига бепарво эмас, шекилли.

– У мени қаерда учрата қолиби?

– Черковда, ё сайр қилиб юрганингизда!.. Тафин Худо билади! Балки хонангизда ухлаб ётганингизда кўргандир, бундай ишлар унинг кўлидан келади...

Уларнинг ёнига келиб тўхтаган уч хоним, Лизавета Ивановна учун гоятда мароқли бўлиб турган сухбатни тўхтатиб қўйиши.

Томский танлаган хоним бояги князь қизи эди. Иккови одатдагидан узоқроқ доира айланиб, рақсга тушиши. Хоним қилтиллаб келиб ўз курсисига ўтириди, Томскийнинг кўнглидаги ғашликни ҳам чиқариб юборди. Томский ҳам қайтиб ўз жойига ўтирас экан, бошқа на Лизавета Ивановнани ва на Германни ўйлади. Ойимқиз бўлинган сухбатнинг давом этишини жуда истар, лекин рақс якунига етганди. Кекса граф хоним ҳам дарҳол уйига кетди.

Гарчи Томскийнинг сўзлари шунчаки валаклаш бўлса-да, бу паришонхотир қизнинг қалбida чуқур из қолдирди. Томский чизган сурат, қизнинг ўйлаб юрган сиймосига ўхшаб кетарди. Сўнгги вакъларда бу ўта ярамас зот, бир томондан қизни қўркитса, иккинчи томондан уни ўзига мафтун этарди. У кўлларини қовуштирганича, гуллар билан беза-

тилган бошини ҳамон ярим очик кўкрагига эгиб турар эди... Дабдурустдан эшик очилиб, Германн кириб келди. Қиз кўркув ичидаги қалтираб:

– Қаерда эдингиз? – деда пичирлади.

– Кекса граф хонимнинг ётоғида, – деб жавоб берди Германн. – Ҳозир ўша ердан чиқдим, граф хоним қазо қилганга ўхшайди.

– Ё, Худо! Нималар деяпсиз?

– Унинг ўлимига мен сабабчи бўлдим, шекилли, – деб сўзига давом этди Германн.

Лизавета Ивановна йигитнинг юзига қараб туриб, Томскийнинг: бу одамнинг виждонида камидаги учта ёвузилик бор! деган сўзларини хотирлади. Германн қизнинг ёнидаги дераза токчасига ўтириди ва бўлиб ўтган воқеани бутун тафсилотлари билан гапириб берди.

Ойимқиз унинг сўзларини зўр ҳаяжон билан тинглади. Демак, умидбахш мактублар, оташин орзулас, қизнинг ортидан қолмай юришлар – барчаси муҳаббат эмас, балки ичига ўт соглан нарса пул экан-да! Уни мурод сари етаклаб, баҳтиёр этувчи қиз эмас экан! Бечора қизигина, ўзи ҳам билмай туриб, каллакесарга, кекса граф хонимнинг қотилига ёрдамчи бўлди!.. Гарчи вақт ўтган бўлса-да, қиз қаттиқ пушаймонликда аччик-аччик йиглади, Германн унга индамай қараб турарди. Йигитнинг ҳам юраги эзилар, бироқ на асранди қизнинг кўз ўшлари ва на қайғу ичидаги ажойиб гўзаллиги унинг тош кўнглини юмшата олди. Кампирнинг ўлимини эсларкан, у ҳеч қандай виждан азобини туймас эди. Фақат бир нарса: мангу йўқотилган сир, яъни, бадавлат бўлиш истаги унинг қалбига ғулғула соларди.

– Қандай бадбаҳтсиз! – деда ниҳоят Лизавета.

– Мен граф хонимнинг ўлимини истамаган эдим, – деб жавоб берди Германн. – Тўппончам ўқланмаган эди. – Иккови ҳам жим қолишиди.

Тонг отди. Лизавета Ивановна ёниб тугаётган шамни ўчириди: хона хира ёруғликка фарқ бўлди. У кўз ўшларини артиб, Германнга қаради: йигит кўлларини қовуштириб қовоғини согганича дераза рахига суюниб турарди. Шу туришида у чиндан ҳам Наполеоннинг суратини эслатарди. Бу ўхшашлик ойимқизни ҳайрон қолдирди.

– Уйдан қандай чиқиб кетасиз? – деда ниҳоят Лизавета Ивановна.

– Мен сизни яширин йўл орқали чиқариб юбормоқчи эдим, лекин йўл кампирнинг ётоғидан ўтади, энди мен кўрқаман.

– Ўша яширин йўлни қандай топишни айтсангиз, ўзим чиқиб кетаман.

Лизавета Ивановна ўрнидан туриб, жавондан калит олди ва уни Германнга бера туриб, яширин йўлни батафсил тушунтириди. Йигит,

оимқизнинг истамайгина узатган қўлини қисди, қуи эгилган бошидан ўпди ва чикиб кетди.

У айланма зинадан пастга тушди ва яна граф хонимнинг ётоғига кирди. Ўлган кампир юзида хотиржамлик ифодаси ила юмшоқ курсида ўтирганича тош қотганди. Германн жасаднинг қаршисида тўхтаб, гўё бу даҳшатли ҳақиқатга ишонч ҳосил қилмоқчи бўлгандек, анча вактгача тикилиб қолди. Кейин хос хужрага кирди ва деворга ёпиширилган қоғозларни пайпаслаб яширин эшикни топди. Ажид таассуротлар остида қоронги зинадан пастга туша бошлади. Худди мана шу зинадан, – деб ўйлар эди Германн, – бундан салкам олтмиш йил илгари мана шу ётоққа, балки худди шу соатларда башанг кийиниб, соchlарини силлиқ қилиб тараб, учбурчакли шляпасини юзига босганича биқиниб келган баҳтли йигит, аллақачонлар қабрида чириб кетгандир. Мана бугун кекса севгилисининг ҳам юраги уришдан тўхтади.

Германн зина остидаги эшикни топиб, уни оимқиз берган калит билан очди ва кўчага олиб чиқадиган йўлақдан юриб кетди.

В Б О Б

*Бугун тушимда марҳума баронесса
фон В.ни кўрдим. У бошдан-оёқ оқ
либосга ўралиб олганди. Менга қараб:
«Салом, жсаноб маслаҳатчи!» деди.*

Шведенборг¹.

Ўша машъум кечадан уч кун ўтиб, эрталаб соат тўккизда Германн *** ибодатхонасига кетди: графин хонимга дағн дуоси ўша ерда ўқилар эди. Гарчи бўлиб ўтган ишга пушаймон бўлмаса-да, аммо виждонининг: сен кампирнинг қотилисан, деган овозини ҳеч ўчира олмасди. Динга ишонмаса ҳам иримчи эди. У кампирнинг арвоҳи уришидан кўрқарди, шунинг учун жанозага бориб, ундан гуноҳидан ўтишини сўрамоқчи бўлди.

Черков одамга лиқ тўла. Германн одамлар орасидан сиқилиб базур ўтди. Тобут, баҳмал мато билан безатилган аравада турарди. Марҳуманинг юзига тўр парда тутилган, эгнида оқ шохи кўйлак, кўллари кўксига кўйилган холатда ётар эди. Атрофида хизматкорлар қора кийиб, елкаларига насад тамғали тасма боғлаб, кўлларида шам тутиб туришарди. Барча қариндош-уруглари – фарзандлари, набиралари ва эваралари чуқур таъзияда. Ҳеч ким кўз ёши тўкмади;

¹ Шведенборг – швед ёзувчisi.

агар кўз ёши тўкилганида – шайтон йифи бўларди. Марҳума шу қадар кекса эдики, унинг вафоти ҳеч кимни изтиробга солмади ва яқинлари аллақачон унга ошини ошаб, ёшини яшаган, деб қарашар эди. Ёш руҳоний дағн дуосини ўқий бошлади. Марҳуманинг узок йиллардан бўён тинч ва баракали ҳаёт кечириши насроний имонининг саломат бўлишига гаров бўлганини айтди. «Ўлим фариштаси уни ўз қучогига олганида у ҳали тетик ва тунги танмаҳрамнинг бағрида лаззатланишдан умидвор эди», – деди ёш руҳоний. Дағн дуоси маросими одатдагидек, чуқур мотамда ўтди.

Марҳума билан видолашгани тобут ёнига аввал қариндош уруғлари келишди, уларнинг ортидан кўп замонлар бирга шоду хуррамлик қилган инсон билан хайрлашгани келган беҳисоб меҳмонлар эргашишди. Кейин уй хизматкорлари, ниҳоят кампирнинг tengдоши – кекса оқсоч икки ёш қиз қўлтиқлаган ҳолда тобутда яқинлашди. Ерга қадар энгашиб таъзим қилишга ўзида куч топа олмади. Узок йиллик бекасининг қўлларидан ўпиб, бир муддат кўзёш тўқди. Сўнгра Германн тобутнинг олдига боришга аҳд килди. У ерга қадар энгашиб, арча барглари сочилган совук полда бир неча дақика ётди. Бир оздан сўнг ранги тобутдаги мурда каби оқариб, ўрнидан турди. Граф хонимнинг тобути ортилган аравага кўтарилди ва энгашди... Шу топда унга, гўё марҳума бир кўзини қисиб унинг устидан кулаётган-дек туюлди. Германн шиддат билан ортига тисланди-ю, оёғи тойиб ҷалқанчасига йикилди. Атрофдагилар дарров уни туришига ёрдамлашишди. Худди шу вақтда Лизавета Ивановнани ҳам бехуш ҳолда ташқарига олиб чиқишиди. Бу ҳолат – маросимнинг тантанали сукунатини бузди. Халқ ўртасида пи chir-pi chirлар бошланди. Марҳуманинг яқин қариндошларидан озгин бир амалдор, ёнида турган инглизнинг қулоғига, ёш зобит кампирнинг ҳароми ўғли деб пи chirлаган эди, у ҳам совуққина қилиб: «Шундай денг!», деб қўйди.

Ўша куни Германнинг кайфияти бўлмади. Хилват ерда жойлашган чоғроққина ошхонада овқатланар экан, хаяжонини босиш умидида кўпроқ ичди, аммо ичкилик унинг тасаввурини янада жонлантириди, холос. Уйга келиб ечинмасданоқ ўзини тўшакка отди ва қаттиқ уйкуга толди.

У ярим кечаси уйгониб кетди: ой унинг уйини ёритиб турарди. Соатга қаради: вақт чоракам уч. Уйқуси ўчди. Ўрнида ўтириб, кекса граф хонимнинг дағн маросимини хотирлай бошлади.

Шу топда кўча тарафдаги деразадан бирор унинг ётогига мўралади-ю, дарров ғойиб бўлди. Германн бунга аҳамият бермади.

Бир оздан кейин даҳлизнинг эшиги очилганлигини эшитди. Германн хизматчим одатдагидек кечки томошадан маст қайтган бўлса керак деб ўйлади, аммо қадам товушларининг бегона эканлигини пайқади. Кимдир туфлисини дўқиллатиб, юриб келмоқда эди. Эшик очилиб, оқ либосга ўранган бир аёл кириб келди. Германн уни ўзининг кекса энагаси деб ўйлади ва бемахалда нима киляпти деб ҳайрон бўлди, лекин аёл сирғаниб бирдан унинг қаршисида ҳозир бўлди. Шунда Германн граф хонимни таниди.

— Мен ҳузурингга ўз ихтиёrim билан келганим йўқ, — деди у қатъийлик билан. — Менга илтимосингни бажариш буюрилди. Учлик, еттилик ва туз сенга бирин-кетин ютуқ келтиради, лекин шарт шуки, кунига биттадан ортиқ қарта тикмайсан. Яна умрингнинг охиригача қарта ўйнашдан воз кечасан. Агар сен асранди қизим Лизавета Ивановнага уйлансанг, хунимдан кечаман...

Шу гапларни айтиб, граф хоним аста ортига бурилиб, эшикка қараб юрди ва туфлисини дўқиллатганича кўздан йўқолди. Германн ташқари эшикнинг қаттиқ ёпилганини эшитди ва деразадан яна кимдир мўралаб ўтганини кўрди. Германн анча вақтгача ўзига келолмади. У қўшни хонага ўтди. Хизматкори қуруқ таҳтанинг устига ухлаб ётарди; Германн уни базўр уйғотди. У бугун ҳам қаттиқ маст эди. Ундан бирон саволга жўяли жавоб олишнинг имкони бўлмади, ташқари эшик тамбаланганди. Германн хонасига қайтиб кириб шамни ёқди-да, бояги кўзига кўринган воқеани қофозга тушириб кўйди.

VІ Б О Б

— Тўхта!

— Менга тўхта дейшига қандай ҳаддингиз сизди?

— Жаноб, мен сизга, тўхтанг! — дедим.

Табиатда икки жисм бир кўринишда бўлмаганидек, руҳий оламда ҳам икки ҳаракатсиз фикр бирга яшай олмайди. Учлик, еттилик ва туз Германнинг хаёлдан кетмас, лабларида пичирлаб турар эди. Бирон ёш қизни кўрса, қадди қоматини қаранг, худди учлик картанинг ўзи-я, дерди. Одамлар: «Соат неча бўлди?» деб сўрасалар, у: «Беш дақиқа кам еттилик» деб жавоб берарди. Ҳар бир бақувват эркак унга тузни ёдга солар эди. Учлик, еттилик, туз – турли хил шаклларда унинг тушига кирарди. Учлик унинг кўз ўнгига катта ва гўзал кўқонгул сингари намоён

бўлар, еттилик – баҳайбат юонон дарвозалариdek хаёлида жилваланар, туз эса катта қора ўргимчак шаклида кўринарди. Унинг ўй-хаёли, дарди кампир айтган сирни тезроқ амалга ошириш эди. Германн истеъфога чиқиб, саёҳат қилишни режалаштира бошлади. У Парижга бориб, энг обрули қиморхоналарда омад фариштасининг мол-дунёсини ютиб олишни истарди. Бироқ тақдир, тасодифан уни бу ташвишлардан озод этди.

Москвада бадавлат қиморбозлар жамияти ташкил этилди. Жамиятга бутун ҳаётини қиморга бағишлаган, бир пайтлар миллионлаб ютукларга эришган, ўйинда ютса вексел олиб, ютқизса нақд пул тўлайдиган машҳур Чекалинский раис этиб сайланди. Унинг кўп йиллик тажрибаси, ширинсуханлиги ва хушмуомалалиги дўстлари орасида унга нисбатан ишонч уйғотган, айниқса, катта қиморхонаси ҳамда маҳоратли ошпази унинг обрўсини ошириб юборган эди. У Петербургга келганида, ёшлар ўзларини унинг қиморхонасига уришди. Зиёфату аёллар ортидан юришдан кўра, Фиръянни афзал кўришди. Нарумов, Германни Чекалинскийнинг олдига олиб келди.

Улар бир неча яхши зийнатланган ва хушмуомала хизматчилар билан тўла хоналардан ўтишди. Генерал ва маҳфий маслаҳатчилардан бир нечтаси вист¹ ўйнардилар. Йигитлар қалин ипак мато қопланган оромкурсиларда ўтириб, музқаймоқ еб, чубук чекишарди. Мехмонхонага кўйилган узун столнинг атрофига йигирмага яқин қиморбоз йифилган. Уй эгаси ўйинга бошчилик қиласиди. У олтмиш ёшлар чамасида бўлиб, салобатли, оппоқ сочи кумушдек товланар, лўппи ва тиниқ юзи унинг юмшоқ табиат инсонлигидан дарак берарди; кўзлари ҳам табассумдан чақнаб турарди. Нарумов у билан Германни таништирди. Чекалинский унинг кўлини дўстона сиқиб кўйди ва бемалол, бехижолат ўтиришини айтиб, яна ўйинни давом эттириди.

Ўйин анча чўзилди. Столнинг устида ўттизга яқин тикилган қарта бор эди. Чекалинский ҳар қарта айланиб келганида, тўхтаб, ўйин иштирокчиларига қарор қабул қилиш учун бир неча сония вақт берар, ўзи бўлса ютқазилган пулнинг ҳисобини ёзиб борар ва ўйинчиларнинг талабини дикқат билан эшитарди. У баъзан, кўп пул тикиб ғафлатда колганларнинг хатосини тузатишга уринарди. Ниҳоят, ўйин тугади. Чекалинский яна қартани чийлаб, янги ўйинга ҳозирлик кўра бошлади.

¹ Вист – қиморнинг бир тури.

– Қарта тикишга рухсат этсангиз, жаноб, – деди Германн киморбозлардан семиз бир кишининг ортидан қўлини чўзиб. Чекалинский жилмайиб, жуда яхши дегандек, бошини силкитиб қўйди. Нарумов кулиб туриб, анча пайтгача аҳдини бузолмаган Германни табриклиди ва унга, биринчи ўйининг омадли бўлсин, деди.

– Бўлади! – деди Германн, ўзининг қартасига бўр билан ёзиб.

– Қанча тикилди? – деб сўради Чекалинский. – Афв этинг, кўзим яхши кўрмайди.

– Қирқ етти минг, – деди Германн.

Бу сўзларни эшишиб, ҳамма бирдан Германн томон ўгирилди.

– Нима, жинни бўлганми? – деб ўйлади Нарумов.

– Ижозат берсангиз, тушунтирсам, – деди Чекалинский хуш табасум билан. – Ўйинингиз жуда яхши, лекин ўйновчиларнинг биронтаси ҳали икки юз етмиш сўмдан ортиқ пул тиккан эмас.

– Нима бўлиби? – деди Германн унга. – Менинг довимни урасизми ёки йўқми?

Чекалинский розилик билдириб бош эгди.

– Сизга фақат шуни айтиб қўйишим керак, – деди у. – Бу ердаги дўстларим менга ишонгандарни учун то ўргата нақд қўймагунингизча, ўйинни бошлай олмайман. Мен учун сизнинг лафзингиз ҳам етади, аммо тартиб ва хисоб бузилмаслиги учун нақд пул қўйишингиз керак.

Германн ёнидан банк чекини чиқариб, Чекалинскийга узатди. У кўз юргутириб чиқди-да, Германнинг қартаси устига қўйди.

Ўйин бошланди. Ўнг томонга тўққизлик, чап томонга учлик тушди.

– Ютуқ! – деди Германн қартасини кўрсатиб.

Қиморбозлар ўртасида олағовур бошланди. Чекалинскийнинг қошлари чимирилди, лекин дарҳол юзига одатдагидек табассум югарди.

– Ютуқни оласизми? – деб сўради Германндан Чекалинский.

– Марҳамат қилсалар.

Чекалинский чўнтагидан бир неча боғлам қофоз пул чиқариб, Германнга узатди. Германн пулларни олиб, столдан нари кетди. Нарумов гангиги қолди. Германн бир бордоқ шарбат ичди-да, уйига қараб жўнади.

Эртасига кечки пайт яна қиморхонага келди. Чекалинский карта ўйнарди. Германн столнинг ёнига келганида, қиморбозлар унга дарҳол жой беришди. Бу гал Чекалинский у билан қуюқина кўришди.

Германн янги ўйиннинг бошланишини кутиб турди-да, карта тикиди. Довга ўзининг кечаги ютуғи – қирқ етти мингни тикиди. Чекалинский ўйинни бошлади. Валет ўнг томонга, еттилик сўлга тушди.

Германн еттилик қартани очди.

Барча ох тортиб юборди. Чекалинский шошиб қолди. У тўқсон тўрт мингни куртдек санаб, Германнга узатди. Германн шошилмай, совуққонлик билан ютуқни олди-да, уйига қараб кетди.

Эртаси кечқурун Германн яна қиморхонада пайдо бўлди. Ҳамма уни кутмоқда эди. Генераллар ва маҳфий маслаҳатчилар ўйинни йигиштириб, катта ўйинни томоша қилгани тўпланишди. Оромкурсида ўтирган йигитлар ҳам сакраб туришди; хизматчиларга қадар меҳмонхонага йигилишди. Ҳамма Германни ўраб олди. Бошқа қиморбозлар бугун қарта тикишмади. Улар ўйиннинг қандай якун топишини сабрсизлик билан кутишарди. Германн стол ёнида битта ўзи, ранги оқарган бўлса-да, юзидан табассум аrimайдиган Чекалинский билан ўйин бошлашга ҳозирлик кўтарди. Ҳар иккиси янги қарталарни очишли. Чекалинский қарталарни чийлай бошлади. Германн ҳам ўз қартасини тикиб, устига қоғоз пулларни қўйди. Бу худди, гладиаторлар жангига ўхшарди. Томошабинларнинг нафаси чикмай қолди.

Чекалинский ўйинни бошлади. Унинг қўллари қалтиради. Ўнгга кора хотин, чапга туз тушди.

– Туз ютди! – дея Германн қартасини очди.

– Қўлингиздаги кора хотин, сиз ютқиздингиз, – деди Чекалинский хушмуомалалик билан.

Германнинг юраги ҳаприқиб кетди. Ҳақиқатан ҳам унинг қўлида туз эмас, кора хотин турарди. У кўзларига ишонмас, қандай қилиб янглишганини англай олмасди.

Шу пайт Германнга қартадаги кора хотин кўзларини қисиб, унинг устидан кулаётгандек туюлди. Унинг граф хонимга ўхшаши Германни довдиратиб қўйди...

– Кампир! – деб қичқирди у даҳшатга тушиб.

Чекалинский ютуқни йигиштириб олди. Германн тош қотиб турарди. Бир оздан сўнг у столдан узоқлашди. Қиморбозлар ўзаро пи chir-pi chir қилиб: «Зўр таваккал қилди!» – дейишарди. Чекалинский янги қартани ташлади. Яна ўйин бошланди.

ХОТИМА

Германн ақлдан озди. У, Обухов шифохонасининг 17-хонасида ётарди. Саволларга умуман жавоб қайтармас, факат тез-тез: «Учлик, еттилик, туз! Учлик, еттилик, кора хотин!» – дея алжиради, холос.

Лизавета Ивановна яхши бир йигитга турмушга чиқди. Йигит аллақаерда хизмат қилар экан, ўзига яраша мол-мулки ҳам бор эмиш. У йигит кекса граф хоним гумаштасининг ўғли. Лизавета Ивановна камбағал бир қариндошининг қизини асраб олди.

Томскийга ротмистр унвони берилди ва у князь қизи Полинага уйланяпти.



КАПИТАН КИЗИ

роман

Номусни ёштиқдан
Эрпийёп Қуат.
Макор



І Б О Б

ГВАРДИЯ СЕРЖАНТИ

– Эртагаёқ гвардия капитани бўлсайди.
 – Ўнга ҳожат ўйқ; хизмат этсин қўшинда.
 – Тузук гап! Майли у ҳам андак азоб чексин-да...

.....
 Ҳа, отаси ким ўзи?

Княжнин¹

Отам Андрей Петрович Гринёв, ёшлигига граф Миних² хузурида хизмат қилган ва премьер-майор даражасига етганди, 17... нчи йили истеъфога чиққан. Шу вактдан бошлаб, Симбирскдаги ўз қишлоғида турган ва ўша қишлоқли камбағал бир боённинг қизи Авдотья Васильевна Ю. деган қизга уйланган. Биз тўқиз бола бўлганмиз. Опа ва акаларим болалиқда ўлиб кетишган. Яқин қариндошимиз гвардия майори князь Б.нинг илтифоти билан мен Семёнов полкига³ сержантликка ёздирилган эканман. Мен таҳсилни тамом қилгунимча полкда таътилда деб хисобланганман. У замонда биз ҳозиргидан бошқача тарбияланар эканмиз. Беш яшарлигимда жиловдор Савельичнинг кўлига топширилганман. Бу одам тавфиқли, тадбирли киши бўлгани учун менга оға этиб тайинланган. Унинг қарамоғига ўн икки ёшимда русча хат-савод чиқардим ва овчи итларнинг хусусиятлари хақида баҳузур муҳокама юритадиган бўлдим. Бу вақтда отам Москвадан мсье Бопре деган бир французни менга мураббийлик қилиши учун бир йилга етарли мусаллас ва зайдун ёғи билан бирга олдириб келтирди. У одамнинг келиши Савельичга ҳеч ёқмади. У ўзича: «Худога шукур, боланинг уст-боши тоза, ўзи озода, қорни тўқ бўлса, ортиқча чиқим қилиб, бу мсьени ёллашга нима ҳожат бор эди, гўё бу ерда одам куриб кетгандек-а!» деб тўнгиллади. Бопре ўз юртида сартарош, сўнгра Пруссияда аскар бўлган, ундан кейин Россияга муаллим бўлиш учун келган, лекин бу сўзнинг маъносига ўзи ҳам унча тушунмаган экан. У хуш-

¹ Княжин Яков Борисович (1712–1791) – машхур рус драматург-шоири.

² Миних Бурхард Христофорович (1683–1767) – граф, харбий ва сиёсий арбоб.

³ 1762 йилдаги фармонга кўра, офицерлик унвонини олиш учун ўн икки йил оддий аскар бўлиб хизмат қилиши керак эди, шунинг учун боёнлар фарзандларини ёшлигидан ҳарбий хизматга ёздиришган. Бу болалар, уйда туриб хизмат муҳлатини тамом қилгач, балоғатга етганларида офицерлик унвонини олишарди.

феъл, мулойим, аммо ўлгудек енгил табиат, бузук одам бўлиб, энг заиф томони хотин-қизларга ўчлиги эди; шу феъли туфайли кўпинча калтак еб, кечалари инқиллаб чиқарди. Яна (ўзининг айтишича) шишанинг ҳам душмани эмасди, яъни, (русча айтганда) бир қултум ортикроқ ютишни яхши кўйарди. Бизнида мусаллас фақат емак пайтида ва шунда ҳам бир қадаҳдангина берилгани ва кўпинча муаллимларга берилмагани учун менинг Бопре ҳадемай рус ароғига одатланиб қолди, ҳатто бу ичимликни меъдага фойдалироқ ҳисоблаб, ўз юртининг мусалласидан ҳам аълорок кўрадиган бўлди. Биз тез фурсатда иноқ бўлиб кетдик, гарчи шартнома кўра у менга француз, олмон тиллари ва бошқа илмларни ўргатишни ўз зиммасига олган бўлса-да, лекин мендан тез орада унча-мунча русча ўрганиб олишни афзалроқ кўрди, кейин ҳар қайсимиз ўз ишимиз билан машғул бўлавердик. Биз жуда қалин бўлиб кетдик. Менга бошқа муаллимнинг кераги ҳам йўқ эди. Бироқ тақдир бизни бир-биримиздан айирди, сабаби эса бундай бўлди:

Палашка деган семиз, чўтири кир юувучи қиз билан сигир соғувчи Акулька деган қийшиқ аёл иккови бамаслаҳат волидамнинг оёғига ийқилиб, ўзларининг нодонликлари орқасида катта гуноҳ қилиб қўйганлари учун афв сўраганлар ва мсье уларнинг тажрибасизлигидан фойдаланиб алдаганини йиглаб-сиқтаб айтишган. Онам бундай ишларга жуда каттиққўл эди, отамга шикоят қилибди. Отамнинг жаҳли ёмон эди. У дарҳол шум французни чакиртирибди. Мсье ўғлингизга дарс бергаётиди, дейишибди. Отам менинг хужрамга кириб келди. Бопре бу пайтда донг қотиб ухлаб ётганди. Мен ўз ишим билан банд эдим. Шуни айтиш керакки, менга Москвадан география харитаси келтирилган эди. Бу харита бекорга деворда осилиб ётар ва кўпдан бери унинг қофозига сукланиб юардим. Мен шу қофоздан варрак ясамоқчи бўлиб, Бопренинг уйқуда эканини ғанимат билиб, ишга киришган эдим. Варракни ясаб, «Добрая Надежда»нинг бурнига энди дум боғлаётганимда отам кириб келди. Менинг география машгулотимни кўриб қулогимни чўзди, сўнгра югуриб Бопренинг ёнига борди ва уни дағаллик билан уйғотиб, койиди. Бопре гангиб, ўрнидан турмoқчи бўлган эди, тура олмади: бечора француз ўлгудек маст эди. Ўн балога бир даво деганлар. Отам унининг ёқасидан ушлаб, каравотдан турғазди-да, эшикдан улоқтириб юборди ва шу куннинг ўзидаёқ, Савельичнинг баҳтига уни уйдан ҳайдади. Шу билан менинг ўкишим ҳам тамом бўлди.

Мен хали вояга етмаган бола эдим, куним калтар учирив, ҳовлидаги болалар билан сакрамачок ўйнаб ўтарди. Шундай қилиб, ўн олти ёшга ҳам тўлдим. Шунда тақдирим ўзгача бўлди.

Куз кунларининг бирида онам меҳмонхонада асалдан мураббо қайнатар, мен эса тамшаниб, қайнаётган кўпикка қараб турардим. Отам дераза ёнида ўтириб, ҳар йили келадиган Сарой тақвимини¹ ўкирди. Тақвим унга ҳамма вақт зўр таъсир қиларди. Бу китобни отам сира совуқонлик билан ўқиёлмас, ўқиш ҳамиша унинг зардасини қайнатиб юборарди. Унинг феъл-авторини яхши билган онам мудом бу китобни иложи борича панароқ жойга яширишга тиришар, отам баъзан ойлаб бу Сарой тақвимини кўрмасди. У сарой тақвимини топиб олгудек бўлса, соатлаб қўлидан қўймас эди. Отам бир кун тақвимни ўкир экан, орасира елкасини учирив, ўзича: «Генерал-поручик!.. У менинг ротамда сержант эди!.. Ҳар икки рус орденининг кавалери! Хўш, биз қачондан бери..» деди. Оқибат, отам тақвимни каравотга қараб улоқтириди-да, ўйга ботди, унинг бу авзойи яхшилик нишонаси эмас эди.

У тўсатдан онамга қараб: «Авдотья Васильевна, Петрушка нечага кирди?» деб сўради.

– Мана энди ўн еттига қадам қўйди, – деди онам, – Петруша, Настасья Герасимовна холанинг кўзи ожиз бўлган йили туғилган эди, у туғилганда ҳали...

«Хўп яхши, – деди отам унинг сўзини бўлиб, – хизмат қиласидан вақти етибди. Оқсоchlар бўлмасида югуриб-йўргани, капитар тутгани етар».

Тез фурсатда мендан айрилиб қолишини эшишиб, онам шундай ҳангуга манг бўлдики, қўлидаги қошиқ декчага тушиб кетди, кўзидан дув ёш тўкилди. Мен, аксинча тасвир этиб бўлмайдиган даражада севиндим. Хизмат деганда эркинлик ҳақидаги фикрлар, Петербург ҳаётининг хузур-ҳаловати кўз олдимга келарди. Ўзимни гвардия офицери ҳаёл қиласман, офицерликни эса киши саодатининг энг юқори чўққиси деб ҳисоблардим.

Отам ўз ниятини ўзгартиришни ҳам, унинг ижросини орқага суришни ҳам хоҳламасди. Жўнайдиган куним белгиланди. Кетишимдан бир кун илгари отам, бўлажак бошлиғимга мен орқали мактуб юбормоқчи эканини айтиб, қалам билан қофоз сўради.

– Княз Б.га мендан ҳам салом айтишни эсингдан чиқарма, Андрей Петрович, – деди онам, – Петрушадан марҳаматини дариф тутмаслиги-га ишонишимни унга ёз.

¹ 1745 йилдан нашр этила бошлаган бу Сарой тақвимида оддий маълумотлардан ташки, ҳарбийлар ва гражданлардан етишган олий мартабали амалдорлар рўйхати ва император саройининг ишларига оид турли коидалар ҳам бўлар эди.

– Бехуда гапни кўйсанг-чи! – деди отам қовоини солиб. – Нега мен княз Б.га мактуб ёзар эканман?

– Ўзинг Петрушанинг бошлиғига мактуб ёзаман дединг-ку.

– Хўш, деган бўлсам нима?

– Ахир, Петрушанинг бошлиғи княз Б.да, Петруша, Семёнов полкига ёздирилган эди-ку.

– Ёздирилган эмиш! Ёздирилган бўлса менга нима? Петруша Петербургга бормайди. Петербургда хизмат қилиб нима ўрганади? Бекорга санғиши, лақиллашними? Йўқ, аскар бўлиб хизмат қилсин, аскарлик жабдуғини кўтарсин, порохнинг исини хидласин, аскар бўлсин, такасалтанг эмас! Гвардияга ёздирилган эмиш! Қани унинг паспорти? Менга бер.

Онам болалигимда кийгизиб чўқинтирилган кўйлагим турган сандиқасини титиб, паспортимни топди ва қўли қалтираб отамга узатди. Отам паспортни диққат билан ўқиди, сўнгра олдига, столнинг устига қўйди-да, мактуб ёзишга киришди.

Петербургга юбормаса қаёққа юборар экан? Шуни билиш орзуси мени қийнар эди. Икки кўзим отамнинг имиллаб қимирилаётган пат қаламида эди. Нихоят, мактуб битди. Отам уни паспорт билан бир хатжилдга солди, кўзойнагини олиб, мени ёнига чақирди ва:

– Мана сенга мактуб, буни менинг қадрдон дўстим Андрей Карлович Р.га бер. Сен Оренбургга, шу кишининг қўли остида хизмат килишга борасан, – деди.

Шундай қилиб, порлок умидларим пучга чиқди. Кувноқ Петербург хаётининг ўрнига мени узоқ ва чет ерда зерикиш, диққинафаслик куттарди. Бундан бир дақиқа аввал шу қадар хурсандлик билан ўйлаган хизматим, энди кўзимга катта бир фалокат бўлиб кўринди. Энди нима ҳам дейман! Эртасига эрталаб эшик олдига соябон арава келди; унга жомадон, озиқ-овқат солинган қути билан нон ва пироглар тугилган тугунча жойланди, булар уйдаги эркалигимнинг сўнгги аломатлари эди. Ота-онам фотиҳа беришди. Отам хайрлашар экан: «Хайр, Пётр. Хизматини қилишга онт ичган кишинингга сидқидил билан хизмат қил; бошлиқларнинг гапига кулоқ сол, уларнинг ширин сўзларига учма: хизматда амал тама қилма, хизматдан қочма, кийимни янгилигидан, но-мусни ёшлиқдан эҳтиёт қил, деган мақолни ҳамиша ёдингда тут». Онам кўзига ёш олиб, менга ўз сиҳатимни саклашни, Савельичга мендан боҳабар бўлишни тайинлади. Менга қуён терисидан тикилган калта пўстин ва унинг устидан яна тулки терисидан тикилган калта пўстин кийгизишиди. Савельич икковимиз аравага чиқди, йиглаб-сиқтаб жўнадик.

Шу куни кечаси Симбирскка келдик, у ерда бир кун туриб, зарур бўлган нарсаларни олишимиз керак эди, бу ишни Савельичга буюрдим. Ўзим қовоқхонага тушдим. Савельич эрталаб барвакт бозор қилгани кетди. Деразадан ифлос кўчага қараб ўтириб зерикдим, уйларни айлангани чиқдим. Биллиард хонасига кирдим, бу ерда ўттиз беш ёшларда, новча, узун қора мўйловли, авра тўн кийган, кўлида кий, оғзида чубук билан турган бир жанобни кўрдим. У маркер¹ билан биллиард ўйнамокда, маркер ютса бир қадаҳ ароқ ичар, ютқизса биллиард столи остидан эмаклаб ўтар эди. Уларнинг ўйинини томоша қилдим. Ўйин давом этган сайин маркернинг эмаклаши кўпайди, охири столнинг остига кирганича чиқмай қўя қолди. Жаноб худди қабрнинг устида гапираётгандек, унинг шаънига бир қанча сўз айтганидан кейин, менга бир кўл ўйнашни таклиф қилди. Мен бу ўйинни билмаганимдан, таклифини қайтардим. Бу, афтидан унга ғалати туюлди. У менга таассуф назари билан каради; аммо иккимиз гаплашиб қолдик. Бу одамнинг исми Иван Иванович Зурин бўлиб, гусар полкининг ротмистри, Симбирскка рекрут қабул қилиш учун келиб, қовоқхонага тушган экан. Зурин, мени бирга аскарча таом тайёрлашга – ҳар нимаики Худонинг берганини баҳам кўришга таклиф қилди. Мен жону дилим билан рози бўлдим. Овқатлангани ўтирдик. Зурин кўп ичиш хизматига кўниши лозим эканини айтиб, мени ҳам сийлар эди: у харбий хаётдан турли қизиқ латифалар айтиб берди, кулавериб қотиб қолдим, овқат тайёр бўлгунича иккимиз жуда инок бўлиб қолдик. Шунда у менга биллиард ўргатмокчи бўлди. «Бу нарса, – деди у – бизга ўхшаган хизматдаги кишига зарур. Масалан, сафарга чиқилганда бир манзилга тушилади; нима қиласан? Нукул жуҳудларни ураверган билан бўладими?! Но-илож қаҳвахонага борасан, биллиард ўйнайсан; бунинг учун ўйинни билиш керак». Унинг гапи менга жуда маъқул тушди, иштиёқ билан ўрганишга киришдим. Зурин менга далда берар ва тез ўрганишимга ҳайрон қоларди; бир неча ўйиндан сўнг пул тикиб ўйнашни таклиф қилди, қуруқ бўлмасин, ярим тийиндан ўйнайлик, мақсад ютиш эмас, қуруқ ўйнашдан ёмони йўқ, деди. Бунга ҳам кўндим. Зурин бўлса пунши буюрди ва хизматга кўниши зарур эканини таъкидлаб, мени пуншдан ичиб қўришга унади; пунш ичилмаса хизматнинг қизиги бўлмайди, деди. Мен унинг гапига кирдим. Ўйнимиз ҳам давом этарди. Пунши ичганим сайин ботирланавердим. Зарб билан урганимда сокқалар кирғоқларидан ошиб, ерга тушиб кетарди; тажанг бўлиб маркерни ури-

¹ Биллиардда хизмат қилиб турадиган киши.

шар эдим, чунки ўйинни у нотўгри ҳисоб қиласди; борган сари ўйинни оширдим, қискаси ўзимни бирданига эркинликка чиқсан ёш боладек тутардим. Кун охирлаб қолди. Зурин соатига қаради, таёкни қўйди-да, юз сўм ютқизганлигимни билдириди. Андак хижолат бўлдим, чунки пуллим Савельичда эди. Афв сўрадим. Зурин сўзимни бўлиб: «Йўқ, бемалол! Ҳеч ташвиш тортма. Кейинроқ берарсан. Ҳозир Аринушканинг олдига борайлик», деди.

Нима дейсиз энди? Бу кунни бошдан-оёқ бемазагарчилик билан ўтказдим. Кечки овқатни Аринушканикнида едик. Зурин хизматга кўнишиш керак деб, дамба-дам менга ичклилик қуярди. Дастанурхондан турганда, мен оёқда базўр турардим; Зурин мени яrim кечаси қаҳвахонага элтиб қўйди.

Савельич бизни эшик олдида – зинапояда учратди. У хизматга бўлган ихлосимнинг муқаррар нишоналарини кўриб:

– Оббо, Худо урди, сенга нима бўлди? – деди у куюниб. – Қаерда бу аҳволга тушдинг? Оббо Худо урмаса! Умрингда бундай гуноҳ қилмаган эдинг.

– Кўп гапирма, миясини еган чол! – дедим дудукланиб. – Мастга ўхшайсан, кириб ёт... мени ҳам ётқиз.

Эрталаб бошим оғриб турдим. Кеча бўлиб ўтган ишларни зўрга эслар эдим. Чой кўтариб кирган Савельич фикр-хаёлимни бўлди.

– Ҳали эрта, Пётр Андреевич, – деди бошини чайқаб, – ҳозирдан кайфга берилсанг бўлмайди. Сен кимга тортдинг? Отанг ҳам, боонг ҳам пиёниста эмасдилар, назаримда; онанг ҳақида гапириш ҳам ортиқча: умрида квасдан бошқа нарсани оғзига олганмас. Айб кимда? Айб ўша лаънати француз жанобда. Ҳар доим Антильевнанинг олдига югуриб келиб: – Ҳоним, сиздан илтимос, арок берсангиз, – дер эди.

– Мана сенга илтимос арок! Қилғиликни қилди, итвачча. Бир ножинси мураббий қилиб ёллашнинг нима ҳожати бор эди. Гўё, боённинг ўз одамлари қуриб кетгандек!

Уялдим, юзимни тескари ўгириб: «Бор йўқол, Савельич, чой ичмайман» дедим. Лекин Савельич бир насиҳатгўйликка тушса, уни сира ҳам тўхтатиб бўлмас эди. «Мана кўрдингми, Пётр Андреевич, кайфнинг оқибати шундай бўлади. Бош ҳам оғрийди, иштаҳа ҳам йўқолади. Ичадиган киши ҳеч нарсага ярамай қолади... Шўр бодрингнинг сувига асал қўшиб ич, ундан ҳам кўра бир бордок қуюқ мусаллас билан бош оғриқ қилган тузук. Олиб келайми?»

Шу топда бир бола кириб, Зуриннинг мактубини менга узатди. Мактубини очиб, қуйидаги сатрларни ўқидим:

«Азизим Пётр Андреевич, кеча ютқизганинг юз сўм пулни марҳамат қилиб, шу боладан бериб юборишингни сўрайман. Пулга жуда-жуда зориқиб турибман.

Амрингга интизор Иван Зурин»

Нима қилардим, чора йўқ, ўзимни бепарво тутдим; ҳам пулим, ҳам кийим-кечагим, хайрихоҳим, жонкуярим Савельичга мурожаат қилиб, болага юз сўм беришни буюрдим.

– Нечук? Нима учун? – деди у таажжубланиб.

– Шунча қарзим бор, – дедим иложи борича совуққонлик билан.

– Қарз! – деди борган сайн ҳайрон бўлаётган Савельич. – Қачон қарз бўла қолдинг, азизим? Бир балоси бор. Ихтиёринг, нима қилсанг, қилавер, аммо мен бир чака ҳам бермайман.

Шу кескин дақиқада бу қайсар чолга гапимни ўтказмасам, кейинчалик унинг васийлигидан кутулишим қийин бўлади, деб ўйладим ва унга кибр билан қараб дедим:

– Мен сенинг хўжайинингман, сен эса хизматкоримсан. Пул меники. Уни мен ютқиздим, чунки шуни истадим. Сенга ақл ўргатмаслигинг ва буюрилган ишни бажаришингни маслаҳат бераман.

Бу гапни эштиби, Савельич донг қотиб қолди.

– Нима қилиб турибсан? – дедим ғазаб билан бақириб. Савельич ийғлаб юборди.

– Отахоним Пётр Андреевич, – деди титраган товуш билан. – Мени кулфатда адо қилма! Нури дийдам! Мен чолга қулоқ сол: у муттаҳамга мактуб ёз, ҳазиллашиб ўйнаган эдим, бунака бейўриқ пулимиз йўқ дегин. Юз сўм-а! Худойим ўзинг асрар! Ота-онанг ёнғоқдан бошқа ўйинни зинҳор ўйнама деганини айт...

– Ёлғон гапирма, – дедим зарда билан унинг сўзини кесиб. – Пулни бу ёққа бер, йўқса ўзингни қуваман.

Савельич менга чуқур қайғу билан назар ташлади-да, қарзни узгани кетди. Бечора чолга раҳмим келди; аммо эркин бўлишни ва энди ёш бола эмаслигимни исбот қилишни истар эдим. Зуринга сўралган маблағ етказилди. Савельич мени бу лаънати қаҳваҳонадан олиб кетишга шошиларди. Отлар тайёр эканидан хабар берди. Кўнглим ғаш, ичдан ўкиниб, устозим билан хайрлашмай, қачон бўлса-да, у билан яна кўришишни ҳам ўйламай, Симбирскдан кетдим.

П Б О Б

ЕТАКЧИ

*Менинг диёримми бу диёр,
 Бегона диёр!
 Келмадимми мен ўзим сенга,
 Ё учқур от келтирганмиди,
 Йўқ, келтирган мен азаматни –
 Ёшлик зўрим ва дадиллигим,
 Майхонага хос сархушилигим.*

Қадимий қўшик

Йўл бўйи ўйлаганларим унча кўнгил очадиган ўйлар эмасди. Ютқизган маблағим ўша вақтдаги пулнинг кучига кўра хийлагина эди. Симбирск қаҳвахонасида бемаънилик қилганимни тан олиб, Савельич олдида ўзимни гуноҳкор сезардим. Буларнинг ҳаммаси мени кийнарди. Чол араванинг бир четида менга тескари ўгирилиб, тумшайиб ўтирас, индамас, ҳар замон томогини қириб қўярди. У билан ярашгим келар, аммо гапни нимадан бошлашга ҳайрон эдим. Ниҳоят, мен унга:

– Бўлди энди, Савельич! Бас, ярашайлик, айб ўзимда эканини билиб турибман. Кеча ўзим ёмон иш қилиб қўйиб, бекор сенга озор бердим. Бундан кейин бу хилда номаъқулчилик қилмасликка, сенинг гапингга қулоқ солишга ваъда бераман. Бўлди энди, хафа бўлма, ярашайлик, – дедим.

– Эҳ, отахоним Пётр Андреевич! – деди у чукур хўрсаниб. – Ўзимдан хафаман, ҳамма айб менда. Наҳотки, сени қаҳвахонага ёлғиз ташлаб кетсан! Нима қилай? Йўлдан оздим: қудамни қўрай деб, дъячиханинг олдига борибман. Ошнамнинг уйида ўтириб қолибман. Кўргилик-да. Хўжайнининг кўзига қандай кўринаман. Сенинг ичганингни, қимор ўйнаганингни эшитса нима дейди.

Бечора чолнинг кўнглини тинчтиш учун, минбаъд унинг розилигини олмасдан бир тийинга ҳам кўл урмасликка ваъда бердим. У астасекин тинчили, аммо ҳамон бошини чайқаб, баъзида ўз-ўзига «Юз сўм-а! Айтмоққа осон!» деб пўнғилларди.

Хизматга тайин этилган жойимга яқинлашдим. Атроф паст-баланд, тепа ва жарликлардан иборат кўнгилсиз дашт эди. Ҳаммаёқ кор билан копланган. Куёш ботиб борарди. Арава тор йўлдан, тўғриси, мужикларнинг ченалари солган издан борарди. Извошли тўсатдан бир томонга қарай бошлади, ниҳоят телпагини бошидан олди-да, менга ўгирилиб:

- Хўжайин, қайтсак қандай бўларкин, – деди.
 – Нима учун? – деб сўрадим мен.
 – Ҳавонинг авзойи бузук, шамол кўтириляпти, қорнинг тўзишини қаранг.
 – Нима қилибди?
 – Кўрмаяпсизми, ху ана уни? (Извошчи қамчиси билан кун чиқиши томонни кўрсатди).
 – Мен оппок дашт, тиниқ осмондан бўлак ҳеч нарсани кўрмаяпман.
 – Ҳов ана у-чи, булут.

Осмоннинг бир бурчида, уфққа яқин ерда, дарҳақиқат оқ булут пар-часи турар, кўрган киши уни йироқдаги қир деб гумон қиларди. Извошчи булутнинг бўрон аломати эканини айтди.

Бу ерларнинг бўрони қандай бўлишини эшитганман, бутун бошли карвонлар ҳалок бўлганини билар эдим. Савельич извошчининг фикрига қўшилиб, қайтишни маслаҳат берди. Аммо менинг назаримда шамол унча кучли кўринмади, то кучайгунича бекатга етиб олиш умидида бўлиб, хоҳламайгина юришни буюрдим.

Извошчи отларнинг бошини қўйиб берди; аммо кун чиқиши томондан сира кўзини узмасди. Отлар елар, шамол эса борган сари кучаяр эди. Булут юкорилаб, аста-секин бутун осмонни энлади. Майдалаб турган қор бирдан лайлак қорга айланди. Шамол ғувиллади; бўрон бошланди. Кўз очиб юмгунча, корамтири осмон мавж уриб турган қор денгизига айланди. Борлик кўздан йўқолди. «Мана, бегим, фалокат. Бўрон бошланди!», – деди извошчи.

Соябондан бошимни чиқариб қарадим: ҳаммаёқ қоп-қоронги, куюн. Шамол, гўё жони бордек, вахима солиб ғувиллар эди. Савельич иккимизни қор босди; отлар секинлашиб, узоққа бормай тўхтади.

- Нега тўхтадинг? – дедим извошчига токатсизлик билан.
 – Қаёққа юрай? – деди извошчи ченадан тушаётib. – Қаерга келиб қолганимизни билмасам: йўл йўқ, ҳаммаёқ қоп-қоронги.

Мен извошчини сўка бошлагандим, Савельич унинг тарафини олди:

– Сен гапга кирсанг экан, – деди у зарда қилиб. – Саройга қайтиб, овқат еб, чой ичиб эрталабгача тинчгина дам олар эдик, бўрон босилганидан кейин йўлга чиқардик. Мунча шошилмасак? Тўйга бораётимизми!

Савельич ҳақ эди. Илож йўқ. Қор нуқул ботмонлаб ташларди. Араванинг ёнида қор уюми пайдо бўлди. Отлар бошларини куйи солиб турар ва ҳар замон силкиниб қўярди. Извошчи айланиб юрар ва

нимада қилишини билмай, отларнинг абзалини тузатарди. Савельич вайсагани-вайсаган; бирон уй ёки йўл белгисини кўриш умидида чор атрофга қарадим, қоп-қора қуондан бошқа ҳеч нарса кўринмасди... Тўйқусдан алланарсанинг қорасини кўриб қолдим. «Ҳой, извошли!» – қичқирдим, – қара, ана у ёқда корайиб кўринаётган нима? Извошли синчиклаб қаради.

– Қаёқдан билай, хўжайнин, – деди у ўрнига ўтираётиб, – арава десанг арава эмас, дараҳт десанг дараҳтга ўхшамайди, қимиrlаяпти шекилли. Балки бўридир, ё одамдир.

Мен, шу қорага қараб юришни буюрдим, у ҳам, биз томон юриб келаверди. Бир зумда етиб олдик, қарасак одам экан. Шунда извошли:

– Ҳой, яхши одам, – деб қичқирди. – Йўлни билмайсанми?

– Йўл-ку шу-я, мен йўлда турибман, – деб жавоб берди йўловчи. – Юриб бўлмагандан кейин бу йўлдан нима фойда?

– Менга қара, оғайни, – дедим унга. – Сен бу ерларни биласанми? Бизни қўшхонага элтиб қўймайсанми?

– Бу ерларни биламан, – деб жавоб берди йўловчи. – Худога шукр, қадамим етмаган жой йўқ. Ҳавони кўрмайсизми: бундай вактда албатта адашасан, киши. Яххиси шу ерда туриш керак, бўрон тўхтасин, ҳаво очилсин, йўлни юлдузларга қараб топиб оламиз.

Унинг совуққонлиги менга дадиллик берди. Таваккал қилиб кечани шу даштда ўтказар эканман-да, деб тургандим, йўловчи бирдан аравага чиқди-да, извошлига:

– Э, Худога шукр, манзил узоқ эмас экан, ўнгга бур-да, хайда, – деди.

– Нега ўнгга бураман? – деди извошли ажабланиб. – Қани йўл? Гапингни қара-ю. От ҳам биронники, хомут ҳам менини эмас деб, бур деяверар экансиз-да!

Извошининг гапи менга маъқул тушди.

– Дарҳақиқат, – дедим. – Нега манзил яқин деб, ўйлайсиз?

– Чунки, – деди йўловчи, – шамол шу томондан эсяпти. Димоғимга тутун иси келяпти, демак қишлоқ яқин.

Унинг зийраклиги ва сезирлигига ҳайрон қолдим. Извошини йўлга солдим. Қалин қорда отлар чираниб қадам ташлар эди. Арава секин ўрмалаб, гоҳ қорга ботади, гоҳ чуқурликка тушиб кетади, гоҳ ўнгга, гоҳ сўлга чайкалади. Киши худди мавж уриб турган денгизда сузуб бораётгандек бўлади. Савельич бикинимга урилиб инқиллайди. Пардани туширдим, пўстинга ўралиб олдим, бўрон аллалайди, соябон тебранади; мени уйқу элтди.

Бир туш кўрдим, бу туш сира ёдимдан чиқмайди, бошимдан ўтган воқеалар хақида ўйлаб кўрсам, ҳануз бу тушни одатдан ташқари бир каромат деб биламан. Ўқувчи кечирап, чунки хурофотга накадар нафрат кўзи билан қаралса-да, бидъатга берилиш – инсон учун туғма иллат экани тажрибадан маълум.

Мен рухан шундай бир ҳолатда эдимки, бунда мавжудлик хаёлотга ён бериб, унга қўшилиб, кўз уйқуга илинган пайтдаги тушга айланади. Назаримда, бўрон ҳануз қутурмоқда, биз эса ҳамон қор саҳросида адашиб юрибмиз... Бирдан кўзимга дарвоза кўринди, биз шу дарвозага кирдик, бу – ўзимизнинг ҳовлимиз эмиш. Дабдурустдан хаёлимга келган нарса: отам, ночор қайтганимни билмай, аччиғи келмаса ва бу қайтишни атайлаб қилинган ўзбошимчалик деб билмаса гўрга эди, деган хавф бўлибдир. Шошиб аравадан тушдим, қарасам: эшикнинг олдидаги мени қаршилаб онам турибди, у жуда хафа кўринади.

– Секин, – деди онам, – отанг хаста, ўлим тўшагида ётибди, сен билан розилик тилашмоқчи.

Кўркиб кетдим, онамнинг ортидан ётоқقا кирдим. Қарасам, уй гира-шира; отамнинг тўшаги ёнида кишилар турибди, ҳаммаси ғамгин. Секин отамнинг ёнига бордим; онам пашшахонанинг бир тарафини кўтариб:

– Андрей Петрович, Петрушка келди; сенинг бетоблигингни эшитиб қайтибди, дуо қил, – дедилар.

Мен тиз чўкиб, беморга тикилдим. Нимани кўрдим денг?.. Отамнинг ўрнида қора соқолли бир мужик ётар, менга кулиб қаарди. Мен ҳайрон бўлиб онамга қарадим.

– Бу қандай гап? Ахир, бу отам эмас. Нега мен мужикнинг дуосини олар эканман? – дедим.

– Барибир, Петрушка, – деди онам, – бу сенинг отанг ўрнидаги киши. Қўлини ўп, сени дуо қилсин.

Мен кўнмадим. Шу вақт мужик иргиб ўрнидан турди-да, орқасидан болта олиб ҳар томонга ҳамла қила бошлади. Қочмоқчи бўлдим... лекин қочолмадим. Уйнинг ичи ўликка тўлди, мен уларга қоқиласман, кўлмак бўлиб ётган қонга тойиламан... Ваҳимали мужик ширин сўз билан мени ёнига чақириб:

– Кўрқма, менинг дуйимни ол, – деди.

Мен ҳаддан ташқари кўрқдим, гангидим... Шу онда уйғониб кетдим; арава тўхтаган эди. Савельич қўлимдан тортиб:

– Тушинг хўжайин, келдик, – деди.

– Қаерга келдик? – дедим, кўзимни уқалаб.

– Карвонсаройга. Худо йўлимини ўнглади, деворга тўқнаш келиб қолибмиз. Тушинг, хўжайин, тезроқ тушиб исининг, – деди Савельич.

Аравадан тушдим. Бўрон гарчи бир оз босилган бўлса-да, ҳамон давом этарди. Қоронги, ҳеч нарсани кўриб бўлмайди. Саройбон қўлидаги чироқни этагининг остида тутиб, бизни дарвоза олдида кутиб олди ва мени меҳмонхонага бошлаб кирди. Меҳмонхона тор, аммо озодагина; жинчироқ ёниб турарди. Деворда битта милтиқ, бир казакча телпак осиғлиқ.

Саройбон олтмиш ёшларда, аммо ҳали анча тетик бир мужик эди. У асли Яиқ казакларидан экан. Савельич ортимдан озиқ-овқат қутисини олиб кирди ва чой қайнатиш учун ўт сўради. Бир умр чойга ҳозиргидек ташна бўлмагандим. Саройбон ўт қидириб кетди.

– Етакчи қани? – дедим Савельичга.

– Мен шу ердаман, жаноб, – деди юкоридан кимдир.

Юкорига қарадим, қоп-қора соқол, иккита чақнаб турган кўзни кўрдим.

– Ҳа, оғайни совқотдингми? – дедим.

– Бир қават чопон билан совқотмайдими киши! – деди етакчи. – Яширишга не ҳожат, пўстиним бор эди, кеча қаҳвахонага гаровга кўйдим; совуқ унчалик қаттиқ кўринмаганди.

Шу топда саройбон қайнаб турган самоварни кўтариб кириб келди. Етакчини бир пиёла чойга таклиф қилдим, у юкоридан тушди. Унинг ташки киёфаси кўзимга жуда ажойиб кўринди. Ёши қирқларда бўлиб, ўрта бўйли, озғин, елкалари кенг эди. Қоп-қора соқолига оқ оралаған, катта-катта кўзлари ўйнаб турарди. Истараси иссик, аммо маккор кўринади. Сочи айланасига қирқилган; устида жулдур чопон, татар чолвори. Унга бир пиёла чой тутдим; у чойни хўплаб, афтини буришириб:

– Жаноб, марҳамат қилиб бир бордоқ мусаллас буюрсангиз; биз закларга чой тўғри келмайди, – деди.

Мен дарров хўп, дедим ва истагини бажо келтирдим. Саройбон жавондан катта шиша билан бордоқ олиб, унинг ёнига келди ва юзига қараб:

– Э, ҳа, тағин биз тарафларга келибсиз-да! Қаерлардан Худо етказди? – деди.

Етакчи маъноли қилиб кўз қисди-да, мақол билан жавоб берди:

– Елдим, югурдим: сой ошдим, қир ошдим, бу ерга тушдим. Хўш, ўзларинг қалайсизлар?

– Ўзимиз – бир нав! – деди саройбон ҳамон кинояли сўзида давом этиб. – Кечки ибодатга занг ура бошлаган эдик, руҳонийнинг

хотини қўймади: руҳоний меҳмондорчиликда, қишлоққа шайтон оралаган.

– Кўйсанг-чи, оға, – деди менинг саёғим, – ёмғир ёғса қўзиқорин чиқади; қўзиқорин чиқса териб олгани сават топилади. Энди-чи (у яна кўз қисиб қўйди) болтантгни яшири: ўрмон қўриқчиси юрибди. Жаноб! Сизнинг эсончилигингизга!

Шу сўзларни айтиб, бордоқни олди, чўкинди ва бир кўтарди. Кейин, менга таъзим қилиб, юкорига чиқиб кетди.

Бу хуфия гапдан ўша пайтда ҳеч нарса тушунмадим, кейин билсам, сўз 1172 йилда бўлган исёндан кейин ўша вақтда янгигина итоат эттирилган Яиқ қўшинининг ишлари ҳакида борган экан. Савельич бу сўзларга жуда малолхотирлик билан қулок солди. У гоҳ саройбонга, гоҳ етакчига гумонсираб қарапди. Сарой ёки ўзларicha айтганда, қалъа, бир четда – даштда, қишлоқдан узоқда бўлиб, худди ўгрихонанинг ўзи эди. Аммо бошқа илож йўқ. Бу ердан жўнашни хаёлга ҳам келтириб бўлмасди. Савельичнинг ташвишларига қулгим қистарди. Ётадиган бўлиб, сўрига чиқиб чўзилдим. Савельич печканинг устига чиқиб кетди; саройбон – пастда ётди. Ҳадемай ҳамма уйқуга кетиб, хуррак отди, мен ҳам ўлиқдек қотиб қолибман.

Эрталаб хйла кеч уйғондим, бўрон тинибди. Қуёш порламоқда. Бепоён даштни қоплаган қор ярқираб қўзни қамаштиради. Арава қўшилган. Саройбоннинг ҳақини бердим; жуда кам ҳақ талаб қилди, ҳатто Савельич одатдагича савдолашиб ҳам ўтирамди; кечаги шубҳалар ҳам кўнглидан чиқиб кетди. Мен етакчини чакирдим, кўрсатган ёрдами учун унга миннатдорлик билдиридим ва ярим сўм ароқ пули беришни Савельичга буюрдим. Савельич қовоғини солиб:

– Нима учун? Ярим сўм эмиш, – деди. – Уни саройга келтириб қўйганимиз учунми? Ўзинг биласан, хўжайн, ортиқча ярим сўмимиз йўқ, Ҳар кимга ароқ пули бераверсанг, ҳадемай ўзимиз оч қоламиз.

Савельичнинг сўзига ортиқча эътиroz билдирамадим, чунки ўз ваъдамга кўра, пул тамоман унинг ихтиёрида эди. Бироқ мени бир оғатдан бўлмаса ҳам, камида жуда ёмон бир аҳволдан кутқарган кишини хурсанд қилолмаганимга ачиндим. – Хўп, майли, – дедим совуққонлик билан. – Агар ярим сўм бергинг келмаса, кийимларимдан биронтасини бер. Усти жуда юпун экан. Унга қуён терисидан тикилган пўстинимни бер.

– Ҳой, отахоним Пётр Андреевич! – деди Савельич. – Сенинг пўстинингни нима қиласди у? Бу ит, пўстинни биринчи учраган майхонада сотиб ичади.

– Сенга бунинг ташвиши тушмай қўя қолсин, – деди саёғим. – Сотиб ичаманми, йўқми, сенга нима қайфу? Тақсирим устиларида ги пўстинни менга инъом қиляптилар, бу киши шуни истади; сенек хизматкорнинг вазифаси – буюрилган ишни гап қайтармасдан адо қилишдир.

– Худодан кўркмайсан, сен ўгри! – деди Савельич аччиғи келиб. – Кўриб турибсанки, боланинг ақли етмайди, унинг соддалигидан фойдаланиб, шилмоқчи бўласан. Бунинг пўстинини нима қиласан? Ахир, пўстин мурдор эгнингга сигмайди ҳам.

– Ақл ўргатма, – дедим Савельичга, – ҳозироқ пўстинни олиб чиқ.

– Ё, Парвардигор, – деди Савельич инқиллаб. – Янгигина пўстин-а! Кошки бир тузук одамга берилса, бир пиёниста саёққа-я!

Ҳар қалай пўстин олиб чиқилди. Мужик дархол уни кийиб кўрди. Ҳақиқатан, менга ҳам кичик келиб қолган пўстин унга бир оз торлик қилди. Бироқ у бир иложини қилиб кийди, пўстиннинг чоклари сўқила бошлиди. Буни кўриб Савельичнинг фифони чиқди. Қилган инъомимга саёқ жуда севинди. У мени аравагача кузатиб қўйди ва таъзим қилиб:

– Қуллуқ, жаноб! Қилган яхшилигингиз Худодан қайтсин. Сахийлигингизни умрбод эсимдан чиқармайман, – деди.

У ўз йўлига кетди. Мен эса, Савельичнинг тажанг бўлишига парво килмай, йўлда давом этдим. Ҳадемай кечаги бўрон ҳам, етакчи ҳам, пўстин ҳам ёддан чиқди.

Оренбургга келиб, тўғри генералнинг олдига бордим. Генерал новча, аммо қариб буқчайган бир одам эди. Узун соchlари оппоқ. Эгнидаги ўнгган мундири Анна Ивановна¹ замонидаги аскарни эсга туширап, сўзида олмон талаффузи жуда билиниб турарди. Отамнинг мактубини бердим. Унинг исмини эшитган ҳамон менга ялт этиб қараб:

– Э, қойил! – деди у. – Андрей Петрович яқиндагина сенек бола эди, энди кап-катта ўғли бор-а! Ох, умр, умр.

У мактубни очди-да, босиқ товуш билан ўқий бошлиди: «Марҳаматли Андрей Карлович, ишонаманки, жанобингиз...» Такаллувфнинг нима ҳожати бор эди? Вой, айб эмасми? Албатта, ҳаммадан кўра интизом зарур, аммо наҳот ўзининг қадрдонига шундай мактуб ёэса!.. «Жанобингиз унутмагандирлар...» ҳм... «ва... марҳум фельдмаршал Миних... сафардан... шунингдек, Каролинка ҳам...» Э, биродарим-эй! Ёшлигимизда қилган шўхликларимиз ҳали ёдида экан-да? «Энди муддаога келайлик... Ҳузурингизга фарзанди нокобилимни юбордим...» ...

¹ Аёллардан чиққан рус императори (1693–1740).

Ҳм... «Қаттиққұл бўлгайсиз...». «Қаттиққұл нима дегани? Бу рус ибораси бўлса керак... «Қаттиққұл бўлиш»нинг маъноси нима?» деб менга қаради.

– Бу, – дедим, иложи борича ўзимни маъсум кўрсатишга тиришиб, – яхши муомала қилиш, унча ҳам қаттиқ тутмаслик, кўпроқ эрк бериш деган сўз.

«Ҳм, тушундим... ва унга эрк берилмасин»... йўқ, қаттиққұл бўлишнинг маъноси бу эмасдир... «Ушбунинг билан... унинг паспортини юбордим...» «Қани паспорт? Ҳа, буёқда экан...» «Семёнов полкига ёзилсин...» «Яхши, тузук, ҳамма айтганини қиласман...» «Гарчи бирон мансабда бўлмасам ҳам... қадрдан дўст ва ўртоқ бўлганим туфайли сени ғойибона қучоқлашга ижозат берасан...» Ҳа, ана, оқибат фаҳми етибди... ҳоказо ва ҳоказо... Хўш, отахоним, – деди у мактубни ўқиб бўлганидан кейин паспортиимни бир томонга қўя туриб, – ҳаммасини бажараман: сени полкка офицер қилиб юбораман, фурратни ўтказмаслик учун эртагаёқ Белогор қалъасига жўна. У ерда капитан Миронов деган яхши, ҳалол бир одамнинг қўл остида бўласан, чинакам хизматни кўрасан, интизомга ўрганасан. Оренбургда нима ҳам қиласар эдинг, йигит кишига бекорчилик зарар. Бугун бизникига тушликка марҳамат қил».

Ахвол борган сайин ёмонлашяпти! Ўзимча ўйлардим: онамнинг қорнида, деярли гвардия сержанти бўлганим менга нима қилиб берди! Бу мени қаерга олиб келди. Полкка ва қирғиз-қозоқ чўлларининг чегарасидаги узоқ бир қалъага!.. Андрей Карловичнинг уйида кекса адъютант билан бирга учовимиз тушлик қилдик. Унинг дастурхонида олмонларга хос тежамкорлик яққол кўриниб турарди. Мени тезроқ гарнизонга жўнатаётганининг қисман сабаби – унинг меҳмонни хушламагани, меҳмон кутишга оғринганлиги бўлса керак, деб ўйлайман. Эртасига генерал билан хайрлашиб, тайин этилган жойимга кетдим.

ІІІ Б О Б

ҚАЛЪА

*Туар жойимиз аскарий құрғон,
Ичганимиз сув, еганимиз нон;
Ёбуз душманлар бүлгали меҳмон –
Келиб қолсалар агар биз томон,
Меҳмонлар учун бошлаймиз базм,
Түп ўқларин еб, қилишигай ҳазм.*

Аскар күшиги

*Қадимий одамлар, отахоним
Недоросль*

Белогор қалъаси Оренбургдан қирқ чақирим бер이다. Йўл Яик дар-
ёсининг қирғоқларини ёқалаб кетади. Дарё ҳали музламаган, оппок
кор билан қопланган бир хилдаги қирғоқлар орасида тўлқинланиб
оққан сув кўрғошин рангидა қорайиб кўринади. Нариги томонда
қирғиз чўллари. Фикрга чўмдим, бу фикрларнинг кўпи кўнгилсиз
фикрлар эди. Гарнизон ҳаётига унча қизиқмас ҳам эдим. Бўлажак
бошлиғим – капитан Мироновни кўз олдимга келтиришга уриндим,
назаримда, у қаттиқкўл, ўз хизматидан бошқа ҳеч нарсани билмайдиган,
сал нарсага мени қамаб, нон билан сувгина беришга тайёр,
баджаҳл бир чол бўлиб кўринарди. Қоронғи ҳам туша бошлади. Биз
хийла секин борар эдик.

- Қалъага яқин қолдими? – деб сўрадим извошчимдан.
- Яқин қолди, ана, кўриниб турибди, – деди у.

Вахимали истеҳкомлар, кўрғон ва тепаликлар кўринармикан, деб
атрофга қарадим; аммо ёғоч девор билан ўраб олинган кичкина бир
қишлоқчадан бўлак нарса кўринмади. Бир томонда қор босаёзган уч-
тўрт ғарам пичан, яна бир томонда қаноти тахтадан ясалган, қийшайган
ел тегирмон.

- Қани қалья? – деб сўрадим ажабланиб.
- Ҳу, ана, – деди извошчи қишлоқчани кўрсатиб.

Ҳадемай шу қишлоқчага кириб бордик. Дарвоза ёнида эски чўян
замбарак турарди; кўчалар қинғир-қийшиқ, тор; пастак-пастак уйлар,
буларнинг кўпи похол билан ёпилган. Мен извошчига комендантнинг
олдига олиб боришни буюрдим, бир дақиқадан сўнг соябон арава,
ёғочдан бино қилинган черков яқинидаги тепаликка солинган кичкина
ёғоч иморат олдида тўхтади.

Мени ҳеч ким кутиб олмади. Айвончага кириб, даҳлиз эшигини очдим. Кекса бир ногирон, стол устида ўтириб, яшил мундирининг ёнгига ямоқ соларди. Комендантни кўрмоқчи эканлигимни айтдим. У:

– Кира қол, отахоним, – деди. – Ўзлари уйда.

Бурунги замон расм-русуми бўйича ясатилган озодагина бир бўлмага кирдим. Бурчакда идиш-товоқ жавони турибди; деворга ойнали рамкага олинган офицерлик дипломи осилган; унинг ёнида арzonгаров суратлар: уларда Кистрин ва Очаковнинг¹ олиниши, келин танлаш, мушукни дағн қилиш² тасвир этилган. Дераза ёнида бир кампир ўтирибди, унинг устида нимча-тўн, бошида рўмол. У офицер мундири кийган филай чол тутиб турган калавани ёзмоқда эди. «Ҳа, болам, нима дейсиз?» деди у, ишидан бошини кўтармай. Мен хизматга келганимни ва бўйнимдаги вазифага кўра, жаноб капитанга учрашим кераклигини айтдим. Филай чолни комендант фаҳмлаб, шу сўзлар билан унга мурожаат қилаётган эдим, кампир сўзимни бўлди:

– Иван Кузмич уйда йўқ, – деди кампир. – Герасим ҳазратникига меҳмон бўлиб кетган, мен унинг рафиқаси бўламан. Марҳамат қилиб ўтириб тур.

Кампир бир қизни чақириб ўнбошини айтиб келгани юборди. Чол бир кўзлаб менга мароқ билан қаради. «Сўрашга ҳаддим сигадими, – деди у, – жаноблари қайси полқда хизмат қилган эдилар?» Саволига жавоб бердим. «Сўрашга ҳаддим сигадими, – деди у яна, – нима учун гвардиядан гарнizonга ўтишни ихтиёр этдилар?» Бошлиғимнинг амри билан ўтганимни айтдим. «Эҳтимол, гвардия офицерига номуносиб бирон иш қилгандирлар?» деди эринмаган чол. «Бас, беъмани гапларни гапираверма! – деди капитаннинг рафиқаси, – кўриб турибсанки, йўлдан чарчаб келган одам; гапинг кулогига киармиди... (кўлингни тўғрироқ тут...) Сен, болам, – деди у менга қараб, – бу чекка ерга келганингга хафа бўлма. Сен бу ерга келганларнинг биринчиси ҳам эмассан, охиргиси ҳам. Сабр қилсанг ўрганиб кетасан. Алексей Иванович Швабриннинг одам ўлдиргани учун бу ерга юборилганига беш йил бўлади. Қандай гуноҳнинг касрига қолганини Худо билади; бир поручик билан шаҳардан ташқарига чиқишибди, ўзлари билан қилич ҳам олишган экан, иккови қиличбозлик қилибди-ю, Алексей Иванович

¹ Кистрин – 1758 йилда рус аскарлари томонидан Пруссияда қамал қилинган қалъа. Очаков 1787–1788 йиллардаги урушда руслар томонидан босиб олинган турк қалъаси.

² Пётр I га аталган сатирик карикатура.

поручикни икки гувоҳ олдида ўлдириб қўйибди. Нима дейсиз энди? Гуноҳ қилиш ҳар кимнинг ҳам қўлидан келаверади».

Шу пайтда ўнбоши кирди. У ёш, хушқомат бир казак эди.

– Максимич! – деди унга кампир. – Бу офицер жанобларига озодарок бир уй бер.

– Бош устига, Василиса Егоровна, – деди ўнбоши. – Жанобларини Иван Полежаевнинг уйига жойлаштирсаммикан?

– Бўлмаган гап, Максимич, – деди кампир, унинг уйи шундок ҳам ўзига торлик қилади; у менга яқин одам, биз бошлиғи эканимизни эсидан чиқармайди. Офицер жанобларини... исмингиз, отангизнинг исми нима, болам?

– Пётр Андреевич.

– Пётр Андреевични Семён Кузовнинг олдига олиб бор. У товламачи, отини менинг боғчамга қўйиб юборибди. Хўш, Максимич, нима гаплар?

– Худога шукр, тинчлик, – деди казак, – фақат капрал Прохоров ҳаммомда Устения Негулина билан бир жом иссиқ сув талашиб уришибди.

Иван Игнатич! – деди капитаннинг аёли ғилай чолга қараб. – Прохоров билан Устениянинг жанжалини текшир, айб кимда эканлигини бил. Иккотига ҳам жазо бер. Хўп, Максимич, Худо йўлдошинг бўлсин, бор энди, Пётр Андреевич, Максимич сизни уйингизга элтиб қўяди.

Таъзим қилдим. Ўнбоши мени қалъанинг бир бурчида – дарёнинг баланд қирғоғидаги бир уйга бошлаб борди. Уйнинг ярмида Семён Кузов оиласи билан турар экан, қолган яrimини менга беришди. Бу анчагина озода бўлма бўлиб, тахта билан иккига бўлинган эди. Савельич нарсаларни саронжомлашга киришди; мен кичкина деразадан ташқарини томоша қилдим. Қаршимда бепоён дашт. Ёнбағирликда бир нечта уй бўлиб, кўчада бир нечта товуқ донлаб юради. Бир кампир, эшик олдидаги зинапояда туриб чўчқаларни чақирап, чўчқачалар бараварига ғўқ-ғўқ деб, унинг чақириғига товшуш беришарди. Қаранг, ёшлигимни қандай ерда ўтказишга маҳкум бўлганман-а! Мени ғам босди; деразанинг ёнидан кетдим ва Савельичнинг вайсашига қарамай, овқат емасдан ётдим. У бўғилиб, ҳадеб вайсар эди: «Ё, Парвардигор! Ҳеч нарса емайди-я! Боласи бетоб бўлиб қолса, хоним нима дейдилар?»

Эртаси куни энди кийинаётганимда эшик очилиб, ёшгина, ўрта бўйли, бир қадар хунук бўлса ҳам ғоятда тетик, тўла юзли бир офицер кирди.

– Сиз билан танишгани тўғри келаверганим учун афв этасиз, – деди у французчасига. – Келганингизни кеча эшигандим, аммо дийдорингизни кўриш истаги шунчалик кучли эдикси, сабр қилолмадим. Бу ерда бир мунча вақт турганингиздан кейин, буни ўзингиз ҳам билиб оларсиз.

Бу одам дуэль учун гвардиядан чиқарилган ўша офицер эканини пайқадим. Дарҳол танишдик. Швабрин хийла ақлли одам экан. Гаплари ўткир ва маъноли. У, коменданнтнинг оиласи, улфатлари ва менга насиб буюрган бу ўлка ҳакидаги жуда хушчақчақлик билан сўзлаб берди. Мен завқланиб, кулиб ўтирган эдим, келганимда мундир ямаб ўтирган ўша филай ногирон кирди ва мени Василиса Егоровнанинг номидан тушлика тақлиф қилди. Швабрин ҳам мен билан бирга борадиган бўлди.

Коменданнтнинг уйига яқин майдонда узун сочли, учбурчак шляпалар кийган йигирма чоғли кекса ногиронларни кўрдик. Барчаси бир қатор тизилишганди. Олдинда новча, тетик, бошига қалпоқ, эгнига хитойи авратўн кийган комендант чол турарди. У бизни кўриб, олдимизга келди ва менга бир неча оғиз ширин сўз айтиб, яна бўйруқ беришда давом этди. Биз машқни томоша қилгани тўхтадик; лекин у, Василиса Егоровнанинг олдига киришимизни сўраб, ўзи ҳам хозир ортимиздан киражагини билдириди. «Бу ерда нимани ҳам томоша қилардиларинг» деб кўйди.

Василиса Егоровна бизни соддагина, очиқ чехра билан кутиб олди ва менга, худди эски танишидек муомала қилди. Ногирон чол билан Палашка дастурхон ёзишди.

– Нима бу, бизнинг Иван Кузмич бугун жуда машққа берилиб кетди! – деди коменданнтнинг аёли. – Палашка, хўжайнини емакка чақириб кел. Айтгандек, Маша қани.

Шу топда ўн саккиз ёшларга кирган юмaloқ ва қизил юзли бир қиз кирди; сарғиш сочини силлиқ қилиб тараган, қулоклари қипқизил ёнар эди. У дабдурустдан менга унинг таърифини қилиб: «Капитаннинг қизи Маша мутлақо аҳмоқ қиз» деган эди. Марья Ивановна бурчакка ўтириб, кашта тикиш билан машғул бўлди. Таом келтирилди. Василиса Егоровна бу орада эрини кўрмай, унга яна Палашкани юборди. «Мехмонлар маҳтал, шўрва совиб қолади дегин, Худога шукр, машқ деган нарса қочмайди; бақириш мовути билан бўлар». Тезда капитан, унинг ортидан филай чол кирди.

– Нима бўлди, тақсирим? – деди Василиса Егоровна. – Таом аллақачон сузилгану, чақириган билан келмайсан.

– Хизматчилик-да, Василиса Егоровна, аскарларга таълим берадётган эдим, – деди Иван Кузмич.

– Биламиз! – деди капитаннинг аёли. – Фақат номига таълим: на улар хизматга лойик бўлади, на ўзинг бир наф кўрасан. Худо, деб уйда ўтирганинг яхши эди. Азиз меҳмонлар, қани, дастурхонга марҳамат қилинглар.

Овқатланишга ўтирдик. Василиса Егоровна тинмасдан менга устмавуст саволлар берар эди: менинг ота-онам ким, улар хаётми, қаерда туришади, мол-мулклари борми? Отамнинг уч юз дехқони борлигини эшишиб:

– Айтмоқка осон! Дунёда хўп бой одамлар бор-да! – деди. – Бизнинг қўлнимизда биттагина қиз – Палашка бор холос, жаноб; Худога шукр, бир кунимиз бўлса ўтиб турибди. Бир ташвишимиз мана шу Маша: бўйи етиб қолди, лекин сепини сўрасангиз? – сиркатароқ, бир тутам новда¹, олти пул чақа (Худо кечирсин!), бу билан ҳаммомга борган тузук. Яхши бир одам чиқса-ку, дуруст-а, бўлмаса қари қиз бўлиб ўтиради. Мен унинг қизи Марья Ивановнага қарадим: у қип-қизарид кетди, ҳатто олдидаги ликопчага кўзидан бир-икки томчи ёш томди. Бечора кизга раҳмим келди, гапни бошқа ёққа буришга шошилдим.

– Қалъаларингга бошқирдлар ҳужум қилмоқчи деб эшилдим, – дедим томдан тараша тушгандек.

– Кимдан эшилдингиз, жаноб? – деди Иван Кузмич.

– Оренбургда менга шунака дейишди, – дедим.

– Бўлмаган гап! – деди комендант. – Кўпдан бери бунақа ҳодиса бўлгани йўқ. Бошқирдлар қўркиб қолган ҳалқ, қирғизларнинг ҳам адаби берилган. Бизга ҳужум қилгани ҳадди сигадими, қани ҳужум қилиб қўрсин, шундай таъзирини берайин, ўн йил чурқ этмасин.

– Шундай хавф остида қолган қалъада тургани сиз ҳам кўрқмайсизми? – дедим капитаннинг рафиқасига қараб.

– Ўрганиб қолганман, жаноб, – деди у. – Полқдан бу ерга юборилганимизга йигирма йил бўлди, янги келган вақтларимизда бу гайридинлардан шундай қўрқар эдимки, Худо кўрсатмасин! Уларнинг жун телпакларини кўрсам, қийқириқларини эшилсам, ишонасизми жаноб, юрагим орзиқиб кетарди! Энди бадкорлар қалъа атрофида юришибди деган хабарни эшилсам, ўрнимдан ҳам турмайман.

– Василиса Егоровна юраги дадил аёл, – деди Швабрин керилиб. – Буни Иван Кузмич ҳам тасдиқлайди.

¹ Бир тутам новда – ҳаммомда ишлатилади.

– Бу аёл қўрқоқлардан эмас, – деди Иван Кузмич.

– Марья Ивановна-чи? – дедим. – Бу киши ҳам сиздек жасурми?

– Машами? – деди онаси. – Йўқ, Маша қўрқоқ. Ҳалигача милтиқнинг товушидан қўрқиб, дағ-дағ қалтирайди. Бурноғи йили туғилган кунимда Иван Кузмич замбарагимизни оттирган эди, бечора қизгинам кўркувдан ўлаёзди. Шундан бери куриб кетгур замбаракни отмаймиз!

Овқатланиш якунига етиб, ўрнимиздан турдик. Капитан рафиқаси билан ётоққа кириб кетди; мен эса, Швабрин билан кетдим ва бутун кечани у билан бирга улфатчиликда ўтказдим.

IV Б О Б

ДУЭЛ

– *Марҳамат қилгайсан, тўғри тургайсан,
Сенга қандай тиг тортишиим кўргайсан!*

Княжнин

Бир неча ҳафта ўтди, Белогор қальасидаги ҳаётим чидаб бўларликкина эмас, ҳатто ўзимга ёқиб ҳам қолди. Комендант оиласи мени яқин қариндошдек қабул қилди. Улар, эр-хотин, жуда яхши кишилар эди. Иван Кузмич аскар боласидан чиққан офицер бўлиб ўқимаган, содда, аммо кўнглида кири йўқ, яхши одам эди. У хотинининг измидан чиқмас, бу унинг бегамлигига мос келарди. Василиса Егорова хизмат ишларига ҳам ўзининг уй-рўзгор ишига қараган кўз билан қарап ва қальяни, худди ўз уйини бошқаргандек бошқарарди. Марья Ивановна ҳам тез фурсат ичидан мендан чўчимай қўйди. Икковимиз қалин бўлиб қолдик. Қарасам: ақлли, зийраккина қиз экан. Аста-секин мен бу эзгу оиласа, ҳатто гарнizon поручиги ғилай қария Иван Игнатъичга ҳам ўрганиб қолдим. Бу ғилай қария ҳақида: «У Василиса Егоровна билан маҳрамлик қилар эмиш» деб Швабрин миш-миш тарқатган экан, лекин бу зигирча ҳам ростга ўхшамайди, аммо Швабрин бу ҳакда ҳеч тап тортмай гапиради.

Менга офицерлик унвони берилди. Хизмат менга оғирлик қилмас эди. Худонинг паноҳида бўлган бу қальада на таълим бор, на кўрик, на коровул қўйилади. Комендант хуши келган чоғларда аскарларга таълим беради, аммо ҳалигача ўнг томон қайси-ю, сўл томон қайси эканини уларга билдира олганича йўқ. Швабриннинг бир нечта французча китоби бор экан. Китоб ўқишга киришдим ва менда адабиётга ҳавас уйғонди. Ҳар куни эрталаб китоб ўқийман, таржима қилишни машқ

қиласман, баъзан шеърлар ёзаман. Таомни ҳар куни деярли комендантнинг уйида еб, колган вақтни шу ерда ўтказаман. Баъзан кечкурунлари Герасим, ойимча рафиқаси Акулина Памфиловна билан келади. Бутун қалъада ҳар қандай янги хабар бўлса, шу аёлдан эшитардилар. Албатта, Швабрин билан кунда кўришар эдим; аммо борган сайин унинг сұхбатидан беза бошладим. Комендантнинг оиласи ҳақидаги доимий хазиллари, айниқса, Марья Ивановна ҳақидаги пичинглар менга сира ёқмасди. Қалъада бошқа улфат йўқ, бошқа улфатни хоҳламас ҳам эдим.

Бошқирдларнинг хужуми мукаррар экани тўғрисида хабар берилишига қарамасдан, хужум бўлмади. Қалъамиз атрофида осойишталик хукм сурарди.

Мен ҳали адабиёт билан машғул бўлганимни гапирган эдим. Қилган таржималарим ўша замон учун хийла тузуккина бўлган экан, уларни бир неча йилдан кейин Александр Петрович Сумароков¹ кўриб, роса мақтади. Бир куни қўшик ёздим, бу қўшиқ ўзимга маъқул бўлди. Ёзувчилар, баъзан маслаҳатталаблик ниқоби остида хайрхоҳлик билан «яхши ёзибсан» дегувчи мисраларни қидиришлари маълум. Ёзган қўшиғимни оқقا кўчириб, Швабриннинг олдига олиб бордим; бутун қалъада шоирнинг шеърига баҳо бера оладиган факат шу одамгина эди. Кичик мүқаддимадан кейин, чўнтағимдан дафтарни олиб, шу шеърни ўқиб бердим:

*Муҳаббат фикридан бутун воз кечиб,
Уринаман: ёрни ёдимга олмай!
Эвоҳ, Машани ҳам кўришидан қочиб,
Ўйлайман – эрк олай, боғланиб қолмай!*

*Аммо у кўзларки, мени боғламиши,
Дамбадам қаршимда порлар фусункор
Руҳимни банд этиб, бағрим доғламиши,
Доим тўлғанаман, бетинч, бекарор.*

*Холимга назар сол ва дардимни бил,
Бошимда не савдо, Маша, ачингил.
Фурсат зич ва оғир, ўзинг раҳм қил,
Сенинг мафтунингман, сени дейди дил.*

– Қалай чиқибди? – дедим Швабринга, гўё мақтов менга албатта берилиши керак бўлган бир тўловдек, унинг таҳсинини кутиб. – Бироқ

¹ Шоир, биринчи рус драматурги (1708–1777).

қандай қиласы, одатда мени қўллайдиган Швабрин шеъримни буткул ярамасга чиқарди.

– Нега? – дедим, ранжиганимни билдирмасдан.

– Чунки, – деди у, – бунақа шеърлар менинг устозим Василий Кирилич Тредьяковскийга¹ ярашади. Бу шеър унинг ишқий лапарларига ўхшайди.

Дафтарни қўлимдан олди ва шеърнинг ҳар бир сатри, ҳар бир сўзини текшириб, захарли сўзлар билан мени масхара қила бошлади. Чидолмадим, дафтаримни қўлидан тортиб олиб, минбаъд сенга асаримни кўрсатмайман, дедим. Швабрин бу дўқдан ҳам кулди. «Кўрамиз-да, қани, сўзингда турармикансан: Иван Кузмичга таом олдидан бир гравин ароқ қанчалик керак бўлса, шоирларга ҳам мақтov шунчалик зарур. Бу қадар нозик эҳтирос арз этиб, муҳаббатпеша бўлганинг Маша ким ўзи? Марья Ивановна эмасми?»

– Ким экани билан сенинг ишинг бўлмасин! – дедим қовоғимни солиб. – Бу ҳақда менга сенинг фикринг ҳам керак эмас, ким эканини билишинг ҳам.

– Ўхў! – деди Швабрин борган сайин қитиғимга тегиб. – Сиркаси сув кўтартмайдиган шоир, шикастнафс ошиқ экансан-ку! Аммо менинг дўстона кенгашимга қулоқ сол: муродимга етай десанг, ишни шеърдан бошлама.

– Бу нима деганинг? Тушунтириброк айт.

– Жоним билан. Агар сен Маша Мироновнанинг кечқурунлари қош қорайганида уйингга келишини хоҳласант, бундай шеърлар ёзишнинг ўрнига бир жуфт исирға совға қил.

Қоним қайнаб кетди.

– Нега уни шунақа қиз деб ўйлайсан? – дедим, аранг ўзимни босиб.

– Чунки, – деди у захарханда қилиб. – Унинг табиатини, хулқини синаб кўрганман.

– Ёлғон айтасан, аблах! – дедим тепа сочим тикка бўлиб. Ҳаёсизларча шармандаларча ёлғон гапирмоқдасан.

Швабриннинг рангидан қони қочди. «Бу ҳақоратинг учун осонликча кутулмайсан. Мен сени дуэлга чақираман» деди у қўлимни қисиб.

– Чакир, ҳамма вақт тайёрман! – дедим қувониб. – Шу топда, мен уни мажақлаб ташлашга тайёр эдим.

Дарров Иван Игнатьевичнинг олдига бордим. У қўлида игна, Василиса Егоровнанинг амри билан қишига қуритиб олиш учун ипга қўзиқорин

¹ Василий Кириллович Тредьяковский (1703–1769) шоир, таржимон, олим.

тизар эди. «Э, Пётр Андреевич! – деди мени кўриб, – хуш келибсиз! Нечук Худо ярлақади! Нима иш билан келганингизни сўрашга ҳаддим сифадими?» Мен Алексей Иванович билан уришганимни қисқагина қилиб айтиб бердим ва ундан менга секундант бўлишни сўрадим. Иван Игнатьич сўзимга дикқат билан кулоқ солди ва ягона кўзини катта очиб, менга қараганича қолди. «Яъни, демоқчисизки: сиз Алексей Ивановичга қилич урмоқчисиз, менинг гувоҳ бўлишимни истайсиз? Шундайми?»

– Худди шундай.

– Инсофга келинг, Пётр Андреевич! Нима бало қилмоқчисиз? Алексей Иванович билан уришдингизми? Жуда ёмон бўлибди. Ҳақорат эсдан чиқиб кетадиган нарса. У сизни сўккан бўлса, сиз уни қаттиқрок сўкинг; у сизни урган бўлса, сиз унинг у бетига, бу бетига шапалок тортиб юборинг, тамом; кейин биз яраштириб қўямиз. Одам одамга қилич уриши яхшими? Сиз Алексей Ивановичга қилич урсангиз гўргаку-я, менинг ўзим ҳам уни хушламайман. Бордию, сизга қилич урса-чи? Унда нима бўлади? Ким аҳмокқа айланади, сўрашга ҳаддим сифса?

Поручикнинг бу одилона фикри менга таъсир қилмади. Мен ўз аҳдимда колдим. «Ўзингиз биласиз, – деди Иван Игнатьич. – Билганингизни қилинг. Бу ерда менинг гувоҳ бўлишимга не ҳожат? Қайси важдан? Наҳотки, одам одамга қилич суғурса, хеч қаерда кўрганим йўқ, бундай ишни. Худога шукр, турклар, шведлар билан бўлган урушларни кўрганман».

Мен секундантнинг вазифаси нима эканини бир амаллаб тушунтира бошладим, аммо Иван Игнатьич сира англамас эди. «Ихтиёрингиз, – деди у. – Бу ишга мен ҳам аралашадиган бўлсам, қальъада ҳукумат манфаатига қарши бадкорлик қилинмоқчи деб Иван Кузмичга бориб айтсан, жаноб комендант тегишли чора кўрсалар тузук бўлмасми...»

Мен чўчидим ва Иван Игнатьичдан комендантга айтмаслигини сўрадим; зўрга кўндиридим; у менга ваъда берди, мен ҳам уни гувоҳ қилишдан воз кечдим.

Кечани, одатдагидек комендантнинг уйида ўтказдим.

Үйдагиларни шубҳага солмаслик, безор қилувчи саволларга йўл қўймаслик учун ўзимни жуда шод ва бегам кўрсатишга харакат қилдим; лекин икрор бўлайинки, менинг ўрнимда бошқа киши бўлганида, менга қараганда ортиқроқ совуққонлик кўрсата оларди. Шу кечаси мен мулоим ва мўмин эдим. Марья Ивановна кўзимга одатдагидан яхшироқ кўринарди. Эҳтимол, сўнгги дафъа кўраётгандирман, деган ўй уни кўзимга аллақандай таъсирли қилиб кўрсатарди. Шу пайтда Швабрин

келди. Мен уни четга тортиб, Иван Игнатьич билан сўзлашганимни айтдим. «Бизга секундантнинг нима кераги бор? Ишни гувоҳсиз ҳам битира оламиз» деди у тўнгиллаб. Биз қалъя ёнидаги гарам орқасига ўтиб қиличбозлик қилишга ва эрталаб соат еттида ўша ерда ҳозир бўлишга қарор қилдик. Биз чамамда, шундай дўстона гаплашиб ўтирасак керак, Иван Игнатьич севинганидан вайсаб кетди. «Ҳа, баракалла, мана шундай бўлиш керак, – деди у менга мамнуният билан, – яхши жанжалдан ёмон тинчлик афзал. Маломатдан кўра, саломат маъкул».

– Нима, нима, Иван Игнатьич? – деди бурчакда қарта билан фол очиб ўтирган коменданнтнинг рафиқаси, – эшитмай қолдим.

Иван Игнатьич юзимдаги норозилик аломатларини кўриб ва ўз вавдасини хотирлаб, хижолат бўлди, нима деб жавоб беришини билмади. Швабрин уни хижолатдан куткарди.

– Иван Игнатьич бизнинг ярашганимизни маъкулляяпти, – деди у.

– Ким билан уришдинг, отахоним?

– Пётр Андреевич билан айтишиб қолдик.

– Нима ҳақда?

– Арзимаган бир нарса ҳакида, қўшиқ тўғрисида, Василиса Егоровна.

– Хўп нарса ҳакида уришибизлар-да! Қўшиқ тўғрисида-я! Нима бўлиб уришдиларинг?

– Шундай бўлди: Пётр Андреевич яқинда бир қўшиқ ёзган эди, буғун шуни менинг олдимда ўқиди, мен эса ўзим яхши кўрган қўшиқни айтдим:

*Капитан қизи, эй, капитан қизи,
Яrim кеча эмас томоша кези.*

Орамизда гап қочди. Пётр Андреевичнинг аччиғи келди; аммо кейинчалик ўзига келди – ҳар ким хоҳлаган қўшигини айтишга ҳақли эканини билди. Шу билан гап тамом бўлди.

Швабриннинг юзсизлиги жонимни чиқараёди; аммо унинг қўпол киноясини мендан бошқа ҳеч ким фаҳмламади; тўғриси, ҳеч ким бу кинояга эътибор қилмади. Қўшиқ қолиб, гап шоирлар ҳакида кетди ва комендант уларни бузуқ, ёмон пиёнисталар деб, шоирлик хизматга зид ҳамда яхшиликка олиб бормайдиган иш бўлгани учун бу ишдан қайтишни менга дўстларча маслаҳат берди.

Швабриннинг бу ерда ўтиришини кўтара олмадим. Кўп ўтирмай, комендант ва унинг оиласи билан хайрлашдим; уйга келиб қиличимни кўздан кечирдим, учининг ўткирлигини синааб кўрдим ва Савельичга мени соат олтидан ўтганда уйғотишни буюриб ётдим.

Эрталаб айтилган вақтда ғарамнинг орқасида ҳозир бўлиб, душманимни кутдим. Кўп ўтмай у ҳам келди. «Устимизга одам келиб қолиши мумкин, тезроқ бўйайлик» деди у. Мундирларимизни ечиб, енгиз камзул билан қолдик ва қиличларимизни қинидан суғурдик. Шу топда бирдан ғарам орқасидан Иван Игнатьич билан бешта ногирон чиқиб келди. У бизнинг комендант олдига боришимизни талаб қилди. Биз афсусланиб, рози бўлдик; аскарлар бизни ўраб олишди, Иван Игнатьич нинг кетидан қальяга қараб йўл олдик. Иван Игнатьич бизни тантана-вор кузатиб борар ва ўзи ҳайрон қоларлик даражада фурур билан қадам ташларди.

Комендантнинг уйига кирдик. Иван Игнатьич эшикни очиб, тантанали равишда: «Олиб келдим!» деди. Бизни Василиса Егоровна қарши олди: «Вой болаларим-эй! Бу нима деган гап-а? Бизнинг қальамиизда хунрезлик! Иван Кузмич, ҳозир буларни қамоққа олдир! Пётр Андреевич! Алексей Иванич! Қиличларингни беринглар! Палашка, бу қиличларни омборга элтиб қўй. Пётр Андреевич! Ҳали сендан келган иш шуми? Уялмайсанми? Алексей Иванич-ку одам ўлдиргани учун гвардиядан ҳайдалган киши, у Худога ҳам мункир, сенга нима бўлди? Сен ҳам шунинг изидан бормоқчимисан?»

Иван Кузмич хотинининг гапини маъқуллади ва: «Қулоқ сол, Василиса Егоровна рост айтди. Дуэль ҳарбий қонунлар мажмуасида расман ман этилган» деди. Бу орада Палашка қиличларимизни омборга олиб кетди. Мен ўзимни тия олмай кулиб юбордим. Швабрин ҳануз жиддият сақларди. «Мен сизни жуда ҳурмат қиласман, – деди у совуққонлик билан, – аммо шуни айтайки, бизни тергаб бекорга овора бўлмоқдасиз. Бу ишни Иван Кузмичга ҳавола қилинг, Иван Кузмичнинг иши бу».

– Вой, тақсирим! – деб эътиroz қилди аёл, – ахир эр билан хотин бир жон, бир тан эмасми? Иван Кузмич! Нега оғзингни очиб турибсан! Ҳозироқ икковини икки жойга қама, фақат нон билан сувгина бер, ўзига келсин; Герасим ҳазрат келиб икковини тавбатазарру килдирсинки, Худодан гуноҳини тилаб, одамлар олдида қилмишларига пушаймон бўлишсин.

Иван Кузмич нима қилишини билмасди. Марья Ивановнанинг ранги хаддан ташкари оқариб кетган эди. Тўполон аста-секин босилди; комендантнинг хотини жаҳлидан тушиб, бизни ярашишга мажбур қилди. Палашка қиличимизни келтириб берди. Икковимиз ярашган бўлиб, комендантнинг уйидан чиқди. Иван Игнатьич ортимиздан чиқди.

– Комендантга айтмаслик ҳақида менга вაъда бериб, яна айтгани уялмадингизми? – дедим койиб.

– Худо урсин, – деди у. – Иван Кузмичга айтганим йўқ. Василиса Егоровна мендан суриштириб, ҳамма гапни билиб олди. Комендантга айтмасданоқ ўзи буйруқ берди. Хайрият, иш шу билан бита қолди.

У уйига бурилиб кетди. Швабрин икковимизгина қолдик. – Бизнинг ишимиз шу билан якун топмайди, – дедим.

– Албатта, – деди Швабрин, – бу номуссизлигингизга қон билан жавоб берасиз; бизни эҳтимол пойлашар. Бир неча кун ярашган бўлиб юришимиз керак. Хайр!

Гўё орамизда ҳеч гап бўлмагандек ажралдик. Комендантнинг уйига қайтиб, одатдагича, Марья Ивановнанинг ёнига ўтиридим. Иван Кузмич уйда йўқ; Василиса Егоровна уй иши билан банд эди. Икковимиз се-кингина гаплашиб ўтиридик. Швабрин билан жанжаллашиб ҳаммани ташвишга қўйганимни Марья Ивановна юмшоқлик билан тъяна қилиб, мени уялтириди.

– Сизни Швабрин билан қиличбозлик қилишмоқчи деб эшитиб, жоним чиқиб кетди, – деди у. – Эркаклар ғалати-я! Бир ҳафтадан кейин эсдан чиқиб кетадиган бир оғиз сўз учун қиличбозлик қилишга, ҳаётларинигина эмас, виждонларини ва баъзи... инсонларнинг роҳатини курбон қилишга тайёр. Аммо жанжални сиз бошламаганингизга ишонман. Айб Алексей Ивановичда.

– Нега ундей деб ўйлайсиз, Марья Ивановна?

– Шундай, ўзим... у шунақа одам! Алексей Ивановични ёмон қўраман. Ундан жирканаман; қизиқ, аммо унинг ҳам мени ёмон қўришини сира-сира истамайман. Юрагимни ваҳима босади.

– Нима дейсиз, Марья Ивановна, у сизни яхши кўрармикан ё йўқми? Марья Ивановна дудукланди ва қизариб:

– Яхши кўрса керак, яхши кўради деб ўйлайман, – деди.

– Нега ундей деб ўйлайсиз?

– Чунки менга одам қўйган эди.

– Одам қўйган эди? У сизга киши қўйган эдими? Қачон?

– Ўтган йили. Сиз келмасингиздан икки ой аввал.

– Сиз кўнмадингизми?

– Кўнмадим. Алексей Иванич, албатта ақлли киши, орбўли авлоддан, бойлиги ҳам бор; аммо никоҳ маросимида ҳамманинг олдида у билан ўпишишни ўйласам... Йўқ, асло. Буни ақлимга сифдиролмайман.

Марья Ивановнанинг сўзлари кўзимни очди ва кўп нарсаларни англатди. У ҳақда Швабрин нима учун бунчалик ғийбат қилишини энди билдим. Балки у, икковимизнинг бир-биримизга майлимиз борлигини билгандир ва бизни айрмоққа тиришгандир. Кўпол ва адабсиз масхаранинг замирида ўйланилган, оғир бир бўхтон борлигини билганимдан

сўнг, икковимизнинг жанжалимизга сабаб бўлган сўз менга яна ҳам қабиҳроқ туюлди. Юзсиз гийбатчининг таъзирини бериш истаги менда роса авж олди ва сабрсизлик билан қулай фурсатни кута бошладим.

Кўп кутмадим. Эртасига шеър ёзиб, кофия устида ўйланиб ўтирганимда Швабрин дeraзамни тақиллатди. Мен қаламни кўйдим ва қиличимни олиб чиқдим.

– Ортга суришнинг нима кераги бор? – деди у, – бизни ҳеч ким пойлаётганий йўқ. Дарё бўйига тушамиз. У ерда ҳеч ким бизга халакит бермайди.

Индамасдан дарё бўйига қараб кетдик. Ёнбагирликдан юриб, дарё бўйида тўхтадик ва қиличимизни қинидан сугурдик. Швабрин қиличбозликка мендан кўра устароқ чиқиб қолди, аммо мен унга қараганда бақувват ва дадилроқ эдим. Бир замонлар аскар бўлган француз мураббий Бопре менга қиличбозликдан бир оз таълим берганди, ана шу ўзлаштирганимни ишга солдим. Швабрин мени уччалик хавфли душман деб ўйламаган экан. Анчагача бир-биримизга ҳеч қандай шикаст етказа олмадик, ниҳоят, Швабриннинг дармони қуриганини сезиб, мен илдамлик билан ҳужум бошладим ва уни дарёнинг лабига қадар сикиб бордим. Бирдан кимдир баланд товуш билан мени чакирди. Оркамга ўгирилиб қарасам, тепаликдаги сўқмоқдан Савельич келяпти... Шу вақтда кўкрагимнинг ўнг тарафига, елқадан пастрокқа қилич санчилди; йиқилиб, хушдан кетдим.

В Б О Б МУҲАББАТ

Эҳ, сен жсон қиз, эй жсонона қиз!
Эрга чиқма ёши чогингдан ҳеч;
Сўра аввал ота-онангдан,
Ота-онанг, уруғ-аймоқдан;
Ақлу ҳушинг етилсин, жсон қиз,
Ақлу ҳушинг – сенинг бўлгуси.

Халқ қўшиги

*Мендан яшини топсанг, унумтиб қўярсан,
Мендан ёмонни топсанг, ёдга оларсан.*

Бир вақт ўзимга келиб, анчагача эс-хушимни йиголмадим ва менга нима бўлганини билмадим. Қарасам: бироннинг меҳмонхонасида каравотда ётибман, ниҳоятда дармонсизман. Ёнимда кўлида шам билан Савельич турибди. Кимдир елкам аралаш кўкрагимга боғланган латтани

авайлаб ечар эди. Аста-секин ҳушим жойига келди. Дуэлга чиққаним ёдимга тушди, билдимки, ярадор бўлибман. Шу онда ғичирлаб эшик очилди. «Ҳа, қалай?», деди кимдир пичирлаб. Бу товушни эшитиб, мени титроқ босди.

– Бир хилда, – деб жавоб берди Савельич ҳоргинлик билан. – Беш кечаю беш кундуз бўлди ҳушига келмайди.

Мен эшик томон ўгирилмоқчи бўлдим, аммо дармоним етмади.

– Каерда ётибман? Ким булар? – дедим зўрга.

Марья Ивановна ёнимга келди ва энгashiб:

– Қалай, тузукмисиз? – деди.

– Шукр, – дедим заиф товуш билан. – Марья Ивановнамисиз? Менга айтинг.

Гапиргани дармон бўлмади. Савельич севинчидан «оҳ» тортиб юборди. Чиройи очилиб кетиб:

– Ҳушига келди! Ҳушига келди! – деди у. – Худога шукр! Э, тақсирим Пётр Андреевич! Қўрқитдинг-ку мени! Осонми! Беш кечаю беш кундуз-а!

Марья Ивановна унинг сўзини бўлиб:

– Кўп гапга солма, Савельич, хали дармони йўқ, – деди.

У секин эшикни ёпиб чиқиб кетди. Юрагим ҳаприқди. Демак, комендантнинг уйида ётган эканман, олдимга Марья Ивановна кирибди. Савельичдан баъзи нарсаларни сўрамоқчи эдим, у бошини чайқаб, кулоқларини беркитиб олди. Хафа бўлиб, кўзимни юмдим ва уйкуга кетдим.

Уйқудан уйғониб Савельични чакирдим; қарасам – унинг ўрнида Марья Ивановна турибди; у ширин товуш билан мени қутлади. Шу дақиқалардаги шодлигимни ифода этолмайман. Унинг қўлини ушладим ва кўзимдан ёш тўкиб, бағримга босдим. Маша қўлини тортиб олмади... Кутимаганда унинг қайноққина лаби юзимга тегди, мен юмшоққина бўса олганини сездим. Вужудим ловуллаб кетди.

– Суюкли, марҳаматли Марья Ивановна, – дедим. – Менинг саодатли бўлишимга розилик бер, менга турмушга чиқ.

У эсини йигиб олиб:

– Худо ҳақи, ўзингизни уринтирманг, – деди қўлини тортиб олиб. – Ҳали аҳволингиз оғир: жароҳатнинг очилиш эҳтимоли бор. Ҳеч бўлмаса мен учун ўзингизни эҳтиёт қилинг.

Шу сўзларни айтиб чиқиб кетди, мен завққа гарқ бўлганимча қолдим. Баҳт мени қайтадан тирилтириди. У менинг рафиқам бўлади! У мени севади. Бу фикр борлигимни тўлдирди.

Шундан сўнг қундан-кун соғая бошладим. Мени полк сартароши даволарди, чунки қалъада шифокор йўқ эди. Ёшлик ва табиат соғайишмни тезлатди. Комендантнинг бутун оиласи менга қаради. Марья Ивановна ҳамиша ёнимда. Турган гапки, қулай фурсат бўлиши билан мен олдинги сафар айтиб битирмаган дардимни яна бошлардим, Марья Ивановна ҳам сабр билан қулоқ соларди. У менга чин кўнгилдан мойил эканлигига ҳеч қандай карашмасиз иқрор бўлди ва ота-онаси унинг баҳтига албатта ҳурсанд бўлишларини билдириди. «Аммо хўп ўйлаб кўринг, – деди у яна, – сизнинг ота-онангиз тўсқинлик қилишмасмикин?»

Ўйланиб қолдим. Онамнинг кўнгилчанлигига шубҳаланмас эдим; аммо отамнинг феъли, тушунчалиги ўзимга аён бўлганидан, бу муҳаббатимни писанд қилмаслигини, бу муҳаббатга ёш йигитнинг енгиллиги деб қарашини сезиб турар эдим. Марья Ивановнага тўғрисини айтдим, шундай бўлса-да, ота-она розилигини сўраб, отамга имкон қадар чучук тил билан мактуб ёзишга қарор қилдим. Мактубни ўқиб, Марья Ивановнага кўрсатдим, мактуб унга шу қадар ишонарли ва таъсирли кўриндики, бунинг муваффақият қозонишига аниқ ишонди ва ёшлиқ, муҳаббатнинг тўла ишончи билан латиф ишқ ҳиссиятига берилди.

Софайганимнинг илк куни ёк Швабрин билан ярашдим. Иван Кузмич дуэлга чикқаним учун танбеҳ бериб:

– Эҳ, Пётр Андреевич! Сени қамаб қўйишим керак эди-ю, усиз ҳам жазоингни тортдинг, – деди. – Алексей Иванович ҳануз нон дўконида қамоқда ўтирибди, қиличини Василиса Егоровна сандиққа солиб, қулфлаб кўйди. Қамоқда ўтирсин, ўйлаб кўрсин, пушаймон бўлсин.

Мен шу қадар баҳтиёр эдимки, қалбимга душманлик адовати сиғмас эди. Комендантдан Швабринни озод этишини сўрадим, комендант бечора, хотинининг розилигини олиб, уни озод қиласидан бўлди. Швабрин менинг олдимга келди; орамиздаги ўтган ишларга зўр таассуф билдириди, ҳар жиҳатдан ўзининг гуноҳкор эканига иқрор бўлиб, ўтган ишларни унтишимни сўради. Табиатимда зотан, гина саклаш одати йўқлигидан, орада ўтган жанжални, унинг ярадор қилганини кўнглимдан чиқардим ва чин кўнгилдан афв этдим. Унинг бўхтонига иззат-нафсининг хақоратланиши, муҳаббатининг рад этилиши сабаб бўлгани учун, олижаноблик билан баҳтсиз душманимнинг гуноҳидан ўтдим.

Тез фурсатда соғайдим, ўз уйимга кўчиб ўтдим. Юборган мактубимга жавобни сабрсизлик билан кутар эдим, умид қилишга ботина олмайман, «йўқ» дермикин деган ўйга бориб, бу қайгуни енгишга тиришардим. Василиса Егоровна ва унинг эрига ҳали дардимни айтганим

йўқ: аммо менинг таклифим уларни ҳайрон қолдирмаслиги керак эди. На мен, на Марья Ивановна улардан ўз ҳиссиётларимизни яширишга уринмасдик, уларнинг розилик беришларига ҳозирданоқ ишонардик.

Нихоят, бир куни эрталаб Савельич, олдимга мактуб кўтариб келди. Қалтираб мактубни олдим. Манзилдаги дастхат отамнинг қўли билан ёзилган. Бу муҳим бир ҳодисадан дарак берар эди, чунки одатда мактубни онам ёзар, отам бўлса охирига бир неча сатр қўшимча киларди, холос. Анча вақтгача мактубни очмадим, хатжилдинг устига ёзилган таниш манзилни қайта-қайта ўқидим: «Ўғлим Пётр Андреевич Гринёвга, Оренбург губернаси, Белогор қалъаси». Хатжилд устидаги ёзувдан мактубнинг қай руҳда ёзилганини билишга тиришдим; охири, мактубни очишга аҳд қилдим ва дастлабки сатрлардан кўрдимки, ишлар чатоқ. Мактуб қуйидаги мазмунда эди:

«Ўғлим Пётр! Мироновнинг қизи Марья Ивановнага уйланиши борасида биздан розилик ва ота-она фотиҳасини сўраб ёзган мактубинг шу ойнинг ўн бешинчисида тегди, бунга на фотиҳа, на розилик берииш ниятим бор, балки ўзим бориб, офицерлик мансабинг бўлишига қарамасдан, шўхликларинг учун ёш бола тарзида таъзирингни бермоқчиман; чунки сен ҳали қилич тақишига муносаб эмаслигинги исбот қилдинг; у қилич сенга, ўзингга ўхшаган беодоб билан дуэлга чиқши учун эмас, балки ватанни мудофаа қилиши учун ишониб топширилган. Андрей Карловичга, сени Белогор қалъасидан йироккроқ, сенга ақл кирадиган бирон ерга юборишини сўраб, тўхтовсиз мактуб ёзаман. Дуэлга чиққанингни ва ярадор бўлганингни онанг эшишиб оғриб қолди, ҳозир ётибди. Шу ҳолинг билан нима ҳам бўлар эдинг? Ҳудоддан сенга инсофт тилайман, аммо унинг буюк марҳаматига умид қилолмайман.

Отанг А.Г.»

Бу мактубни ўқиб, менда турли ҳислар қўзгалди. Отам мендан дариф тутмаган қаттиқ иборалар менга катта ҳақорат бўлди. Марья Ивановна ҳақида андишасизлик билан айтилган сўзлар ноҳақ бўлганидек, назокатсизлик ҳам бўлиб туюлди. Белогор қалъасидан бошқа ерга юборишлиш тўғрисидаги ўй мени ваҳимага солар, аммо ундан ҳам кўра онамнинг бетоблиги ҳақидаги хабар мени хафа қиларди. Савельичдан қаттиқ хафа бўлдим, мени дуэлга чиққанинги шубҳасиз ўша ёзган, деб ўйладим. Тор уйда у ёқдан-бу ёкка юриб, уйнинг ўртасида тўхтадимда, Савельичга дўқ аралаш:

– Сен туфайли ярадор бўлиб, бир ой ўлим тўшагида ётганим сенга камлик қилганга ўхшайди; энди онамни ҳам ҳалок қилмоқчи бўлибсан, – дедим.

Савельич донг қотиб қолди.

– Марҳамат қил, хўжайнин, – деди у йиглаб юборгудек бўлиб. – Нималар деяпсан? Ярадор бўлишингга мен сабабчи бўлдимми? Сен билмасанг, Худо билади, мен сени Алексей Ивановичнинг қиличидан кўкрагим билан сақлагани югуриб борган эдим! Лаънати кексалик ха-лал берди. Волидангга нима қилибман?

– Нима қилибман? – дедим. – Мен ҳақимда чақимчилик қилишни ким сендан сўради? Ҳали сен жосуслик қилиш учун менинг ихтиёримга берилганимисан?

– Мен сен ҳақингда чақимчилик қилибманми? – деди Савельич кўз ёши билан. – Ё, Парвардигор! Мана, менга нима деб мактуб ёзганлари-ни ўқиб кўр: кандай чақимчилик қилганимни кўрарсан.

Мактубни чўнтағидан чиқариб, менга берди. Мактуб шундай ёзил-ган эди:

«Қаттиқ фармойишишинга қарамасдан ўғлим Пётр Андреевич ҳақида менга маълумот бермаганинг, унинг шўхликлари борасида ўзга киши мени хабардор қилгани сенга уят эмасми, қари кўпак. Ўз вазифанг ва хўжайнинг амрини сен ҳали шу хилда бажарасанми? Ҳақиқатни яширганинг, ёши йигит гуноҳ қилганида унинг тарафини олганинг учун сен қари итни чўчқа боққани юбораман. Шу мактубни олганинг ҳамон унинг аҳволи, қаеридан ярадор бўлгани, тузуккина да-волашдими, йўқми экани ҳақида мактуб ёзишини буюраман. Боишалар Пётр тузалиб қолган, деб ёзадилар».

Савельичда ҳеч қандай гуноҳ йўқлиги очик маълум бўлди. Бекор ундан шубҳаланиб, қаттиқ гапириб дилини оғритибман. Узр сўрадим, аммо чол таскин топмади. «Қандай кунларга қолдим, – деди у. – Хўжайнларимдан кўрган илтифотим шу бўлдими? Мен ит ҳам, тўнғиз боқувчи ҳам бўлдим, энди ярадор бўлишингга сабабчи ҳам бўлдимми? Йўқ, жаноб Пётр Андреевич! Менда ҳеч қандай айб йўқ, ҳамма гуноҳ лаънати француз мураббийда: сенга қиличбозликни ўша ўргатган. Қиличбозликни билиш билан ёвуз кишидан сақланиб бўлар эканми? Ортиқча чиқимдор бўлиб, шу французыни ёллаш мунча зарур экан!»

Менинг юриш-туришим ҳақида отамни ким хабардор қилди экан? Генералми? У мен ҳақимда унча ғам емаса керак; Иван Кузмич эса ду-элга чиққаним борасида билдирги беришни лозим ҳам кўрмайди. Бо-шим қотди. Биргина гумон – Швабриндан. Отамга бу ҳақда маълумот

беришдан ўшагина манфаатдор, чунки алалоқибат менинг қалъадан кетишим ва комендант оиласи билан алоқани узишим эҳтимолдан йирок эмас. Бу гапларни айтгани Марья Ивановнанинг олдига бордим. У кўча эшиги олдидағи айвончада ўтирган экан.

– Нима бўлди сизга? – деди у мени кўриб. – Рангингизда ранг қолмабди?

– Бутун ишлар чаппасига кетди! – дедим ва отам ёзган мактубни унинг кўлига бердим. Унинг ҳам ранги ўчди. Мактубни ўқиб титраётган қўли билан менга узатди ва заиф товуш билан деди:

– Толеим йўқ экан. Ота-онангиз мени ўз оилаларига олишни истамайдилар. Ҳар иш Худонинг иродаси билан бўлади! Иложимиз йўқ, Пётр Андреевич, ҳеч бўлмаса сиз баҳтли бўлинг...

– Бунинг иложи йўқ! – дедим унинг кўлидан ушлаб. – Сен мени севасан, мен ҳеч нарсадан қайтмайман. Юр, икковимиз сенинг ота-онанг оёғига йиқилайлик; улар содда одамлар, тошюрак тақаббур эмас... Улар рози бўлишади, никоҳланамиз... Отамни бўлса вакти келиб кўндиришимизга кўзим етади. Онам бизнинг тарафимизни оладилар; отам менинг гуноҳимдан ўтади...

– Йўқ, Пётр Андреевич! – деди Маша. Ота-онангизнинг розилиги бўлмасдан сизга тегмайман. Улар фотиҳа бермасдан баҳтингиз унмайди. Худонинг иродасига бўйин эгамиз. Насиб қилган бирон қизни топсангиз, уни яхши кўрсангиз, – Худо йўлингизни берсин, Пётр Андреевич; мен эса икковларинг учун...

У йиғлаб юборди ва ўрнидан туриб кетди; мен унинг ортидан уйга кирмоқчи бўлган эдим, ўзимни тута олишга кўзим етмай, уйимга қайтиб кетдим.

Уйда чуқур хаёлга чўмиб ўтирган эдим, Савельич кириб, хаёлимни бўлди.

– Мана, хожам, – деди у қўлимга бир мактуб бериб. Кўринг-чи, мен ўз хожам ҳақида чақимчилик қилибманми, ота билан боланинг орасини бузмоқчи бўлибманми?

Мактубни қўлимга олдим; бу Савельичнинг отам мактубига жавоби бўлиб, айнан мана шундай ёзилган эди:

«Марҳаматли қиблагоҳимиз,
султоним Андрей Петрович!

Юборган илтифотномангиз тегди. Бунда қулингизни
газаблаб, хўжса амрини бажо қилмаслик уят сенга дебсиз; мени

қары им эмас, содиқ қулингизман, хўжса амрини бажо этаман ва сизга ҳамма вақт жону дил билан хизмат қилдим, шу йўлда соч-соқолим оқарди. Сизни бекорга қўрқитмай деб, Пётр Андреевичнинг ярадор бўлгани ҳақида индамадим ва эшишишмга қараганда онамиз Авдотья Васильевна қўрқиб бетоб бўлибдила, дуойи жонларини қиласман. Пётр Андреевич елкадан пастроқ еридан ярадор бўлган эди, жароҳатнинг чуқурлиги бир ярим вершок¹; Пётр Андреевич коменданнтнинг уйида ётди, биз уни дарё бўйидан шу ерга олиб келган эдик, уни шу ерлик сартарош Степан Паромонов даволади. Худога шукр, Пётр Андреевич энди тузалиб қолди, у ҳақда хушихабардан бўлак ҳеч гап йўқ. Эшишишмга қараганда, қўмондонлар ундан мамнун; Василиса Егоровна эса уни ўз ўелидек кўради. Унинг иттифоқо шундай бир хотога бориши, ёш йигит учун таъна қиласларлик эмас; тўрт оёқли от қоқиласди-ю. Мени «чўчқа боқишига юбораман» дебсиз, нима қилассангиз ўзингизга ҳавола; қулларча бўйин эгаман.

Содиқ қулингиз Архип Савельев»

Бечора чолнинг мактубини ўқиб, бир неча бор жилмайишдан ўзимни тута олмадим. Отамнинг мактубига жавоб қайтаргани дармоним йўқ эди, онамни тинчтиши учун эса Савельичнинг мактуби кифоядек кўринди.

Мана шундан сўнг ҳолатим ўзгарди. Марья Ивановна деярли мен билан гаплашмас, турли баҳоналар килиб бўлса ҳам мендан қочишига уринарди. Коменданнтнинг уйидан қўнглим қолди. Ўзим якка уйда ўтиришга аста-секин кўнишиб бордим. Василиса Егоровна авваллари мендан ўпкалади; кейин кайсарлигимни кўриб, индамай кўйди. Иван Кузмич билан фақат хизмат важидан зарур бўлгандағина учрашар эдим. Швабрин билан ҳар замонда бир, ўшандা ҳам хушламасдан кўришардим, чунки ичидан менга душман эканини сезардим, шубҳаларим буни тасдикларди. Турмушим оғирлашиб кетди. Ёлғизлик ва бекорчилик мени қайғули ўйчанликка солиб қўйди. Якка қолган чоғларимда муҳаббатим оловланар ва борган сайин менга оғирлик қиласарди. Китоб ўқишига, адабиётга иштиёқим қолмади. Рухим тушди. Ё ақлдан озаман, ё бузилиб кетаман, деб қўрқар эдим. Бутун ҳаётимга қаттиқ таъсир қилган тасодифий ҳодиса, бирданига руҳимни қўрқинчли қайғуга солди.

¹ Вершок – 4,4 см.га тенг узунлик ўлчови.

VI БОБ

ПУГАЧЁВ ҚЎЗГОЛОНИ

*Сиз, ёши-яланглар қулоқ согайсиз,
Биз, кекса чоллар нелар сўйлаймиз.*

Кўшик

Ўз кўзим билан кўрганим ажойиб ҳодисаларнинг тасвирига кириш-масимдан аввал, 1773 йилнинг охирларида Оренбург губернаси қай ахволда бўлганини бир неча оғиз сўз билан айтиб ўтишим керак.

Бу кенг ва бой губернада рус ҳокимлигини яқиндагина таниган жуда кўп ярим ваҳший халқлар яшарди. Уларнинг дам-бадам кўзголон кўтаришлари, қонунга ва гражданлик ҳаётига ўрганмасликлари, енгилтаклик ва раҳмисизликлари уларни итоат қилдириш учун хукумат томонидан доимий назорат этишни талаб қиласарди. Қалъалар ўнгай деб топилган ерларга солинган ва уларга Яиқ дарёси қирғоқларини кўпдан буён эгаллаган казаклар ўрнаштирилган. Лекин бу ўлканинг тинчлигини ва хавфсизлигини сақлаш учун маъмур этилган бу казакларнинг ўzlари бирмунча вақтдан буён хукуматни безовта қилиб, хавф туғдириб келар эдилар. 1772 йилда уларнинг марказий шаҳарчасида¹ ғалаён кўтарилилган. Бунга аскарларни етарли даражада итоат қилдириш учун генерал-майор Траубенберг² кўллаган шиддатли чоралар сабаб бўлган. Натижада Траубенберг ваҳшиёна суратда ўлдирилган, ўлкани идора этиш тартибига ўzlарича ўзгаришлар киритганлар ва оқибат кўзголон курол кучи ҳамда қаттиқ жазолар билан бостирилган.

Бу ҳодиса мен Белогор қалъасига келмасимдан бирмунча вақт илгари бўлган. Мен келганда жимжитлик ёки шунга ўхшаш бир ҳол хукм сурар эди; хукумат амалдорлари айёр кўзголончиларнинг ёлғондакам тавба-тазарруларига учганлар, ҳолбуки улар ичларида кек сақлаб, яна тартибсизлик бошлиш учун кулай фурсатни кутардилар.

Мен яна ўз ҳикоямга қайтаман.

Бир куни кечқурун (1773 йилнинг октябрь ойи бошларида) куз шамолининг гувиллашини тинглаб, қора булут парчаларининг ой ёнидан сузиб ўтишига деразадан қараб, уйда ўзим якка ўтирадим. Комендантдан менга одам келди. Мен дарҳол йўлга тушдим. Комендантнинг уйи-

¹ Екатерина томонидан Ўрол деб ном берилган шаҳар.

² Пугачёв кўзголонигача Яиқ казаклари ва Оренбург ўлкасида яшовчи халқлар орасида кўтарилилган кўзголонларни «босиши»да энг бераҳм бўлган генералларнинг бири.

да Швабрин, Иван Игнатьич ва бир казак ўнбошиси ўтиришган экан. Ўйда Василиса Егоровна ҳам, Марья Ивановна ҳам йўқ эди. Комендант мен билан ташвишли бир қиёфада кўришди. У эшикни қулфлади, кираверишда турган ўнбоши бошқа ҳаммани ўтқизди-да, чўнтағидан бир қоғозни олиб:

– Жаноб офицерлар, мухим янгилик! – деди. – Генерал ёзган мактубга кулоқ солинглар!

У кўзойнагини тақиб, мактубни ўқиди:

*«Белогор қалъасининг коменданти
жаноб капитан Мироновга*

Махфий

Уибунинг билан маълум қиламанки, қамоқдан қочган Дон казаги фитначи Емельян Пугачёв ёмон адабсизлик қилиб, ўзига марҳум император Пётр III номини берган ва атрофига бадкирдорлардан иборат гуруҳ тўплаб, Яиқ қишлоқларида галаён кўтарган, ҳамма жойда тиланчилик қилиб ва одам ўлдириб, ҳозирнинг ўзидаётк бир неча қалъани қўлга олган ҳамда ҳароб қилган. Шунинг учун уибуну мактубни олганингиз ҳамон сиз, жаноб капитан, зудлик билан юқорида айтилган бадкирдор ва хоиннинг ҳужумини даф қилиши учун лозим бўлган тадбирларни кўргайсиз, агар сизга топширилган қалъага ҳамла қилса, тамом маҳв этиши иложини кўргайсиз».

– Лозим бўлган тадбирларни кўргайсиз! – деди комендант кўзойнагини олиб, мактубни бувларкан. – Айтмоқка осон. У бадкирдор зўрга ўхшайди; ишониб бўлмайдиган казакларни ҳисобламагандা, ҳаммаси бўлиб бир юз ўттиз нафар одамимиз бор, сенга тегизиб айтиётганим йўқ, Максимич (ўнбоши қулиб қўйди). Бироқ на чора, жаноб офицерлар! Тайёр бўлинглар, тунги қоровуллар қўйинглар; ҳужум бўлса дарвозани ёпиб, аскарларни чақиринглар. Сен, Максимич, ўз казакларингга эҳтиёж бўл. Тўпни кўриб, яхшилаб тозалаш керак. Энг мухими – бу хабарни маҳфий сақлаш лозим, буни қальъада ҳеч ким барвақт билмасин.

Шу буйруқни айтиб, Иван Кузмич барчамизга жавоб берди. Комендантнинг уйидан янги хабарни мухокама қила-қила, Швабрин билан бирга чиқдик.

– Сенингча бу ишнинг охири нима бўлар экан? – дедим.

– Худо билади, – деб жавоб берди у. – Кўрамиз. Ҳозирча фавқулодда бир нарса йўқ. Агарда...

У ўйланиб қолди ва паришон бўлиб, французча бир куйни ҳуштак қилиб чала бошлади.

Эҳтиёткорлигимизга қарамай, Пугачёвнинг пайдо бўлгани ҳақидаги хабар бутун қалъага тарқалди. Иван Кузмич рафиқасини жуда ҳурмат қилса-да, ҳеч вақт хизматга оид сирни унга айтмас эди. У генералнинг мактубини олгач, гўё Герасим ҳазратга Оренбургдан жуда ажойиб, маҳфий бир хабар келган эмиш, деб Василиса Егоровнани жуда усталик билан Герасим ҳазратникига юборган: Василиса Егоровна шу ондаёқ рухонийникига отланган ва Иван Кузмичнинг маслаҳати билан у ерда зерикиб қолмасин деб, Машани ҳам олиб кетган.

Иван Кузмич, ўзи ёлғиз қолиб, дарҳол бизга одам юборган. Палашкани эса, гап пойламасин деб, омборга қамаб қўйган.

Василиса Егоровна рухонийнинг хотинидан ҳеч қандай янги хабар эшитмай қайтган; у уйга келиб билсаки, Иван Кузмич кенгаш ўтказиби, Палашкани омборга қамаб қўйибди. Василиса Егоровна эрининг алдаганини фаҳмлаб, текшира бошлабди. Аммо Иван Кузмич сўроқдан тап тортмай, рафиқасининг саволларига дадил жавоб бераверган: «Биласанми, азизим, аёллар печкага похол ёқадиган бўлишибди, бундан бирон фалокат чикмасин деган ниятда похол эмас, шоҳ ва пайраҳа ёқинглар, деб қаттиқ буйруқ бердим». – Нега бўлмаса Палашкани қамаб қўйдинг? Нима учун бечора киз биз қайтиб келганимизгача омборда қамалиб ётиби? – деб сўрабди хотини. Иван Кузмич бундай саволга жавоб беришга тайёрланмаганидан, жуда ҳам ёпишмаган бир важ қилибди. Василиса Егоровна эрининг мақрини пайқабди; аммо ундан бир гап чиқишига кўзи етмасдан, ортиқ гап кавламай қўя қолибди ва Акулина Памфиловнанинг ғалати усул билан тузлаган бодринги ҳақида сўз очиби. Василиса Егоровна шу кеча сира ухлаёлмабди, ўзи билолмаган, эри ундан яширган сирнинг нима эканлигини ўйлаб ҳеч тагига етолмабди.

У эртаси куни тушки ибодатдан қайтаётиб, йўлда Иван Игнатъични кўрибди; у замбаракни, болалар ўйнаб тўлдирган латта-путтта, хас-хашақдан тозалаётган экан. «Бу ҳарбий тайёрликнинг маъноси нима? Наинки қирғизлар хужуми кутилса? Наҳотки, Иван Кузмич шу арзимаган нарсани мендан яширган бўлса?» деб Василиса Егоровна ўйлабдида, билолмай хуноб бўлган сирнинг тагига етишга аҳд қилиб, Иван Игнатъични чақирибди.

Худди суд айборнинг ҳушчёргилигини сусайтириш учун сўроқни ишга алоқаси бўлмаган саволлар билан бошлагандек, Василиса Егоровна ҳам Иван Игнатъичга уй ишига оид бирмунча танбехлар қилган.

Сўнгра, андак туриб чукур уф тортган-да, бош чайқаб: «Худованди карим! Бу қандай янги гаплар! Бунинг охири нима бўлар экан?» дебди.

– Хоним, – дебди Иван Игнатьич. – Худо пошшо: аскарларимиз етарли, ўқ-дори кўп, замбаракни созлаб кўйдим. Пугачёвнинг бир таъзирини берайликки! Худо бермаса, тўнғиз емайди.

– Бу Пугачёв қандай одам экан ўзи? – деб сўрабди комендантнинг хотини.

Иван Игнатьич сирни айтиб қўйганини билиб, тилини тишлаб қолибди. Бироқ ғишт қолипдан кўчган эди.

Василиса Егоровна, ҳеч кимга оғзимдан чиқармайман деб, бутун сирни айтишга мажбур қилибди.

Василиса Егоровна ўз сўзида турибди ва бу сирни руҳонийнинг хотинидан бошқа ҳеч кимга айтмабди, ўшанга ҳам унинг сигири далага ўтлагани борганида бадкирдорлар ушлаб олишмасин, деб айтибди.

Ҳадемай Пугачёв ҳақида дув-дув гап бўлиб кетди. Ҳар ким ҳар хил гапиради. Комендант қўшни қишлоқлар ва қалъалардаги аҳволни син-чиклаб ўргангани ўнбошини юборди. Ўнбоши икки кундан кейин келди ва даштда, қалъадан олтмиш чақирим йирокда, жуда кўп ўт-олов кўрганини, бошқирдлардан сўраганида номаълум бир куч келаётганини айтганликларини хабар қилди. Аммо тузукроқ хабар топиб келолмади, чунки нарироқ боргани юраги бетламабди.

Қалъадаги казаклар орасида одатдан ташқари ҳаяжон бошланди; кўчаларда тўп-тўп бўлиб, ўзаро аста-секин сўзлашар ва отлик ёки гарнizon аскарини кўришганида тарқалишар эди. Буларнинг орасига воқеанафислар юборилди. Юлай деган чўкинганд қалмоқ комендантга муҳим хабар топиб келди. Унинг гапига қараганда, ўнбоши ёлғон гапирган, бу маккор казак қайтиб келганидан сўнг, ўз ўртоқларига қўзғолончиilar орасига борганини, уларнинг сардорига қўл берганини, унинг қўлини ўпиб, узоқ ҳамгап бўлганини айтган. Комендант ўнбошини дарҳол қамади ва Юлайнин унинг ўрнига тайинлади. Бу хабарни казаклар очиқ норозилик билан қарши олдилар. Комендантнинг буйруқларини ижро этувчи Иван Игнатьич уларнинг: «Хой, гарнizon қаламуши, кўрадиганингни кўрасан!» деганларини ўз қулоги билан эшилди. Комендант ўнбошини шу куннинг ўзида сўроқ қилмоқчи бўлди; бироқ ўнбоши, ўз ҳамфирларининг ёрдами билан бўлса керак, қочиб кетди.

Бошқа бир ҳодиса комендантни яна-да, баттар ташвишга солди. Бир бошқирд яширин хитобномалар билан тутилди. Шу муносабат билан комендант ўз офицерларини чақирмоқчи бўлган ва бунинг учун

яна Василиса Егоровнани бир баҳона билан бирон ёққа юборишни истаган. Бироқ Иван Кузмич соғдил ва тўғри одам бўлганидан, илгари бир марта ишлатган баҳонасидан бошқа баҳона тополмаган.

«Менга қара, Василиса Егоровна, – дебди у йўталиб. – Герасим ҳазрат шаҳардан...» – Қўй ёлғонингни, Иван Кузмич, – дебди хотини унинг сўзини кесиб. – Сен кенгаш чақириб, Емельян Пугачёв ҳақида менсиз музокара қиласа музокчисан; бу сафар мени алдай олмайсан! – Иван Кузмич ҳайрон бўлиб, бақрайиб қолибди. «Э, хоним, – дебди у. – Агар ҳамма гапдан боҳабар бўлсанг, кетмасанг ҳам бўлади; сенинг олдингда ҳам сўйлашаверамиз». – Ҳа, баракалла, – деб айтибди хотини. – Ҳийлакорликни сен эпломайсан; офицерларга одам юборавер.

Яна ҳаммамиз тўпландик. Иван Кузмич хотинининг олдида бизга қандайдир чаласавод казак қўли билан ёзилган Пугачёвнинг хитобномасини ўқиб берди. Бу ўғри тезда бизнинг қалъага юриш бошлаш ниятида эканини эълон қиласа; казаклар ва аскарларни ўз тўдасига чакирган, қаршилик кўрсатмасликни қўмондонларга таклиф этган, акс ҳолда ўлдиражак эканини билдирган. Хитобнома дағал, аммо кучли таъбирлар билан ёзилган, содда одамларни ваҳимага солиши мумкин эди.

– Бу ёлғончини қаранг! – деди комендантнинг хотини. – Бизга яна нималар таклиф қиласа экан! Қаршисига чиқиб, байроқларни оёғи остига қўйсак-а! Вой итвачча-эй! Наинки, бизнинг қирқ йилдан бўён хизматда эканимизни, Худога шукр, кўпни кўрганимизни билмаса? Наҳотки, шу ўгрининг сўзига кулоқ соладиган қўмондонлар топилса?

– Топилмаса керак, – деди Иван Кузмич. – Хабарларга қараганда, бадкирдор кўплаб қалъаларни эгаллаган эмиш.

– Ростдан ҳам кучликка ўхшайди, – деди Швабрин.

– Унинг чинакам кучини ҳозир биламиз, – деди комендант. – Василиса Егоровна, омборнинг калитини бер. Иван Игнатьевич, бошқирдни олиб кел-чи; кейин Юлайга айт, гаврон келтирисин.

– Шошма, Иван Кузмич, – деди хотини, ўрнидан туроғтиб. – Мен Машани олиб чиқиб кетай; дод овозини эшитса қўрқади. Тўғрисини айтсан, уриб сўроқ килишга ўзимнинг ҳам хушим йўқ. Яхши қолинглар.

Сўроқ вақтида уриш илгари замонда суд ишларига шундай сингиб кетган эдики, уни йўқ қиласа музокчи Александр I томонидан чиқарилган фармон¹. Бу фармондан кейин ҳам подшо жандармлари ва терговчилари калтаклашни давом эттирганлар.

¹ Сўроқ пайтида уришни йўқотиш ҳақида Александр I томонидан чиқарилган фармон. Бу фармондан кейин ҳам подшо жандармлари ва терговчилари калтаклашни давом эттирганлар.

иқрор бўлиши зарур деб ўйлашган; бу фикр асоссизгина эмас, хаттохи соғлом ҳукуқий тушунчага тамоман зиддир, чунки, агар гуноҳкорнинг тониши унинг гуноҳсиз эканига исбот деб қабул қилинмаса, у ҳолда гуноҳкорнинг иқрор бўлиши унинг гуноҳкор эканига яна ҳам кучсизроқ далил бўлиши керак. Бу ваҳшиёна таомилнинг йўқотилишига норози бўлган қадимги судлар бор эканини, ҳатто ҳозир ҳам эшитиб юраман. Бизнинг замонда эса уриш зарур эканлигига судлар ҳам шубҳа қилмаганлар, гуноҳкорлар ҳам. Шунинг учун коменданнтнинг буйруги хеч қайсимизни ҳайрон қолдирмади, ташвишга ҳам солмади. Иван Игнатиич бошқирдни олиб келгани кетди. У Василиса Егоровнанинг омборида эди. Бир неча дақиқадан кейин асир даҳлизга келтирилди. Комендант асирни ичкарига олиб киришни буюрди.

Бошқирд оstonадан зўрга ўтди (унинг оёғига ёғоч кишан солинган эди) ва чўзинчоқ қалпогини қўлига олиб, эшик ёнида тўхтади. Афтига қараб, сесканиб кетдим. Бу киши умр бўйи ёдимдан кўтарилимаса керак. У етмишлардан ошган, на бурни бор, на қулоқлари. Сочи кирдирилган; соқол ўрнида бир неча оқ мўй осилиб турарди; пакана, ориқ ва буҷчайган, аммо қисиқ кўзлари ҳамон чақнарди. «Э-хе! – деди комендант, унинг кўрқинчли белгиларидан 1741 йилда жазолангандан исёнчилардан бири эканини билиб. – Сен, қари қашқир, бизнинг қопқонимизга бир марта тушгансан дейман. Қулоқ, бурнинг кесилганидан маълумки, кўзғолонга энди қўшилган эмассан. Қани, берироқ кел-чи; айт, сени ким юборди?»

Қари бошқирд индамади ва комендантга бўзрайиб қаради. «Нимага индамайсан? – деди Иван Кузмич. – Ё русча билмайсанми? Юлай ўз тилингда сўра-чи, буни бизнинг қалъага ким юборди экан?»

Юлай Иван Кузмичнинг саволини татар тилида тушунтириди. Лекин бошқирд унга ҳам худди боягидек қараб, бир оғиз ҳам жавоб бермади.

– Хўп, яхши, – деди комендант. – Тилингни чиқариб қўяман. Йигитлар! Бунинг беъмани ола чопонини ечиб, уринглар. Юлай, ўхшатиб адабини бер!

Икки инвалид бошқирдни ечинтира бошлади. Бечоранинг юраги ховлиқди. У болалар қўлига тушган жонивордек жавдираб атрофга қаради. Ногиронлардан бири унинг қўлларини ўз елкасидан ошириб, чолни орқасига кўтарди, Юлай эса новда билан орқасига бир туширган эди, бошқирд заиф, ёлворган товуш билан «вой» деди-да, бошини чайқаб, оғзини очди. Унинг тили йўқ – кесилган эди.

Шундай ишлар менинг замонимда бўлгани ва император Александр эзгулик билан подшолик қилаётган вақтда яшаётганим ёдимга

тушса, илм-урфоннинг тараққийси ва инсонпарварлик қоидаларининг тез тарқалишига ҳайрон қолмасдан иложим йўқ. Ёш йигит! Агар менинг бу ёзувларим қўлингта тушса билгинки, энг яхши ва мустаҳкам ўзгаришлар ҳеч қандай зўрлик қиласдан, киши хулқининг яхшиланишидан вужудга келган ўзгаришлардир.

Ҳамма ҳайрон қолди. «Хўш, – деди комендант, – бундан ҳеч гап чиқмайди. Юлай, бошкirdни омборга элтиб кўй. Биз, жаноблар, баъзи нарсалар хақида гаплашамиз».

Биз ўз вазиятимизни музокара қилиб ўтирган эдик, бирдан Василиса Егоровна кириб келди, у ҳаддан ташқари ҳовлиқсан эди.

– Нима бўлди? – деди ҳайрон бўлган комендант.

– Фалокат, жаноблар, фалокат! – деди Василиса Егоровна. – Нижнеозёрск қалъаси бугун эрталаб кўлдан кетибди. Герасим ҳазратнинг хизматкори ўша ердан келди. Қалъанинг кўлдан кетганини қўрибди. Комендант ва барча офицерлар дорга осилибди. Бутун аскарлар асир олинибди. Бадкирдорлар бу ерга ҳам келмаса гўрга эди.

Кутилмаган хабар мени эсанкиратиб кўйди. Нижнеозёрск қалъасининг коменданти ювош ва камтар йигит эди, мен уни танирдим: бундан иккى ойча илгари ёшгина хотини билан Оренбургдан ўз қалъасига ўтиб кетаётib, Иван Кузмичнига тушганди. Нижнеозёрск қалъаси бизнидан йигирма беш чақиримча нарида эди. Биз ҳам Пугачёвнинг хужумини ҳар соат кутишимиз керак эди. Марья Ивановнанинг тақдири кўз олдимга келиб, юрагим орзикиб кетди.

– Менга қаранг, Иван Кузмич! – дедим комендантга. – Бизнинг вазифамиз сўнгги нафасимизгача қалъани сақлашдир; бу ҳақда гапириб ўтиришнинг ҳам ҳожати йўқ. Аммо аёлларни эҳтиёт қилиш тўғрисида ўйлаш керак. Буларни агар йўл очик бўлса, Оренбургга ёки бадкирдорларнинг қўли етмайдиган узокроқ ва ишончлироқ қалъага юборинг.

Иван Кузмич хотинига қаради ва:

– Дарҳақиқат, исёнчиларни бирёқли қилмагунимизча сизларни узокроқ бир ерга юбормасак бўлмайдими? – деди.

– Бўлмаган гап! – деди хотини. – Ўқ етмайдиган қалъа бор эканми? Белогор қалъасининг нимаси ишончсиз? Худога шукр, йигирма икки йилдан буён шу ердамиз. Бошқирдларни ҳам кўрдик, қирғизларни ҳам, қўявер, Пугачёв ҳам келаверсин!

– Майли, – деди комендант, – агар қалъамизга ишонсанг, ўтира берганинг дуруст... Машани нима қиласиз? Туриб берсак ёки ёрдам етиб келса яхшику-я, борди-ю, қалъани бадкирдорлар ишғол қилишса нима бўлади?

— У вақтда... — Василиса Егоровна тутилиб қолди ва ҳаддан ташқари хаяжонга тушиб, жим бўлди.

Ўз гапининг хотинига таъсир қилганини сезиб (эҳтимол, бутун умрида илк марта таъсир қилишидир), Иван Кузмич давом этди:

— Йўқ, Василиса Егоровна, Машанинг бу ерда бўлиши мумкин эмас. Уни Оренбургга – аммасиникига юборамиз: у ерда аскар ҳам, тўп ҳам кўп, қалъанинг девори фиштдан. Сенинг ҳам ўша ерга кетганинг маъкул; қалъани ишғол этишса, кекса бўлсанг ҳам ҳолинг ёмон бўлади, соғ кўйишмайди.

— Хўп, — деди хотини, — шундай қила қолайлик: Машани юборамиз. Аммо мени юбораман деб, овора бўлма: бормайман. Кексайган чоғимда сендан айрилиб, ёт элларда якка гўр излаб юрайми?! Бирга умр қилдик, бирга ўламиз.

— Майли, — деди комендант. — Қани, имиллама. Машани жўнатиш тараддудини кўр. Эртага тонг ёришиши билан жўнайди, гарчи ортиқча одамимиз бўлмаса-да, ёнига отлик аскар қўшамиз. Қани Маша?

— Акулина Памфиловнанинг уйида, — деди комендантнинг рафиқаси. — Нижнеозёрск қалъасининг кўлдан кетганини эшишиб, кўнгли безовта бўлди; тоби қочмаса деб кўркаман. Ё, Парвардигор, қандай кунларга қолдик!

Василиса Егоровна Машани жўнатиш тадорикини кўргани кетди. Музокарамиз давом этди; аммо мен сўзга аралашмасдим, қулоғимга гап ҳам кирмас эди. Марья Ивановна кечки емак пайтида келди – ранги оқарган, кўзлари йиғидан шишиган. Емак вақтида ҳеч ким гапирмади ва дастурхондан одатдагидан эртароқ турдик; комендант ва унинг оиласи билан хайрлашиб, уй-уйимизга кетдик. Аммо мен қиличимни жўрттага эсдан чиқариб, шу баҳона билан қайтиб келдим: Марья Ивановнанинг ўзи якка бўлишига кўзим етган эди. Ҳақиқатан ҳам у ёлғиз бўлиб, мен билан эшик олдида учрашди ва қиличимни ортимдан олиб чиқсан экан, берди. У кўзига ёш олиб:

— Хайр, Пётр Андреевич! – деди. – Мени Оренбургга юборишатипти. Соғ-саломат ва баҳтиёр бўлинг, насиб бўлса кўришармиз, агар кўришмасак... – У йиғлаб юборди. Мен уни маҳкам кучоқлаб олдим.

— Яхши бор, маликам, – дедим, – хайр севгилим, фариштам! Бошимга нималар тушмасин, фикр-ёдим сенда бўлади! – Маша кўксимга бошини қўйиб йиғлар эди. Мен эҳтирос билан унинг юзларидан бўса олдим ва шошиб уйдан чиқдим.

VII Б О Б

ХУЖУМ

*Шўрлик, гариб бошгинам,
Итоаткор бошгинам!
Нақ ўттиз йил, боз уч йил
Хизмат қилди бошгинам.
Тополган йўқ бошгинам:
На манфаат, на шодлик,
Ва на бирон яхши сўз,
Ё баландроқ мартаба;
Хизмат қилиб бошгинам
Орттиргани шу бўлди.
Икки баланд дор ёғоч,
Ҳа, яна ипак сиртмоқ.*

Халқ қўшиғи

Шу кечаси ухламадим, ечинмадим ҳам. Марья Ивановна билан сўнгги дафъа хайрлашиш учун сахарда қалъя дарвозасига бориш ниятида эдим. Ўзимда буюк ўзгариш сезардим; қалбимдаги хаяжон яқинда чеккан кулфатларимга қараганда енгилроқ эди. Жудолик қайғусига туманли, аммо тотли умидлар, сабрсизлик билан кутилган хавф-хатар ва олижаноб иззат-нафс ҳислари қўшилиб кетди. Кечанинг қандай ўтганини билмай қолдим. Энди ташқарига чиқмоқчи бўлганимда, эшик очилиб, капрал кириб келди ва бизнинг казаклар Юлайни зўрлик билан олиб, қалъадан чиқиб кетганликларини, қалъя атрофида номаълум суворийлар юрганини айтди. Марья Ивановна чиқиб кетолмай қолса-чи, деган ўй мени вахимага солди; капралга бир қанча топшириклар бериб, ўзим дарҳол коменданнтинг олдига югурдим.

Тонг ёриша бошлаганди. Югурганимча кетаётган эдим, кимдир мени чақирди.

– Қаёққа кетяпсиз? – деди Иван Игнатьич ортимдан етиб келиб. – Иван Кузмич тепалиқда, сизни айтиб келгани юборди. – Пугачёв келди.

– Марья Ивановна кетдими? – дедим юрагим ҳовлиқиб.

– Улгурулмади, – деди Иван Игнатьич. – Оренбург йўли ёпилибди, қалъя ўраб олинган. Аҳвол ёмон, Пётр Андреевич!

Тепаликка қараб йўл олдик. Бу табиий тепалик бўлиб, ғовлар билан ўралган эди. Қалъанинг бутун аҳолиси шу ерга тўпланган. Гарнizon саф тортган, тайёр. Замбаракни у ерга кеча кечкурун олиб чиқишиган. Комендант ўзининг саф тортган озгина аскари олдида у ёқдан-бу ёққа

юрарди. Хавфнинг яқинлиги кекса ҳарбийни одатдан ташқари дадиллаштирган. Даشتда, қалъадан сал нарироқда йигирмага яқин суворий айланиб юрарди. Булар казакларга ўхшар, аммо ичида бошқирдлар ҳам кўринарди. Уларни бошларидағи қалпоқ ва ёnlарига осиб олган ўқдонларидан таниш мумкин. Комендант аскарларни кўриқдан ўтказар экан:

– Ҳа, йигитлар, бугун подшомизга кўкрагимизни қалқон қиласиз ва ботир, онтини бузмайдиган кишилар эканимизни бутун дунёга кўрсатамиз! – деди.

Аскарлар баланд товуш билан ўзларининг содиқ эканликларини айтдилар. Швабрин ёнимда туриб, душманга синчилаб қарап эди. Даشتда айланиб юрган суворийлар қалъадаги ҳаракатни сезиб, бир ерга тўпландилар ва ўзаро сухбатлаша бошладилар. Комендант Иван Игнатьичга замбаракни шу суворийлар тўдасига тўғрилашни буюрди, ўзи пилтага ўт туташтириди. Ўқ фувиллаганича суворийлар устидан учиб ўтди, аммо ҳеч қандай шикаст етказмади. Суворийлар тарқалиб, дарҳол кўздан йўқолдилар. Ҳеч ким қолмади.

Василиса Егоровна келди, онасидан ажрашни истамаган Маша ҳам унинг ёнида эди.

– Қалай? – деди комендантнинг хотини. – Урушнинг бориши қандай? Қани душман?

– Душман яқинда, – деди Иван Кузмич. – Худо ёр бўлса, иш жойида бўлади. Хўш, Маша кўркяпсанми?

– Йўқ, отажон, – деди Марья Ивановна. – Уйда ўзим якка колганимда кўпроқ кўрқардим.

У менга қаради ва ўзини зўрлаб илжайди. Қиличимни кеча унинг кўлидан олганим ёдимга тушиб, сопидан маҳкам ушладим, гўё бу қиличини у менга ўз ёримни мудофаа қилиш учун берганди. Юрагимга ўт тушди. Ўзимни унинг рицари деб хаёл қилас эдим. Мен унинг ишончига лойиқ эканимни исбот қилишга ташна бўлиб, сабрсизлик билан қатъий дамларни кутардим.

Шу онда қалъадан ярим чакирим наридаги тепалик ортидан яна анчагина суворийлар чиқиб келди ва ҳадемай дашт найза, камон билан куролланган кишиларга тўлди. Буларнинг ўртасида оқ от минган, қизил чакмон кийган бир киши қиличини яланғочлаб келар, бу Пугачёвнинг ўзи эди. У тўхтади; атрофини ўз кишилари ўраб олди. Унинг буйруғи билан бўлса керак, тўпдан тўрт отлиқ ажralиб, бизнинг қалъа томонга от қўйиб кела бошлади. Буларни танидик – бизга хиёнат қилган кишилар экан. Бири боши тепасида қоз кўтариб олган, бирининг найзаси

учида Юлайнинг калласи. У ғовнинг олдига келиб бир силтаган эди, калла четандан ошиб тушиб биз томонга юмалади. Бечора қалмоқнинг калласи комендантнинг оёғи остига тушди. Хоинлар: «Ўқ отманглар, подшонинг олдига чиқинглар. Подшо шу ерда!» деб қичқирар эди.

«Шошма, мен сенга кўрсатиб қўяй! – деб бақирди комендант. – Йигитлар, отинглар!» Аскарлар бараварига ўқ узишди. Мактуб ушлаб турган казак қалқиб, отдан ағанаб тушди, қолганлари қочди. Мен Марья Ивановнага қарадим. Юлайнинг қонли бошини кўриб эсанкираган ва милтиқ товушидан гаранг бўлган Марья Ивановна хушсиздек кўринарди. Комендант капрални чақириб, ўлган казакнинг кўлидан мактубни олишга буюрди. Капрал, ташқарига чиқиб, ўлган казакнинг отини жиловлаб келди-да, мактубни комендантга берди. Иван Кузмич мактубни товуш чиқармай ўқиди, кейин майда-майда қилиб ташлади. Бу орада исёнчилар, афтидан ҳужумга тайёргарлик кўришар эди. Ҳадемай қулоқ остидан ўқлар ғувиллаб ўта бошлади, бир неча ёй бизнинг ёнимизга – ерга ва ғовга санчилди.

– Василиса Егоровна! – деди комендант. – Бу аёлларнинг иши эмас. Машани олиб кет, қара, қизгинанинг юраги ёрилиб кетди.

Ўқ ёғилиб тургани учун қайтаришга ожиз бўлган Василиса Егоровна даштга қаради, у ерда катта ҳаракат борлиги билиниб турарди; кейин эрига қараб:

– Иван Кузмич, тириклик ҳам, қазо ҳам Худонинг иродаси. Машадан рози бўл. Маша, бор отангнинг олдига, – деди.

Маша ранги оқариб, титраб, Иван Кузмичнинг олдига борди ва тиз чўқди. Кекса комендант уни дуо қилди, сўнгра турғизиб ўпди-да, ўзгарган товуш билан:

– Хайр, Маша, баҳтинг ёр бўлсин, – деди. – Худога сигин: У сени марҳаматидан бебахра қўймайди. Бирон яхши одам чиқса, Худо баҳт ва муҳаббат ато этсин. Биз Василиса Егоровна, иккимиздек умр кўринглар. Хайр, Маша. Василиса Егоровна, уни тезроқ олиб кет.

Маша отасининг бўйнига осилиб йиглади.

– Биз ҳам видолашайлик, – деди Василиса Егоровна йиглаб. – Хайр, азизим Иван Кузмич. Мендан рози бўл, яхши-ёмон гапирган бўлсам!

– Хайр, хайр азизам! – деди комендант рафикасини кучоклаб. – Бўлди энди, боринглар, боринглар уйга, фурсат бўлса Машага сарафан кийдириб қўй.

Василиса Егоровна қизи билан кетди. Мен Марья Ивановнанинг ортидан қараб қолдим; у қайрилиб, менга бошини қимирлатиб қўйди. Шундан сўнг Иван Кузмич бизга қаради ва бутун дикқатини душманга

жалб қилди. Исёнчилар ўз бошлиқлари атрофига тўпланиб, бирданига отдан туша бошладилар. «Энди маҳкам бўлинглар! – деди комендант, – хужум бошланади...» Шу онда даҳшатли қичқириқ ва шовқин кўтарилди, исёнчилар қалъага қараб югурдилар. Замбарагимиз сочма ўқ билан ўқланган эди. Душман яқин келганида, комендант замбаракка ўт туташтириди. Ўқ душман тўдасининг ўртасига тушди. Исёнчилар икки ёққа сочилиб, чекиндилар. Бошлиқлари олдинда якка қолди... У қиличини ҳавода ўйнатиб, чекингланларни олға давват қилгандек кўринарди... Босилган шовқин-сурон яна авжига чиқди.

– Ҳа, йигитлар! – деди комендант. – Энди дарвозани очинглар, довул қоқинглар. Йигитлар! Менинг ортимдан олға!

Комендант, Иван Игнатьевич ва мен кўз очиб юмгунча тепаликнинг нариги тарафиға чиқдик. Бирок юрагини олдириб кўйган гарнизон ўрнидан кўзғалмади. «Нега турибсизлар, болаларим? – деб қичқириди Иван Кузмич. – Бир бошга бир ўлим: хизмат шуни талаб қиласди!» Шу онда исёнчилар биз томонга югуриб, қалъанинг ичига кириб олдилар. Довул товуши тинди, гарнизон куролни ташлади. Мени уриб йиқитишиди, аммо дарров ўрнимдан туриб, исёнчилар билан бирга қалъага кирдим. Бошидан ярадор бўлган комендант исёнчилар орасида турар, бадкирдорлар ундан калитни талаб қиласдилар. Мен уни ҳимоя килиш учун юргурган эдим, бир неча барваста казак маҳкам ушлаб:

– Кўрадиганингизни кўрасиз энди, подшохга бўйин эгмаганлар, – дейишиди ва кўлимни боғлашди. Бизни кўчама-кўча олиб юришди; аҳоли уй-уйидан нон билан туз олиб чиқарди. Бутхона кўнғироғи жаранглади. Бирдан кимдир қичқириб, подшоҳнинг майдонда асирларни кутиб турганини ва қасам ичирмоқчи эканини хабар қиласди. Халқ майдонга қараб оқди, бизни ўша ерга олиб бордилар.

Пугачёв комендантнинг эшиги олдидаги айвончада – оромкурсида ўтиради. Устида зарҳал ҳошияли чиройли казакча тўн, бошида олтин жига тақилган узун казакча телпак, кўзлари чақнар эди. Унинг афти менга таниш кўринди. Казак оқсоқоллари уни ўраб олишганди. Герасим ҳазрат, ранги оппоқ, кўлида хоч, айвонча ёнида қалтираб турар ва бир оздан кейин бўладиган қурбонларнинг гунохини сукут билан тиляётгандек, қонларидан кечилишини сўраётгандек кўринар эди. Майдонга бир нечта дор тикилган. Биз яқинлашганимизда, бошқирдлар оломонни четлатиб, бизни Пугачёвга рўпара килдилар. Черковнинг кўнғироқ товуши тинди, ҳаммаёқ сукунатга чўмди. «Комендант қайси бири?», деди ёлғон подшоҳ. Бизнинг ўнбоши оломон орасидан чиқиб, Иван Кузмични кўрсатди. Пугачёв чолга ғазаб билан кўз ташлади ва:

– Менга, ўз шоҳингга қарши чиққани қандай журъат этдинг? – деди. – Ярадор бўлиб мадори қуриган комендант бор кучини тўплаб, дадиллик билан: – Сен менинг шоҳим эмассан, сен ўғри ва хоинсан, эшитдингми! – деди.

Пугачёв ғазбланиб, оқ дастрўмоли билан ишора қилди. Бир неча казак комендантни ушлаб, дорнинг остига судради. Кеча биз сўрот қилган қулоқсиз, бурунсиз бошқирд, қўлида аркон, дорнинг устида айри миниб ўтирас эди. Бир неча дақиқадан сўнг, бечора Иван Кузмичнинг дорга осилганини кўрдим. Кейин Пугачёвнинг олдига Иван Игнатилични келтиришиди.

– Подшоҳинг Пётр Фёдоровичга содиқман деб онт ич! – деди Пугачёв. – Сен бизга шоҳ эмассан, – деди Иван Игнатилич ўз капитанининг сўзини такрорлаб. – Сен ўғри ва хоинсан!

Пугачёв яна оқ рўмомчаси билан ишора қилди. Иван Игнатилич ҳам ўзининг кекса бошлиғи ёнига осилди.

Навбат менга келди. Олижаноб дўстларимдек жавоб беришга ҳозир бўлиб, Пугачёвнинг юзига тик қарадим. Шу пайт кўзим исёнчиларнинг оқсоқоллари орасида турган Швабринга тушди, ҳайрон қолдим. У сочини айланмасига қирктириб, казакча кийиниб олганди. У Пугачёвнинг олдига келиб, қулоғига бир нима деб пичирлади. «Осилсин!» деди Пугачёв, менга қарамасдан. Бўйнимга сиртмоқ солишиди. Гуноҳларимга тавба қилиб, калима қайтардим ва яқинларимнинг дуойи жонини қилдим. Мени дор остига олиб келишиди. «Балки афв этиларсан» дейишиарди, менга жаллодлар. Эҳтимол чиндан ҳам далда бермоқчи бўлишар эди. Бирдан: «Тўхтанглар, мальянлар! Тўхтанглар!» деган товуш эшитилди. Жаллодлар тўхташди. Қарасам: Савельич Пугачёвнинг оёғига бош кўйиб ёлворарди. «Жаноб! – дер эди у бечора. – Бир боённинг фарзандини ўлдиришдан сенга нима фойда! Кўйиб юбор уни, хунининг ҳақини беради; муддао кишиларни қўрқитиш ва жазолаш бўлса, мен чолни дорга торта қол!» Пугачёв ишора қилди. Бўйнимдан сиртмоқни олишиди. «Подшоҳимиз сени афв этди!» дейишиди атрофидагилар. Шу дақиқада кутулганимга севиндим дея олмайман, шунингдек, афсусланганим ҳам йўқ. Ҳисларим ҳаддан ташқари туманли эди. Мени қайтариб, яна сохта подшоҳинг олдига келтиришиди ва қархисига тиз чўқтиришиди. Пугачёв томирлари бўртиб чиқкан қўлини менга узатди. «Ўп қўлини, ўп!» дейишиар эди ён-атрофимдагилар. Аммо мен бундай қабиҳ тубанликдан кўра, энг қаттиқ жазони афзал кўрар эдим. «АЗИЗИМ Пётр Андреевич – дерди Савельич ортимдан туриб. – Қайсарлик қилма! Сендан нима кетди? Ўпид кўя қол, шу баччага... (тфу!) ўпа қол

қўлини...» Мен қимирламадим. Пугачёв қўлини ола туриб: «Жаноблари севинчдан эсларини йўқотиб қўйибдилар, – деди истехзо билан. – Турғизинглар!» Мени турғизиб, қўйиб юборишиди. Мен даҳшатли комедиянинг давомини томоша килдим.

Аҳоли онт ича бошлади. Ҳамма бирин-кетин келиб, хочни ўпарва ёлғон подшоҳга таъзим қиласарди. Гарнizon аскарлари ҳам шу ерда. Рота машиначиси, қўлида ўтмас қайчи, уларнинг соchlарини айланмасига қирқар эди. Аскарлар устларини қоқар, Пугачёвнинг олдига келиб, унинг қўлини ўпардилар, у бўлса афв этиб, ўз тўдасига оларди. Бу иш уч соатча давом этди. Ниҳоят, Пугачёв ўрнидан туриб айвончадан тушди, амалдорлари унга эргашдилар. Қимматбаҳо жабдук урилган оқ от келтирилди. Икки казак қўлтиғидан олиб, уни отга миндириб қўйди. У Герасим ҳазратникида меҳмон бўлишини билдириди. Шу онда аёлнинг фарёди эшитилди. Ўғрилардан бир нечтаси соchlари тўзғиган, яланғоч Василиса Егоровнани судраб чиқди. Булардан бири дарров кампирнинг иссиқ пахтали нимчасини кийиб олибди ҳам! Бошқалари сандик, идиш-товоқ, кийим-кечак, кўрпа ва бошқа буюмларини олиб чиқар эди.

– Азизларим, – дер эди бечора кампир. – Қўйиб юборинглар мени. Жаноблар, мени Иван Кузмичнинг олдига олиб боринглар. – Бирдан унинг кўзи дорга тушди ва эрини таниб:

– Бадкирдорлар, – деди беҳуш қичқириб. – Уни нима қилдиларинг? Вой кўзимнинг нури Иван Кузмич, ботир аскар! Сенга на прусс найзаси ботган, на турк ўқи теккан эди. Тузукроқ бир урушда эмас, турмадан кочган бир ўғрининг қўлида ўлдинг!

– Товушини ўчиринг бу алвастини! – деди Пугачёв. Ёш казак, кампирнинг бошига қилич билан урди. У айвончанинг зинасига йиқилиб жон берди. Пугачёв кетди. Халойик унинг ортидан эргашди.

VIII Б О Б

ЧАҚИРИЛМАГАН МЕҲМОН

Чақирилмаган қўноқ, йўнилмаган таёқ.

Мақол.

Майдон бўшаб қолди. Мен ҳамон бир ерда турар ва бундай даҳшатли таассуротлардан чувалган фикримни бир ерга тўплай олмас эдим.

Мени ҳаммадан ҳам кўра Марья Ивановнанинг тақдири нима бўлгани кўпроқ қийнар эди. У қаерда? Нима бўлди? Яширина олдими?

Яширинган жойи ишончлими... Шундай ваҳимали ўйлар билан комендантнинг уйига кирдим... Уй бўм-бўш, курсилар, столлар, сандиклар ва идиши-товоқлар синдирилган, уй талангани. Торгина зинадан югуриб меҳмонхонага чиқдим ва умримда илк дафъа Марья Ивановна нинг бўлмасига кирдим. Ўғрилар титкилаган тўшагини кўрдим; жавон синдирилган ва ичидаги ашёси талангани, санам олдидағи чироқ ҳануз ёнмоқда эди. Деворга осиглиқ кичкина ойна омон қолган... Бу сокин, қиз бўлмасининг эгаси қаерда? Вахимали бир хаёл миямдан лип этиб ўтди: у ўғриларнинг қўлига тушган бўлса-я!.. Юрагим шув этди... Севгилимнинг исмини қаттиқ-қаттиқ айтиб, куйиниб йигладим... Шу чогда шитирлаш эшитилди ва жавоннинг орқасидан Палашка чиқиб келди. Унинг ранги оппроқ, ўзи титрарди.

– Оҳ, Пётр Андреевич! – деди қўлларини бир-бирига уриб. – Қандай кунларга қолдик! Қандай кўргилик!..

– Марья Ивановна қаерда? – дедим шошиб. – Унга нима бўлди?

– Ойимқиз саломатлар, – деди Палашка. – У Акулина Памфиловна нинг уйига яширилган.

– Руҳонийнинг уйига-я? – дедим ваҳима билан қичқириб. – Ё, Рабб! Ахир Пугачёв ўша ерда-ку!..

Югуриб уйдан чиқдим ва кўз очиб юмгунча руҳонийнинг уйига этиб бордим. Кўзимга ҳеч нарса кўринмас, қулоғимга ҳеч қандай товуш кирмасди. Герасим ҳазратнинг уйдан шовқин-кулги, кўшиқ садолари эшитилар эди... Пугачёв ўз ҳамтоворклари билан кайфу сафо қиласиди. Палашка ҳам ортимдан этиб келди. Палашкадан аста Акулина Памфиловнани чақиртиридим. Хиёл ўтмай, у бўш шаробнинг идишини кўтариб чиқди.

– Худо ҳақи! Марья Ивановна қани? – дедим айтиб бўлмайдиган даражада ҳаяжон билан.

– Менинг каравотимда ётибди, бўталоғим, каравотни назардан пана қилиб қўйганман, – деди руҳонийнинг хотини. – Худо бир сақладида, Пётр Андреевич, бадкирдор энди овқат егани ўтирган эди, бечора қизгина уйғониб инграб юборсами!.. Жон-поним чиқиб кетди. Бадкирдор унинг товушини эшитиб қолди: «Инграган ким, кампир?» деди. Ўғрини алладим: «Жияним, шоҳим, икки ҳафтадан буён бетоб ётибди» дедим. – «Жиянинг ёшми?» деди. «Ёш, шоҳим» дедим. – «Қани, кампир, кўрсат-чи, жиянингни» деди. Юрагим орзиқиб кетди, илож қанча. «Марҳамат шоҳим, аммо қиз хузурингизга келолмайди, тургани дармони йўқ» дедим. «Майли ҳечқиси йўқ, ўзим бориб кўраман» деди. Қара, малъун парданинг ортига ўтди, билсанг! Юзини очди, лочинникидек

кўзларини тикди, йўқ, хеч нарса демади... Худо саклади! Ишонсангиз, болам, отангиз иккимиз ит азобида ўлдирилишимизга кўзимиз етиб қолган эди. Бахтимизга, қизгина бадкирдорни танимади. Худоё тавба, не кунларни кўрдик. Нима дейсиз энди? Бечора Иван Кузмич! Ким шундай бўлади, деб ўйлаган эди!.. Василиса Егоровнани айтинг! Иван Игнатьич! Уни нега ўлдиради денг?.. Сизга нечук раҳм қилди? Алексей Иванич Швабринни қаранг-а? Сочини айланмасига қирқтириб, шулар билан кайф-сафо қилиб ўтирибди! Уддабуролигига гап йўқ! Жияним бетоб деганимда, афтимга шундай қарадики, ишонсангиз, худди кўксимга наштар санчгандек бўлди, аммо сирни очмади, шунисига ҳам балли. – Шу пайт маст меҳмонларнинг бақиришлари ва Герасим ҳазратнинг товуши эшитилди. Меҳмонлар шароб талаб қилишар, Герасим ҳазрат эса рафиқасини чақирап эди. Рухонийнинг хотини шошилиб қолди.

– Боринг уйингизга, Пётр Андреевич, – деди. – Ҳозир сиз билан сўзлашишнинг мавриди эмас, бадкирдорлар ичкилик қилаётирлар. Мастлик вактида қўлига тушиб қолсангиз ёмон бўлади. Хайр, Пётр Андреевич. Нима бўлса-да, хавотир бўлманг, Худонинг ўзи асрайди!

Рухонийнинг хотини кетди. Бир оз тинчиб, уйга кетдим. Майдон ёнидан ўтиб кетаётсам, бир неча бошкирд дор тагига тўпланиб, осилганларнинг этикларини ечиб олишмоқда; қаттиқ жаҳлим чиқди, аммо аралашишнинг бефойдалигини сезиб, ўзимни зўрга босдим. Ўғрилар қальъада у ёқдан-бу ёкка югуриб, офицерларнинг уйларини талашар эди. Ҳар ёқдан маст исёнчиларнинг қичқирган товушлари эшитиларди. Уйга келдим. Бўсағада Савельичга дуч келдим. «Худога шукр! – деб қичқирди у мени кўриб. – Мен яна бадкирдорлар ушладимикан, деб ўйлаган эдим. Э, хожам Пётр Андреевич! Ўғрилар ҳамма нарсамизни талаб кетишиди, кийим-кечак, идиш-товоқ, хеч нарса қолмади. Гўрга. Сизни тирик қўйиб юборгандарига шукр қиласман! Айтгандек, сиз, хожам, атамани танидингизми?»

– Йўқ, танимадим, ким экан у?

– Нега, хожам? Карvonсаройга тушганимда алдаб пўстинингни олган пиёнистани эсингдан чиқардингми? Янги пўстинингни берган эдинг, бу алвости кийганда чок-чокидан сўқилиб кетган эди-ку!

Ҳайрон қолдим. Дарҳақиқат, Пугачёв ўша етакчига жуда ўхшар эди. Пугачёвнинг ўша эканига ишондим ва менга қилинган раҳмнинг сабабини англаб етдим. Ажаб, бир саёққа инъом этилган кичкина пўстин мени сиртмоқдан кутқариб қолди ва карvonсаройларда санғиб юрган бир пиёниста қалъани қамал қилди, хукуматни ларзага келтирди!

– Овқат емайсанми? – деди Савельич одатини тарк этмай. – Уйда ҳеч нарса йўқ. Бирор нарса топиб, таом тайёрлайман.

Ўзим якка қолиб, ўйга ботдим. Нима қилишим керак? Бадкирдорлар қўли остида бўлган қальада туриш ёки унинг тўдасига қўшилиш ҳарбий учун номус. Шундай қийинчилик бўлган вактда, хизматим ватан учун фойдали бўладиган ерга боришни бўйнимдаги вазифа талаб қилар эди... Аммо муҳаббат, Марья Ивановна олдида унинг ҳомийси, мудофаачиси бўлиб қолишини талаб этарди. Гарчи тез фурсатда ахволнинг ўзгаришига кўнглим гувоҳлик берса-да, Марья Ивановна хавф остида эканини ўйлаб қўрқар эдим.

Бир казак кириб келди, ўйларим чала колди.

– Подшоҳи аъзам сени йўқлайди, – деди.

– Қаерда? – дедим фармонига бўйсунгани ҳозирланиб.

– Коменданнтнинг уйида. Жаноб емакдан кейин ҳаммомга борган эдилар, ҳозир дам олмоқдалар. Рафторидан шоҳимиз аслзода кўринадилар, жаноб. Овқат вақтида икки лаган қовурилган гўштни пакқос туширдилар. Ҳаммомнинг ҳам шундай иссиғини хоҳлар эканларки, ҳатто Тарас Курочкин ҳам тоқат қилолмай, супургини Фомка Бикбаевга берди, совуқ сувга тушиб зўрға ўзига келди. Энг қизиги, нима десам экан... Ҳаммомда кўкрагидаги шоҳлик нишонасини кўрсатибди, унинг бир томонида бир мирилик чақадек келадиган икки бошли бургут, иккинчи томонида ўз шахсини кўрсатадиган аломат бор эмиш.

Казакка гап қайтаришни лозим кўрмай, у билан бирга коменданнтнинг уйига қараб юрдим. Пугачёв билан учрашувимни йўл-йўлакай тасаввур килиб, бунинг оқибати нима билан якун топишини англашга ҳаракат қилардим. Ўқувчи бу ҳолда менинг мутлақо совуққон бўйлолмаслигимни осонгина тасаввур қила олади.

Коменданнтнинг уйига етганимда, қоронғи туша бошлаган эди. Дор ўзининг қурбонлари билан ваҳимали суратда қорайиб турарди. Бечора Василиса Егоровнанинг жасади ҳануз икки ёнида икки казак қоровул турган зина бикинида ётарди. Мени бошлаб келган казак хабар бергани ичкарига кириб кетди ва зум ўтмай чиқди-да, мени кечагина Марья Ивановна билан маҳрамларча видолашганим уйга таклиф қилди.

Фавқулодда бир манзарани кўрдим. Устига дастурхон ёзиб, шиша ва пиёлалар қўйилган стол атрофида Пугачёв билан бирга унга яқин казак оқсоқоллари ўтирас, ҳаммасининг бошида телпак, устида турли рангдаги кўйлак, барчаси шароб ичиб қизарган, кўзлари чакнар эди. Буларнинг орасида на Швабрин бор, на ўнбоши ва на бизга хиёнат қилган бошқа кишилар.

– Ҳа, жаноб! – деди Пугачёв мени кўриб. – Хўш келибсиз, қани марҳамат қилсинлар.

Ҳамсұхбатлари силжиб, менга жой беришди. Мен индамасдан столнинг бир четига ўтиридим. Ёнимдаги ёш, чиройли, хушқомат каз менга оддий мусалласдан бир пиёла қўйди, лекин мусалласга қўл урмадим. Ўтирганларга диққат билан бир-бир қараб чиқдим. Пугачёв тўрда, столга тирсагини қадаб, каттакон муштини қоп-кора соқоли остига тираб ўтиради. Унинг келишган ва хийлагина чиройли сиймосидан ҳеч қандай кўрқинч акс этмасди. У элликларга борган кишига қараб, уни гоҳ граф деб, гоҳ Тимофеич деб атар, гоҳида ота деб иззат қиласарди. Ҳаммаси ўзаро ўртоқларча муносабатда бўлар ва бошлиқларини у қадар иззат-икром ҳам қилишмас эди. Сўз эрталабки хужум, қозонилган муваффақият ва эндиғи ҳаракатлар устида борарди. Ҳар қайсиси мақтайди, ўз фикрини айтади ва Пугачёв билан баҳузур баҳслашади. Шу ғаройиб ҳарбий кенгашда Оренбургга хужум қилишга қарор берилди: гўё бу муваффақият қозониладиган жасурона бир юриш бўладигандек эди! Юриш эртага амалга ошириладиган бўлди. «Қани, йигитлар, – деди Пугачёв, – ухлаш олдидан менинг севган қўшиғимни айтайлик. Чумаков¹ бошла!» Ёнимда ўтирган киши ингичка товуш билан ҳазин бурлоқ куйини бошлади, бошқалар ҳам қўшилди:

*Гувиллама, она ўрмон, ям-яшил ўрмон,
Мард йигитнинг ўйлашига халал бермагин.
Мен мард йигит нақ эртага тергов бергали
Қаттол қози, подионинг олдига боргум,
Шоҳ-хўкмдор мендан шундай сўроқ бошлайди:
Айтавергин, катта йигит, айт, дехқонбачча,
Кимлар билан ўғирладинг ва йўл тўසдинг сен.
Шерикларинг кўпми эди сен билан бирга?
Мен дейманки, пуштипаноҳ православ шоҳи,
Айтгум сенга бутун ҳақни ва ҳақиқатни,
Бор-йўзи тўртта эди менинг ўртогим.
Қоронги тун энг биринчи ўртогим менинг,
Пўлат пичоқ менинг учун иккинчи ўртоқ,
Хўши, учинчи ўртогимни сўрсанг – яхши от
Ва тўртингчи ўртоқ менга – таранг ёй-садоқ,
Отган ўқлар эса менинг югурдакларим.
Пуштипаноҳ православ шоҳи шундай дер:*

¹ Фёдор Чумаков – Яик казаги, Пугачёвнинг энг яқин ёрдамчиларидан бири. Кўзғолон тор-мор бўлганидан сўнг, у Пугачёвни ҳукуматга тутиб берганлардан бири бўлиб чиқди.

*Баракалла, катта йигит, сен деҳқонбачча,
Ўғирликда ва жавобда ўткир экансан! –
Катта йигит, шунинг учун бағишилай сенга
Кенг ёвоннинг ўртасида баланд саройлар,
Яъни – боши биринчилган икки дор ёғоч.*

Осилишга маҳкум бўлган кишилар томонидан айтилган дор ҳақидаги бу содда халқ қўшифи, менга қандай таъсир қилганини тасвир этиб бўлмайди. Уларнинг кўрқинчли башаралари, келишган товшлари, усиз ҳам таъсирли бўлган сўзларга мунг беришлари мени қандайдир вахимага солди.

Мехмонлар яна бир пиёладан мусаллас ичиб ўринларидан туришди ва Пугачёв билан хайрлашиши. Мен ҳам турмоқчи бўлган эдим, Пугачёв тўхтатди. «Ўтири, мен сен билан гаплашиб олмоқчиман». Иккимиз қолдик.

Бир-биримизга тикилишиб, бир неча дақиқа жим қолдик. Пугачёв ҳар замон чап кўзини қисиб менга тикилар, юзида макр ва табассумнинг ғалати бир ифодаси кўринар эди. Охири у кулиб юборди ва бу кулги, шундай самимий, хурсандчилик кулгиси эдики, нимага кулганини билмаганим ҳолда, мен ҳам унга қараб кулдим.

– Хўш, ростини айт-чи, – деди у менга. – Йигитларим бўйнингга сиртмоқ солганда кўрқдингми-йўқми? Дунё кўзингга кўринмагандир, дейман?.. Агар хизматкоринг келиб қолмаганида, ўзингни дорда кўрар эдинг. У чолни дарров танидим. Сени карvonсаройга бошлаб борган киши буюк шоҳ экани сира хаёлингга келганмиди? (Шу гапни айтиб, у керилди ва ўзини сирли тутди). Сен менинг олдимда гуноҳкорсан, деб давом этди, – аммо яхшилик қилганинг, душманларимдан қочиб юрганимда кўрсатган муруватинг туфайли сени афв этдим. Ҳали бу ҳеч гап эмас! Шошма, ҳали подшоҳликни кўлга олай, ўшанда кўрасан! Менга чин кўнгил билан хизмат қилишга ваъда берасанми?

Бу фирибгарнинг саволи ва жасорати менга шунчалик кулгили туъюлдики, ўзимни тия олмадим.

– Нега куласан? – деди у қовоғини солиб. – Ё менинг буюк шоҳ эканимга ионномайсанми? – Тўғрисини айт.

Мен довдираф қолдим. Бу саёқни шоҳ деб тан олгудек эмасман, бу назаримда, кечирилмас бир қўркоқлик бўлиб кўринади. Юзига қараб алдоқчисан деб айтиш эса, ўзимни ҳалок қилиш деган сўз. Дор тагида, бутун халқнинг кўзи олдида, газабим жўш урган чоғда ўлимга тайёр бўлиб туришим ҳозир кўзимга фойдасиз мақтанчоқлик бўлиб кўринарди. Иккиланиб қолдим. Пугачёв қовоғини солиб, жавоб ку-

тар эди. Охири (ҳозир ҳам у дақиқаларни мамнунлик билан эслайман) бўйнимдаги вазифа хисси инсоний заифликни енгди. Пугачёвга:

– Қулоқ сол, сенга ростини айтаман, – деб жавоб бердим. – Ўйлаб кўр, қандай қилиб мен сени шоҳ деб тан олайн? Зийрак одамсан: ёлғондан танисан, мақр қилганимни биласан.

– Сенингча, бўлмаса мен ким?

– Худо билади, ким бўлсанг ҳам қўрқинчли ўйин қиляпсан.

Пугачёв ялт этиб менга каради.

– Сен ҳали мени шоҳ Пётр Фёдорович эканимга ишонмайсанми? – Ҳа, майли, яхши. Марднинг омади келмайдими? Қадим замонда Гришка Отрепьев подшоҳлик қилмаганми? Мен ҳакимда қандай фикрда бўлсанг бўл, аммо мендан қолма. Бошқалар билан нима ишинг бор? Ким руҳоний бўлмасин, отахон бўлиб қолаверади. Менга содик қолиб хизмат қил, сени фельдмаршал ҳам қиласман, князъ ҳам қиласман. Нима дединг?

– Йўқ, – дедим қатъият билан. – Зотим боёнлардан. Император хонимга хизмат қилгани онт ичганман, сенга хизмат қилолмайман. Агар чиндан ҳам менга яхшиликни истасанг, жавоб бер. Оренбургга кетай.

Пугачёв ўйланиб қолди.

– Агар жавоб берсам, – деди у, – менга қарши иш қилмасликка ваъда берасанми?

– Қандай қилиб ваъда бераман? – дедим. – Ўзинг биласан, ихтиёр менда эмас: сенга қарши чиқишни буюрсалар, чиқаман, иложим йўқ. Сен ўз аскарларингдан фармонингга бўйсунишни талаб қиласан-ку, хизмат қилишим лозим бўлганда мен бўйин товласам қандай бўлади? Жоним сенинг кўлингда: озод қилсанг – қуллуқ, ўлдирсанг – тепангда Худо бор, ростини айтдим.

Менинг самимиятимга Пугачёв ҳайрон қолди.

– Ҳа, майли, – деди елкамга қоқиб. – Ўлдирадиган бўлсам, ўлдирганим тузук эди, афв этган эканман, нима ҳам қила олардим. Бор, қаёққа борсанг, нима қилсанг ихтиёринг. Эртага мен билан хайрлашгани кел, ҳозир уйингга бориб ором ол, мени ҳам уйқу босаётир.

Турдим. Кўчага чиқдим. Тун сокин ва совуқ эди. Ой ва юлдузлар майдон ҳамда дор ёрочларини ёритарди. Қальъа жим ва қоронғи. Фақат майхонада чироқ бор ва кеч қолган кишиларнинг қичқирган товушлари эшитиларди. Руҳонийнинг уйига кўз ташладим. Дарвоза ҳамда дераза қопқоқлари ёпиқ. Жимжитга ўхшайди.

Ўз уйимга келдим, Савельич мендан хавотир бўлиб ўтирган экан. Менинг кутулганимга у ҳаддан ташқари севинди.

– Худоё, ўзингга минг қатла шукр! – деди чўқиниб. – Тонг ёришиши билан йўлга тушамиз. Овқат пишириб қўйдим. Еб ол, азизим, кейин Худонинг паноҳида ухла.

Савельичнинг гапига кириб, таомни зўр иштаҳа билан едим, жисман ва руҳан чарчаган эдим, қуруқ полда донг қотиб ухлаб қолдим.

IX БОБ

ЖУДОЛИК

*Мен учун сен билан ошнолик –
Нечоғли шириндир, гўзалим.
Ҳасратдир, ҳасратдир жудолик,
Гўёки, руҳимдан айрилдим.*

Херасков

Эрталаб барвакт дўмбира товушига уйғондим. Одамлар йифилган жойга бордим. Пугачёвчилар кечаги қурбонлар ҳануз осилиб ётган дор ёнига саф тортганлар. Казаклар отлик, аксарларнинг елкаларида милтиқ. Байроқлар хилпираган. Бир неча замбарак йўлга чоғланган, улардан бири бизники эди – танидим... Бутун аҳоли ҳозир бўлиб, ёлғон подшоҳга мунтазир. Комендант уйининг эшиги олдида бир казак чиройли, оқ қирғиз отининг жиловидан ушлаб турарди. Мен комендант хотинининг жасадини излаб, кўз югуртирдим. Жасад четроққа чиқарилиб, устига чипта ёпib қўйилибди. Нихоят, Пугачёв чиқди. Халқ бош кийимини ечиб, таъзим қилди. Пугачёв эшик олдида тўхтаб, ҳамма билан омонлашди. Оқсоқоллардан бири унга бир халта чақа тутди. У чақани сиқимлаб-сиқимлаб сочди, халқ қичқириб, бир-бирини итариб, тангаларни тераверди. Пугачёвни ўзига яқин одамлари ўраб олди. Уларнинг ичida Швабрин ҳам бор эди. Кўз кўзга тушди. Нигоҳимдан у нафратни илғай оларди ва юзида газаб, сохта табассум акс эттириб, четга қаради. Пугачёв мени оломон ичida кўриб, боши билан имлаб ёнига чакирди.

– Ҳой, – деди у менга. – Ҳозироқ Оренбургга жўна, губернатор ва барча генералларга айт: мен бир хафтадан кейин бораман, кўзда тутишсин. Уларга маслаҳат бер: мени масъум мухаббат ва итоат билан кутиб олишин, акс ҳолда, қаттиқ жазодан қочиб қутуломмайдилар. Хайр, оқ йўл. – Сўнгра у халойикқа мурожаат қилди ва Швабринни кўрсатиб: «Мана халойик, сизларга янги қўмондон. Унинг гапига қулоқ солинглар. Бу эса, менинг олдимда ҳам сизлар, ҳам қалъа учун жавобгар» деди.

Бу гапни эшитиб, қутим учди: Швабрин қалъага бошлиқ бўлаётир; Марья Ивановна унинг кўли остида қолмоқда! Эй, Худо, энди унинг бошига қандай кунлар келади! Пугачёв айвончадан тушди. Келтирилган отга, казакларнинг миндириб кўйишини кутмай, ўзи сакраб минди.

Шу аснода қарасам, халойиқ ичидан менинг Савельичим чиқиб, Пугачёвнинг олдига келди ва унга бир варақ қофоз тутди. Бунинг нима эканлигини ўйлаб, тагига етолмадим. «Бу нима?» деди Пугачёв керилиб.

– Марҳамат қилиб ўқисанг, маълум бўлади, – деди Савельич. Пугачёв қофозни кўлига олиб, юзига жиддий қиёфа берган ҳолда узоқ кўз югуртириди.

– Нималар ёзгансан? – деди охири. – Бу ёзувни биз ўқий олмадик. Менинг мирзам қани, мирза?

Ёш, паст бўйли, капрал мундирли мирза дарров югуриб келди. «Товушингни чиқариб ўқи!» деди Пугачёв, қофозни мирзага узатиб. Савельичнинг Пугачёвга нима деб ёзганини билишга ҳаддан ташқари қизикар эдим. Мирза баланд овоз билан дона-дона қилиб қуйидагиларни ўқиди:

«Бири миткалдан ва бири йўл-йўл шойидан тикилган икки тўн: баҳоси олти сўм».

– Бу нима деганинг? – деди Пугачёв, қовоғини солиб.

– Нариги томонини ўқит, – деди Савельич совукконлик билан.

Мирза давом этди:

«Юпқа зангор мовутдан тикилган мундир, баҳоси етти сўм».

«Оқ мовутдан тикилган шим, баҳоси беш сўм».

«Тоза сурпдан тикилган қадама енгли ўн икки дона голландия кўйлаги, баҳоси 10 сўм».

«Ичи тўла озиқ-овқат солинган қути, баҳоси икки ярим сўм...»

– Бу қандай гап? – деди Пугачёв мирзани тўхтатиб. – Қутию, қадамали шимларинг билан нима ишим бор?

Савельич хириллаб тушунтира бошлади. «Бу, тақсирим, бадкирдорлар томонидан таланган боёнга қарашли буюмларнинг рўйхати...»

– Қанақа бадкирдор? – деди Пугачёв, дўйк уриб.

– Маъзур кўрилсин, оғзимдан чиқиб кетди, – деди Савельич. – Бадкирдорларми, бадкирдор эмасми, сенинг одамларинг талаб, олиб кетган. Аччигинг чиқмасин: тўртта оёги бўлатуриб от хам қоқинади-ю! Нариги томонини ҳам ўқит.

– Ўқи! – деди Пугачёв. Мирза давом этди:

«Бири чит, бири шойи – икки кўрпа, баҳоси тўрт сўм».

«Қизил тринка авраги поча пўстин, баҳоси қирқ сўм».

«Яна сенга карвонсаройда инъом этилган, қуён терисидан тикилган пўстин, баҳоси ўн беш сўм».

– Бу нимаси тагин! – деб қичкирди Пугачёв, кўзларини ўйнатиб.

Тўгрисини айтсам, чол учун мен қўрқиб кетдим. У яна изоҳ бермоқчи эди, Пугачёв сўзни бўлди:

– Бундай беҳуда нарсани олдимга кўтариб келгани қандай ҳаддинг сиғди? – деди у қофозни мирзанинг қўлидан олиб ва унинг юзига иргитиб. – Ахмоқ чол! Талаганлар эмиш: ҳой, миясини еган чол, мен ва менинг одамларим хақига дуо қилки, хўжайининг билан бирга мана бу ноқобиллар қаторида осилиб кетмадинг... Қуён терисидан тикилган пўстин эмиш! Кўрсатиб қўяман, мен сенга пўстинни! Тириклай тे-рингни шилиб, пўстин тикираман-а, билсанми?

– Ўзинг биласан, – деди Савельич. – Мен бир хизматкорман, хўжайниннинг буюмларига жавобгарман.

Пугачёв олижаноблик ҳиссидан карахт эди шекилли, индамасдан бурилиб кетди.

Швабрин билан оқсоқоллар унинг кетидан юришди. Бадкирдорлар тўдаси қальъадан тартиб билан чиқиб кетди. Халқ Пугачёвни кузатиб борди. Майдонда Савельич иккимизгина қолдик. Савельич, қўлида рўйхат, унинг у ёқ-бу ёғига чуқур хўрсиши билан қараб қўярди.

Пугачёв билан орамизнинг яхшилигини кўриб, Савельич бундан фойдаланмоқчи бўлган экан, аммо бу яхши нияти амалга ошмади. Ўринсиз жонкуярлик қилгани учун койимоқчи эдим, аммо кулгидан ўзимни тутолмадим.

– Кул, хожам, кул, – деди Савельич. – Шу буюмларнинг барчасини яна сотиб олиш керак, кўрамиз, ўша вақтда ҳам кулармикинсан.

Мен Марья Ивановна билан кўришгани шошиб, руҳонийнинг уйига бордим. Руҳонийнинг хотини мени қайғули бир хабар билан қарши олди.

Марья Ивановна кечаси билан иситмада ёниб, алаҳлаб чиқибди. Ҳозир ҳам хушсиз, куйиб ётган эмиш. Руҳонийнинг хотини мени Марья Ивановнанинг ёнига бошлаб кирди. Мен аста каравотнинг ёнига бордим. Унинг юзидағи ўзгаришни кўриб, эсимни йўқотдим. Бемор мени танимади. Мен анча вақтгача тик туриб қолдим, Герасим ҳазрат билан унинг меҳрибон рафиқаси менга тасалли беришарди шекилли, аммо икковининг ҳам гапи қулогимга кирмас эди.

Турли ёмон ўйларга бориб, ҳаяжонга тушдим. Қутурган қўзголончилар орасида қолган бечора, кимсасиз етим қизнинг ҳоли, ўзимнинг ожизлигим мени ваҳимага солди. Швабрин! Ҳаммадан ҳам

ана шу мени ғазаблантиради. Ёлғон подшо амалга миндириган Швабрин қалъада хукмронлик қилас экан, қалъада қолган гуноҳсиз қизга бехуда адоват юзасидан ҳеч нарсадан қайтмаслиги мумкин эди. Нима қилсан экан? Қизга қандай ёрдам берсам бўлади? Бадкирдорнинг қўлидан уни қандай қилиб куткарсан экан? Биргина йўл қолди. Белогор қалъасини куткаришни тезлатиш учун бетўхтов Оренбургга бориш ва имкон қадар бу ишга ёрдам бериш. Руҳоний ва унинг хотини билан хайрлашдим ва энди рафиқам ҳисоблаганим қизни Акулина Памфиловнага топширидим. Бечора қизнинг қўлини олиб ўпдим ва ўпкам тўлиб йигладим.

– Хайр, – дедим руҳонийнинг хотини мени кузатиб. – Хайр, Пётр Андреевич. Яхши кунларда кўришармиз. Бизни эсингииздан чиқарманг, тез-тез мактуб ёзиб туринг. Бечора Марья Ивановнанинг сиздан бўлак умиди, ҳомийси йўк.

Майдонга чиқдим, бир лахза тўхтаб, дорга қарадим, мархумларга фотиҳа ўқиб қалъадан чиқдим ва Оренбург йўлига тушдим. Мендан ажралишини истамаган Савельич ортимдан борар эди.

Йўл-йўлакай ўйланиб борардим. Бирдан ортимдан отнинг дупури эшитилди. Кайрилиб қарадим; қалъадан бир казак от қўйиб чиқди. У бир бошқирд отини етаклаган, мен томон от чоптириб, қўли билан ишора қилиб келарди. Мен тўхтадим. Қарасам, ўзимизнинг ўнбоши. У етиб келди, отдан тушиб, етаклаб келган отини менга берди ва:

– Жаноб, шоҳимиз шу отни ва ўз пўстинларини (кўзининг терисидан тикилган пўстин эгарга боғланган эди) сизга инъом қилдилар. – Яна, – деди у тутилиб, – сизга... яrim сўм пул ҳам берган эдилар, йўлда йўқотиб қўйдим, афв этинг.

Савельич унга хўмрайиб қараб:

– Йўқотган эмиш! – деб тўнғиллади. – Чўнтагингда жаранглаётган нима? Ноинсоф!

– Чўнтағимда нима жаранглайти? – деди ўнбоши авзойини бузмасдан. – Тепангда Худо бор, чол! Жаранглаган отнинг сувлиғи, пул эмас!

– Бўлди, – дедим жанжалга хотима бериб. – Сени юборган кишига менинг номимдан куллук қил. Йўқолган яrim сўмни қайтишда топиб, унга мусаллас олиб ич.

– Кўпдан-кўп раҳмат, жаноб, – деди у отининг бошини бураётиб.

– Умр бўйи ҳақингизга дуо қиламан. – Шуни айтиб, бир қўли билан чўнтагини ушлаганича тезда кўздан йўқолди.

Мен пўстинни кийиб, отга миндим ва Савельични мингаштириб олдим. «Мана кўрдингми, хожам, – деди чол. Мен у ўғрига бекорга

арз-хол қилганим йўқ, гарчи у бошқирд оти ва пўстин, биздан таланган буюмлар ва ўз қўлинг билан берган пўстининг ўрнини босолмасада, ҳар ҳолда ўғри инсофга келди; тўнғиздан бир тук деганлар, бу ҳам фанимат».

Х Б О Б

ШАҲАР ҚАМАЛИ

*Забт этиб тоғларни, ўтлоқларни ҳам,
Бургут каби чўққидан боқди шаҳарга бир дам,
Ўрдагоҳ орқасига, буюрди, майдон қуринг,
Яшириб ўқ-чақинлар, тундан шаҳарга юринг!*

Херасков

Оренбургга яқинлашар эканмиз, бир тўда бандиларни кўрдик. Уларнинг соchlари кирқилган, юзлари жаллод омбури билан дабдала килинган. Бандилар истеҳком ёнида гарнizonдаги ногиронлар назорати остида ишлар эдилар. Баъзилари хандакларга тўлган ахлатларни замбилғалтак билан ташиб чиқарадилар, баъзилари белкурак билан ер қазирдилар; фиштчилар фишт ташиб, шаҳар кўргонининг деворларини тузатардилар. Дарвозадаги коровул аксар бизни тўхтатиб, паспорт сўради. Сержант Белогор қалъасидан келаётганимни эшитиб, менинг тўғри генералнинг уйига олиб борди.

Мен уни богида учратдим. У куз шамоли яланғочлаган олма даражатларини қарап ва кекса боғбоннинг ёрдами билан уларнинг танасига похол ўрадди. Унинг юзидан осойишталик, тансоғлик ва зэгулик акс этарди. Мени кўриб севинди. Ўз кўзим билан кўрганим даҳшатли ҳодисаларни сўрай бошлади. Ҳаммасини айтиб бердим. Чол менинг сўзимга дикқат билан кулоқ солар, шу билан бирга қуриган шохларни кесар эди.

– Бечора Миронов! – деди мен қайгули ҳикоямни тамом қилганимдан сўнг. – Эсизгина, яхши офицер эди. Миронова хоним ҳам яхши аёл эди, кўзиқорин тузлашда тенги йўқ. Капитаннинг қизи Маша нима бўлди?

Мен унинг қалъада, руҳоний хотинининг қўлида қолганини айтдим.

– Бай-бай-бай! – деди генерал. – Ёмон бўлибди, жуда ёмон бўлибди. Босқинчилардан ҳеч интизом кутиб бўлмайди. Бечора қизнинг аҳволи нима бўлар экан?

Мен Белогор қалъаси яқин, ундаги бечора аҳолини кутқариш учун аскар юбориш ишини жаноблари балки тезлаторлар, дедим. Генерал кўнгли чопмай, бош чайқади.

– Кўрамиз, кўрамиз, – деди, у. – Бу ҳақда маслаҳат қилишга фурсат бор. Уйимга марҳамат қил, бирор пиёла чой ич: бугун ҳарбий кенгаш бўлади. Ишёқмас Пугачёв ва унинг қўшини ҳақида бизга тўғри матьлумотлар бера оласан. Энди бориб дам ол.

Менга ажратилган уйга кетдим. Савельич уйга аллақачон ўрнашиб олибди. Белгиланган вақтни сабрсизлик билан кутиб турдим. Тақдирим учун катта аҳамиятга эга бўлган бу ҳарбий кенгашга боролмаслигимни ўқувчи осонгина илғаса керак.

Тайнинланган вақтда генералнинг уйида ҳозир бўлдим.

У ерда шаҳар амалдорларидан бири (обрўли идоранинг директори экани ёдимда бор) қизил юзли, барваста, ипак тўн кийган бир киши ўтирган экан. У менга Иван Кузмич ва унинг тақдири ҳақида кўп саволлар берди. Гапига қараганда, Иван Кузмич унинг яқин ошнаси экан. У менинг сўзимни ахлоқий қайдлар ва қўшимча сўроқлар билан тез-тез бўлар эди. Бу сўzlари ва қайдлари унинг уруш илмидан бехабар эканига далолат қилмаса ҳам, зотан ақлли ва зийрак эканини кўрсатарди. Бу орада бошқа чакирилганлар ҳам йиғилиб қолди. Ҳамма ўтириб, барчага бир пиёладан чой берилганидан кейин, генерал гап нимада эканини очиқ ва содда равишда:

– Энди, жаноблар, – деди у давом этиб. – Шуни ҳал қилишимиз керак: исёнчиларга қарши ҳужум жангига олиб борамизми ёки мудофаа жангими? Бу жанглардан ҳар бирининг фойдали томони ҳам, зарарли томони ҳам бор. Душманни тез ҳалок қилишда ҳужум жангига ишончлироқ йўл; мудофаа жангига тўғрироқ ва хавфсизроқ бўлади... Шундай қилиб, қонунга мувофиқ овозга қўямиз, яъни, амал жихатидан кичиклардан бошлаймиз.

– Жаноб прaporшик, – деди у менга мурожаат қилиб, – марҳамат килиб, ўз фикрингизни айтинг.

Мен, аввал Пугачёв ва унинг тўдаси ҳақида қисқагина сўзлаб, сўнgra унинг мунтазам аскарий ҳужумларга туриб бера олмаслигини айтдим.

Менинг фикрим амалдорларга ёқмади. Улар бу фикрни бир ёш йигитнинг шошқалоқлиги ва калта ўйлиги деб билдилар. Пичир-пичир бошланди, кимнингдир «гўдак» деганини эшитиб қолдим. Генерал мен томонга ўгирилди ва кулимсираб деди: «Жаноб прaporшик! Одатда, ҳарбий кенгашда биринчи овоз ҳужум жангига фойдасига берилади; бу қонуний тартиб. Энди овозга қўйишда давом этамиз. Жаноб маслаҳатчи! Ўз фикрингизни айтинг!»

Ипак чопон кийган чол, озгина мусаллас солингган учинчи пиёлани шошиб ичди-да, генералга жавоб берди: «Менимча, жаноби олийлари, ҳужум жангига ҳам бўлмайди, мудофаа жангига ҳам».

– Жаноби маслаҳатчи, – деди ҳайрон бўлиб генерал. – Жангда бошқа йўл йўқ: ё хужум ё мудофаа...

– Жаноби олийлари, пул билан алдаш йўлини қўллаш керак.

– Ҳа, ха, ха! Фикрингиз жуда бамаъни. Пул билан алдаш йўлини қўллашга ҳам ҳарбийда рухсат берилади, сизнинг маслаҳатингиздан фойдаланамиз. Бадкирдорнинг калласини келтирган кишига маҳфий пулдан... бирон етмиш, ҳатто юз сўм ваъда қилиш мумкин...

– Шундай қилганда, – деди обрўли идоранинг директори, генералнинг сўзини бўлиб. – Бу ўғрилар ўз бошлиқларининг қўл-оёғини боғлаб топширмасалар маслаҳатчи эмас, кирғизларнинг кўйи бўлай.

– Биз бу ҳақда яна йлашиб, кенгашиб кўрамиз, – деди генерал. – Бироқ ҳар эҳтимолга қарши, ҳарбий тадбирларни ҳам кўриш керак. Жаноблар, қонуний тартибда овоз беринглар.

Бутун гаплар менинг фикримга қарши бўлиб чиқди.

Ҳамма амалдорлар қўшинга ишониб бўлмаслиги, муваффакият қозониш мушқуллиги, эҳтиёткорлик кераклиги ва ҳоказолар ҳақида сўзлади. Уларнинг ҳаммаси ҳам очиқ майдонга чиқишидан кўра, қальянинг фиштин девори орасида, тўплар ҳимояси остида туришни афзал кўришди. Охири генерал ҳамманинг фикрини эшитиб бўлганидан сўнг, чекиб турган чубугининг кулини қоқиб, сўз бошлади:

– Жаноблар, сизга шуни айтаманки, мен ўз тарафимдан жаноб прапорщикнинг фикрига тамом қўшиламан: чунки, бу фикр соғлом ҳарбий хийланинг барча қоидаларига асослангандир. Ҳарб иши ҳамма вақт мудофаадан кўра хужум жангини аъло кўради.

У тўхтаб, чубугига тамаки солди. Менинг кўкрагим кўтарилид. Шунда мен юзларидан бесаранжомлик ва норозилик акс этиб, ўзаро пицирлашиб ўтирган амалдорларга кибр билан қарадим.

– Аммо жаноблар, – деди генерал чуқур уф тортиб ва оғзидан ҳаво ўрнига қуюқ тутун чиқариб. – Сўз, марҳаматли жаноб император хоним томонларидан менга топширилган вилоятнинг хавфсизлиги устида борар экан, мен бундай оғир масъулиятни ўз зиммамга ололмайман. Шундай қилиб, мен кўпчиликнинг қарорига қўшиламан; шаҳарнинг ичига туриб қамални кутиш, душман хужумини эса тўп ва (имкон бўлса) калъадан ташқарига чиқиш билан даф қилиш тўғри ва хавфсизроқдир.

Амалдорлар энди менга кулимсираб қарашди. Кенгаш тарқалди. Иш билмас ва тажрибасиз кишиларнинг фикрига амал қилиб, ўз фикрига қарши қарор берган мўътабар генералнинг бўшанглигига афсусландим.

Бу машхур кенгашдан кейин бир неча кун ўтгач, Пугачёв ваъдасига мувофиқ Оренбургга яқинлашганидан дарак етди. Мен қўзғолончилар қўшинини шаҳар қўргонининг тепасидан кўрдим. Назаримда, ўзим кўрган сўнгги хужумдагига қараганда, уларнинг сони ўн баравар кўпайганди. Тобе этилган кичик қальсалардан олинган тўплар ҳам бор эди. Кенгашнинг қарорини эслаб, Оренбург қальясида узоқ вақт қамалиб ётишимга қўзим етди ва аламдан йиглаб юбораётдим.

Хотирага эмас, тарихга оид бўлган Оренбург қамалини тас-вирлаб ўтирумайман. Қисқагина қилиб шуни айтаманки, маҳаллий бошлиқларнинг эҳтиётсизлиги ортида, бу қамал турли оғатлар ва очликни бошдан кечирган аҳоли учун ҳалокатли бўлди. Оренбургда тирикчилик қилиш нақадар оғир бўлганини киши осонлик билан кўз олдига келтириши мумкин. Ҳамма ўз тақдирининг нима бўлишини оҳ-воҳ билан кўтди; барча қимматчиликдан фифон чекарди, қимматчилик хақиқатан даҳшатли бўлди. Аҳоли ҳовлиларига тушадиган тўп ўқларига кўнишиб қолди; ҳатто Пугачёвнинг хужуми сўнгги вақтда кишиларнинг дикқатини жалб этмай ҳам кўйди. Мен дикқинафасликдан ўлаёздим. Кунлар ўтиб борар эди. Белогор қальясидан мактуб йўқ. Барча йўлу алоқалар кесилган. Марья Ивановнадан айрилганимга тоқат қилолмай қолдим. Унинг тақдири нима бўлганини билмаслигим мени қийнарди. Менинг ягона юпанчим – отга миниб у ёқ-бу ёқка бориш эди. Пугачёвнинг марҳамати билан яхши отга эга бўлгандим. Топган-тутганимни шу билан баҳам кўраман ва унга миниб, Пугачёвнинг суворийларини отгани ҳар куни шаҳардан ташқарига чиқаман. Бу отишувларда тўқ, маст, яхши отга эга бўлган бадкирдорларнинг қўли доим баланд келарди. Оти ориқ шаҳар суворийлари уларни енгишдан ожиз. Баъзан бизнинг оч пиёда аскарларимиз ҳам шаҳардан ташқарига чиқар, аммо қорнинг қалинлиги, тарқоқ суворийларга қарши муваффақиятли иш кўргани халал берар эди. Қалъа тепалигидан тўп пайдар-пай отилади, аммо уруш майдонида олға силжилмайди, чунки отларда дармон йўқ, қорга ботиб қолади. Бизнинг ҳарбий ҳаракатимизнинг ҳоли шу эди! Оренбург амалдорлари мана шуни эҳтиёткорлик ва ақллилик деб атаганлар!

Бир куни душманинг каттагина бир қисмини тиркиратиб қочиришга муваффақ бўлганимизда, ўз ўртоқларидан ортда қолган бир казакка етиб олдим; уни усмонли қиличим билан урай деганимда, у телпагини бошидан олиб, қичқирди: «Ассалому алайкум, Пётр Андреевич! Эсон-омонмисиз?»

Карасам, ўзимизнинг ўнбоши. Мен, ниҳоятда севиндим.

— Ваалайкум ассалом, Максимич, — дедим унга. — Белогор қальва-
сидан қаочон келдинг?

— Яқинда азизим Пётр Андреевич, кечагина келдим. Сизга мактуб
бор.

— Қани? — дедим ҳовлиқиб. — Ёнимда, — деди Максимич, қўлини
қўйнига тиқиб. — Қандай бўлмасин, мактубни сизга етказиб бераман деб,
Палашкага ваъда берган эдим. — У мактубни менга берди-да, дархол от
қўйиб кетди. Мактубни очиб, ҳаяжон ичида шу сатрларни ўқидим:

*«Худо менга ҳам ота, ҳам онадан ажраини муносаб кўрди:
дунёда на қариндошим бор, на ҳимоячим. Менга ҳамма вақт
хайриҳоҳ бўлганингизни ва ҳар кимга ҳам ёрдам беришига тай-
ёр эканингизни билиб, сизга мурожсаат қиласман. Худоё, бу мак-
туб, қандай бўлмасин сизга етиб борсин! Максимич буни сизга
етказмоққа сўз берди. У сизни уруши вақтларида тез-тез узоқдан
кўрар экан. Кўз ёши тўкиб дуойи жонингизни қилувчилар ҳақида
ўйламасдан, ўзингизни эҳтиёт қилас мас эмишисиз. Узоқ вақт оғриб
ётдим; согайганимдан кейин, марҳум отамнинг ўрнига ҳозир
қўмондонлик қилаётган Алексей Иванович, Герасим ҳазратни
мажбур қилиб, Пугачёвнинг исми билан қўрқитиб, мени ўзига
олмоқчи бўлди. Мен ҳозир ўз уйимда турибман, мени пойлаб
мудом қоровул туради. Алексей Иванович «менга турмушга
чиқсан» деб мажбур қилмоқда. Акулина Памфиловна менинг
жияним деб ёлгон гапирганида, «бу ёлгонни очмай, жонингни
сақлаб қолганман» дейди. Алексей Ивановичдек кишининг хоти-
ни бўлгунча ўлганим афзал. У менга роса жабр қилмоқда. «Агар
розилик бермасанг, лагерга элтиб Лизавета Харлованинг кунига
соламан» дейди. Мен Алексей Ивановичдан ўйлаб кўргани муҳлат
сўрадим. У яна уч кун сабр қилишига рози бўлди; агар уч кундан
кейин мен унга тегмасам, ҳеч қандай раҳм-шафқат бўлмайди.
Азизим Пётр Андреевич, менинг ягона пуштипаноҳимсиз. Мен
бечорани ҳимоя қилинг. Генерал ва барча қўмондонлардан илти-
мос қилинг; бизни қутқаргани аскарлар юборишисин. Илоҗини
қиласангиз, ўзингиз ҳам келинг. Содиқ қулингиз, етим қиз:*

Марья Миронова».

Бу мактубни ўқиб, ақлдан озаёздим. Бечора отни раҳмсизлик билан
камчилаб, шаҳарга тушдим. Бояқиши қизни қандай қилиб қутқарсам
экан деб, йўл-йўлакай кўп ўйга ботдим, аммо ҳеч нарса ўйлаб топол-

мадим. Шаҳарга келиб, тўғри генералнинг олдига бордим ва югуриб уйига кирдим.

Генерал чубугини чекиб, уйда у ёқдан-бу ёққа юрган экан. Мени кўриб тўхтади. Важоҳатимни кўриб ҳайрон бўлди шекилли, бундай шошиб қолганимнинг сабабини сўради.

– Жаноб олийлари, – дедим унга. – Мен сизни ўз отам ўрнида кўриб, мурожаат қиласман, Худо ҳақи, илтимосимни рад этманг. Гап менинг умр бўйи ё баҳтли, ё баҳтсиз бўлишим ҳақида кетмоқда.

– Нима гап, азизим? – деди чол ҳайрон қолиб. – Мен сен учун нима қила оламан? Айт.

– Жаноби олийлари, бир рота аскар билан элликта казакни олиб, Белогор қалъасидан исёнчиларни қувиб чиқариш учун менга фармон беринг.

Мени ақлдан озган деб ўйлади шекилли, генерал юзимга тикилди (агар шундай деб ўйлаган бўлса, хато қилмаган деса ҳам бўлади).

– Бу қандай гап? Белогор қалъасидан исёнчиларни қувиб чиқармоқقا? – деди у ниҳоят.

– Муваффақият қозонишга кафилман, – дедим қизишиб. – Фақат менга рухсат беринг.

– Йўқ, йигитча, – деди у бошини чайқаб. – Бундай катта масофа да душман, асосий стратегик пунктдан ажратиб қўйиб, сизни тамоман мағлуб этади. Алока йўли кесилса...

Унинг муҳокамага берилаётганини кўриб, кўркиб кетдим ва сўзини бўлишга шошилдим.

– Капитан Мироновнинг қизи менга мактуб йўллабди, – дедим.

– Ёрдам сўрамоқда, Швабрин уни ўзига турмушга чиқишига мажбур қилаётган эмиш.

– Наҳотки? О, бу Швабрин бориб тургани ярамас одам. – Агар қўлимга тушса, 24 соат ичида суд қилдириб, қалъа девори остида оттираман! Аммо ҳозирча сабр қилиш керак...

– Сабр қилиш керак! – деб қичқирдим ўзимни йўқотиб. – Унгача Марья Ивановнани хотин қилиб олади!..

– О! – деди генерал. – Ҳечқиси йўқ. Ҳозирча Швабринга хотин бўлиб тургани тузук. Швабрин ҳозир уни кутқаради, биз Швабринни отганимиздан кейин Худо берса, эр топилиб қолар. Ёшгина тул аёл уйда ўтириб қолмайди, яъни, демоқчиманки, улар қизларга қараганда тезроқ эр топишади...

– Уни Швабринга берганимдан кўра, ўлимимга рози бўламан! – дедим ғазаб билан.

– Э... ҳали гап бу ёқда дегин! – деди чол. – Энди тушундим. Сен Марья Ивановнани яхши кўрар экансан-да! Бу бошқа гап. Бечора йигит! Шундай бўлса-да, сенга бир рота аскар билан элликта казак беролмайман. Бундай иш ақлга тўғри келмайди, мен бу масъулиятни бўйнимга ололмайман.

Бошимни қуи солдим, умидсизлик мени ўз чангалига олди. Бирдан миямга бир фикр келди: бу фикр, қандай фикр эканини қадимги романчилар айтганидек, ўқувчи қуидаги бобда билиб олади.

XI Б О Б

ҚЎЗГОЛОНЧИЛАР ҚИШЛОГИ

*У чоқда шер тўқ әди, гарчи йиরтқич тугаси
«Нега даркор бўлибди мен гарифнинг кулбаси, –
Нега ташриф этдилар?»
Сўради у мулоийм.*

А. Сумароков

Генералнинг олдидан чиқиб, ўз уйимга кетдим. Савельич мени одатдагидек қовоғини солиб қарши олди. «Маст ўғриларга рўпара бўлиши сенга бир ҳавас! Оксуякларга муносиб ишми бу? Замон ёмон, беҳудага ҳалок бўласан. Кошки, туркларга ёки шведларга қарши урушсанг экан, кимга қарши урушаётганингни айтишга ҳам тил бормайди».

– Ҳаммаси бўлиб қанча пулим бор? – дедим унинг сўзини бўлиб.

– Сенга етарли пул бор, – деди очиқ чехра билан. – Босқинчилар шунча қидирганлари билан мен яшириб қўйган жойимдан топишолмади. У чўнтагидан кумуш тангага тўла ҳамённи олди.

– Қани Савельич, – дедим. – Ярмини менга бер, қолганини ўзинг ол. Мен Белогор қальасига бораман.

– Хожам Пётр Андреевич! – деди меҳрибон чол титроқ товуш билан. – Худодан кўрк, босқинчилар йўлни тўсиб, хеч қаёққа қўймайдиган бир пайтда сен қандай қилиб йўлга чиқсан! Ўзингга раҳм қиласанг, ота-онангга шафқат қил. Қаёққа борасан? Нима учун? Озроқ сабр қил: аскарлар чикишсин, босқинчиларни тутсин, кейин қаёққа борсанг, боравер.

Менинг аҳдим қатъий эди.

– Бу ҳақда ўйлаб ўтиришнинг вақти ўтган, – дедим чолга. – Мен боришига мажбурман, бормай иложим йўқ. Кўрқма Савельич, Худонинг ўзи асрайди, яна кўришамиз! Тортинма, хасислик ҳам қилма. Ўзингга

керакли нарсаларни ол, уч баравар қиммат бўлса ҳам майли. Бу пулни сенга инъом қилдим. Агар уч кунда қайтиб келмасам...

– Нималар деяпсан, хожам? – деди Савельич менинг сўзимни бўлиб.
– Сени ёлғиз кетгани қўярмидим! Бундай дея қўрма. Агар сен боришга бел боғлаган экансиз, пиёда бўлса ҳам кетингдан бораман, ортингдан қолмайман. Мен сенсиз бу тош девор орқасида ўтираманми! Эсимни ебманми? Ихтиёргинг хожам, аммо мен ҳам бу ерда қолмайман.

Савельич билан баҳлашиб қийин эканини билганим учун йўлга хозирланишни буюрдим. Ярим соатдан кейин мен ўз отимга миндим. Шаҳарликлардан бири, боқиши қўлидан келмай текинга берган ориқ ва чўлоқ қирчангига Савельич минди. Шаҳар дарвозаси томон юрдик, коровуллар бизни тўсмади. Оренбургдан чиқдик.

Оқшом туша бошлади. Мен Пугачёвнинг қароргохи – Бердская қишлоғи ёнидан ўтишим керак, чунки тўғри йўлни қор босган. Бутун далада ҳар куни янгиланиб турадиган туёқ излари кўринарди. Мен отни ўйртириб борарадим. Савельич базур менга етиб юрар, баъзан узоқдан қичқирап эди: «Секинроқ юр хожам, Худо хақи, секинроқ! Мени бу лаънати қирчангим узун оёқ алвастингга етолмаяпти. Мунча шошилмасанг? Кошки зиёфатга кетаётган бўлсак, ўлимнинг кучогига бўлмаса гўрга эди... Пётр Андреевич... Хожам Пётр Андреевич!.. Ҳалок килма!.. Ё, Парвардигор, боённинг фарзанди хароб бўлади!»

Ҳадемай Бердская қишлоғининг чироқлари кўринди. Қишлоқнинг табиий кўргони бўлган сойликка келдик. Савельич ёлворишини қўймай, ортимдан келарди. Мен бу қишлоқ ёнидан эсон-омон ўтиб кетиши умидида эдим, бирдан коронгида рўпарамдан бешта мужик чиқди: ҳаммаси сўйил кўтарган бўлиб, улар Пугачёв қароргохининг аввалги коровуллари эди. Бизни чақиришди. Шартлашилган маҳфий сўзни билмаганим учун индамасдан ўтиб кетмоқчи эдим, улар дарҳол мени ўраб олишди ва бири отимни жиловлади. Қиличимни суғуриб, мужикнинг бошига урдим, телпаги унинг жонига оро кирди, аммо қалқиб кетиб жиловни қўйиб юборди. Бошқалари қўрқиб қочишиди, мен фурсатдан фойдаланиб, отга қамчи босдим.

Тушиб келаётган коронгилик мени ҳар қандай хавфдан асраши мумкин эди, аммо бирдан ортимга қарасам: Савельич йўқ. Бечора чол чўлоқ от билан ўғрилардан қочиб қутула олмабди. Нима қилиш керак? Озрок кутдим, қўлга тушганига ишонганимдан сўнг отнинг бошини буриб, уни кутқаргани бордим.

Чукурликка яқин келиб узоқдан ғовур, шовқин-сурон ва Савельичимнинг товушини эшилдим. Жадаллик билан ўша томонга бордим,

тез орада бундан бир неча дақиқа аввал мени ушлаган қоровуллар орасыга яна келиб қолибман. Савельич шуларнинг ўртасида экан. Улар чолни отдан тушириб, оёқ-кўлини боғлаш ҳаракатида эканлар. Менинг келганимга ҳаммаси севинди. Қичқириб, менга ҳужум қилишди ва кўз очиб юмгунча отдан судраб туширишди. Булардан бири, бошлиқ бўлса керак, бизни шоҳнинг олдига элтажагини билдириб: «Шоҳимиз нимани буюрсалар шу: ҳозир остирадиларми, ё тонг отишини кутмоққа буюрадиларми – ўzlари биладилар» деди. Мен қаршилик кўрсатмадим; Савельич ҳам мендан ўrnak олди. Бизни тантана билан олиб кетдилар.

Чуқурлиқдан ўтиб, қишлоққа кирдик. Ҳамма уйларда чироқ ёнар эди. Ҳар ёнда ғовур, шовқин-сурон. Кўчада халқ кўп, аммо қоронғида бизни ҳеч ким пайқамади ва менинг оренбургли офицер эканимни ҳеч ким билмади. Бизни тўғри чорраҳадаги бир уйга олиб кирдилар. Дарваза ёнида бир неча мусаллас бочкаси ва иккита тўп турар эди. «Мана, саройга келдик, – деди мужиклардан бири, – ҳозир сизлар ҳақингизда кириб айтаман». У уйга кириб кетди. Мен Савельичга қарадим: чол чўқинар ва ўзича аллақандай дуолар ўқир эди. Мен узоқ кутиб қолдим, ниҳоят, кириб кетган мужик чиқди ва: «Юр, шоҳимиз, офицер кирсин, деб амр қилди» деди.

Мен уйга ёки мужикларнинг айтишича, саройга кирдим. Уйда иккита мум шам ёниб турарди. Деворларга зарҳал қоғоз ёпиширилган: аммо курси, стол, ип билан осиб қўйилган қўл ювғич, қозикқа илинган сочиқ, бурчакдаги катта сопол печка ва бошқа анжомларнинг ҳаммаси оддий уйлардагидек эди. Пугачёв, устида қизил тўн, бошида узун телпак, санам остида керилиб, ёнбошлаб ўтиради. Ёнида, унинг яқин ўртоқларидан бир нечаси ясама лаганбардорлик қилиб турарди. Оренбургдан офицер келганилиги хабари кўзголончиларнинг зўр мароқларини кўзгатганлиги ва мени тантана билан кутиб олишга тайёрланганликлари ошкор эди. Пугачёв мени кўриши билан таниди. Унинг сунъий жиддияти бирдан йўқолди. «Ха, жаноби олийлари, – деди у дарров. – Ахволинг қалай? Нечук. Худо етказди?» Мен ўз ишим билан кетаётганимда унинг кишилари тўхтатганларини айтдим. «Қандай иш билан?» деб сўради. Нима дейишими билмай қолдим. Пугачёв мени «Одамларнинг олдида гапиргиси келмаяпти» деб гумон қилиб, ўртоқларига чиқиб туришни буюрди. Ҳаммаси чиқиб кетди. Фақатгина иккитаси қолди. «Буларнинг олдида бемалол гапиравер, – деди Пугачёв. – Улардан мен ҳеч нарсани яширмайман». Мен ёлғон шоҳнинг яқин ўртоқларига кўзимнинг қирини ташладим. Улардан бири ориқ, буқчайган, оппоқ соқолли чол бўлиб, елкасидан тортилган қўй тасмадан

бўлак дикқатни жалб қиласиган ҳеч нарсаси йўқ эди. Аммо иккинчи-си ўлгунимча эсимдан чиқмайди. У новча, барваста, кенг елкали, кирк бешларга борган кўринди. Қалин малла соқоли, чақнаб турган кулранг кўзлари, кесик бурни, пешанасидаги ва юзидағи қизил доғлар унинг чўтири, кенг юзига тушуниб бўлмайдиган бир ифода берар эди. Унинг устида қизил кўйлак, қирғизча чопон ва шим. Кейин билсам, биринчи-си – қочоқ капрал Белобородов¹, иккинчиси Хлопуша² номи берилган Афанасий Соколов экан. Бу одам сургун қилинган жиноятчи бўлиб, уч марта Сибирь конларидан қочган. Мени фавқулодда ҳаяжонга солган ҳисларга қарамай, иттифоқо кириб қолганим менга ҳеч қандай мароқ бермади. Аммо Пугачёв савол бериб, мени ўзимга келтирди. «Айт, сен нима иш билан Оренбургдан чиқдинг?»

Бошимга ғалати бир фикр келди, назаримда шундай кўринди: мени иккинчи марта Пугачёвнинг олдига келтирган ҳикмати илохия ўз ниятимни амалга оширгани ёрдам бермоқда эди. Мен бундан фойдаланишга аҳд қилдим ва қандай қарорга келганимни ҳали ўйлаб етмасдан, Пугачёвнинг саволига жавоб бердим.

– Зулм кўраётган етим қизни қутқаргани Белогор қалъасига кетаётган эдим.

Пугачёвнинг кўзлари чақнаб кетди. «Менинг кишиларимдан қайси бири етим қизга зулм қилибди, кимнинг ҳадди сифибди? – деди у кичкириб. – У ҳар қандай донишманд бўлса ҳам, менинг ғазабимдан кочиб кутуломайди. Сўйла, ким экан у?»

– Швабрин, – дедим. – Руҳонийнинг уйида сен кўрган бемор қизни камоқда сақлаб, мажбуран хотин қилиб олмоқчи.

«Мен Швабринга кўрсатиб кўяман! – деди у ғазабланиб. – Менинг кўл остимда бўлиб, ўзбошимчалик ва халқка зулм қилиш қандай эканини билиб қўяди. Осаман уни».

– Рухсат эт, бир оғиз сўз айтай, – деди Хлопуша хириллаган товуш билан. – Сен Швабринни қальянинг беги қилиб тайнинлашга шошган эдинг, энди уни осишга ошиқяпсан. Боённи бошлиқ қилиб тайнинлаш билан казакларни ҳақорат қилдинг; уни осиб боёнларни қўрқитиб қўйма.

– Уларга раҳм ҳам, илтифот ҳам керак эмас! – деди кўк тасмали чол. – Швабринни оссак ҳечқиси йўқ. Жаноб офицернинг нима учун келгани ҳакида бир сўроқ қилинса, ёмон бўлмас эди. Агар сени шоҳ

¹ Белобородов – Пугачёвнинг ёрдамчиларидан бўлган деҳқон.

² Хлопуша – Урал заводларидан бирида ишлаган ишчи. Катта ташкилотчи, ўтқир нотик.

деб тан олмаса, сендан адолат сўрашининг маъноси йўқ; агар у сени шоҳ деса, нима учун шу кунгача Оренбургда сенинг душманларинг билан ўтирган? Сўроқ уйига олиб кириб қийноққа солишга рухсат бермайсанми? Назаримда, бу кишини олдимизга Оренбург қўмондонлари жосус қилиб юборган.

Бу қари бадкирдорнинг мантиқли сўзи менга хийла ишонарли кўринди. Кимларнинг қўлида эканимни ўйлаб, этим жунжикиб кетди. Пугачёв менинг гангид қолганимни сезди. «Хўш, жаноби олийлари, – деди у менга кўз қисиб. – Менинг фельдмаршалим тўғри айтяпти, дейман. Сенингча, қалай?»

Пугачёвнинг заҳархандаси менга далда берди. Мен ховлиқмасдан, унинг қўлида эканимни, нима қилса қўлидан келишини айтдим.

– Бўпти, – деди Пугачёв. – Энди шахарнинг қандай аҳволда эканини айт.

– Худога шукр, тинчлик, – дедим.

– Тинчлик? – деди Пугачёв. – Халқ очдан ўляпти-ку!

У тўғри айтарди: лекин бурчимга содик бўлганим учун, буларнинг ҳаммаси бекор гап, Оренбургда босиб қўйилган озиқ-овқат кўп деб ишонтиришга тиришдим.

– Кўрдингми? – деди чол. – Кўзингга қараб туриб сени алдаяпти. Қочиб келгандарнинг ҳаммаси бир оғиздан Оренбургда очарчилик ва ўлат бор экани, халқ ўлиқ ейишдан ҳам тортинағанини сўзлайди, бу киши бўлса, ҳар нарса тўкинчилик деб ишонтиради. Агар сен Шваринни осадиган бўлсанг, ўша дорга бу жанобни ҳам оски, ҳеч ким ҳавас қиласин.

Лъяннати чолнинг гапи Пугачёвга таъсир қилгандек бўлди. Менинг баҳтимга Хлопуша ўртоғининг сўзига қарши турди. «Кўйсанг-чи, Наумич, сенга қолса ҳаммани бўғ, ос. Қандай паҳлавонсан ўзинг? Бир оёғинг гўрда-ю, бошқаларни ўлдирмоқчи бўласан. Озмунча кишининг қонига зомин бўлдингми?»

– Сен қачондан бери художўй бўлиб қолдинг? – деди Белобородов.
– Раҳмдиллик сенга қаёқдан илашди?

– Албатта мен ҳам гуноҳкорман, – деди Хлопуша. – Бу қўл (у қуруқ суюқдан иборат бўлган муштини қаттиқ сикди ва енгини шимариб, ўхшовсиз қўлини очди), тўқилган христиан қонига ҳам зомин. Аммо мен меҳмонни эмас, душманни ўлдирганман. Уйда печканинг олдидаги ўтириб эмас, майдонда, қоронғи ўрмонда ўлдирдим. Хотинларнинг афсуни билан эмас, чўқмор ва болта билан ўлдирдим.

Чол юзини тескари ўгириб:

– Йиртиқ бурун! – деб тўнгиллади.

– Нима деб тўнгилляпсан, лакма чол? – деб қичкирди Хлопуша. – Йиртиқ бурунни сенга кўрсатиб қўяман, шошмай тур, сенга ҳам навбат келади. Худо хоҳласа, сен ҳам омбурнинг мазасини тотиб кўрасан... Ҳозирча эҳтиёт бўлиб тур, соқолингни юлиб олмайин!

– Генерал жаноблар! – деди Пугачёв улуғворлик билан. – Жанжални бас қилинглар. Бутун Оренбург итлари бир дор ёғочи остида оёқ типирлатса ҳечқиси йўқ, аммо бизнинг кўпраклар бир-бири билан гажишгани ёмон. Бас, ярашиналар.

Хлопуша билан Белобородов индамай, бир-бирига хўмрайиб қаради. Мен гапни бошқа ёққа буриш зарурлигини сездим, чунки бу сўз давом этса, мен учун зарарли бир натижча чикиши мумкин эди.

– Айтгандек, юборган отинг ва пўстининг учун сенга раҳмат айтиш эсимдан чиқаёзибди! – дедим Пугачёвга қараб очиқ чехра билан.

– Агар шуларни юбормаганингда, шаҳарга етолмай йўлда совуқ қотиб қолардим.

Ўйлаган макрим иш берди. Пугачёвнинг чехраси очилиб кетди. «Олишнинг бериши ҳам бўлади, – деди у кўзини қисиб. – Хўш, Швабрин зулм қилаётган қиз билан қандай алоқанг бор? Ё юракдан урганми, а?»

Унинг авзойини кўриб, яширишни лозим топмадим:

– У менинг қаллигим, – дедим.

– Сенинг қаллифинг? – деди Пугачёв қичкириб. – Нега илгарироқ айтмадинг? Биз сени уйлантириб, тўйингда кайф қиласдик! – Сўнг Белобородовга мурожаат қилди: «Менга қара, фельдмаршал! Биз бу киши билан эски танишлармиз, таом тайёрлайлик; эрта кечдан кўра яхшироқ. Бу кишини нима қилиш ҳақида эртага гаплашамиз».

Мен бу илтифотдан воз кечишга тайёр эдим, бироқ илож йўқ эди. Уй эгасининг қизлари – икки казак гўзали дастурхон ёзди, нон, балиқ шўрва, бир неча шиша мусаллас ва шароб келтирди. Шундай қилиб, мен иккинчи марта Пугачёв ва унинг даҳшатли шериклари билан ҳамтовоқ бўлдим.

Ихтиёrsиз қатнашганим бу май мажлиси ярим кечагача давом этди. Охири улфатларни кайф енга бошлади. Пугачёв ўтирган жойида муддтар эди, унинг ўртоқлари туриб, менга «чик» деб ишора қилдилар. Ҳаммамиз бирга чиқиб кетдик. Хлопушанинг буйруғи билан қоровул мени сўроқхонага олиб кирди. У ерда Савельич ҳам ўтирган экан. Икковимизни шу ерга қамаб, эшикни қулфлашди. Бу ишларни кўриб, чол шундай хайратда эдики, мендан ҳеч нарса сўрамади ҳам. У қоронгида

анчагача уф тортиб, оҳ чекиб ётди; охири уйқуга кетиб, хуррак тортди. Мен ўйга ботдим, бу ўйлар тун бўйи кўз юмгани қўймади.

Эрталаб мени Пугачёв чақиртирди. Бордим. Дарвоза олдида учта татар оти қўшилган фойтун турар эди. Қўчада одам кўп. Эшик олдида Пугачёвга рўпара келдим; у сафар кийими кийган – устида пўстин ва бошида кирғизча телпак. Кечаги ўртоқлари уни ўраб олишди, улар ўзларини Пугачёвнинг ҳар бир амрига ҳозир қилиб кўрсатсалар-да, бу мулозаматлар кечагиларига, умуман тўғри келмас эди. Пугачёв мен билан очик чехрада кўришди ва фойтунга таклиф қилди.

Иккимиз фойтунга чиқдик. «Белогор қалъасига!» деди Пугачёв кенг елкали татарга. Юрагим гупиллаб уради. Отлар қўзғалди, қўнғироқлар жиринглади, арава юриб кетди.

«Тўхта! Тўхта!» деган товуш эшитилди. Бу товуш менга таниш эди. Қарасам: қаршидан Савельич югуриб келяпти. Пугачёв фойтунни тўхтатди. «Азизим Пётр Андреевич! – деди чол қичкириб. – Қариган чоғимда мени ташлаб кетма, бу ўғр...» – Ҳа, миясини еган чол! – деди унга Пугачёв. – Яна дийдорингни кўрдим. Чик аравага, аравакашнинг ёнига ўтира қол!

– Қуллук бегим, раҳмат хожам! – деди Савельич чиқаётиб. – Мен чолни ҳимоя қилганинг, тинчтитганинг учун дард кўрма, умринг узок бўлсин. Умр бўйи дуои жонингни қиламан ва қуён терисидан тикилган пўстин ҳақида минбаъд гапирмайман.

Бу пўстин можароси охири Пугачёвни чинакам ғазаблантириши мумкин эди. Хайриятки, у ё эшитмади, ё кинояга аҳамият бермади. Отлар чопар, халқ қўчада тўхтаб таъзим қиласар, Пугачёв ҳар икки томонга бош қимирлатиб, саломга алик олиб борарди. Бирпасда қишлоқдан чиқиб, катта текис йўлга тушдик.

Шу пайтда қўнглимдан нималар ўтганини тасавур қилиш қийин эмас. Бир неча соатдан кейин «энди йўқотдим» деганим билан қўришишим керак. Топишадиган дақиқамизни кўз олдимга келтирдим... Тақдирим кўлида бўлган ва фалакнинг гардиши билан боғланиб қолганим киши ҳақида ҳам ўйлар эдим. Севгилимни қутқармоқчи бўлган бу одамнинг шафқатсизлиги, қонхўрлигини эсладим! Менинг севгилим капитан Мироновнинг қизи эканини Пугачёв билмас эди; ғазабланган Швабрин бутун сирни очиши мумкин. Пугачёв ҳақиқатни бошқа йўл билан ҳам билиб олиши мумкин... У вақтда Марья Ивановнанинг ахволи нима бўлади? Вужудим жимиirlлашиб, соchlарим тикка бўлди.

Бирдан Пугачёв ўйимни бўлиб:

– Жаноби олийлари нимани ўйламоқдалар? – деди.

– Ўйламай бўладими, – деб жавоб бердим. – Мен ҳам офицер, ҳам боёнман: кечагина сенга қарши урушган эдим, бугун эса сен билан бир фойтунда кетяпман ва тақдирим сенинг кўлингда.

– Нима бўпти? – деди Пугачёв. – Кўрқасанми?

Мен бир марта унинг томонидан афв этилганимдан сўнг ундан марҳаматгина эмас, ҳатто ёрдам кутганимни айтдим.

– Тўгри айтасан, Худо ҳақи тўгри! – деди ёлғон шоҳ. – Одамларим-нинг сенга ёмон кўз билан қараганини кўрдинг. Чол бугун ҳам сени жосус деб жазолаш, осиш кераклиги ҳақида гапирди, аммо мен кўнмадим. – Савельич билан татар эшитмайдиган қилиб, секин: – Берган бир коса мусалласинг билан пўстининг эсимдан чиқмайди. Кўрдингми, мен одамлар айтганчалик қонхўр эмасман, – деб кўйди.

Мен Белогор қальясининг олинишини эсладим, аммо унга гап қайтаришни лозим топмадим ва индамадим.

– Оренбургда мен ҳақимда нима дейишади? – деди Пугачёв бир оз жим қолиб.

– Сени эплаш қийинрок дейишади-да, уни-буни қўй, зарбингни ўтказибсан.

Ёлғон подшоҳ жуда керилиб кетди. «Шундай! – деди у чехраси очилиб. – Мен урушда хеч нарсадан қайтмайман. Юзеевага якин ерда бўлган урушни Оренбургдагилар биладими? Қиркта генерал ўлдирилди, тўрт армия асир олинди. Нима дейсан, Пруссия кироли менга бас кела оладими?»

Боскинчининг мақтандоқлиги менга кулгили туюлди. – Ўзинг нима дейсан? – дедим унга. – Фридериикни¹ енга олармидинг?

– Фёдор Фёдоровичними? Бўлмаса-чи! Сизларнинг генералларингни эпладим-ку, бу генераллар улардан зўр эди. Ҳозиргача мен енгиб келяпман. Ҳали шошмай тур, Москвага ҳам юриш қиласман.

– Москвага юриш ниятинг ҳам борми?

Пугачёв бир оз ўйланиб қолди ва секин:

– Худо билади, – деди. Менинг йўлим тор; бутунлай ихтиёр менда эмас. Одамларим ўзбошимчалик қилишади. Ҳаммаси ўғри, каззоб. Мен жуда зийрак бўлишим керак; биринчи енгилишдаёқ бошимни душманга топшириб, ўз жонларини сақлаб қолишади.

– Гап шунда-да! – дедим Пугачёвга. – Фурсат борида сен уларни ташлаб, император хонимнинг марҳаматига эришганинг дуруст эмасми?

¹ Фридрих II – Пруссия кироли.

Пугачёв захарханда қилди. «Йўқ, – деди у. – Тавбанинг вақти ўтди. Энди менга шафқат бўлмайди. Бошлаган ишимни давом эттираман. Ким билади, балки муваффакият қозонарман! Гришка Отрепьев ҳам Москвада подшоҳлик қилган-ку!»

– Охири нима билан тугаганини биласанми? Уни баланд бинонинг деразасидан улоқтиришган, қиймалашгач, куйдиришган ва кулини замбаракка солиб отишган!

– Менга қара, – деди Пугачёв қандайдир ёвойи бир илҳом билан. – Ёшлигимда мен бир қалмоқ кампирдан эшитган афсонани сенга айтиб берай. Бир куни бургут қарғадан: «Нима учун сен уч юз йил умр кўрасану, мен бор-йўғи ўттиз уч йилгина яшайман» деб сўрабди.

– Чунки дебди қарға, сен тирик жониворларнинг қонини ичасан, мен эса ўлаксанинг гўштини ейман. – Бургут ўйлаб, майли, мен ҳам ўлакса гўшти билан тирикчилик қиласай, дебди. Кейин бургут билан қарға учибди. Ўлиб ётган отни кўриб, иккови қўнибди. Қарға чўкиб, гўшти мақтабди. Бургут бир чўкибди, яна бир тумшук урибди, сўнгра қанотини қоқиб, шундай дебди: «Йўқ, қарға, биродар, ўлакса еб уч юз йил умр кўргандан, бир марта тирик жониворнинг қонига тўйган тузук, у ёғи Худонинг хоҳиши! Қалмоқ афсонаси қалай?

– Ажойиб, – дедим. – Аммо мен, одам ўлдириш ва босқинчилик билан умр кўришни ўлимтиқ чўкиш деб биламан.

Пугачёв афтимга таажжубланиб қаради-да, индамади. Иккимиз ҳам жим қолиб, ўз ўйимиз билан бўлдик. Татар мунгли қўшиқ бошлади, Савельич мудрар ва тебраниб борар эди. Фойтун текис, музлаган йўлдан фириллаб кетарди... Бир оздан кейин, Яиқ дарёси бўйидаги қишлоқ черковининг минораси кўринди ва чорак соатдан кейин биз Белогор қалъасига кириб бордик.

ХІ БОБ ЕТИМ ҚИЗ

*Бизнинг олма оғочдай,
На новда бор, на шохи;
Бизнинг бека ойимдай,
На ота бор, на она.
Ким қизни ўраб-чирмар,
Ким беради фотиҳа.*

Тўй қўшиғи

Фойтун комендант уйининг эшиги олдига келиб тўхтади. Халқ, келган Пугачёв эканини фойтуннинг қўнғироғидан билиб, ортимиз-

дан югурди. Швабрин Пугачёвни эшик олдида қарши олди. У казакча кийинган ва соқол қўйган. Хоин, Пугачёвнинг қўлтиғидан олиб фойтундан тушириб қўйди, ўзини жуда тубан олиб, севинч ва садоқатини намоён қилид. Мени қўриб хижолат бўлди, аммо дарров ўзини ўнглаб, менга қўл узатди ва: «Сен ҳам бизнинг томонга ўтдингми? Аллақачон шундай қилиш керак эди!» деди. Мен юзимни тескари ўғирдим, жавоб бермадим.

Кўпдан бери менга таниш бўлган уйга кирганимизда юрак-бағрим эзилиб кетди. Деворда ҳамон кечмишдан фамли ёднома бўлиб, мархум капитаннинг дипломи осилиб турарди. Пугачёв оромкурсига ўтириди. Бу оромкурсида бир замонлар Иван Кузмич рафиқасининг вайсашларидан мудраб ўтирап эди. Швабрин унга ароқ тутди. Пугачёв уни ичди ва: «Бу жанобга ҳам қўй» деди мени кўрсатиб. Швабрин қўлида патнис, менинг олдимга келди, аммо мен иккинчи марта ундан юзимни ўғирдим. У ўзини йўқотиб қўйди. Зийрак бўлганидан, ўзидан Пугачёвнинг норози эканини сезди, албатта. У Пугачёвдан қўрқар ва менга ишончсиз назар билан қарап эди. Пугачёв қалъанинг ахволи, душман аскари ҳақидаги миш-мишлар ва бошқалар ҳақида сўради-да, кутилмаганда савол берди:

– Менга қара, биродар, қанақа қизни уйга қамаб қўйибсан? – Уни менга кўрсат-чи?

Швабриннинг ранги мурдадек оқариб кетди. – Шоҳим, – деди у титроқ товуш билан. – Шоҳим, мен уни қамаб қўйганим йўқ... у бетоб... уйда ётиби.

«Мени унинг олдига олиб кир» деди ёлғон подшоҳ ўрнидан туриб. Гап қайтариш мумкин эмас эди. Швабрин уни Марья Ивановна ётган уй томон бошлади. Мен ҳам эргашдим.

Швабрин зинада тўхтади. «Шоҳим! – деди у. – Сиз мендан истаганингизни талаб қила оласиз, аммо хотинимнинг олдига бегона кишини киритмасангиз».

Мен титраб-қақшаб кетдим. «Ҳали сен уйланганмисан?» дедим гижиниб.

– Секин! – деди Пугачёв гапимни бўлиб. – Бу менинг ишим. Сен эса, – деди у Швабринга қараб, – менга ақл ўргатма, қийшанглама. У сенинг хотинингми, йўқми, унинг олдига истаган кишимни олиб кираман. Қани жаноби олийлари, юравер.

Уйнинг эшиги олдида Швабрин яна тўхтади ва энтика-энтика:

– Шоҳим, олдиндан айтиб қўйяй, у иситмада ёниб, уч кундан бери алаҳсираф ётиби, – деди.

– Оч! – деди Пугачёв.

Швабрин чўнтағини тимирскилаб, қалитни олиб келмаганини билдириди. Пугачёв эшикни бир тепганди, эшик очилиб кетди. Кирдик.

Мен хонага кириб, қотиб қолдим. Марья Ивановнанинг эгнида дәхқон хотинлари киядиган йиртиқ кўйлак, ерда ўтирарди: ранги ўчган, озган, соchlари тўзган. Олдида кўза, унинг устида бир бурда нон. У мени кўриб, чўчиб кетди ва қичқириб юборди. Шунда қандай аҳволга тушганим эсимда йўқ.

Пугачёв Швабринга қаради ва заҳарханда қилиб:

– Яхши шифохонанг бор экан! – деди. – Сўнгра Марья Ивановнанинг ёнига борди: – Хўш, кўзичогим, эринг нима учун сени жазолади? Унга нима гуноҳ қилдинг?

– Эрим? – деди у ажабланиб. – Бу менинг эрим эмас. Мен ҳеч қачон унинг хотини бўлмайман! Агар мени кутқаришмаса, ўлишга аҳд қилганман ва ўламан.

Пугачёв Швабринга ғазабланиб қаради. «Сен ҳали мени алдашга журъат қилдингми! Биласанми, нимага сазоворсан?» деди.

Швабрин тиз чўқди... Шу топда мендаги нафрат хисси душманлик ва ғазаб туйғусини босиб кетди. Қочоқ казакнинг оёғи остида ётган боёнга нафрат билан қарадим. Пугачёв жаҳлидан тушди. «Бу сафар гуноҳингдан ўтдим, – деди у Швабринга. – Аммо яна бир марта шу ишни тақрорласанг, бу гуноҳинг ҳам эсга олинажагини унутма». Сўнгра Марья Ивановнага қаради ва унга юмшоқлик билан: «Чик қизгина, сени озод қилдим. Мен шоҳман» деди.

Марья Ивановна дарров унга қаради ва ота-онасининг қотили шу эканини билди. У иккала қўли билан юзини ёпди ва хушидан кетиб ийқилди. Мен у томонга югурдим, аммо шу пайт эски танишим Палашка дадиллик билан уйга кирди-да, бекасининг хизматига хозир бўлди. Пугачёв уйдан чиқди, учовимиз меҳмонхонага тушдик.

– Хўш, жаноб, – деди кулиб Пугачёв. – Гўзал қизни куткардик! Нима дейсан, энди руҳонийни айттириб келиб, жиянининг никоҳини ўқитсақмикан? Мен гувоҳ бўламан, Швабрин қизни қарши оладиган ўртоги бўлади; ичамиз, тўйни ўтказамиз!

Мен қўрқиб турган иш амалга ошди. Швабрин Пугачёвнинг таклифини эшитиб, жон-пони чиқиб кетди. – Султоним! – деди у бакириб.

– Мен гуноҳкорман, мен сизга ёлғон гапирган эдим, аммо Гринёв ҳам сизни алдаяпти. Бу қиз шу ерлик руҳонийнинг жияни эмас, у ўша ердаги қалъа олингандга осиб ўлдирилган Иван Мироновнинг қизи.

Пугачёв менга оловли кўзлари билан тикилди. «Бу нимаси тағин?» деди у менга ажабланиб.

– Швабрин рост айтди, – дедим қатъият билан.

– Сен менга буни айтмаган эдинг, – деди Пугачёв авзойи бузилиб.

– Ўзинг ўйлаб қара, – дедим. Одамларинг олдида Миронов қизининг тирик эканини айтиб бўлармиди, уларинг ғажиб ташлар эди. Қизнинг жонига ҳеч нарса оро киролмасди.

– Бу ҳам тўғри, – деди Пугачёв қулиб. – Пиёнисталарим бечора қизга раҳм қилишмас эди. Руҳонийнинг хотини яхши қилибди, уларга ёлгон гапириб.

– Қулоқ сол, – дедим унинг юмшаганини кўриб. – Сени нима деб аташимни ҳам билмайман, атаб ҳам нима қилай... Худо ҳақи, бу қилган яхшилигинг учун жонимни беришга ҳам тайёрман. Аммо номусим, виждоним қабул қилолмайдиган нарсани мендан талаб қилма. Сен менинг халоскоримсан. Бошлаган ишингни охирига етказ: бечора етим қиз билан иккимизни қўйиб юбор, бошимиз оққан томонга кетайлик. Биз каерда бўлмайлик, бошингга қандай кун келмасин, дуойи жонингни қиласиз, гуноҳингни Худодан тилаймиз...

Пугачёвнинг тош юрагига бу гап таъсир қилди шекилли: «Хўп, сен айтганча бўлсин, – деди. – Осадиган бўлсам осишим керак эди, модомики афв қилган эканман, афв қиласман: менинг одатим шу. Гўзалингни етаклаб, қаёққа борсанг боравер; баҳтли бўлинглар, Худо баҳт берсин».

У Швабринга, ўз қўли остида бўлган бутун қалья ва шаҳарларга рухсатнома беришни буюрди. Тамоман хароб бўлган Швабрин донг қотиб қолди. Пугачёв қальани айлангани чиқиб кетди. Швабрин уни кузатиб борди; мен йўлга тайёргарлик қўриш баҳонаси билан қолдим.

Югуриб Марья Ивановна ётган уйга чиқдим. Эшик берк эди. Тақиллатдим. «Ким у?» деди Палашка. Исмимни айтдим. Марья Ивановнанинг ёқимли товуши эшитилди: «Шошманг, Пётр Андреевич. Мен кийиняпман. Акулина Памфиловнанинг уйига боринг; мен ҳам хозир бораман».

Мен Герасим ҳазратнинг уйига қараб кетдим. Руҳоний хотини билан югуриб чиқди. Савельич мени келишим ҳақида уларни хабардор қилган экан. «Ассалому алайкум, Пётр Андреевич, – деди руҳонийнинг хотини. – Яна қўришишни Худо насиб қилди. Қалайсиз? Биз ҳар куни сиз ҳақингизда гаплашамиз. Бечора Марья Ивановна, сиз йўқ, қандай кунларга тушди денг!.. Вой, тақсирим, бу Пугачёв билан қандай муро-са қилдингиз? Нечун у сизга шикаст етказмади? Тузук, бу бадкирдорга

шу ишлари учун ҳам раҳмат». – Бўлди, кампир, – деди Герасим ҳазрат унинг сўзини кесиб. – Валдираиверма. Кўп гапирмоқнинг хосияти йўқ. Азизим Пётр Андреевич! Уйга киринг, марҳамат қилинг. Кўп замондан бери кўришганимиз йўқ.

Руҳонийнинг хотини топган-тутганини олдимга қўйди ва тинмай жаврай берди. Швабрин қандай қилиб Марья Ивановнани беришга уларни мажбур қилгани, Марья Ивановна йиглаб, бу уйдан кетгиси келмагани, у Палашка орқали (Палашка ўнбошини ногорасига ўйнатган шаддод киз) улар билан доим алоқада бўлгани, бу қиз менга мактуб ёзишни Марья Ивановнага маслаҳат бергани ва бошқалар ҳақида сўзлаб берди... Мен ҳам бошимдан кечирғанларимни қисқагина қилиб айтиб бердим. Руҳоний билан унинг хотини Пугачёвга ўзларининг ёлғон гапирғанлари маълум бўлганини эшишиб ранглари учди, чўкиниб олишди. «Худонинг ўзи асрайди, – деди Акулина Памфиловна. – Ҳар балою, ҳар қазодан сақлагил, Парвардигор! Бу Алексей Ивановични айтинг-а, одам эмас, шайтон». Шу топда эшик очилиб, Марья Ивановна кириб келди. Унинг оқарған юзида табассум барқ уради. У дехкон аёллари киядиган кўйлакни ташлаб, содда ва дилкаш кийинган эди.

Мен унинг қўлидан ушлаб, анчагача бирон сўз айта олмадим. Юраклардаги кувончдан иккимиз ҳам жим қолдик. Уй эгалари бизнинг ҳолатимизни сезиб, чиқиб кетишди. Биз ёлғиз қолдик. Ҳамма нарса эсдан чиқди. Гаплашган сари тўймас эдик. Марья Ивановна қалья олингандан буён бошдан ўтганларини сўзлади; бўлиб ўтган бутун фожиани, қабиҳ Швабрин етказган жабру жафоларни тасвирлаб берди. Ўтган саодатли кунларни ҳам эсладик... Икковимиз ҳам йигладик... Оқибат, мен унга ўзимнинг мўлжалларимни айтдим. Пугачёв қўли остида бўлиб, Швабрин идора қилаётган қалъада унинг қолиши мумкин эмасди. Қамал балосини бошдан кечириб турган Оренбург ҳақида ўйлашнинг ҳам иложи йўқ эди. Дунёда унинг ҳеч кими йўқ. Мен унга қишлоқقا – ота-онамнинг олдига боришни таклиф қилдим. У аввал иккиланди; отамнинг унга хуши бўлмаганлигини билгани учун кўрқар эди. Мен унга далда бердим. Отам, ватан учун қурбон бўлган муҳтарам бир кишининг қизини ўз панохига олишни баҳт ҳисоблашини ва ўз бўйнидаги вазифа деб билишини билар эдим. «Азизим Марья Ивановна! – дедим охири. – Мен сени хотиним деб ҳисоблайман. Ажойиб ҳодисалар бизни бир-биримизга боғлади: ҳеч нарса бизни айира олмайди». Марья Ивановна менинг гапимга жўн, сохта уятчанлик қиласдан, бошқа ўйларга бормасдан кулоқ солди. Тақдири менинг тақдиримга боғланғанлигини сезарди. Аммо ота-онам рози бўлсагина, менга тегишини айтди. Мен

сўзини қайтармадим. Эҳтирос ва самимият билан бўса алмашдик ва узил-кесил бир қарорга келдик.

Бир соатдан кейин ўнбоши Пугачёв қингир-қийшиқ қилиб имзо чеккан рухсатномани олиб келди ва мени ёлғон шоҳ ҷақираётганини айтди. Борсам: у йўлга тайёр турган экан. Мендан бошқа ҳамма учун қўрқинчли бадкирдор бўлган бу даҳшатли одам билан хайрлашганимдаги туйғуни айтишдан ожизман. Ҳақиқатни яширишнинг нима кераги бор? Шу дамда кучли меҳр-муҳаббат мени унга томон тортди. Уни ўзи бошчилик қилган бадкирдорлар орасидан тортиб олишни ва ҳали фурсат ўтмасдан жонини саклаб қолишни жону дилим билан истар эдим. Бу ерда турган Швабрин ва ҳалойиқ қўнглимдаги бу дардни айтишга халал берди.

Дўйстларча хайрлашдик. Пугачёв оломон ичида Акулина Памфиловнани кўриб, бармоғи билан таҳдид қилди ва маъноли қилиб кўз қисди, сўнгра фойтунга чиқиб Бердага¹ караб ҳайдашни буюрди. Фойтун кўзғалганда у яна бошини чиқариб, менга қичқирди: «Хайр, жаноби олийлари, хайр. Насиб бўлса яна бирор ерда кўришармиз». Айтгани бўлди: биз яна кўришдик, аммо қандай шароитда денг!..

Пугачёв кетди. Унинг уч отли фойтуни ўрмалаб бораётган оппок даштга узок қараб қолдим. Ҳалқ тарқалди. Швабрин ғойиб бўлди. Мен рухонийнинг уйига қайтиб келдим. Йўл анжомларимиз таҳт эди, кетишини пайсалга солишини хоҳламас эдим. Барча юкларимиз комендантнинг эски аравасига жойланди. Аравакаш кўз очиб юмгунча аравани қўшди. Марья Ивановна черковнинг орқасига кўмилган ота-онаси-нинг қабри билан видолашгани кетди. Мен уни бирга олиб бормоқчи эдим, кўнмади, ўзини якка юборишимни сўради. Бир неча дақиқадан кейин қайтиб келди, юз-кўзидан ёш оқарди. Арава тайёр бўлди. Герасим ҳазрат билан хотини эшик олдига чиқишиди. Мен, Марья Ивановна ва Палашка аравага чиқдик. Савельич аравакашнинг ёнига ўтиреди. «Хайр, Марья Ивановна, хайр кўзичноғим; хайр, Пётр Андреевич, ок йўл, шунқорим, – деди рухонийнинг меҳрибон хотини. – Сафарларинг бехатар бўлсин, Худо толеингларни баланд қилсин». Кетдик. Комендант уйининг дарвозаси ёнида Швабринни кўриб қолдим. Унинг юзида қайғу ва ғазаб акс этарди. Яксон бўлган душманимни кўриб хурсанд бўлишни истамай, юзимни бошқа ёкка бурдим. Охири дарвозадан чиқиб, Белогор қальясидан абадий кетдик.

¹ Берда – Сокмор дарёси бўйидаги казак шаҳарчаси.

ХІІІ Б О Б

ҚАМОҚ

*Аччиғланманг, тақсирим, сизни тұхтөвсиз –
Қамоққа жұннатишиим – бурчим, билсангиз,
– Марҳамат, мен тайёрман; умид қиламан,
Гұноҳим не, айтартсыз аввал, билай ман.*

Княжнин

Эрталаб йўлида ғам еб, ташвишланиб юрганим севикли қиз билан бундай тўсатдан қовушганимга ишонмасдим ва буларнинг ҳаммасини тушим бўлса керак, деб ўйлар эдим. Марья Ивановна гоҳ менга, гоҳ йўлга қарар ва ҳали ўзига келмагандек кўринарди. Иккимиз ҳам жим. Қалблар тўлган. Икки соатдан сўнг яна ўша Пугачёв қўли остида бўлган қальяга келганимизни ҳам билмай қолдик. Бу ерда отларни алмаштиридик. Сергапликни биздан ҳам ўтказиб юборган аравакашнинг лақмалиги ортида, бу ердагилар мени сарой ходими ноиби деб гумон қилишган. Буни Пугачёв томонидан тайинланган серсоқол казак комендантнинг чаққонлик билан бизга хизмат қилиши, отларни аравага тез қўшилишидан билдим.

Йўлда давом этдик. Коронги туша бошлади. Биз, серсоқол комендантнинг сўзига қараганда, Пугачёвга кўшилгани бораётган кучли бир отряд турган шаҳарга яқинлашдик. Қоровуллар бизни тўхтатди. «Ким у?» деган саволга аравакаш: «Шоҳнинг дўстлари ўз рафиқалари билан» деб жавоб берарди. Бирдан гусарлар бизни ўраб олди ва ҳақорат қила кетди. «Чиқ бу ёққа, шайтоннинг дўсти! – деди менга узун мўйлови сардор суворий. – Кунингни кўрасан хотининг билан бирга!»

Мен аравадан тушиб, бошлигининг олдига олиб боришни талаб қилдим. Офицер эканимни кўриб, аскарлар сўкишдан тўхташди. Сардор суворий мени майорнинг олдига олиб борди. Савельич кетимдан қолмас ва ўзича вайсаб: «Мана сенга шоҳнинг дўсти! Кордан қутулиб ёмғирга... Ё, Парвардигор, бу ишларнинг охири нима бўлади?» дер эди. Арава аста-секин ортимиздан юрди.

Беш дақиқадан кейин кичкина, ёруғ бир уйнинг олдига келдик. Сардор суворий мени қоровулга топшириб, ичкарига кириб кетди ва кўп ўтмай чиқиб: жаноби олийларининг мени қабул қилишга фурсати йўқ эканини, мен қамоққа юбориб, хотинни ўз хузурига олиб келишни бу юрганини билдириди.

– Бу нима деган гап? – дедим ғазаб билан. – Нима, ақлдан озғанми ўзи?

– Билмайман жаноб, – сардор суворий. – Қўмондон жаноблари сизни қамоққа олишни, хонимни хузурига олиб келишни буюрдилар. Буйруқ шу, жаноби олийлари!

Мен эшик томон отилдим. Қоровуллар мени тутишмади, тўғри уйга кирдим. Уйда олтита офицер қимор ўйнаб ўтирган экан. Майор қарта ташлар эди.

Қарасам: мени бир замон Симбирск майхонасида ютган Иван Иванович Зурин ўтирибди.

– Тушимми-ўнгим! – дедим қичириб. – Иван Иванович! Сенмисан?

– Э-ҳе... Пётр Андреевич, баҳайр? Қаёқдан келяпсан? Ана буни қара-я! Сенга ҳам қарта берайми?

– Қуллук. Ундан кўра менга уй топтириб бер.

– Қанақа уй? Менинг уйимда туравер.

– Бўлмайди: ёлғиз эмасман.

– Ўртоғингни ҳам олиб кир.

– Ўртоғим эмас, мен... аёл киши билан.

– Аёл киши билан? Қаердан илаштириб олдинг? Ў-ху, ишинг зўрку! (Шуни айтиб, у бир хуштак чалдики, ҳамма кулиб юборди, мен жуда хижолат бўлдим.)

– Ҳай, – деди Зурин. – Бундай бўлса, сенга уй берамиз. Э, аттанг... Эскичасига бир кайф қиласр эдик... Ҳой! Йигит! Нега Пугачёв дўстининг хонимини бу ёққа олиб кирмайсизлар? Ё қайсарлик киляптими? Айтинглар, қўрқмасин. Боён жуда яхши, озор бермайди денглар, қўйманглар, зўрлаб бўлса ҳам олиб киринглар.

– Нима деяпсан? – дедим Зуринга. – Қанақа Пугачёв дўстининг хоними? Бу – марҳум капитан Мироновнинг қизи. Мен уни асирилдан кутқариб, отамнинг қишлоғига юборяпман. У ўша ерда туради.

– Нима? Хали менга сен ҳақингда гапиришганмиди? Э, бу қандай гап.

– Кейин ҳаммасини гапириб бераман. Ҳозир бечора қизни юпат, Ҳудо ҳақи. Гусарларинг уни ёмон қўрқитиши.

Зурин дарров буйруқ берди, ўзи бу англашилмовчилик ҳакида Марья Ивановнага узр айтгани қўчага чиқди ва сардор суворийга хоним учун шаҳардан энг яхши уй топиб беришни буюрди. Мен унинг уйида тунайдиган бўлдим.

Овқат едик. Икковимиз ёлғиз қолганимизда, бошдан кечирганларимни хикоя қилиб бердим. Зурин сўзимга дикқат билан қулоқ солди. Мен хикоямни тамом қилганимдан сўнг, бошини чайқаб, деди: «Бунинг ҳаммаси яхшику-я, бир жойи ёмон: уйланишга бало борми? Мен ҳалол

офицерман, алдашни истамайман, сўзларимга ишон. Уйланиш бу – де-воналиқ. Хотин билан овора бўлиш, яна бола боқиш кўлингдан келадими? Э, қўй! Менинг гапимга кир: капитаннинг қизи билан алоқангни уз. Симбирск йўлини очганман, хавф-хатар йўқ. Эртагаёқ унинг ўзини ота-онангнинг олдига юбор; ўзинг эса менинг бўлинмамда қол. Оренбургга боришнинг ҳожати йўқ. Яна қўзголончиларнинг қўлига тушсанг – кутулишинг гумон. Шундай қилсанг, муҳаббат иситмаси босилади, тинчийсан».

Гарчи унинг фикрига батамом қўшилмасам-да, император хонимнинг қўшини сафида бўлишимни бўйнимдаги вазифа талаб қиласар, мен буни билар эдим. Зуриннинг маслаҳатига амал қилиб, Марья Ивановнани қишлоққа юборишга ва ўзим бўлинмада қолишга аҳд қилдим.

Савельич мени ечинтиргани кирди. Эртага Марья Ивановна билан қишлоққа кетгани тайёр бўлиб туришни буюрдим. У қайсарлик қилмоқчи бўлди. «Нима бўлди, ҳожам? Мен сизни қандай ташлаб кетаман? Сизга ким қарайди? Ота-онангиз нима дейишади?»

Чолнинг қайсарлигини билганим учун уни самимият ва ширин сўз билан кўндиromoқчи бўлдим. – Қадрроним Архип Савельич! – дедим. – Йўқ деманг, яхшилик килинг. Бу ерда хизматкорга муҳтоҷ бўлмайман, агар Марья Ивановнани сенсиз юборсам, кўнглим тинчимайди. Унга хизмат қилсанг – менга хизмат килган бўласан, чунки имконият бўлиши билан мен унга уйланаман.

Савельич айтиб бўлмаслик даражада таажжубланиб: «Уйланаман? – деди. – Бола уйланса-я! Отанг нима дейди, онанг нима деб ўйлади?»

– Рози бўлишади, – дедим. – Марья Ивановнани эшитганларидан кейин кўнишади. Сенга ҳам умид боғлаганман. Ота-онам сенга ишонишади: сен бизнинг тарафимизни олиб ҳимоя қиласан, шундай эмасми?

Чолга гап таъсир қилди. «О, азизим Пётр Андреевич, – деди у. – Гарчи уйланишингизга эрта бўлса-да, Марья Ивановнадек яхши қизни кўлдан чиқариш ҳам гуноҳ. Майли, сен айтгандек бўлсин. Элтиб кўяман ва ота-онангга, сепсиз бўлса ҳам жуда яхши қиз эканини қулларча етказаман».

Савельичга раҳмат айтиб, Зурин билан бир уйда қолдим. Қизишиб кетиб, кўп гапириб юбордим. Зурин аввал хўп яхши гаплашди, аммо аста-секин хуши учиб, гапи пойма-пой бўла бошлади. Охири, қандайдир бир саволимга жавоб бериш ўрнига хуррак тортди. Мен гапдан тийилиб, уйқуга кетдим.

Эртасига эрталаб Марья Ивановнанинг олдига бориб, ўз режамни айтдим. У, режамни маъқул топиб, фикримга қўшилди. Зуриннинг

бўлинмаси шу куни шаҳардан чиқиши керак эди. Имиллашнинг вақти эмасди. Мен дархол Марья Ивановна билан хайрлашиб, уни Савельичга топширдим. Марья Ивановнага ота-онамга элтиш учун мактуб бердим. У йифлаб юборди. «Хайр, Пётр Андреевич! – деди секингина. – Яна кўришиш насиб бўладими-йўқми, Худо билади; аммо умр бўйи сизни ёдимдан чиқармайман, қабрга киргунимча қалбимдан кетмайсиз». Мен ҳеч нарса дея олмадим. Бизни одамлар ўраб олди. Уларнинг олдида ўзимни тутдим, ҳаяжонга солган хисга берилишни истамадим. Охирни Марья Ивановна кетди. Мен Зуриннинг олдига хафа, хомуш қайтиб келдим. У кўнглимни кўтармоқчи бўлди, мен ўзимни овунтиromoқни истадим; иккимиз кунни ўйин-кулги билан ўтказдиқ, кечқурун сафарга чиқдик.

Февраль ойининг охирлари эди. Ҳарбий юришларни қийинлаштирган киш ўтди. Бизнинг генераллар бир ёқадан бош чиқариб иш кўришга ҳозирланардилар. Пугачёв ҳамон Оренбургга яқин ерда турарди. Бу орада унинг атрофида бўлган бўлинмалар бирлашиб, ҳар томондан бадкирдорлар уясига яқинлашарди. Кўзғолон кўтарган қишлоқлар бизнинг аскарларни кўриши билан тобе бўларди; ўғрилар тўдаси ҳар ерда биздан кочар, бу иш тез кунда ва хайрли битиши кўриниб турар эди.

Ҳадемай князь Голицин¹ Татищево қальъаси яқинида Пугачёвни торпомр килиб, лашкарларини тўзитди ва Оренбургни кутқарди. Бу кўзғолонга сўнгти ва узил-кесил зарбадек бўлган эди. Зурин бу вақтда исён кўтарган бошқирдларга қарши юборилганди, улар биз бормасимиздан тарқаб кетибди. Баҳор бизни кичкина бир татар қишлоғига қамаб кўйди. Дарёлар тошиб, йўлларни сув босди. Бир жойда туриб қолганимиз ҳақида ўз-ўзимизга, ўғри ва ёввойиларга қарши бу зерикарли майдада урушлар тезда яқун топади, деган фикр билан тасалли берар эдик.

Аммо Пугачёв қўлга тушмади. У Сибир заводларига бориб, янгитдан тўда тўплади ва яна бадкирдорликни давом эттириди. Унинг муваффақиятлари ҳақида роса дув-дув гап тарқалди. Сибирдаги қальъалар талон-торож қилинганлиги маълум бўлди. Зудликда Қозонни олгани ва Москвага қараб юриш қилгани ҳақидаги хабар манфур Пугачёвни кучсиз, деган умид билан мудраб ётган катталарни ҳаракатга солди. Зурин Волгадан ўтиш ҳақида буйруқ олди.

Бизнинг юришимиз ва урушнинг тамом бўлганини тасвиirlаб ўтирмайман. Қисқагина қилиб шуни айтаман: ахвол ҳаддан ташқари

¹ Голицин Пётр Михайлович – (1738–1775) Қозон-Оренбург худудларида Пугачёвга қарши урушда аскарий қисмларга кўмандонлик қилган генерал.

ёмон эди. Кўп жойларда идора ишлари тўхтаб қолди; зодагонлар тўқайларга қочиб кетишиди. Бадкирдорлар тўдаси ҳамма ерда ўз бадкирдорлигини қилишарди. Алоҳида тўдаларнинг бошлиқлари ўзларича кишиларни ўлимга хукм қиласа ё афв этарди; ёнгин хуруж қилаётган кенг мамлакатнинг аҳволи даҳшатли эди... Маъносиз ва шафқатсиз рус исёнини Худо кўрсатмасин! Иван Иванович Михельсон¹ томонидан таъкиб этилган Пугачёв қочди. Кўп вақт ўтмай унинг тор-мор этилганлиги ҳақида хабар эшилди. Охири Зуринга ёлгон шоҳнинг кўлга тушганлиги ҳақидаги хабар, шу билан бирга ҳаракатни тўхтатиши тўғрисида фармон келди. Уруш тамом бўлди. Энди ота-онамнинг олдига боришим мумкин эди! Отa-онам билан кўришиш, шу кунгача ҳат-хабари келмаган Марья Ивановнани кўриш хаёли мени қувончдан энтиклиарди. Мен ёш боладек иргишлар эдим. Зурин кулар ва елкасини учириб: «Йўқ, сенинг ишинг яхшиликка олиб бормайди. Уйланиб бекорга нобуд бўласан!» дер эди.

Аммо бу орада ғалати бир ҳис шодлигимга заҳар соларди: бунча гуноҳсиз курбонларнинг қонига бўялган бадкирдор ва уни қатл этилиши ҳақидаги ўй мени ҳаяжонга соларди: «Емеля, Емеля! – дер эдим ичимда, – нега сен найзага ёки ўкка учрамадинг? Бундан яхши иш бўлмас эди». Энди нима қилиш керак? Ҳаётнинг энг даҳшатли дақиқаларидан бирида мени афв этганлиги, севгилимни қабих Швариннинг кўлидан қутқарганлиги ёдимдан чиқмаганидек, у ҳам сира хаёлимдан кўтарилимас эди.

Зурин менга таътил берди. Бир неча кундан сўнг уйимга қайтишим ва Марья Ивановнани кўришим керак эди... Бирдан кутилмаган даҳшат мени гангитиб кўйди.

Кетадиган куним йўлга тушгани ҳозирлик кўраётганимда Зурин кирди. Унинг кўлида қофоз, афтидан жуда хафа кўринар эди. Юрагим «шув» этиб кетди.

Қўрқиб кетдим, аммо нимага қўрққанимни билмас эдим. У менга иши борлигини айтиб, аскаримни чиқариб юборди. – Нима гап ўзи? – дедим бетоқат бўлиб. «Кичкинагина кўнгилсизлик, – деди у қўлидаги қофозни менга узатиб. – Ўқиб кўр, ҳозир келди».

Ўқидим: бу барча қўмондонларга ёзилган фармойиш бўлиб, каерда кўлга тушсан, қамоққа олинишим ва зудликда Қозонга, Пугачёв иши юзасидан тузилган тергов комиссиясига юборилишим буюрилган эди.

¹ Иван Иванович Михельсон – (1740–1802) Пугачёв қўзғолонини бостиришда каттиқкўл генераллардан бири.

Қоғоз қўлимдан тушиб кетаёзди. «Иложим йўқ! – деди Зурин. – Буйруқка бўйсуниш вазифам. Пугачёв билан бўлган дўстона алоқанг қандайдир йўл билан ҳукуматнинг қулоғига етганга ўхшайди. Бу ишдан ҳеч қандай натижа чиқмаслигига ва комиссия сени оқлаб юборишига кўзим етади. Хафа бўлма, бор». Виждоним пок; суддан кўрқадиган жойим йўқ, бироқ лаззатли учрашувнинг бир неча ой орқага сурилиши эҳтимолидан чўчир эдим. Арава келди. Зурин мен билан дўстона хайрлашди. Аравага чиқдим. Ёнимга икки аскар ўтирди, иккови ҳам қиличини ялангочлаб олганди. Катта йўлдан кетдик.

XIV Б О Б

СУД

*Халқ сўзи –
Денгиз тўлқини.*

Мақол.

Бутун гуноҳ Оренбургдан ўзимча кетиб қолганлигимдан иборат эканига ишонардим. Бунга важ топа олардим: шаҳардан чиқиб юриш ҳеч қачон тақиқ қилинмаган, балки маъқул кўрилган эди. Мен бебошлиқда эмас, ортиқ даражада бўлган қизиқонликда айблансам керак. Аммо Пугачёв билан бўлган дўстона алоқам кўп шоҳидлар билан исбот қилиниши ва бу жуда ҳам шубҳали кўриниши мумкин эди. Йўл бўйи бўладиган сўроқ ҳакида ўйлаб, айтадиган жавобларимни пишитиб бордим. Суд олдида ҳакиқатни очиб ташлашга қарор қилдим, оқланиш учун шу йўлни жуда жўн ва умидли деб ҳисобладим.

Қозонга келдим: шаҳар хароб, куйган. Кўчаларда уйларнинг ўрнида тўп-тўп кўмири ва томи билан ойнаси йўқ, қорайган деворлар турарди! Пугачёвдан қолган из шу! Мени куйган шаҳарнинг ўргасида омон қолган қалъага олиб келишди. Ёнимда келган икки гусар мени қоровул офицерга топширди. У темирчини чакиртирди. Оёғимга кишан солишиди. Кейин турмага элтиб, деразасига темир панжара қоқилган, купкуруқ тор ва қоронги ҳужрага бир ўзимни қамаб кўйишиди.

Ишнинг бу хилда бошланиши яхшилигидан дарак бермасди. Бироқ мен дадиллигимни йўқотмадим, умидсизликка ҳам тушмадим. Барча ғамгинларнинг тасалли берувчисига сифиндим ва соф, аммо укубат тортган юракдан чиқкан муножотнинг нашъасини ilk марта тотиб, нима бўлиши ҳакида ғам емай, хотиржамлик билан уйқуга кетдим.

Эртасига мени турманинг нозири уйғотиб, комиссия чақи-раётганидан хабар берди. Икки аскар мени ҳовлидан олиб ўтиб, коменданнтнинг уйига элтди, ўзлари даҳлизда қолиб, мени ичкарига киритиб юборишиди.

Каттагина бир хонага кирдим. Усти тўла қоғоз столнинг ёнида икки киши ўтиради: бири – ёши қайтган генерал, афтидан бераҳм ва қаттиққўл; иккинчиси – ёш, гвардия капитани, йигирма саккиз ёшларда эди. Унинг ташки қиёфаси дилкаш, ўзи ажбир, муомалада эркин. Дераза ёнидаги алоҳида столда котиб ўтиради: қалам қулогининг орқасида, ўзи қоғоз устига энгашган, менинг жавобларимни ёзишга тайёр турарди. Сўроқ бошланди. Исмим ва амалимни сўрашди. Генерал менинг Андрей Петрович Гринёвнинг ўғлиманми, йўқми, шуни сўради ва менинг жавобимга қарши: «Ҳайфки, шундок мухтарам кишининг ўзига номуносиб ўғли бор экан!» деди. Мен совуқконлик билан бўйнимга қўйилаётган айб қандай бўлмасин, ҳақиқатни яширмай айтиш орқали уни ўзимдан соқит қилишга ишонишимни айтдим. Менинг ёзларим унга маъкул келмади. «Сен, ука, осмондан келдинг, – деди генерал қовоғини солиб. – Билиб қўй, сендан ўткирларини ҳам кўрганмиз!»

Ёш йигит, қачон ва қандай муносабат билан Пугачёвнинг хизматига кирганимни ва у мени қандай ишларга жалб этганини сўради.

Мен жаҳлим чиқиб, офицер ва боён бўлганим сабабли Пугачёвнинг хизматига кира олмаслигимни ва ундан ҳеч қандай топшириқ ололмаслигимни айтдим.

– Бўлмаса, – деди терговчи, – қандай қилиб бир боён ва офицерги на афв этилди, ҳолбуки, унинг барча сафдошлари ўлдирилди? Қандай қилиб офицер ва боён исёнчилар билан бирга кайф-сафо киласди, бадкирдорларнинг каттасидан пўстин, от ва ярим сўм пул инъом олди? Бу одатдан ташқари иноклик, қабиҳ ва жиноят даражасига етган кўрқоқликка асосланмаган бўлса, унда нимага асосланган?

Гвардия офицерининг бу сўзи менга қаттиқ ҳақорат бўлди, қизишиб ўзимни оқлашга киришдим. Пугачёв билан даштда, бўрон вақтида танишганлигимни ва Белогор қалъаси олинган вақтда у мени таниб афв этганини айтдим. Пўстин билан отни олганим чакки бўлганини тан олдим, аммо Белогор қалъасини имкон борича мудофаа қилганимни сўзладим. Оқибат, Оренбург қамал қилинган вақтда кўрсатган жонбозлигимга гувоҳ бўлган генерални кўрсатдим.

Қаттиқкүл чол стол устидан бир очиқ мактубни олиб, баланд овоз билан ўқый бошлади:

«Праторщик Гринёвнинг ушбу фитна ишга аралашгани ва бадкирдорлар билан муносабати ҳамда ўз бурчига хилоф равишда алоқада бўлгани ҳақида сўровингизга мувофиқ қуидагиларни арз этаман: праторщик Гринёв 1773 йил октябрь ойининг бошидан ушбу йилнинг 24 февраль ойига қадар Оренбургда хизматда бўлиб, шу куни Оренбургдан кетганича қўл остимга қайтиб келмади. Қочиб ўтган кишилардан эшитишимга қараганда, у Пугачёвнинг олдига – қишлоққа борган ва у билан илгари хизмат қилган Белогор қалъасига кетган, унинг ахлоқига келганда мен...» У шу ерда тўхтаб, жиддий оҳангда: «Ўзингни оқлаш учун энди нима дейсан?» деди.

Гапни қандай бошлаган бўлсам, шундай давом этмоқда ва боя айтганимдек, Марья Ивановна билан бўлган муносабатим ҳақида рўй-рост гапирмоқчи эдим, бироқ ўзимда енгиб бўлмас бир нафрат сездим. Агар унинг исмини айтсам, комиссия сўроққа чакиради, деган ўйга бордим. Қизнинг исмини ўғри, бадкирдорлар исмига аралаштирсам, уни булар юзлаштиргани олиб қолишиади, деган фикр мени шундай гангитдики, шошиб қолдим ва жавобимда янглишдим.

Аввалги жавобларимга бир қадар юмшагандек бўлиб қулоқ солган терговчиларим, менинг гангиганимни кўриб яна шубҳага тушди. Гвардия офицери менинг шу ҳақда маълумот берган одам билан юзлаштиришни талаб қилди. Генерал кечаги бадкирдорни чакиринглар, деди. Мен қораловчимни кутиб, эшикка қараб турдим. Бир неча дақиқадан сўнг, эшик очилди – Швабрин кирди. Ундаги ўзгаришни кўриб хайрон қолдим. Бечора роса озиб кетибди, ранги оппоқ. Яқиндагина мумдек коп-қора бўлган сочи тамоман оқарибди, узун соколи патак ҳолига келибди. У менга қўйган айбини босиқ товуш билан, аммо дадил такрорлади. Унинг сўзича, гўё мен Пугачёв томонидан Оренбургга жосуслик учун юборилган эмишман; шахарда қилинаётган ишлардан ёзма маълумот бериш учун ҳар куни отишув баҳонасида, шахардан ташқарига чиккан эканман; оқибат Пугачёв билан очиқдан-очиқ қалъаларни айланган ва ундан мукофот олиш учун ҳар турли йўллар воситасида ўз сафдошларим – хоинларни ўлдиришга, уларнинг ўринларини олишга харакат қилган эмишман. Унинг сўзларига жим қулоқ солдим ва бир нарсадан мамнун бўлдим: мени Марья Ивановнанинг исмини айтмасликка мажбур қилган хис, унинг ҳам қалбидан ўрин олганлигиданми,

хар қалай комиссия олдида Белогор қалъаси комендантининг қизи ҳақида у ҳам индамади. Мен илгариги фикримда яна ҳам қаттиқ туриб олдим ва суд Швабриннинг берган маълумотини қандай рад қила олишимни сўраган эди, илгари айтган сўзимда туришимни ва ўзимни оқлаш борасида бошқа ҳеч гап айта олмаслигимни билдиридим. Генерал бизни олиб чикишга буюрди. Иккимиз бирга чиқдик. Мен совуққонлик билан Швабринга қарадим, аммо индамадим. У заҳарханда қилди ва оёғидаги кишанни кўтариб, мендан ўтиб кетди, жадаллади. Мени яна турмага олиб боришди ва қайтиб сўроққа чақиришмади.

Энди айтадиганларимни мен ўз кўзим билан кўрганим йўқ, аммо бу тўғрида кўп эшитдимки, унинг энг майда-чўйда тафсилоти ҳам мияга ўрнашиб қолган ва худди иштирок этгандекман.

Марья Ивановнани ота-онам, эски одамларга хос бўлган самимият билан қарши олишган. Бечора етим қизни ўз қанотлари остига олиш ва бошини силашни Худонинг марҳамати, деб билганлар. Тез кунда унга ўрганиб қолишган, чунки унинг яхши қиз эканини билмаслик, уни сев-маслик мумкин эмасди. Менинг унга бўлган муҳаббатим отам учун қуруқ девоналиқдан иборат бўлмай қолган; онамнинг эса бирдан-бир орзузи мени шу меҳрибон капитан қизига уйланишим бўлиб қолган.

Менинг қамалганим ҳақидаги хабар оиласми ташвишга солибди. Марья Ивановна ота-онамга Пугачёв билан бўлган ғалати танишлигим борасида оддий қилиб шундай сўзлаб берибдики, улар хавотир бўлиш у ёқда турсин, роса кулишибди. Мақсади тож-тахтни барбод қилиш ва боёнларни кириш бўлган бу қабих исёнга аралашувимга отамнинг ишонгиси келмабди. У Савельични буровга олиб, бу ҳақда сўрабди. Чол мени Емельян Пугачёвга меҳмон бўлганимни ва унинг менга гўё мудом меҳрибончилик қилганини яширмабди, аммо ҳеч қандай хиёнат тўғрисида гап эшитмаганини айтибди. Чол-кампир хотиржам бўлиб, хушхабар келишини интиқлик билан кутишибди. Марья Ивановна ҳаддан ташқари ҳаяжонга тушса ҳам, ўта кетган эҳтиёткор ва оғир табиатли бўлгани учун индамабди.

Бир неча хафта ўтибди... Бир кун отамга Петербургдан, қариндошимиз князь Б.дан мактуб келибди. Князь мен ҳакимда ёзган экан. Одатдаги муқаддимадан сўнг, мени исёнга аралашувим шубҳа, баҳтга қарши исбот этилган, халқнинг кўз олдида осиб ўлдирилишим лозим бўлса-да, малика отамнинг кексайиб қолгани, кўрсатган хизматларига хурмат маъносида афв этишга фармон берганини ва маломатли

ўлимдан қолдириб, узок Сибирга умрбод сургун қилишга буюрганини ёзибди.

Бу кутылмаган зарба отамни ўлдираёзибди. У одатдаги матонатни йүкотиб, унинг одатда пинхоний бўладиган қайғуси аччик шикоятлар тарзида юзага чиқибди. «Бу қандай гап! – дер экан у ғазабланиб. – Менинг ўғлим Пугачёв фитнасида қатнашмаган! Эй, Худо, қандай кунларга қолдим! Малика уни ўлимдан саклаб қолибди! Наҳотки бу, қайғуимни енгиллаштиrsa? Ўлим жазоси кўрқинчли эмас: бобомнинг бобоси муқаддас ҳисоблаган бир нарсадан қайтмаганлиги учун жазо майдонида¹ ўлдирилган эди; отам Волинский, Хрушчёвлар билан бирга жаллод қўлида жон берган. Наҳотки боён ичган онтини бузса, ўғрилар, қочок қотиллар, кулларга қўшилса! Бизнинг авлодга номус, ор!..» Отамнинг умидсизликка тушишидан кўрқкан онам, унинг олдида йиглай олмас ва бу гапларнинг ёлғон эканлиги, одамлар айтган гап аҳамиятли эмаслиги ҳақида сўзлаб, унга тасалли бераркан. Бироқ отам хеч тинчимабди.

Марья Ивановна ҳаммадан кўра кўпроқ азоб тортаётган экан. Истаган вақтимда ўзимни оқлай олишимга кўзи етган Марья Ивановна, гап нимада эканини фаҳмлаб, бошимга келган бахтсизликка ўзини айбдор хисоблабди. У кўз ёши ва тортаётган азобини ҳаммадан яширап ва мени қутқариш ҳақида ўйлар экан.

Бир куни кечқурун отам оромкурсида сарой тақвимини вараклаб ўтирап, аммо хаёли паришон бўлганидан тақвимни ўқиши унга одатдагидек таъсир қиласмиш. Онам индамасдан жун чакмон тўкир ва кўзидан оққан ёш ҳар замон қўлидаги ишига томар экан. Шу ерда ишлаб ўтирган Марья Ивановна тўсатдан ўзининг Петербургга боришига мажбур эканини айтиб, йўлга чиқишига ёрдам беришларини сўрабди. Онам жуда хафа бўлибди. «Петербургда нима қиласан? – дебди у. – Наҳотки, Марья Ивановна, сен ҳам бизни ташлаб кетмоқчи бўлсанг?» Марья Ивановна келажак шу сафарга боғлиқ эканини, садоқат ортида ҳалок бўлган кишининг қизи бўлгани учун обрўли амалдорларга ёрдам сўрагани бормоқчи эканини айтибди.

Оtam бошини куйи солибди: зотан ўғлининг бўхтон бўлган жиноятини ёдга солувчи ҳар бир сўз, унинг учун оғир ва заҳарли киноя бўлиб туюлар эди. «Бора қол азизам! – дебди уф тортиб. – Биз сенинг

¹ Москвадаги майдон (XVI–XVII аср). Хукуматга хиёнат қилганлар шу ерда ўлдирилган.

бахтингга тўсиқ бўлишни истамаймиз. Худо сенга олчоқ хоинни эмас, яхши бир кишини умр йўлдош қилсин». У ўрнидан туриб, чиқиб кетибди.

Марья Ивановна онам билан ёлғиз қолиб, ўз режасини қисман унга айтибди. Онам уни кучоқлаб йиглабди ва эсон-омон ниятига етишни Худодан тилаб, дуо қилибди. Марья Ивановна йўлга ҳозирланиб, бир неча кундан сўнг, садоқатли Палашка ҳамда мендан базур айрилган ва қаллигимга хизмат қилиш билан тасалли топган садоқатли Савельични олиб жўнабди.

Марья Ивановна эсон-омон Софияга етиб келибди ва почтахонадан сарой «Царское село»да эканини билиб, шу ерга тушишга аҳд қилибди. Унга бир бурчакдан жой беришибди. Назоратчининг аёли у билан сўзлашиб кетиб, сарой печка ёкувчисининг жияни эканини билдирибди ва сарой ҳаётининг сирларини сўзлаб берибди. Малика соат нечада уйқудан турари, қачон қаҳва ичади, қайси пайтда айлангани чиқади, бу вактда қандай арбоб-арконлар бўлади; малика кечки таом маҳалида нималар дейди, кечқурун кимни қабул қиласи, кисқаси, агар Анна Власьевнанинг гаплари ёзилса бир неча варақ тарихий хотира бўлиб, келажак авлод учун қимматли нарса бўлар экан. Марья Ивановна унинг гапларига дикқат билан қулоқ солибди. Иккови бокқа ўтишибди, Анна Власьевна ҳар бир хиёбон, ҳар бир қўприкчанинг тарихини сўзлаб берибди, улар хўп айланишиб, бир-биридан жуда мамнун бўлиб қайтишибди.

Эртасига Марья Ивановна барвақт уйғонган, кийинган ва секин боққа чиқкан. Ажид тонг, қуёш куз ҳавосидан сарғайган жўка дарахтларининг учларига тушган. Сокин, катта кўл ярқираган. Оққушлар кирғоқларга зеб бериб турган буталар остидан улуғворлик билан сузиб чиқа бошлаган пайт. Марья Ивановна граф Пётр Румянцевнинг¹ ғалабалари шарафига яқинда унга ҳайкал қўйилган гўзал чаманзор ёнидан ўтиб бораётганида, бирданига рўпарасидан инглиз жинсидан бўлган бир оқ ит чиқиб хурибди. Марья Ивановна қўрқиб, тўхтабди. Шу топда аёл кишининг майнин, ёқимли овози эшитилибди: «Қўрқманг, қопмайди». Марья Ивановна қараса: ҳайкалнинг рўпарасидаги ўриндиқда бир аёл ўтирган эмиш. Марья Ивановна бориб ўриндиқнинг бир четига ўтирибди. Аёл Марьяга синчковлик

¹ Пётр Александрович Румянцев (1725–1796) – Екатерина II замонидаги энг машхур саркардалардан бири бўлган.

билан қарабди; Марья Ивановна ҳам бир неча марта кўзининг қирини ташлаб, уни бошдан-оёқ кузатиб чиқибди. У эрталаб кийиладиган оқ кўйлак, нимча, бошига шляпа кийган экан. Ёши қирқларга борган. Бу аёлнинг тўла, қип-қизил юзи улуғворлик ва осойишталик ифода этар, кўк кўзлари ва юмшоқ табассуми тасвирлаб бўлмайдиган даражада гўзал эди. У сўз қотибди.

- Сиз бирон ёқдан келганмисиз?
- Шундай, хоним. Кечагина қишлоқдан келдим.
- Ота-онангиз билан келдингизми?
- Йўқ, ёлғиз келдим.
- Ёлғиз! Жуда ёшсиз-ку?
- Менинг отам ҳам йўқ, онам ҳам.
- Бирон иш билан келгандирсиз-да?
- Иш билан. Подшоҳ хонимга арз қилгани келдим.
- Етим экансиз, адолатсизлик, жабрдан шикоят қиласиз-да?
- Йўқ, хоним. Мен адолат эмас, шафқат сўраб келдим.
- Узр, сиз ким бўласиз?
- Мен капитан Мироновнинг қизи бўламан.
- Капитан Мироновнинг! Оренбург қалъаларидан бирида комендант бўлган Мироновми?
- Шундай, хоним.

Аёлнинг кўнгли юмшаган бўлса керак, нихоятда мулойимлик билан: «Афв этасиз, сизнинг ишингизга аралашсам майлими? Мен саройга кириб тураман. Аризангиз нимадан иборат эканини айтсангиз, балки ёрдам беришга муваффақ бўларман» дебди.

Марья Ивановна ўрнидан туриб, унга қуллук қилибди. Бу номаълум аёлнинг вужуди уни ўзига тортиби ва ишонч уйғотибди. Марья Ивановна букланган қофозни нотаниш ҳимоячисига тутибди, аёл эса ўқибди.

Аёл аввал дикқат ва хайриҳоҳлик билан ўқир экан, бирдан авзойи ўзгарибди. Унинг ҳар бир харакатини кузатиб турган Марья Ивановна кўркиб кетибди.

- Сиз Гринёв ҳақида арз қилмоқчимисиз? – дебди аёл совуққина.
- Подшоҳ хоним унинг гуноҳидан ўта олмайди. У ёлғон шоҳ томонига жоҳиллик, енгилтаклиқдан эмас, ахлоқсиз, ярамас, зарарли киши бўлганидан ўтган.

– Қандай ёлғон! – дебди Марья Ивановна кичкириб.

– Ёлғон? – дебди аёл жаҳли чиқиб.

– Ёлғон, Худо ҳаки ёлғон! – Мен барчасидан хабардорман, сизга ҳаммасини гапириб бераман. Унинг бошига бу кунлар фақат мен туфайли келди. У суд олдида оқланмаган бўлса, фақат мени бу ишларга аралаштиришни истамаганидан оқланмаган. – У ўқувчига маълум бўлган бутун воқеани сўзлаб берган.

Аёл унинг гапларига диққат билан қулоқ солиб, кейин: «Қаерга тушдингиз?» деб сўрабди ва у Анна Власьевнанинг уйига тушганини эшишиб, кулимсираб: «Ҳа, биламан. Хайр, кўришганимизни бирорвга айтманг. Аризангизга жавобни кўп кутмаслигингизга ишонаман» дебди.

Шу сўзларни айтиб, аёл хиёбонга кириб кетибди. Марья Ивановна қувончли умидларга тўлиб, Анна Власьевнанинг олдига қайтибди.

Анна Власьевна ёш қизга куз куни эрталаб сайдига чиқиш зарарли эканини айтиб, Марья Ивановнани койибди. У самовар келтирибди ва чой вақтида энди сарой ҳақидага сўз бошлаган экан, бирдан сарой извоши келиб, эшикнинг олдида тўхтабди ва сарой хизматкори кириб, капитан Мироновнинг қизини подшоҳ хоним чиқараётганини билдирибди.

Анна Власьевна хайратдан донг қотибди. «Ё, Худо! Подшоҳ хоним сизни саройга чақирибди. Сизни қаердан билди экан? Азизам, подшоҳнинг олдиган қандай борасиз? Ҳали, саройда қандай юришни ҳам билмассиз... Мен сиз билан борайми? Ҳар ҳолда сиз бирон ножӯя ҳаракатдан сакларман. Қандай килиб йўл кийимида борасиз? Сарой кийимини олиб келгани доя кампирнинг уйига киши юборайми?» Сарой хизматкори, подшоҳ хоним унинг ёлғиз ва қандай кийимда бўлса, шундай келаверишини талаб қилганини айтибди. Илож бўлмабди: Марья извошга чиқиб, саройга қараб кетибди, Анна Власьевна унинг кетидан дуо қилиб қолибди.

Марья Ивановна тақдири нима бўлишини олдиндан пайқаб, юраги ҳаприқар эди. Бир неча дақиқадан сўнг извош сарой олдида тўхтабди. Марья шошилиб зинадан юкорига кўтарилибди. Эшиклар ҳайратланарли даражада катта экан. У бир неча бўш, аммо ниҳоятда чиройли хоналардан ўтибди, сарой хизматкори уни бошлаб бораркан. Охири бир ёпик эшик олди-да тўхтаб, Марья Ивановнани қолдирибдида, ўзи хабар бергани ичкарига кириб кетибди.

Подшоҳ хонимга рўпара бўлишдан Марья Ивановна шу қадар ваҳимага тушибидики, оёғида базўр турар экан. Бир неча дақиқадан кейин эшик очилиб, у подшоҳ хонимнинг даргоҳига кирибди.

Подшоҳ хоним ўзининг пардоз-андоз столи ёнида ўтирад, бир канча сарой хизматкорлари уни ўраб олиб, Марья Ивановнага хурмат билан йўл беришибди. Подшоҳ хоним унга жуда мулоҳимлик билан мурожаат қилибди. Марья қарасаки: бу ҳалиги, бундан бир неча соат илгари тортиммай бор гапни айтган хоним. Подшоҳ хоним уни ёнига чакирибди ва кулимишиб шундай дебди: «Сизга берган сўзимнинг устидан чиққанимга ва тилагингизни бажо келтирганимга беҳад шодман. Ишингиз битди. Күёвингизнинг гуноҳкор эмаслигига ишондим. Мана бу мактубни бўлажак қайнотангизга элтиб беринг».

Марья Ивановна мактубни титроқ қўли билан олибди ва йиғлаб, подшоҳ хонимнинг оёғига йиқилибди. Подшоҳ хоним уни турғизиб, пешанасидан ўпибди ва сўзлаша кетибди.

«Бой эмассиз, буни биламан, – дебди у. – Аммо мен капитан Мироновнинг қизидан кўп қарздорман. Келажагингиз хақида ташвиш тортманг. Сизни оёққа қўйишини ўз зиммамга оламан».

Подшоҳ хоним бечора етим қизнинг кўнглини олиб, чиқариб юборибди. Марья Ивановна яна ўша сарой извошида қайтиб кетибди. Марьянинг қайтишини интизорлик билан кутиб ўтирган Анна Власьевна уни саволларга кўмиб ташлабди. Марья Ивановна унинг саволларига бир нав жавоб қайтарар экан, Анна Власьевна гарчи унинг овсарлигидан норози бўлса-да, буни қишлоқдан келган кишининг тортинчоқлиги хисоблаб, афв этибди. Шу куннинг ўзида Марья Ивановна Петербургни айланишга ҳам қизиқмай, қишлоққа қайтиб кетибди...


Пётр Андреевич Гринёвнинг ёзган хотираси шу ерда тамом бўлди. Оиласининг айтишига қараганда, у подшоҳнинг маҳсус фармони билан 1774 йилнинг охирларида қамоқдан озод этилган ва Пугачёвнинг ўлдирилиши вақтида ҳозир бўлган. Пугачёв оломон ичидаги уни таниб бош қимирлатибди ва бир оздан кейин қонга бўялган бу бош халойикқа кўрсатилибди. Кўп вақт ўтмай Пётр Андреевич, Марья Ивановнага уйланган. Буларнинг авлоди Симбирск губернасида умргузаронлик қилар экан. ...дан ўттиз чақирим йироқда ўнта помешчикка қарашли бир қишлоқ бор. Шу ердаги уйларнинг бирида Екатеринанинг ўз қўли билан ёзган мактуби шиша рамкада сақланади. Бу мактуб Пётр Андреевичнинг отасига ёзилган мактуб бўлиб, ўғлининг окланиши, капитан

қизи Марья Ивановнанинг ақл ва қалби ҳақидаги мақтovни ўз ичига олади. Пётр Андреевич Гринёвнинг қўлёзмасини бизга унинг набира-ларидан бири келтириб берди. У бобоси тасвирлаган замон ҳақида асар ёзиш билан овора эканимизни билган экан. Биз қариндошларининг руҳсати билан унинг ҳар бир бобига тузукроқ бир эпиграф қўйиб, баъзи исмларни ўзгартириб, алоҳида нашр этишга қарор қилдик.

Noшир



КИЧИК
ДРАМАЛАР





С У В П А Р И С И

ДНЕПР ҚИРГОГИ. ТЕГИРМОН.

ТЕГИРМОНЧИ ва унинг ҚИЗИ

Т е г и р м о н ч и

Шундай, шундай сизлар, навжувон қизлар,
Ҳаммангиз – ҳаммангиз аҳмоқсиз. Ахир,
Модомики, тузук, бадавлат одам
Кўнгил қўяр экан, сиз этагидан
Маҳкам тутинг; қайси йўллар биланми?
Ақл билан, одоб билан албатта,
Баъзан қаттиқ туриб, баъзан эркалаб,
Уни йўлга солмоқ даркор. Ва баъзан
Тўйдан ҳам гап очиб қўймоқлик лозим.
Лекин, энг муҳими – номусингизни,
Бебаҳо гавҳарни сақланг беғубор.
Номус деган нарса – бу бир калима,
Оғиздан чиқдими, қайтиб кирмайди.
Агар тўйга сира умид бўлмаса,
Бирон ўлжа, ёки кариндошларга
Ғанимат иложин қилмоқлик зарур.
Ўйлаш керак: «Мени мангу севиб у,
Эркалатиб юрабермас-ку» асло!
Сиздан ҳам тузукроқ ўй чикармикан?
Йўқ. Дарҳол идрокни йўқотасизу,
Унинг барча истак – хоҳишларини
Текин ижро қилиш сизга гўё баҳт.
Барингиз узун кун севимли дўстнинг
Бўйнига чирмашиб ётмоққа ҳозир.
Лекин, қарабисизки, севимли дўстдан
Асар ҳам қолмабди, оти ўчибди,
Сиз бўлса сўппайиб, ҳеч бир нарсасиз
Қола берибсизлар, эх, эси пастлар!
Сенга юз марталаб айтмаб эдимми:
Қизим, аҳмоқ бўлма, кўзингга қара,

Бой бериб қўймагин яна баҳтингни;
Қўлдан чиқармагин бек йигитни ҳеч;
Ҳалок бўлма яна беҳуда. Мана –
Айтганим келдими?.. Энди ўтиргин
Қайтариб бўлмасин ёдингта олиб
Зардоб ют, қон қусу, йигла ҳамиша.

Кизи

Сен нега, у мени ташлади, дейсан?

Тегирмончи

Нега эмиш! Ахир, у тегирмонга
Ҳафтада неча бор келиб кетарди?
Тўғрими? Бир кун ҳам канда қилмасди,
Ҳатто, икки бор ҳам келарди кунда.
Сўнгра-чи, камнамо, жим бўлиб кетди,
Тўққиз кун кўрмадик. Бунга не дейсан?

Кизи

У жуда банд, ахир озми ташвиши?
Ўзинг биласан у, тегирмончимас.
Унинг ишларини сув бажармайди.
У доимо менга ўз ишларини
Барча ишлардан ҳам оғирроқ, дейди.

Тегирмончи

Ишон унга! Ҳеч қачон бек тоифаси
Ишлармиди, нима ҳам қилар эди?
Ов қилар, доимо ишрат суради,
Қўни-қўшниларни қиласи хафа,
Сиз шўрликни алдаб йўлдан уради,
Ўзи ишлар эмиш; ачинарлик-а!
Ҳали менинг учун сув ишлайдими?..
Менда туни-куни тиним борми, хўш?
Ҳали у ер чирик, бу ер тешилган,

У ер шикаст еган, бу ер сизмоқда,
Қизим, сенга гап бор эди бу ҳақда:
Бекдан тегирмонни тузатиш учун
Озрок пул ололсанг, соз бўлар эди.

Қизи

Ох!

Тегирмончи

Нима бўлди?

Қизи

Бас, жим! От дукуллади...
У келди, у!

Тегирмончи

Қизим, эҳтиёт бўлгин.
Айтганимни эсдан чиқазиб қўйма...

Қизи

Ана келди, ана!

(Князь киради. Жиловдор унинг отини олиб чиқади).

Кн язъ

Салом, азизам!
Омонмисиз, ота!

Тегирмончи

Марҳаматли бек,
Буюргайсан. Кўпдан бери биз сенинг
Нурли кўзларингга интизор эдик.
Энди сени меҳмон қиласай хурматли!
(Кетади)

Қиз

Ох, ниҳоят мени эсга олибсан!
Шунчалар йўлинга интизор этиб
Эзиб, қийнашликка уялмадингми?
Нималар келмади менинг бошимга?
Не-не ваҳималар босмади мени?
Балки, оти уни ботқоққа, ёки
Учуримга отиб, ташлаб кетгандир,
Балки, айиқ енгган қалин ўрмонда,
Балки, у хастадир, тўшақда, балки,
Мени севганидан тамом пушаймон...
Бутун нарса кириб чиқди бошимга.
Ахир кўрдим. Шукур! Сен соғ ва омон;
Мени аввалгича севасан. Жоним,
Шундай эмасми?

Князъ

Шундай, фариштам, шундай,
Йўқ, ундан ортиқроқ...

Қиз

Бироқ кўп ғамгин
Кўринасан, нега?

Князъ

Мен ғамгинманми?
Шундай туюлгандир сенга, эҳтимол,
Сени кўрарканман доим шодман.

Қиз

Йўқ.
Шод экан чоғингда узоқдан менга
Учиб келиб, дарҳол: дилбарим қайда,
Не этар? – дер эдинг ва талпинардинг.

Сўнг ўпар; кайфинг не? Мени шу қадар
 Эрта кутганмидинг? – дея сўроқлар;
 Энди бўлса, маъюс, тинглайсан жимжит,
 Қучмайсан, ўпмайсан ҳам кўзларимдан?
 Хушинг жойидамас, не бўлди сенга?
 Ёки мендан араз қилиб қолдингми?

К н я з ь

Риёкорлик қилиб турмоқ беҳуда;
 Рост гапирдинг, қайгу ётар дилимда:
 Сен уни эркалаш, севишлар билан
 Тарқатолмас, енгил эта олмассан,
 Сен бўла олмассан ҳатто қайғудош.

Қ и з

Бўла олмаслик сенинг қайғуинга йўлдош
 Оғир менга, оғир, асрорингни оч!
 Амр этсанг – йигларман, рози бўлмасанг
 Сени койитмасман кўздан тўкиб ёш.

К н я з ь

Нега гапни чўзмак? Ахир бу савдо
 Қанчалик тез битса, шунча яхши-ку:
 Азиз дўстим, фоний дунёда сира
 Мустаҳкам ва пухта ҳеч нима йўқдир,
 На аслзодалик, на ҳусн, на давлат;
 Ҳеч ким балони барҳам беролмас.
 Шундаймасми, мана биз ҳам, азизим!
 Биз баҳтиёр эдик, айниқса мен-чи;
 Сенинг севгинг билан баҳтиёр эдим;
 Бошимга ҳар қандай савдо тушса ҳам,
 Ҳар жойда бўлсан ҳам, қимматли дўстим,
 Асло чиқармасман сени эсимдан.
 Башарти бир нарса йўқотсан, унинг
 Ўрнини дунёда ҳеч нарса босмас.

Қиз

Нима деганингни англаганим йўқ,
Ва лекин, бир қўрқув босмоқда ёмон.
Тақдирда хатарнок бало бор чоги;
Эҳтимол, кутади айрилиқ.

Князъ

Топдинг.
Тақдирда айрилиқ ёзилган экан.

Қиз

Ким ажратар экан? Нима, мен сенинг
Изингдан боришига ожизмиканман?
Худди ўғил бола янглиғ кийиниб,
Орқангдан кетарман ва доим сенга
Хизматда бўларман сафарда, жангда;
Урушдан қўрқмайман. – Сени кўрсам, бас.
Йўқ, йўқ ишонмайман! Эҳтимол, мени
Синамоқчиидирсан ва ёки бирор
Бехуда бир ҳазил маъкул тушгандир.

Князъ

Йўқ, бу кун дилимга ҳазил сиғмайди.
Сени синашга ҳам йўқ эҳтиёжим;
Узоқ сафарни ҳам кўзлаганим йўқ;
Урушга ҳам эмас, уйда қоламан.
Лекин видолашмоқ керак мангулик.

Қиз

Тўхта, тўхта тўлиқ англадим энди...
Уйланавтиран.
(Князъ жсим)
Уйланмоқчисан!

К н я з ь

Нима ҳам чора бор? Ўзинг ўйлаб кўр,
Беклар қизлар каби эркин эмаслар?
Улар уйланмаслар севиб юракдан!
Ўзга риояси ва бировларнинг
Фойдасини кўзлаб ёр оладилар.
Қайғунгни тарқатар тангри ва замон;
Мени унутмагин, бу рўмолни ол,
Ўзим ўраб кўяй, кел бери, жоним!
Мана бу марварид ҳам сенга эди.
Бу ҳадя отангга. Унга бер.
(Олтин солинган ҳамённи қизга беради)
Хайр.

Қ и з

Тўхта, тўхта; сенга гапим бор эди,
Ҳах нима эди?

К н я з ь
Эсла.

Қ и з

Мен тамом
Сен учун тайёр... Йўқ, у эмас... Тўхта –
Мумкин эмас ахир, ҳамишаликка
Мени ташласанг... Ҳамон у эмас...
Ҳа... Бундай ҳа, менинг қалбим тагида
Букун сенинг боланг қимиirlаб қолди.

К н я з ь

Бечора! Не этмоқ керак, не чора?
Ақалли гўдак-чун ўзингни асра.
Болангни, ҳам сени ташламасман ҳеч.
Сизларни кўргали, эхтимол, ўзим
Келиб ҳам турарман. Ўртанма, юпан,

Энг сўнгги мартаба қучоқлайин, кел!
(Кета туриб)
Уҳ! Битди – кўнглим тинолгандай бўлди.
Мен бўронни кутган эдим, лекин иш
Жуда силлиқ, жуда енгил тугади.
(Кетади. Қиз қотиб қолади)

Тегирмончи

Қани тегирмонга кирсалармикан...
У, қайда у? Қизим, бек қани? Сўйла!
Бай, бай! Мунча гўзал экан бу рўмол!
Марваридни қара! Бари асл тош!
Кўзингни олади, яркирайди-я!
Шоҳона бир ҳадя, бек саховаткор!
Бу, нима бу? Ҳамён! Пул эмасмикан?
Нега сен индамай, тек туриб қолдинг?
Тилинг боғландими? Тўсатдан келган
Кутилмаган баҳтдан эсинг оғдими?
Ёки гаранг бўлиб қотиб қолдингми?

Қиз

Асло ишонмайман, бу мумкин эмас,
Мен уни шунчалик қаттиқ севардим.
У, ёки ҳайвонми? Ва ёки унинг
Кўнгли қора?

Тегирмончи

Кимни айттаётисан?

Қиз

Ота, айт-чи, уни мен хафа қилиб,
Бездирib қўйдимми? Ёки чиройим
Бир хафтада шунча хазон бўлдими?
Совутдилармикан? Йўлдан оздими?

Тегирмончи

Қизим, сенга нима бўлди? Сўйла тез!

Қизи

Отажон, ҳов ана! – у, жўнаб кетди
Ва мен овсар уни қўйиб юбордим.
Нега этагидан маҳкам тутмадим?
Нега осилмадим от юганига!
Кошки-ди, шу ернинг ўзида мени
Топтаса отининг туёкларида.

Тегирмончи

Алаҳлаётурсан!

Қизи

Қаранг-а, ота,
Беклар қизлар каби эркин эмасмиш.
Ва улар ҳеч қачон севиб юрақдан
Уйланмас эмишлар...
Ҳа, шундай эмиш.
Лекин сени элтиб ўз саройимга
Сирли ҳарамимга олиб киравман,
Бахмал, кимхобларга чирмаб ташларман
Дея, хийла-найранг билан алдашда, –
Ҳатто қасам ичиб, қўнгил овлашда –
Улар жуда эркин, доимо эркин;
Сизгириб худди тун ярмида шўрли
Қизларни турғизиш ва тонгга қадар
Тегирмон кетида ўтқизмоқ учун
Улар эркин. Бизнинг шўримиз билан
Беклар ўз кўнглини доим юпатиб,
Завқланишни жуда яхши кўради.
Сўнгра, хайр, азизим, сенга катта йўл;
Истаганингни сев.

Тегирмончи

Гап бундай дегин!?

Қизи

Айт-чи, ота, менинг қундошим кимdir?
Топмайин қўймасман, у, бадкирдорни
Ва унинг юзига шартта айтарман:
Княздан узоқлаш, – билмайсанмики,
Икки она бўри бир ғорга сифмас.

Тегирмончи

Тентак! Қайлиқ олар эса бекзода
Ким унга тўсқинлик қила оларди?
Сенга айтмовдимми, ана...

Қизи

У худди
Яхши бир одамдай хайрлашолди;
Ҳадялар ҳам берди – яна қандайин!..
Пул берди. У товоң тўламоқ бўлди!
Миш-миш чиқмасин учун шаънида
Ва ёш хотинига етмасин учун,
У, менинг тилимни ёғламоқ бўлди.
Ҳали, нима эди; унутибман, – ха,
Яхши қараганинг учун сен унга,
Қизингни у билан бирга қўйганинг,
Қизни этмаганинг учун эҳтиёт...
Мана бу ҳамённи сенга деб берди.
Менинг ҳалокатим сенга қўл келди.
(Ҳамённи унга беради)

Тегирмончи (қўзида ёши)

Бошимга қандайин балолар тушди.
Нималар эшитдим! Гуноҳ эмасми,
Аччиқ таъналарни отмоқ отангга!

Сен менинг бирдан-бир ёлғизим эдинг,
Кекса ҳаётимнинг танҳо юпанчи,
Қандай қилиб сени эрка этмайин?..
Ёмон ўтаганим учун оталик –
Бурчин, худо ўзи берди жазони.

Қизи

Нафасим бўғилди! Ох, шўрлик бошим!
Бўйнимдан бўғади совуқ бир илон...
Инжу эмас, илон билан у чирмаб
Кетди.
(*Марваридни узади*)

Тегирмончи

Эсингни йиг.

Қизи

Мен шундай қилиб,
Лаънати эй илон, сен эй кундошни
Парча-парча қилиб ташлар эдимки...

Тегирмончи

Алаҳлаётиран, менинг жон қизим!

Қизи (*Рўмолини ечади*)

Мана менинг бадбаҳт тожим, ифлос тож!
Бутун ардоқлаган, эҳтиётимдан,
Бутун номусимдан кечган вақтимда,
Маккор ёв шу билан қўшганди бизни.
Биз айрилдик – энди чириб кет сен ҳам.
(*Рўмолини Днепрга ташлайди*)
Энди ҳамма битди...
(*Ўзини дарёга ташлайди*)

Чол (*йиғлар экан*)

Шўрлик толи, ох!

КНЯЗЬ САРОЙИ

Түй. Қалық-куёв стол атрофида ўтирадилар.

МЕҲМОНЛАР. ҚИЗЛАР ХОРИ.

С о в ч и

Ҳай-ҳай, жуда ажаб бир тўй қилдик-да.
Салом эй бек, энди қайлиқ муборак!
Худо, сизга иноқ, соз турмуш берсин,
Бизга сизнинг соянгизда айш-сафо.
Гўзал қизлар, нега жимиб қолдингиз?
Товушингиз нега тинди оқкушлар?
Ё қўшиқлар одош бўлиб қолдими?
Ё қўшиқдан қуридими ҳалқумлар?

Х о р

Совчи гапни пайқаб ол,
Эй совчи, анқов совчи!
Қайлиққа борар эдик,
Полизга кириб қолдик,
Бочка пиво тўкилди.
Карамлар ҳам хўл бўлди.
Четанларга қоқиндик,
Устунларга топиндик.
Устунча – устунча,
Тез бўл, ўтмасин фурсат,
Қайлиққа йўлни қўрсат.
Совчи, совчи, ҳой совчи,
Ҳамёнчага қўлни сол,
Пул шиддираబ туради,
Қизлар кўнглик олади.

С о в ч и

Кўшиқни хўп топдинглар, мазоқчилар!
Мана, олинглар, совчини қарғаманглар.
(Қизларга пул беради)

Б и р т о в у ш

Майда тош ва сариқ қумлар устидан
Чопиб ўтди равон ва шошқин дарё,
Икки балиқ ўйнар шошқин дарёда
Икки балиқ, кичик иккита човоқ.
Эшийтдингми, балиқ – сингил сен букун
Дарёмизда ажаб бир иш бўлганмиш?
Оқшом гўзал бир қиз дарёга ўзин
Ташлаб, севганини қарғишлаганмиш.

С о в ч и

Ойим қизлар қандай қўшиқ бўлди бу?
У тўйда айтилмас эди шекиллик?
Уни ким бошлади, ким?

Қ и з л а р

Йўқ, мен эмас...
Мен эмас... Биз эмас... Биз бошламадик...

С о в ч и

Ахир уни айтган ким?
(*Кизлар орасида саросималик пичир-пичир гап*)

К н я з ь

Мен биламан.
(*Ўрнидан туради. Жиловдорга секин гапиради*)
У яширин бунда кириб олибди.
Дарҳол уни чикар; киргизган одам
Ким экан; билиб ол!
(*Жиловдор қизлар олдига келади.*)

К н я з ь (*ўтиради. Ўз-ўзиға*)

Ўшанинг ўзи,
Шов-шув кўтариши аниқ бу ерда,
Уятга кўмилиб, шарманда бўлиб,
Қочишга жой бўлмас менга.

Ж и л о в д о р

Топмадим.

К н я з ь

Ахтар. Мен биламан... Шунда... Қўшиқни
Ўша айтди.

М е ҳ м о н

Ҳай-ҳай хўп асал бўпти!
Тилингни кесади, фақат аччиқроқ
Ширинроқ қилганда яхши бўларди.
(Киз-куёв ўтишиадилар. Заиф бир фарёд эшиштилади)

К н я з ь

Ўша! Ана унинг рашкли товуши.
(Жиловдорга)
Хўш?
Жиловдор
Уни ҳеч ердан топмадим.

К н я з ь

Аҳмоқ!

Тўй боши *(ўрнидан туриб)*
Фурсат бўлмадими, бегим хонимни
Куёвга топшириб, қовушганларининг
Бошлирига хмел сочсак, не дейсиз?
(Барча ўринларидан қўзгалди)

С о в ч и х о т и н

Албатта, албатта, хўроз тортилсин!
*(Келин-куёвга пиширилган хўроз тортилади ва
бошлиридан хмел сочиб, сўнг ётотқонага олиб кирадилар)*

Совчи хотин

Бегим хоним, сира қўрқма, йиғлама,
Мўмин-қобил бўлгин.

(*Келин-куёв ётoққa кетадилар. Совчи хотин
ва тўйбошидан бошқa меҳмонлар тарқашади*)

Тўй боши

Қадаҳ қайда? Мен
Дарча орқасида бутун тун бўйи
Югуриб чиқаман. Ичганим тузук!

Совчи хотин

(*Унга май қўйиб беради*)
Кўтар омонликка, ол;

Тўй боши

Уҳ! Ташаккур.
Ҳамма нарса омон-саранжом топди
Тўй ҳам яхши ўтди, шундайми?

Совчи хотин

Шукр.
Ҳаммаси соз, фақат бир гап кўнгилни
Жуда хижил қилиб қўйди.

Тўй боши

Нима у?

Совчи хотин

Худойим билади, алланима бало,
Тўйда айтмайдиган қўшиқ айтилди.

Тўй боши

Бу қизлар бор ерда бир гап чикмасдан
Сира мумкин эмас! Ахир бегимиз –

Тўйини булғатиш осон ишмикан?
Хўш, энди бўлмаса, мен хам жўнайин
Хайр энди, кудача.
(Ketadi)

С о в ч и х о т и н

Дил нотинч! Тўйни
Бехосият қунда қилдик шекилли.

КНЯЗЬ ХОТИНИНИНГ ХОНАСИ

БЕКАЧ ва ОҚСОЧ ХОТИН

Бекач

Табл чалдилар, жим! Йўқ, у келмаяпти.
Онажон, у яхши қуёв эди, оҳ!
Олдимдан бир қадам нари кетмасди,
Кўзини кўзимдан олмасди асло,
Уйланди-ю иш ҳам айниди тамом.
Ҳозир мени сахар чоги уйғотиб,
Отни эгалла деб буйруқ қиласди;
Худо билсин, қайда кезар то кеч тун?
Қайтади-ю, жиндак ширин сўз айтиб,
Эркалайди, силаб юзимни, гўё
Овутган бўлади; шугина, холос.

Оқсоч

Хоним бекам, эркак деган бир хўрозд:
Қўку-қўку! Ёзди қанот ва парвоз.
Хотин бўлса, худди-худди курк товук:
Тухум бос-да, ўтири, ўтири жўжа оч.
Куёв экан зерикмайди сенла ўтириб,
Ичмайди, емайди қараб тўймайди;
Уйландими – ташвиш – иш кўпаяди;
Ҳали, қўшнисига кириб чиқмоқчи,
Ҳали лочин билан овга кетмоқчи,
Қарабсан, урушга жўнаб қолмоқчи,
Ишқилиб у сира уйда турмайди.

Бекач

Ё бирор маъшука топдими экан?
Не дейсан?

Оқсоч

Гапирма, ботма гуноҳга;
У кимни сендан афзал кўраркан?
Сенинг қўлинг билан: сендаги чироқ,

Одоб, ақл. Ўзинг, ахир, ўйлаб кўр;
У сендай гавҳарни тополармиди?

Бекач

Тангри эшитганда тоатларимни
Бола ато қилар эди ва унда
Қайтадан иситиб олардим уни.
О! Ҳовли овчилар билан тўлипти,
Эрим уйга қайтди. Кўринмайди-ку?
(Овчи киради)
Бекқани, қаёқда?

Овчи

Бек-ми, бизларни
Қайтишга буюрди.

Бекач

Ўзи қаерда?

Овчи

Днепр бўйида ўрмонда қолди.

Бекач

Сиз ҳам якка, танҳо қолдириб уни
Келавердингизми? Ҳай, эсиз, эсиз?
Сиздай хизматчига қолган кунга ҳайф!
Дарҳол кетга қайтинг, югуринг дарҳол.
Бизни сизга хоним юборди денглар.
(Овчи кетади)
Эй, тангрим! Ўрмонда, кора кечада,
Ёввойи ҳайвон ҳам ёвуз инсон ҳам,
Жину-алвастилар санқиб юради;
Яна бирон бало бўлмаса эди.
Тез, бут олдига шам ёқиб кўйгин, тез!

Оқсоқ

Хозир, хозир, чироғим, хозир...

ДНЕПР. ТУН

Сув парилари

Ўйнаб, кулиб яшаймиз,
Дарё ости бизга жой;
Тунда сузиб чиқамиз,
Иситади бизни ой!

Дарё остини тунда
Севамиз тарк этишни,
Очиқ бош билан бунда
Сув кўксини кесишни.

Бир-бировни чакириб,
Жаранглатсак ҳавони,
Кўк ва нам соchlар қуриб,
Силкинса кирса жони.

Бир

Тис! Бutoқлар тагида
Пусунмоқда бир қора:

Бошқа бир

Ерда юради биров,
Ой билан бизлар ора.
(Яширинишиади)

Кязъ

Қайғулар қуршаган ошино ерлар!
Буларнинг ҳаммаси менга танишдир;
Мана ўша эски таниш тегирмон!
Ишдан чиқиб тамом бўлибди вайрон;
Парракларда энди шовқин тинипти.
Тоши ҳам айланмай тўхтаб қолипти.
Эҳтимол, бечора чол ҳам ўлгандир.
Ёлғиз сўқмоқ йўл бор эди, битипти,
Энди ҳеч ким ортиқ бу ерга келмас.

Наҳотки, манови қалин чакалак
Үша четан қўра – кичик боғ экан?
Мана у мукаддас эман оғочи,
У ана шу ерда мени қучоқлаб
Бошларини эгиг жим қолган эди.
Мумкинмидир?..

(Дарахтларга яқин келади, хазон тўқилади)
Нима ҳол бу? Япроқлар
Бирдан хазон бўлиб менинг бошимга
Кул каби соврилди ва эман эса,
Лаънат дараҳтидай ялангоч, қора,
Туриб қолди менинг қаршимда..

(Чол киради. Жулдор кийимда, ярим ялангоч)

Ч о л

Салом.
Салом, куёв!

К н я з ь

Кимсан?

Ч о л

Шу ерлик кузғун.

К н я з ь

Мумкинми? Бу ахир тегирмончи-ку.

Ч о л

Нимам тегирмончи? Аллақачонлар,
Тегирмонни ўтрок жинларга сотдим
Ва пулларни асраш учун сихрли
У пари қизимга топшириб қўйдим.
У пуллар дарёнинг қумликларига
Кўмилиб қўйилган, шунда ётади,
Ва уни биркўзлик балиқ асрайди.

К н я з ь

Ақлдан озипти бечора. Ўйи –
Бўрон сўнгидаги булутдай тарқоқ.

Ч о л

Ўтган оқшом нега бизга келмадинг?
Базмимиз бор эди, кўп кутдик сени.

К н я з ь

Мени ким кутди?

Ч о л

Ким? Шубҳасиз қизим!
Мен барча нарсага лоқайд қарайман.
Қизим туни билан, аzonга қадар
Сен билан ўтириб қолса ҳам, унга
Эрк бергум, ҳеч қачон ҳеч сўз демайман.

К н я з ь

Шўрлик тегирмончи.

Ч о л

Нимам тегирмончи менинг! Мен қузғун,
Ахир, тегирмончи эмас, дедим-ку!
Ажойиб ҳодиса: (эсингда борми?)
Ўзини дарёга ташлаганда у,
Мен изма-из чопиб бордим, чўққидан
Сакрап бўлганимда, ноҳас, қўлтиғим
Остидан ёзилиб икки зўр қанот
Ушлаб қолди мени ҳавода. Шундан
Бери ҳали унда ва ҳали бунда
Учаман. Ва ҳаром ўлган молларни
Чўқийман ва баъзан мозорга қўниб
Тинмай қагирлайман.

К н я з ь

Нақадар аянч!
Ким қўриқлар сени?

Ч о л

Мени қўримоқ
Ёмон бўлмас; қариб қолдим ҳам тентак,
Мени қўриқлайди, шукур, бир қизча –
Сув қизи.

К н я з ь

Ким дединг?

Ч о л

Менинг набирам!

К н я з ь

Унинг сўзин англаш ҳеч мумкин эмас.
Чол, бунда сен очдан ўлиб кетарсан,
Ё ўрмонда бирор ҳайвон ем қилар,
Саройимга олиб кетай, қани, юр?
Мен билан яшарсан. Хўш нима дединг?

Ч о л

Сенинг саройингга? Бормайман! Раҳмат!
Тузоққа соларсан ва балки сўнгра
Марваридлар билан бўғарсан тагин.
Бу ерда мен ҳаёт, эркинман ва тўқ.
Сенинг саройингни истамайман, қўй!
(Ketadi)

К н я з ь

Бунинг ҳам гунохи менинг бўйнимда!
Ақлдан ажralиш нақадар мудҳиш!
Бундан ўлган яхши; ўликларни биз
Доим хурматлаймиз, дуо қиламиз
У билан ҳар кимни ўлим тенглайди.

Лекин эсдан озган ҳар қандай киши
Одамликдан чиқиб қолади, шаксиз.
Тилнинг берилгани унга беҳуда,
Не деганин билмас ва ҳайвон уни
Ўзига оғайни дея танийди;
У ҳаммага мазах, ҳаммага эрмак,
Бунинг чун тангри ҳам жазо бермайди.
Бояқиш чол! Унинг қизғонч чехраси
Пушаймон ўтига ташлади мени.

О в ч и

Ана у, ниҳоят тополдик уни!

К н я з ь

Хўш, ўзи нима гап?

О в ч и

Бекач юборди.
У сендан хавотир.

К н я з ь

Мехрибонлигин
Ҳазм қилолмайман! Мен гўдакмидим,
Асло мураббийсиз жила олмасам?
(Кетади. Дарё юзида сув парилари пайдо бўлди)

С у в п а р и л а р и

Хой, сингиллар, уларни
Қувалаб етсакмикан?
Шовқинлаб отларини
Боплаб хуркитсакмикан?

Кеч. Тўқайлар қорайди;
Совинди дарё таги.
Хўрозлар қичқиришди,
Ой ҳам инига инди.

Б и р и

Бир оз турайлиқ, опа.

Б о ш қ а б и р и

Йўқ; бўлди, бас, бас.
Хонбека бўлар хафа,
Мунтазир, омон бермас.
(Яширинадилар)

ДНЕПР ОСТИ

СУВ ПАРИЛАРИНИНГ САРОЙИ

Сув парилари маликалари олдида йигилишиб ўтирадилар.

Бош пари

Урчуқни ташланглар энди, сингиллар.
Қуёш ботди, ой ярқирар самода.
Сув юзига ўйнагали чиқинглар.
Ҳеч кимсага букун озор берманглар:
Йўловчини асло ўчактирмангиз,
Ўт, лой билан сув лойқатиб сиз яна
Балиқчилар тўрин оғир этмангиз.
Балиқлардан эртак айтиб сув сари
Болаларни асло бошлай кўрмангиз...

(Кичкина сув париси киради)
Қайда эдинг?

Қизи

Чикиб эдим кирғокка,
Бобомнинг олдига. У қачонлардир
Дарёга, биз томон сочиб юборган
Пулни йифиб бер деб, ҳамон қистайди.
Жуда кўп ахтардим; аммо пул нима –
Ўзим ҳам билмайман ва лекин унга
Дарёнинг тагидан бир ҳовуч асл
Чиганоқ тошлардан чиқариб бердим.
У жуда шод бўлди.

Сув париси

Телба қурумсок!
Сенга суннаман энди, жон қизим,
Бу кун қирғоқларга бирор келади,
Кутиб тур, қаршила; қизим пешваз бўл.
У бизга яқиндир. У одам сенинг
Отанг, қизим.

Қизи

Билдим, хов сендан кечиб
Ўзга хотин билан кетганми?

Сув париси

Ўша. Уни маҳкам кучиб эркала.
Туғилганинг ҳақда мендан билганинг,
Эшитганларингни ҳаммасини айт;
Меним тўғримда ҳам унга сўзлаб бер.
Онанг унутганми, дея сўраса,
Айт: ҳамон ёдимда, ҳамон севаман.
Ҳамон кўз тутаман, қизим, уқдингми?

Қизи

Ох, уқдим.

Сув париси

Бор, жўна.

(Ёлғиз)

Мен хушдан кетиб
ТАҲқирланган, маъюс ҳолда ўзимни
Днепрга ташлаб, сувнинг остида
Кудратли, совуқ қон, сув қизи бўлиб
Кўз очдим ва шундан бери доимо
Интиқом йўлини ўйлайман, букун
Интиқом соати етган ўхшайди.

ҚИРГОҚ

Кназъ

Мени баҳтиёр ғойиб бир қудрат
Ҳазин қирғоқларга ҳадеб тортади.
Мозийни эслатар бу манзаралар:
Эркин ёшлигимнинг севимли, лекин

Аччик қиссасини хотирга солар.
Бир замонлар қайнок, озод мухаббат
Қаршимга чикарди шу ерда пешвоз;
Бахтли эдим. Мен тентак! Шу қадар осон
Ўзимнинг бахтимдан ўзим кеңдим воз.
Кечаги учрашув менинг кўнглимда
Фамгин орзуларни кўзгатиб қўйди.
У нақадар мудҳиш! Бечора падар!
Агар букун уни учратсан бунда,
Ўрмонни бутунлай ташлаб кетишига
Унатиб қарапман, у, балки, кўнар,
Бизниги кўчар...

*(Кичик сув қизи қирғоқча чиқади)
Тушимми, ўнгим?!
Қайдан пайдо бўлдинг, севимли фарзанд?*

ҚИЗҒАНЧИҚ РИЦАРЬ

I САХНА

Равоқда

АЛЬБЕР ва ИВАН

А л ь б е р

Ҳар қандай бўлса ҳам, мен бу турнирга
Албатта бораман. Шлемни кўрсат.

(Иван унга шлемни узатади)

Йўқ, найза тешипти, кийиб бўлмайди,
Энди янгисини топишим керак.
Қандай зарб! Лаънати бу граф Делорж!

И в а н

Сизнинг ҳам зарбингиз чакки бўлмади,
Ажаб учиб тушди узангисидан,
Ўликдай ётганмиш ўшандан бери.
Ҳали хушин йиққан бўлиши маҳол.

А л ь б е р

Ҳар қалай, менчалик зиён кўрмади.
Унинг Венеция қалқони бутун,
Кўкраги янчилса ғам емас, чунки,
Пулга сотилмайди кўкрак дегани.
Нега шлемини ечиб олмадим!
Ечиб олар эдим, бироз уялдим,
Герцог, хонимлардан қилдим андиша.
Устибошим йиртмай, найзаси билан,
Бошим ёрмайдими, лаънати граф!
Сўнгти бор рийарлар герйог уйида
Ипак, баҳмал либос кийиб ўтириди.

Орада ёлгиз мен уст-боши ямок.
 Қўққисдан келувдим, дея важ қилдим,
 Бугун нима дейман? Оҳ, бу қашшоқлик!
 Инсонни бунча ҳам хўрлайди экан!
 Оғир найза билан Делорж ўша кун
 Шлемимни тешиб, чап бериб ўтди.
 Шунда Амиримга тортиб бир қамчи
 Бўрон каби елиб қувдим ортидан.
 Етиб, эгаридан узиб, ўша дам –
 Йигирма қадамга отиб ташладим.
 Хонимлар жойидан тик турди бирдан.
 Клотильданинг ўзи юзин бекитиб,
 Беихтиёр додлаб юборди шунда.
 Герольдлар мадҳ этди менинг зарбимни
 Қайдан бу жасурлик ва ажойиб куч –
 Ҳеч ким боисини ўйлаб кўрмади!
 Қалқон пачақлангач, қайнади коним:
 Мардлигим сабаби надир? – Бахиллик.
 Шундай! Яқин юрсанг менинг отамга
 Хасислик мараздай юқиши мумкин.
 От жонивор қалай?

И в а н

От оқсаяпти.
 Ҳали унга эгар уриб бўлмайди.

А л ь б е р

Илож йўқ. Оламан ўша тўрикни,
 Арzon сўраётир от эгаси ҳам.

И в а н

Арzonку-я, аммо пулимиз йўқ-да.

А л ь б е р

Бекорчи Сулаймон нима деяпти?

И в а н

Бундан сўнг гаровсиз қарз бермас эмиш.

А л ь б е р

Гаров! Қайдан олай уни. Алвасти!

И в а н

Мен ҳам шундай дедим.

А л ь б е р

Хўш, нима деди?

И в а н

Фақат йўталади, елка қисади.

А л ь б е р

Отаси жуҳуддай бой демайсанми,
Айтмайсанми, қачон бўлмасин бир кун
Бу бойликлар менга мерос қолади.

И в а н

Айтдим.

А л ь б е р

Хўш?

И в а н

Йўталиб, елка қисади.

А л ь б е р

Энди нима қилдим?!

И в а н

Үзи келмоқчи.

А л ь б е р

Шундай де, хайрият. Энди келса ҳам
Пул олмай чиқариб бўпман уни.

(Эшик тақиллайди)

Ким?

Жуҳуд

Камина қулингиз.

А л ь б е р

Бормисан, ошнам!
Мухтарам Сулаймон, лаънати жуҳуд,
Сен қарзга ишонмай қўйган эмишсан?

Жуҳуд

Марҳаматли рицар, қасам ичайки:
Жон деб берар эдим... пулим бўлгандা.
Нукул рицарларга қараша бериб,
Хонумоним куйиб кетди: Илож йўқ.
Қарзни тўлашмайди. Мана ўзингиз,
Ярмини бўлса ҳам беролмайсизми...

А л ь б е р

Қароқчи! Ёнимда пул бўлса, сен-ла
Ўлтиарми эдим пачакилашиб!
Бас, ўжарлик қилма, азиз Соломон,
Червонларни чиқар. Юзтасини чўз!
Қани, ўзинг чиқар.

Жуҳуд

Юзтасини? А?
Шундай юрармидим юз червон бўлса?

А л ь б е р

Дўстга қарашмаслик – уят эмасми?

Ж у ҳ у д

Онт ичаман...

А л ь б е р

Бас, бас! Гапни қўп чўзма!
Гаровига бирор мол берсин, дебсан?
Чўчқа терисини берайми сенга?
Гаровга арзирлик молим бўлганда,
Сотиб емасмидим! Айт-чи, итвачча,
Рицарлик лафзининг қадри шунчами?

Ж у ҳ у д

Токи барҳаётсиз – лафзингиз қиммат.
Фламанд бойларининг сандиқларини
Сихрли калиддай очар сўзингиз.
Аммо ҳозир ўша пок лафзингизни
Мен қашшоқ жуҳудга агар берсангиз,
Худди шу орада (худо кўрсатмасин),
Агар ўлиб-нетиб қолсангиз бирдан,
Лафзингиз денгизга ботган кутининг
Калиддай қолар қўлимда нафсиз.

А л ь б е р

Наҳот отам мендан узоқ яшаса?

Ж у ҳ у д

Қайдам, тақдиримиз тангри қўлида;
Бугун – бордир йигит, эртасига – йўқ.
Қарайсизки, уни тўрт муккайган чол
Елкасига қўйиб элтар қабрига.
Барон ҳали тетик, бемалол ўн йил,
Худо ярлақаса – йигирма, ўттиз...

А л ь б е р

Ёлғон айтма, жуҳуд: ўттиз йилдан сўнг
Ўзим ҳам элликка кираман, ахир,
У вакт пул деганинг менга не хожат?

Жуҳуд

Пул? Пул деганинг, ҳар вакт, ёшми-кексами,
Ҳар қайда, ҳар жойда ҳаммага зарур.
Аммо ёшлар уни қул қилмоқ истар,
Аямай, у ёнга – бу ёнга отар.
Чол пулни ишончли дўст деб билади,
Кўзин қорасидай асрайди ҳар вакт:

А л ь б е р

Ох, менинг отамми! Пулни қул эмас,
Ҳатто дўст ҳам эмас, Тангри деб билар.
Олтинга сигинар, араб қулидай,
Занжирдаги итдай хизматин қилар.
Қалтираб ўлтирас совуқ ўрада,
Қоқ нонни кемириб, ичар совуқ сув,
Тун мизгимай, итдек, олтинни пойлар,
Олтин-чи, сандиқда ётар бемалол,
Майли, ётаберсин, жим тур! Бир маҳал
Барibir тушади менинг қўлимга.

Жуҳуд

Ха, шундай. Баронни дафн қилганда
Кўз ёшидан кўпроқ тўкилар олтин.
Мерос ато қилсин, ё раббим, тезрок.

А л ь б е р

Омин!

Жуҳуд

Балки бошқа бир йўл...

А л ь б е р

Нима?

Ж у ҳ у д

Йўқ, шундай.

Бошқа бир иложи бормикин девдим...

А л ь б е р

Қандай илож экан?

Ж у ҳ у д

Айтмоқчиманки,

Бир, яхудий чол бор, менга танишроқ.

Доривор сотади, ўзи камбағал...

А л ь б е р

Судхўрдир. Сендайми ё инсофлироқ?

Ж у ҳ у д

Йўқ, рицар, Товийнинг савдоси бошқа.

Бир хил дориси бор... Чиндан ажойиб,

Таъсири тез, ўткир.

А л ь б е р

Хўш, менга нима?

Ж у ҳ у д

Бир пиёла сувга... Уч томчиси бас.

На ранги билинмас ва на мазаси.

Одамнинг қўнгли ҳеч бехузур бўлмай,

Тутқаноқсиз, аста ўла қолади.

А л ь б е р

Захар сотадими?

Жуҳуд

Ҳа. Захри ҳам бор.

Альбер

Демак, пул ўрнига қарз бермоқчисан –
Ўн сўм ҳисобидан юз шиша заҳар?
Шундайми?

Жуҳуд

Сиз нуқул эрмак қиласиз,
Аммо мен... Сизга бир яхшилик... Балки,
Ахир энди барон ўлса бўлади.

Альбер

Нима? Падарқушлик? Сен нима дединг...
Қандай журъат қилдинг? Иван! Тут буни!..
Сен ялмагуз, илон, билиб қўй, ҳозир –
Дарвозага осиб ўлдирман-а!

Жуҳуд

Узр! Кечирасиз: ҳазиллашувдим.

Альбер

Иван, арқон келтири.

Жуҳуд

Мен... Ҳазил, ҳазил:
Пул келтирган эдим.

Альбер

Йўқол, итвачча!

(Жуҳуд кетади)

Ўз отамнинг бундай хасислик феъли
Бошимни неларга қилмади дучор!
Жуҳуднинг ботинган сўзин қара-я,
Бир пиёла май бер. Қалтироқ босди...
Ҳайтовур, пул менга барибир керак.
Орқасидан югур, лаънати жуҳуд –
Червонларини ол. Айтгандай, аввал
Сиёҳдонни келтир, тилхат ёзайнин.
Маккорни бу ерга киргиза кўрма.
Дарвоҷе, тўхта-чи, унинг пулидан
Қадим аждодининг тангаларидай
Захар ҳиди келар...

Май деган эдим.

И в а н

Майдан бир томчи ҳам қолмаган.

А л ь б е р

Нима?
Испаниядан Ремон юборган май-чи?

И в а н

Хаста темирчига кеча кечқурун
Элтиб берган эдим сўнгги шишасин.

А л ь б е р

Ҳа, эсимда, шундай... Бўлмаса сув бер.
Бадбаҳт тирикчилик! Йўқ, йўқ, гап битта:
Герцогга бораман истаб адолат.
Менга, ертўлада оламга келган
Бир каламуш эмас, балки, фарзанд деб –
Қарашга отамни мажбур қилсинлар.

II САХНА

Eртұла

Б а р о н

Маккор фоҳишанинг домига тушган,
 Ё бир ахмоқ хотин алдаган йигит –
 Висол оқшомини қай хилда кутса,
 Мен ҳам худди шундай кутдим кун бўйи
 Сирли ертўламга, бу жозибадор
 Сандиқлар ёнига тушиш пайтимни.
 Қандай баҳтиёр кун! Мен букун яна
 Жамғарган бир сиким олтин-пулимни
 Олтинчи сандиққа соламан. Тўғри, –
 Кўп эмас (сандиқ ҳам тўлмаган ҳали),
 Аммо аста-секин ортар ҳазина.
 Ривоятда борки, бир замон бир шоҳ
 Узоқдан сиқимлаб тупроқ ташитиб,
 Ерида тикка тоғ барпо қилганмиш.
 Шу баланддан денгиз ва кемаларни,
 Яшил водийларни, оқ чодирларни
 Завқ билан қиларкан кунда томоша.
 Худди шундай мен ҳам бу ертўламга
 Ҳар куни келтириб бир сиким хирож
 Бир тоғ яратдимки, чўққиларидан
 Менга қарам бўлган дунё кўринур.
 Менга ким қарам-мас? Иблис сингари
 Жаҳонга ҳукмимни юргизоламан;
 Истасам, кўшклар барпо қиласман;
 Истасам, бу сўлим боғларим аро
 Базм-сафо қурад ҳур қизлари ҳам,
 Бож, совға қўтариб келар парилар,
 Эркин даҳо менга қул бўлар ҳатто,
 Адл-мурувват ҳам, бедор меҳнат ҳам
 Кутади тиз чўкиб эҳсонларимни.
 Ҳайт десам, қаршимда қонли жиноят
 Букилиб ҳукмимга қилас итоат,
 Товонимни ялар, ўқир кўзимда

Хукм-иродамнинг нишонасини,
Ҳамма менга қарам, мен-чи, ҳеч кимга;
Мен ҳамма тилақдан устунман, тинчман.
Мен ўз қудратимни биламан! – етар –
Мен учун шу басдир...

(Олтинларига қарайди)

Ўзи кўп эмас,
Аммо қанча заҳмат, қанча макр-ҳийла,
Қанча кўз ёшлар-у, қарғиш, ёлбориш –
Эвазига келган ҳар бир мисқоли!
Мана бу қадимий олтин тангани
Бугун бир бевадан ундиридим. Аммо,
Уч боласи билан аввал тиз чўкиб
Деразам ёнида ёлборди кампир.
Дам тўхтаб, дам яна саваларди дўл,
Аммо маккор хотин жилмас ўрнидан.
Ҳайдамоқчи эдим сал бўлса. Лекин, –
Недир шивирлади қулогимга: “Қўй,
У сенга келтириши эрининг қарзин,
Эртага зинданга тушишдан кўркар”.
Мана бунисини-чи? Тибо келтирди.
Қайдан олган буни мугамбир, ялков?
Ўғирлаб келтирган албатта, ёхуд –
Тунда ўрмон йўлин тўсган, талаган...
Бу олтинлар учун тўкилган қон, ёш
Бирдан ер остидан сапчиса борми?
Тўфон босар эди, тўфон! Мен шунда
Азиз ертўламда ўлардим бўкиб.
Лекин, бас!

(Сандиқни очмоқчи)

Ҳар сафар сандиқларимга
Яқинлашарканман, титрар вужудим.
Бу кўркувдан эмас. (Йўқ! Недан кўркай,
Ёнимдаги содиқ пўлат шамширим –
Олтиним соқчиси) лекин қандайдир...
Қандайдир бир шарпа эзар кўнглимни...

Ҳакимлар дейдики, баъзи одамлар
Бирорни қатл этиб топар эмиш завқ.
Калид соларканман сандиқ қулфига,
Бирорга тиф санчган қотилдай мен ҳам
Ажид ҳис туяман: завқли ва қўрқинч.

(Сандиқни очмоқчи)

Мана менинг мулким, роҳати жоним.

(Тангаларни тўқади)

Дам олинг! Бас энди жаҳонгашталик.
Кўпларнинг ҳирсини қондиргандирсиз.
Аршу аълодаги тангрилар каби
Тинч ухланг, аллаалаб қудратингизни.
Катта базм қурмоқ истайман бугун:
Ҳар сандиқ устига ёқмоқчиман шам;
Қопқоқларин очай, турай ўртада,
Олтин шуъласига қонсин кўзларим.

*(Сандиқларини бир-бир очиб, ҳар қайсининг
устига шам ёқади)*

Шаҳаншоҳман!.. Қандай фусункор шуъла!
Менинг ҳукмимдадир бу қудратли мулк.
Шунда менинг баҳтим, шоним, шуҳратим!
Шаҳаншоҳман... Ҳайҳот, мендан кейин-чи?
Кимга мерос қолар мулким? Ўғлимга!
Саёқ норасида, исрофгар, тентак,
Ишратпарастларнинг бебош ҳамрохи!
Ўша! Ўша тушар жон берар чоғим
Бу жимжит ва тилсиз равоқ тагига.
Бу ерга у билан келар бир гала
Муттаҳам ва оч кўз аслзодалар
Ва менинг мурдамдан калит ўғирлаб,
Қаҳ-қаҳ уриб очар сандикларимни.
Шунда олтинларим, менинг олтинларим
Атлас чўнтақларга оқар шилдираб.
Эзгу идишларим синдириб ташлар,
Ботқоққа оқизар оби-ҳаётни.

Талон-торож қилар... Қандай ҳаққи бор?
Бекорга келганми менга бу давлат?
Ё гарткам дея пулга чанг солган
Қиморвоз омади билан келган мулк?
Ким билар, қанча вақт шу олтинни деб
Оғир алам билан тийдим нафсимни,
Орзулардан кечдим, ўй сурдим чексиз,
Тунлар ухламадим, тинмадим кундуз;
Қалбинг мөгор босган! – дер ўғлим, балки,
Балки дер, орзу ва ҳавас сенга ёт,
Виждон азобини билмайсан, дер. Йўқ!
Виждон ваҳший ҳайвон, тирноги билан
Қалбни тимдалайди, қўпол, беомон,
Виждон – юзсиз меҳмон, беор суҳбатдош.
Ойни сўндирувчи, гир титратгучи,
Ўлик хуркитувчи ялмоғиз – виждон...
Азоб эвазига аввал мулкни топ,
Кейин кўр: қон тўкиб мол топган баҳтсиз
Исроф килармикан ўзинниг мулкин.
Қани энди шу ертўламни
Назари паастлардан асраб қололсам!
Қани энди, гўрдан чиқиб келсаму
Соқчи кўланкадай ўлтирасам шунда,
Худди ҳозиргидай сандиқ устида
Хазинам сақласам шу тириклардан.

III САХНА

Саройда

АЛЬБЕР, ГЕРЦОГ

А л ь б е р

Мен узоқ чидадим, шоҳим, ишонинг,
Ёвуз мухтожликнинг уятларига!
Қоқ суякка бориб етмаса пичок
Келармидим сизга бундай арз билан.

Г е р ц о г

Ишондим, ишондим: мўътабар рицар,
Қоқ суякка бориб етмаса пичок,
Отадан ранжимас сиздайин ўғил,
Мен отангиз билан гаплашай танҳо,
Шов-шувсиз. Сиз асло бўлманг безовта.
Кўпдан кўрганим йўқ. Бугун келмоқчи.
У менинг бобомга дўст эди бир вақт.
Хотиримда, ҳали бола эканман,
Отига миндириб баъзан, бошимга –
Оғир шлемини кийгазарди.

(Деразага қараб)

Ким?
Отангиз шекилли.

А л ь б е р

Ҳа, шоҳим, ўша.

Г е р ц о г

Нариги хонага ўтинг. Мен ўзим
Чақиравман.

(Альбер нариги хонага ўтади. Барон киради)

Сизни соғ ва саломат
Хузуримда кўриб кўп шодман, барон.

Б а р о н

Бахтлиман, хукмдор, – амрингиз билан
Хозир бўла олдим хузурингизда.

Г е р ц о г

Дийдор кўришмадик анчадан буён,
Мени эслайсизми?

Б а р о н

Албатта, шоҳим!
Худди ҳозиргидай кўз ўнгимдасиз,
Ҳе-ҳе, жуда ҳам шўх бола эдингиз.
– Филипп, – дерди баъзан раҳматлик герцог
(*У мени Филипп деб атарди доим*), –
Йигирма йилдан сўнг балки сен ва мен
Бу бола кархисида бўлармиз тентак...
Сизнинг қаршингизда, яъни...

Г е р ц о г

Энди биз
Яна тиклагаймиз ошноликни.
Аммо сиз саройга келмай кўйдингиз.

Б а р о н

Қариб қолдим, шоҳим, саройда, ахир,
Нима ҳам қилардим. Мана сиз ёшлар
Турнирда, байрамда очасиз кўнгил.
Мен-чи бу ишларга энди заифман.
Худо амри билан жанг бўла қолса,
Отлангайман дарҳол кекса бўлсан ҳам.
Қилич ялангочлаб титроқ қўлларим,
Сиз учун жангларда топажак кудрат.

Г е р ц о г

Барон, бизга аён содиқлигингиз;
Бобомнинг дўстисиз, раҳматли отам
Сизни хурматларди. Мен ўзим эса
Содик мард рицар деб биламан. Қани,
Ўтирайлик, барон. Болангиз борми?

Б а р о н

Ўғлим бор.

Г е р ц о г

Саройга нечун келмайди?
Хўп, сиз учун бу ер кўнгилсиз. У-чи?
Саройга муносиб ёши, мансаби.

Б а р о н

Суронлик ҳаётни севмайди ўғлим;
Таъби ёввойироқ, маҳзун ва ўйчан.
Кўргон атрофига, ўрмонда ёлғиз
Кийик атрофига, ўрмонда ёлғиз
Кийик боласидан кезар.

Г е р ц о г

Яхшимас.
Ёввойилашмасин. Келсин саройга,
Шодлик-базмларга ўргансин бироз.
Ҳузуримга келсин. Мансабига боп
Маблағ тайин қилинг, ўғлингиз ахир...
Рангингиз ўчдими? Балки йўл юриб
Чарчаб қолгандирсиз?

Б а р о н

Йўқ, хукмдор, йўқ;
Бироқ ҳозир мени уялтирдингиз,
Ўғлим тўғрисида айтгим йўқ эди,

Энди икрор бўлмай йўқдир иложим:
Шоҳим, минг афсуски, у эҳсонга ҳам
Қадри-химматга ҳам муносиб эмас.
У ёшлик йилларини зойи қилмоқда,
Номаъқул ножўя...

Г е р ц о г

Чунки у ёлғиз.
Ёлғизлик ёшларни ҳалок қилади.
Бизга йўлланг уни: узлатдан чиқса,
Ножўя хулкларни унутар.

Б а р о н

Шоҳим,
Мен бунга розилик бермайман, узр...

Г е р ц о г

Нега, ахир?

Б а р о н

Чолга беринг ихтиёр...

Г е р ц о г

Сабабини айтинг – талаб қиласман.

Б а р о н

Хафаман ўғлимдан, шоҳим.

Г е р ц о г

Нимага?

Б а р о н

Ёвуз бир жиноят юз берган.

Г е р ц о г

Айтинг –
Нима экан ўзи?

Б а р о н

Сўраманг, шоҳим...

Г е р ц о г

Ажаб, ё номусга қўйдими сизни?

Б а р о н

У... Мени бир кун ўлдирмоқчи бўлди.

Г е р ц о г

Ўлдирмоқчи бўлди? Ундан бўлса мен
У ёвузни дарров жазога тортай.

Б а р о н

Мен даъво қилмайман, гарчи аёнки,
Менинг ўлимимни тўрткўзлаб кутар.
Гарчи у мулкимга қасд қилмоқда...

Г е р ц о г

А?
(Альбер нариги хонадан отилиб чиқади)

А л ь б е р

Ёлғон гапирдингиз, барон.

Г е р ц о г (*ўғилга*)

Сиз қандай...
Қандай ботиндингиз?

Барон

Шу ердамисан!
Сен... қандай ботиндинг! Сен ўз отангга
Қандай журъат билан айтдинг бу сўзни?..
Ҳам бизнинг ҳукмдор ҳузурида-я!..
Ёлғон эмиш! Мен... мен... ёки энди мен
Рицарь эмасмиман?

Альбер

Сиз ёлғончисиз.

Барон

Нега ер ёрилмас, ё парвардигор!
Ол, мана, ҳақ ҳукм чиқарсин ханжар!

(Кўлқопини ташлади, ўғли уни дарҳол ердан олди)¹

Альбер

Рахмат. Бу – отадан биринчи инъом.

Герцог

Бу қандай манзара? Ўнгимми? Ўғил –
Кекса отасига ханжар ўқталар!
Не балолик кунда кийган эканман
Герцоглик тожини! Бас, э тентак чол,
Бас қил дейман сен ҳам шервачча.

(Ўғилга)

Ташла.

Қани қўлқопни ҳам менга бер.

(Тортуб олади)

¹ Рицарлар расмида қўлқопни ерга ташлаш – яккама-якка қиличбозлишка чақиришни англатади.

А л ь б е р (*четга*)

Афсус.

Г е р ц о г

Дарров чанг солди-я, кўлқопга! – аблаҳ!
Йўқолинг: то ўзим чақирмагунча
Кўзимга кўринманг.
(*Альбер кетади*)
Сиз-чи, бадбаҳт чол.
Уялмадингизми...

Б а р о н

Авф этинг, шохим...
Дармоним қолмади... Бўғинларимда
Қувват йўқ... Бўғилдим!.. Бўғилдим!..
Қани,
Қани, калидларим? Калидлар...

Г е р ц о г

Ўлди.
Ё раб! Мудхиш замон, мудхиш юраклар!



МУНДАРИЖА

Рус адабиётининг қуёши 3

Мархум Иван Петрович Белкин қиссалари

Ноширдан (<i>Рустам Комилов таржимаси</i>)	10
Ўқ (<i>Миртемир таржимаси</i>)	14
Бўрон (<i>Миртемир таржимаси</i>)	25
Тобутсоз (<i>Уйгун таржимаси</i>)	37
Бекат назоратчиси (<i>Иzzат Султон таржимаси</i>)	44
Қишлоқи ойимқиз (<i>Миртемир таржимаси</i>)	56
Дубровский (<i>Маъруф Ҳаким таржимаси</i>)	73
Қора хотин (<i>Анвар Шер таржимаси</i>)	142

Роман

Капитан қизи (*Абдулла Қаҳҳор таржимаси*) 167

Кичик драмалар

Сув париси (<i>Ҳамид Олимжон таржимаси</i>)	263
Қизғанчик рицаръ (<i>Асқад Мухтор таржимаси</i>)	290

Адабий-бадиий нашр

«Жаҳон адабиёти» қутубхонаси

Александр Сергеевич Пушкин

СУВ ПАРИСИ

Мухаррир *И. Аҳмедов*

Рассом *Б. Зуфаров*

Бадиий мухаррир *Р. Зуфаров*

Техник мухаррир *Д. Габдрахманова*

Мусахих *Ш. Орипова*

Компьютерда саҳифаловчи *Л. Абкеримова*

Нашриёт лицензияси АI №158, 14.08.09.

Босишга руҳсат этилди 11.01.2013.

Офсет қозози. Бичими $60 \times 90^{1/16}$. «Times» гарнитурасида офсет
усулида босилди. Шартли босма табоғи 19,50. Нашр табоғи 19,28.
Адади 3000 нусха. Буюртма № 12-199.

Ўзбекистон Матбуот ва ахборот агентлигининг
«O'zbekiston» нашриёт-матбаа ижодий уйи.
100129, Тошкент, Навоий кўчаси, 30

Телефон: (371) 244-87-55, 244-87-20

Факс: (371) 244-37-81, 244-38-10.

e-mail: uzbekistan@iptd-uzbekistan.uz

www.iptd-uzbekistan.uz

Пушкин, Александр Сергеевич.

П 96 Сув париси: насрый асарлар ва драмалар /А.С. Пушкин; тузувчи, нашрга тайёрловчи ва сўз боши муаллифи А. Шер. – Тошкент: O‘zbekiston, 2012. – 312 б. («Жаҳон адабиёти» кутубхонаси)

1. Шер, Анвар /тузувчи/

ISBN 978-9943-01-815-0

«Рус шеъриятининг куёши» деб ном олган Александр Сергеевич Пушкин насрда ҳам, назмда ҳам самарали ижод қилган буюк сиймодир. У янги рус адабиётининг асосчиларидан бири сифатида рус маданияти тарихига кирди. Пушкин ўзининг йўл хотирапари ва бадиҳалари, тарихий роман ва киссалари билан насрчилик жанрига асос солди. Унинг ижоди рус драмаси ва театри тараққиётида ҳам муҳим роль ўйнади. Мазкур китобдан унинг киссалари, «Капитан кизи» романи ва кичик драматик асарлари ўрин олган.

**УДК: 821.161.1(092) Пушкин
ББК 84(2Рос=Рус)1**